



2026/1738

24.7.2026

RIALACHÁN (AE) 2026/1738 Ó PHARLAIMINT NA hEORPA AGUS ÓN gCOMHAIRLE

an 8 Iúil 2026

maidir le ceanglais chiorclaíochta le haghaidh dearadh feithiclí agus maidir le bainistiú feithiclí a bhfuil a ré caite, lena leasaítear Rialacháin (AE) Uimh. 168/2013, (AE) 2018/858, (AE) 2019/1020 agus (AE) 2023/1542 agus lena n-aisghairtear Treoracha 2000/53/CE agus 2005/64/CE

(Téacs atá ábhartha maidir le LEE)

TÁ PARLAIMINT NA hEORPA AGUS COMHAIRLE AN AONTAIS EORPAIGH,

Ag féachaint don Chonradh ar Fheidhmiú an Aontais Eorpaigh, agus go háirithe Airteagal 114 agus Airteagal 192(1) de i ndáil le hAirteagail 14 go 36 den Rialachán seo,

Ag féachaint don togra ón gCoimisiún Eorpach,

Tar éis dóibh an dréachtghníomh reachtach a chur chuig na parlaimintí náisiúnta,

Ag féachaint don tuairim ó Choiste Eacnamaíoch agus Sóisialta na hEorpa ⁽¹⁾,

Tar éis dóibh dul i gcomhairle le Coiste na Réigiún,

Ag gníomhú dóibh i gcomhréir leis an ngnáthnós imeachta reachtach ⁽²⁾,

De bharr an mhéid seo a leanas:

- (1) Leagtar amach sa teachtaireacht ón gCoimisiún an 11 Nollaig 2019 dar teideal *the European Green Deal* [An Comhaontú Glas don Eoraip] straitéis nua fáis na hEorpa arb é is aidhm di sochaí chothrom rathúil a dhéanamh den Aontas, ina mbeidh geilleagar nua-aimseartha iomaíoch, atá tíosach ó thaobh acmhainní de, áit nach mbeidh aon ghlanastaíocht gás ceaptha teasa ann faoi 2050 ar a dhéanaí agus ina mbeidh an fás eacnamaíoch díchúpláilte feasta ó úsáid acmhainní. Chun gur féidir le beartaí táirge an Aontais cur le hastaíochtaí carbóin a ísliú ar an leibhéal domhanda, ní mór a áirithiú go ndéantar táirgí a mhargaítear agus a dhíoltar san Aontas a fhoinsiú, a mhonarú agus a chóireáil nuair a bheidh siad a bhfuil a ré caite ar shlí inbhuanaithe.

⁽¹⁾ IO C, C/2024/1593, 5.3.2024, ELI: <http://data.europa.eu/eli/C/2024/1593/oj>.

⁽²⁾ Seasamh Parlaimint na hEorpa an 18 Meitheamh 2026 (nár foilsíodh fós san Iris Oifigiúil) agus cinneadh ón gComhairle an 29 Meitheamh 2026.

- (2) Is rannchuiditheoir tábhachtach í an earnáil mótarfeithiclí le húsáid na n-acmhainní fuinnimh agus ábhair ag an Aontas, agus le giniúint gás ceaptha teasa dá réir. Cuireann táirgeadh na bhfeithiclí i dtríú tíortha a chuirtear ar mhargadh an Aontais, le gás ceaptha teasa dhomhanda a ghiniúint, rud ag a mbíonn tionchar comhshaoil diúltach ar an Aontas. Tá aistriú ó úsáid na mbreoslaí iontaise i bhfeithiclí go dtí an tsoghluaisteacht astaíochtaí nialasacha, dá bhforáiltear sa phacáiste 'Oiriúnach do 55' ar cheann de na réamhriachtanais chun an sprioc aeráidneodrachta a bhaint amach faoi 2050. Laghdóidh an t-aistriú sin na hastaíochtaí gás ceaptha teasa ón earnáil mótarfeithiclí atá nasctha le céim úsáide na bhfeithiclí. Tá an earnáil mótarfeithiclí ar cheann de na húsáideoirí alúmanaim, cruach agus plaisteach príomhúil is mó dá bhfuil ann, atá nasctha le monarú na bhfeithiclí nua a chuirtear ar mhargadh an Aontais. Is féidir tionchar comhshaoil suntasach a bheith i gceist leis sin, atá nasctha leis an bhfuinneamh is gá chun na hábhair sin a eastóscadh agus a phróiseáil. D'fhéadfadh an lorg comhshaoil atá nasctha le monarú na bhfeithiclí nua dul i méid le leictirí leanúnach an fhlí, leis an bhfás leanúnach ar mhéid agus ar mheáchan na bhfeithiclí, agus i ngeall ar úsáid níos forleithne as leictreonaic i gcineálacha feithicle amach anseo agus ar chastacht na leictreonaice sin, ar gá le haghaidh an dá cheann sin méid nach beag d'amhábhair chriticiúla agus straitéiseacha agus de mhíotail lómhara, amhail copar agus dúile tearc-chré. Is é toradh na n-athruithe sin go bhféadfadh lorg comhshaoil níos mó a bheith ag an gcéim táirgthe ná céim úsáide feithiclí, agus go bhféadfadh tionscal na hEorpa a bheith ag brath níos mó agus níos mó ar allmhairí amhábhair criticiúil agus a bheith soghonta do shuaitheadh soláthair, chun dochar dá iomaíochas. Ina theannta sin, as na ceanglais atá i bhfeidhm faoi láthair i ndlí an Aontais maidir leis an mbainistiú dramhaíola, eascraíonn aisghabháil fho-optamach acmhainní as feithiclí a bhfuil a ré caite, agus tá an-acmhainneacht ann méadú a dhéanamh ar chainníocht agus ar cháilíocht na bpáirteanna, na gcomhpháirteanna agus na n-ábhar atá le deisiú, le hathúsáid, le hathmhonarú, le hathchóiriú, le hiarfheistiú nó le hathchúrsáil ó feithiclí le linn na céime úsáide agus ó feithiclí a bhfuil a ré caite. Chun aghaidh a thabhairt ar na tionchair sin ar an gcomhshaoil agus chun rannchuidiú le dícharbónú na hearnála, agus chun tacú leis an iomaíochas trí athléimneacht thionscal na ngluaisteán a mhéadú, is gá feabhas a chur ar fheidhmiú an mhargaidh aonair agus aistriú na hearnála mótarfeithiclí chuig gilleagar ciorclach a fheabhsú. Tá sé sin i gcomhréir le teachtaireacht ón gCoimisiún an 11 Márta 2020 maidir le Plean Gníomhaíochta Nua don Gilleagar Ciorclach – Chun Eoraip níos glaine agus níos iomaíche a bhaint amach lena iarradh athbhreithniú ar na rialacha atá i bhfeidhm faoi láthair chun samhlacha gnó níos ciorclaí a chur chun cinn trí shaincheisteanna dearaidh a nascadh leis an gcóireáil a bhfuil a ré caite, rialacha maidir le cion athchúrsáilte sainordaitheach a mheas le haghaidh ábhair áirithe, agus feabhas a chur ar an éifeachtúlacht athchúrsála. Tá sé sin i gcomhréir freisin le Rialachán (AE) 2024/1252 ó Pharlaimint na hEorpa agus ón gComhairle⁽³⁾. Chuir an Chomhairle agus Parlaimint na hEorpa i dtábhacht an gá le rialacha nua chomh maith ón Aontas maidir leis na hábhair sin, le hathsholáthar na rialacha reatha maidir le feithiclí a chineálcheadú ó thaobh a n-in-athúsáidteachta, a n-in-athchúrsáilteachta agus a n-in-aisghabháltachta de agus maidir le feithiclí a bhfuil a ré caite.

- (3) Le Treoir 2000/53/CE ó Pharlaimint na hEorpa agus ón gComhairle⁽⁴⁾, cuirtear ar bun ceanglais chóireála chomhchuibhithe i gcás feithiclí a bhfuil a ré caite agus spriocanna i gcás athúsáid agus athchúrsáil feithiclí chomh maith le hathúsáid agus aisghabháil feithiclí. Bunaítear oibleagáidí léi maidir le bailiú na bhfeithiclí a bhfuil a ré caite, mar aon le hoibleagáidí le haghaidh oibreoirí eacnamaíocha, agus úsáid na míotail trom i bhfeithiclí á srianadh go háirithe. Cruthaítear léi bunrialacha freisin maidir le freagracht leathnaithe táirgeora, lena gceanglaítear ar tháirgeoirí feithiclí cuid de na costais a chumhdach i dtaca le bailiú na bhfeithiclí a bhfuil a ré caite.

- (4) Cuireadh i dtábhacht sa mheastóireacht ón gCoimisiún ar Threoir 2000/53/CE go raibh an Treoir éifeachtach ó thaobh roinnt mhaith dá cuspóirí tosaigh a bhaint amach, go háirithe deireadh a chur le caidmiam, luaidhe, mearcair agus cróimiam heicsifhiúsach i bhfeithiclí, méadú ar phointí bailiúcháin le haghaidh feithiclí a bhfuil a ré caite agus na spriocanna aisghabhála agus athchúrsála a ghnóthú. Fuarthas sa mheastóireacht, áfach, nár tugadh aghaidh go leordhóthanach leis an Treoir sin ar shaincheisteanna tábhachtacha atá nasctha le bailiú na bhfeithiclí a bhfuil a ré caite agus nach raibh an Treoir sin oiriúnaithe a thuilleadh chun ardcháilíocht chóireála na bhfeithiclí sin a áirithiú.

⁽³⁾ Rialachán (AE) 2024/1252 ó Pharlaimint na hEorpa agus ón gComhairle an 11 Aibreán 2024 lena mbunaítear creat chun soláthar slán inbhuanaithe amhábhair criticiúil a áirithiú agus lena leasaítear Rialacháin (AE) Uimh. 168/2013, (AE) 2018/858, (AE) 2018/1724 agus (AE) 2019/1020 (IO L, 2024/1252, 3.5.2024, ELI: <http://data.europa.eu/eli/reg/2024/1252/oj>).

⁽⁴⁾ Treoir 2000/53/CE ó Pharlaimint na hEorpa agus ón gComhairle an 18 Meán Fómhair 2000 maidir le feithiclí a bhfuil a ré caite (IO L 269, 21.10.2000, lch. 34, ELI: <http://data.europa.eu/eli/dir/2000/53/oj>).

- (5) Le Treoir 2005/64/CE ó Pharlaimint na hEorpa agus ón gComhairle, ⁽⁵⁾ rialáiltear cineálcheadú na bhfeithiclí i dtaca lena n-ath-inúsáidteacht, lena n-athchúrsáilteacht agus lena n-in-aisghabháltacht, chun go bhféadfadh na feithiclí sin na spriocanna a bhunaítear i dTreoir 2000/53/CE a chomhlíonadh nuair a bheidh siad a bhfuil a ré caite. Mar sin féin, ní raibh Treoir 2005/64/CE éifeachtach maidir le feabhas a chur ar in-athúsáidteacht, in-athchúrsáilteacht ná in-aisghabháltacht na bhfeithiclí nua agus níl sí oiriúnaithe do thréithe feithiclí nua, a bhfuil athrú nach beag tagtha orthu ó tháinig Treoir 2005/64/CE i bhfeidhm.
- (6) Le Rialachán (AE) 2018/858 ó Pharlaimint na hEorpa agus ón gComhairle ⁽⁶⁾, tugadh isteach córas cuimsitheach cineálcheadaithe agus faireachas margaidh ar mhótarfeithiclí, leantóirí, agus ar chórais, comhpháirteanna agus aonaid theicniúla ar leithligh atá ceaptha le haghaidh na bhfeithiclí sin, d'fhonn feidhmiú ceart an mhargaidh aonair a áirithiú agus chun ardleibhéal feidhmíochta comhshaoil a thairiscint. Tá gá le gníomh rialála ar leithligh chun críocha nós imeachta cineálcheadaithe an Aontais a leagtar síos in Iarscríbhinn II a ghabhann leis an Rialachán sin. Is gá, mar sin, forálacha agus ceanglais a leagan síos maidir le ciorclaíocht na bhfeithiclí atá i mbun cineálcheadú an Aontais a fháil. Chun a áirithiú go gcomhlíonfaidh feithiclí na ceanglais sin, is gá a bhforú i bpróiseas cineálcheadaithe an Aontais a áirithiú. Forálacha riaracháin Rialachán (AE) 2018/858, lena n-áirítear na forálacha maidir leis an bhfaireachas margaidh, bearta ceartaitheacha, clásail choimirce, agus pionóis, tá feidhm acu maidir le cineálcheaduithe a eisítear i gcomhréir le ceanglais an Rialacháin seo.
- (7) Tá sé tábhachtach idirdhealú a dhéanamh idir cineálcheaduithe reatha agus cineálcheaduithe nua. Mar sin, is gá a shoiléiriú cé na forálacha a bhfuil feidhm acu maidir le cineálacha nua feithiclí faoi Rialachán (AE) 2018/858. Mar sin, ba cheart a shoiléiriú nach n-éilíonn leasuithe ar an gcineálcheadú síneadh ar chineálcheadú faoin Rialachán sin go córasach.
- (8) Chun feabhas a chur ar fheidhmiú an mhargaidh aonair, agus ardleibhéal cosanta comhshaoil á áirithiú an tráth céanna, tá sé fíor-riachtanach na coinníollacha maidir le cineálcheadú na bhfeithiclí a chomhchuihbhiú a mhéid a bhaineann lena n-in-athúsáidteacht, lena n-in-athchúrsáilteacht agus lena n-in-aisghabháltacht, céim táirgthe feithiclí, measúnú stádaí na feithicle agus onnmhairiú feithiclí athláimhe. Chun cur leis na cuspóirí chun cáilíocht an chomhshaoil a chaomhnú, a chosaint agus a fheabhsú, sláinte an duine a chosaint, agus úsáid stuama agus réasúnach acmhainní nádúrtha, tá sé fíor-riachtanach rialacha a leagan síos maidir le bainistiú feithiclí a bhfuil a ré caite, agus dearadh na feithicle á chur i gcuntas, chomh maith le bearta arb é is aidhm dóibh díchoimeáil neamhdhleathach a chosc amháin inrianaitheacht níos fearr i gcás aistriú úinéireachta feithiclí athláimhe. Is é an bealach is éifeachtúla chun aistriú na hearnála mótarfeithiclí chuig geilleagar ciorclach a éascú dá bhrí sin creat rialála aonfhoirmeach a bhunú ar leibhéal an Aontais, lena gcumhdófar ar bhealach comhsheasmhach agus comhtháite dearadh, monarú, cur ar an margadh san Aontas agus cóireáil na bhfeithiclí a bhfuil a ré caite. Tá sé sin fíor-riachtanach freisin chun margadh an Aontais a fhorbairt le haghaidh amhábhair thánaisteacha a áirítear i bhfeithiclí nua a chuirtear ar an margadh, mar aon le bacainní roimh an trádáil agus saofaí iomaíochta a sheachaint, an tsoiléireacht dhlíthiúil a áirithiú agus feabhas a chur ar fheidhmíochtaí comhshaoil na n-oibreoirí eacnamaíocha uile atá rannpháirteach i ndearadh, táirgeadh agus cóireáil na bhfeithiclí a bhfuil a ré caite. Chun na cuspóirí sin a bhaint amach, ba cheart Rialachán a chur in ionad Treoracha 2000/53/CE agus 2005/64/CE, bunaithe ar Airteagal 114 agus Airteagal 192(1) den Chonradh ar Fheidhmiú an Aontais Eorpaigh (CFAE).
- (9) Sna réigiúin is forimeallaí dá dtagraítear in Airteagal 349 CFAE, ba cheart do na Ballstáit a bheith in ann oibleagáidí táirgeoirí a oiriúnu chun seirbhís a ráthú agus na costais a bhaineann le bainistiú a dhéanamh ar fheithiclí a bhfuil a ré caite a chumhdach ag féachaint do shaintréithe na réigiún sin.

⁽⁵⁾ Treoir 2005/64/CE ó Pharlaimint na hEorpa agus ón gComhairle an 26 Deireadh Fómhair 2005 maidir le cineálcheadú mótarfeithiclí maidir lena n-in-athúsáidteacht, lena n-in-athchúrsáilteacht agus lena n-in-aisghabháltacht agus lena leasaítear Treoir 70/156/CEE ón gComhairle (IO L 310, 25.11.2005, lch. 10 ELI: <http://data.europa.eu/eli/dir/2005/64/oj>).

⁽⁶⁾ Rialachán (AE) 2018/858 ó Pharlaimint na hEorpa agus ón gComhairle an 30 Bealtaine 2018 maidir le ceadú mótarfeithiclí agus a leantóirí, agus córas, comhpháirteanna agus aonad teicniúil ar leithligh atá ceaptha le haghaidh feithiclí den sórt sin, agus faireachas margaidh orthu, lena leasaítear Rialachán (CE) Uimh. 715/2007 agus (CE) Uimh. 595/2009 agus lena n-aisghairtear Treoir 2007/46/CE (IO L 151, 14.6.2018, lch. 1, ELI: <http://data.europa.eu/eli/reg/2018/858/oj>).

- (10) Ní bheidh feidhm ag Treoracha 2000/53/CE ná 2005/64/CE ach amháin maidir le feithiclí paisinéirí (M_1) agus feithiclí tráchtála éadroma (N_1), arb iad sin thart faoi 85 % de na feithiclí uile dá bhfuil cláraithe san Aontas. Ní bheidh na feithiclí eile, is é sin feithiclí dhá agus trí rotha, cuadrothair, leoraithe, busanna agus leantóirí, faoi réir aon reachtaíocht ón Aontas maidir lena n-éicidhearthóireacht ná maidir lena mbainistiú ina gcéim deireadh ré. Mar sin, chun creat ciorclach cuimsitheach a áirithiú le haghaidh na bhfeithiclí uile atá cláraithe san Aontas, lena n-áirítear iad a chóireáil ar shlí atá fóna ó thaobh an chomhshaoil, mar aon le hilroinnt an mhargaidh aonair a chosc, ba cheart feidhm a bheith ag an Rialachán seo ní hamháin maidir le feithiclí de chatagóirí M_1 agus N_1 , ach, go páirteach, maidir le feithiclí áirithe de chatagóir L, feithiclí tromshaothair agus a leantóirí (M_2 , M_3 , N_2 , N_3 agus O). Tá easpa faisnéis chuimsitheach ann maidir le cóireáil na bhfeithiclí sin i ndeireadh a ré san Aontas, rud a chuireann cosc ar an gcóras céanna a chur i bhfeidhm orthu agus atá i bhfeidhm ar fheithiclí de chatagóir M_1 agus N_1 ar theacht i bhfeidhm an Rialacháin seo. Mar sin féin, ba cheart feidhm a bheith ag na ceanglais maidir le bailiú feithiclí a bhfuil a ré caite, seachadadh éigeantach na bhfeithiclí sin chun saoraidí cóireála údaraithe lena gcóireáil mar aon lena ndíthruailliú, baint shainordaitheach páirteanna agus comhpháirteanna áirithe lena n-athúsáid agus lena n-athchúrsáil roimh an mionghearradh agus na coinníollacha chun dramhaíl neamhthámh ó mhionghearradh a chur i líonadh talún, maidir le feithiclí de chatagóir L agus feithiclí tromshaothair agus a leantóirí (M_2 , M_3 , N_2 , N_3 agus O). Chun cóireáil na bhfeithiclí a bhfuil a ré caite sin a éascú, ba cheart a cheangal ar a monaróirí faisnéis a sholáthar faoi bhaint agus faoi athsholáthar na bpáirteanna, na gcomhpháirteanna agus na n-ábhar ó na feithiclí sin. Ina theannta sin, ba cheart feidhm a bheith ag na forálacha lena rialaítear an fhreagracht leathnaithe táirgeora maidir leis na catagóirí feithiclí sin, lena gcumhdaítear costais a mbailithe agus a ndíthruaillithe i ndeireadh a ré.
- (11) Ós rud é nach n-éilíonn gach Ballstát go gclárófaí feithiclí de chatagóirí L1e, L2e nó L6e, is gá an deis a thabhairt do na Ballstáit na catagóirí feithiclí sin a dhíolmhú ó cheanglais atá nasctha le clárú.
- (12) Ní le feithiclí paisinéirí (M_1) ná le feithiclí tráchtála éadroma (N_1) amháin a bhaineann fadhbanna le feithiclí athlámhe a onnmhairiú, ach mar a léiríonn staidéir, le feithiclí atá níos mó freisin. Mar sin, ba cheart feidhm a bheith ag na forálacha sin maidir le feithiclí tromshaothair agus lena leantóirí freisin (M_2 , M_3 , N_2 , N_3 agus O).
- (13) Ba cheart feithiclí a dheartar agus a dhéantar nó a oiriúnaítear lena n-úsáid ag na seirbhísí armtha amháin chomh maith le feithiclí a dheartar agus a dhéantar lena n-úsáid ag na seirbhísí armtha, ag an gcosaint shibhialta, ag seirbhísí dóiteáin, ag fórsaí atá freagrach as an ord poiblí a choinneáil ar bun agus ag seirbhísí éigeandála leighis a eisiáimh ó raon feidhme an Rialacháin seo. Freastalaíonn na feithiclí sin ar shainfheidhmeanna oibriochtúla agus tá siad faoi réir ceanglais theicniúla shonracha, agus tá difríocht shuntasach idir dearadh, déanamh agus úsáid na bhfeithiclí sin agus dearadh, déanamh agus úsáid feithiclí atá ceaptha le haghaidh iompar ginearálta de bhóthar. Níorbh iomchuí, dá bhrí sin, cur i bhfeidhm na gceanglas ciorclaíochta ginearálta maidir le dearadh feithiclí agus bainistiú na bhfeithiclí sin a bhfuil a ré caite agus tá a n-eisiáimh ó raon feidhme an Rialacháin seo comhsheasmhach le cineál sonrach a bhfeidhmeanna.
- (14) Chun oidhreacht chultúrtha na hEorpa a chaomhnú, ba cheart feithiclí ar díol spéise staire iad a eisiáimh ó raon feidhme an Rialacháin seo agus níor cheart iad a bheith faoi réir na n-oibleagáidí a bhaineann le haistriú nó onnmhairiú úinéireachta, ná faoi réir ceanglais deireadh ré. Sa tslí chéanna, ba cheart feithiclí a n-aithníonn Ballstát go bhfuil mórspéis chultúrtha ag baint leo a eisiáimh ó raon feidhme an Rialacháin seo. Is féidir leis seo feithiclí a chlúdach, mar shampla atá i seilbh bailitheoirí nó músaeim, feithiclí saincheaptha nó feithiclí rásaíochta, ar choinníoll go n-aithníonn na húdaráis inniúla go bhfuil mórspéis chultúrtha ag baint leo. Ba cheart feidhm a bheith ag ceanglais an Rialacháin seo, áfach, amhail ceanglais deartha ciorclaíochta, maidir leis na feithiclí sin sula meastar gur feithiclí ar díol spéise staire nó feithiclí mórspéise chultúrtha iad. Thairis sin, nuair nach measann na Ballstáit a thuilleadh gur feithiclí ar díol spéise staire nó feithiclí mórspéise chultúrtha iad na feithiclí sin, tagann siad faoi raon feidhme an Rialacháin seo agus ba cheart feidhm a bheith ag ceanglais amhail oibleagáidí a bhaineann le haistriú úinéireachta, onnmhairiú nó deireadh ré.
- (15) Chun ualach riaracháin iomarcach a sheachaint agus chun a áirithiú go gclúdaíonn raon feidhme an Rialacháin seo riachtanais an mhargaidh inmheánaigh, ba cheart go bhfanadh cineálacha eile feithiclí, amhail feithiclí de chatagóir L a tháirgtear i sraitheanna beaga nó timthriallta áirithe atá deartha chun troitheán a oibriú ar chatagóirí L1e-A agus L1e-B, lasmuigh de raon feidhme an Rialacháin seo.

- (16) Ceamtar feithiclí sainchuspóireacha chun feidhm shonrach a chomhlíonadh agus tá socrúithe cabhalra speisialta ag teastáil uathu nach bhfuil go hiomlán faoi rialú an mhonaróra. Bíonn ríomh na rátaí in-athúsáidteachta, in-athchúrsáilteachta agus in-aisghabháltachta níos casta mar gheall air sin. I gcás feithiclí sainchuspóireacha i gcatagóirí M_1 agus N_1 , ba cheart do tháirgeoirí costais bailithe, díthruaillithe agus bhaint shainordaitheach na bpáirteanna agus na gcomhpháirteanna agus a gcóiréil a chumhdach faoin scéim freagrachta leathnaithe táirgeora. I gcás feithiclí sainchuspóireacha de chatagóirí M_2 , M_3 , N_2 , N_3 agus O, níor cheart ach sraith theoranta rialacha a bheith i bhfeidhm. Ba cheart feidhm a bheith ag forálacha maidir le substaintí ar ábhar inní iad i bhfeithiclí maidir le feithiclí sainchuspóireacha de chatagóirí M_1 agus N_1 , mar atá faoi Threoir 2000/53/CE. Ba cheart páirteanna eile d'fheithicil shainchuspóireach a cineálcheadaíodh i gcineálcheadú ilchéimneach, a chumhdach sa mhéid chéanna agus catagóir na feithicle lena mbaineann. Níor cheart feithiclí sainchuspóireacha de gach catagóir seachas catagóir M_1 agus N_1 a tháirgeann monaróir ísealtáirgeachta a chumhdach faoin Rialachán seo.
- (17) Tá carbháin mhótair agus carbháin leantóra éagsúil ó ghnáthfheithiclí nó gnáthleantóirí, ós é an phríomhfheidhm atá acu cóiríocht seachas iompar. Tógtar na carbháin sin le comhpháirteanna neamhghluaisteán amhail adhmaid, troscán, córais uisce agus córais leictreacha tí, atá lasmuigh de raon feidhme saoráidí athchúrsála feithiclí. Socraítear go leor carbháin leantóra go buan mar thithe saoire, úsáidtear iad i gcomhair cóiríocht shéasúrach, agus fanann siad feidhmiúil ar feadh na mblianta. I bhfianaise a gcineáil shainchuspóirigh, a gcomhdhéanaimh ábhair shainiúil, agus a n-úsáide leanúnaí, ba cheart carbháin leantóra a eisiamh ó raon feidhme an Rialacháin seo. Níor cheart carbháin mhótair, a bhíonn neamhchláraithe go minic, a aicmiú mar fheithiclí a bhfuil a ré caite fad a leanann siad de bheith ag fónamh mar thithíocht. Tá páirteanna agus comhpháirteanna ina mbonnfheithiclí ag carbháin mhótair a úsáidtear freisin i bhfeithiclí eile agus, dá bhrí sin, ba cheart iad a bheith faoi réir na n-oibleagáidí céanna a luaitear nach n-úsáidtear chun críoch tithíochta iad a thuilleadh.
- (18) Baineann ceann de na dúshláin phraiticiúla is mó i dtaca le cur i bhfeidhm Threoir 2000/53/CE lena chinneadh cibé acu an bhfuil nó nach bhfuil feithicil ina feithicil a bhfuil a ré caite, go háirithe i gcásanna loingsithe feithiclí trasteorann. D'ainneoin treoir a bheith eisithe maidir leis an tsaincheist sin, baineann fadhbanna leis an measúnú sin fós. Is gá dá bhrí sin foráil a dhéanamh do chritéir bheachta atá ceangailteach ó thaobh an dlí de lena bhféadfadh feithicil a bhfuil a ré caite a chinneadh. Ba cheart do na húdaráis inniúla ábhartha uile, na hoibreoirí eacnamaíocha uile agus na húinéirí feithiclí uile, a dhéileáil le feithiclí a bhfuil a ré caite, na critéir sin a úsáid. Ina theannta sin, áfach, ní mór foráil a dhéanamh do dhíolúintí chun go mbeidh na Ballstáit fós in ann cásanna a chinneadh nár cheart a mheas go dtiocfadh feithiclí aonair faoi raon feidhme an Rialacháin seo mar gheall ar a stádas mar fheithicil mórspéise cultúrtha speisialta fad a choinníonn siad an stádas sin. Ina theannta sin, féadfaidh údaráis inniúla Ballstáit feithicil a dhíolmhú ó stádas na feithicle a bhfuil a ré caite nuair atá an fheithicil lena mbaineann faoi réir deisiú, ar iarraidh a fháil óna húinéir.
- (19) Leis an meastóireacht ar Threoir 2000/53/CE, cinneadh go raibh tionchar an-teoranta ag na forálacha sa Treoir sin maidir le dearadh feithiclí a bhí dírithe ar dhíchóimeáil na bhfeithiclí a éascú agus ar ghlacadh na n-ábhar athchúrsáilte, ar dhearadh agus ar mhonarú na bhfeithiclí nua, toisc nach raibh na forálacha sin sách mionsonrach, sonrach agus intomhaiste.

- (20) Chun aghaidh a thabhairt ar dhearadh na bhfeithiclí uile a chuirtear ar mhargadh an Aontais chomh maith lena gcéim deireadh ré, is gá ceanglais chiorclaíochta chomhchuibhithe a bhunú arna bhfíorú ag céim an chineálcheadaithe. Tá sé fíor-riachtanach feithiclí a dhearadh agus a mhonarú chun a áirithiú go bhfuil a bpáirteanna agus a gcomhpháirteanna in-athúsáidte, agus go bhfuil na hábhair atá iontu in-athchúrsáilte, chun a sheachaint nach féidir luach ceart a chur ar na páirteanna, na comhpháirteanna ná na hábhair sin nuair a bheidh ré feithicle caite. Mar sin, ba cheart do mhonaróirí agus dá soláthróirí straitéisí deartha a chomhtháthú a chuirfidh feabhas ar an in-athúsáidteacht agus ar an in-athchúrsáilteacht ag céim luath i bhforbairt feithiclí nua. Dá réir sin, ba cheart leanúint de chineálacha nua feithicle a dhéanamh ionas go mbeidh íosmhéid 85 % de réir maise díobh in-athúsáidte nó in-athchúrsáilte agus suas le híosmhéid 95 % de réir maise díobh in-athúsáidte nó in-aisghabhála, dá bhforáiltear cheana féin i dTreoir 2005/64/CE. Chun a áirithiú go ríomhfar na rátaí in-athúsáidteachta, in-athchúrsáilteachta agus in-aisghabháltachta ar shlí aonfhoirmeach agus gur féidir faireachán a dhéanamh air sin, ba cheart modheolaíocht nua a bhunú chun rátaí in-athúsáidteachta, in-athchúrsáilteachta agus in-aisghabháltachta feithicle a ríomh agus a fhíorú. Ba cheart léiriú níos fearr a dhéanamh leis an modheolaíocht sin ar acmhainneacht iarbhir feithicle nua a bheidh le hathchúrsáil, le hathúsáid agus le haisghabháil tráth a bheidh a ré caite, agus an dul chun cinn teicneolaíoch leanúnach á chur i gcuntas. Chun coinníollacha aonfhoirmeacha a áirithiú chun an Rialachán seo a chur chun feidhme, ba cheart cumhachtaí cur chun feidhme a thabhairt don Choimisiún chun an mhodheolaíocht sin a bhunú, agus caighdeán idirnáisiúnta ISO 22628:2002 á chur i gcuntas. Go dtí go mbunófar an mhodheolaíocht sin, ba cheart leanúint de na rátaí in-athúsáidteachta, in-athchúrsáilteachta agus in-aisghabháltachta a ríomh i gcomhréir le caighdeán idirnáisiúnta ISO 22628:2002, mar a dhéantar i dTreoir 2005/64/CE. Ba cheart don Choimisiún féachaint lena chinntiú go ndéanfar modheolaíocht ábhartha Coimisiún Eacnamaíochta na Náisiún Aontaithe don Eoraip (UNECE) a uasdátú dá réir sin, chun neamhréireachtaí le modheolaíocht an Aontais a sheachaint agus chun an t-ualach ar mhonaróirí a laghdú.
- (21) Tá líon mór soláthróirí i gceist le slabhra soláthair na mótarfeithiclí, lena n-áirítear go leor fiontair bheaga agus mheánmhéide (FBManna) a oibríonn i réigiúin éagsúla agus a bhfuil struchtúir eagraíochtúla éagsúla acu. Cé gur cheart do mhonaróirí faisnéis a bhailiú ar fud an tslabhra soláthair faoi na hábhair a úsáidtear i bhfeithiclí agus nósanna imeachta a bhunú agus a chur chun feidhme chun cruinneas na faisnéise sin a fhíorú, ba cheart dóibh acmhainneachtaí FBManna a chur i gcuntas. Is minic nach mbíonn ach acmhainní riaracháin teoranta ag FBManna, is minic a bhíonn níos lú uirlisí teicniúla acu agus, i gcásanna áirithe, is minic nach mbíonn aon chóras bunaithe acu chun sonraí mionsonraithe maidir leis an gcomhshaol nó maidir le comhdhéanamh ábhair a ghiniúint nó a fhíorú. Féadfaidh na srianta sin difear a dhéanamh d'infhaighteacht agus d'iomláine na faisnéise is féidir le FBManna a sholáthar. Dá réir sin, agus measúnú á dhéanamh ar nósanna imeachta na monaróirí chun faisnéis faoi sholáthróirí a bhailiú agus a fhíorú, ba cheart aird chuí a thabhairt ar chás sonrach FBManna sa slabhra soláthair.
- (22) Is colún bunúsach de gheilleagar mótarfeithiclí atá fíor-inbhuanaithe agus ciorclach é indeisitheacht feithiclí a áirithiú ar feadh a saolré. Níor cheart feithiclí a aicmiú roimh am mar fheithiclí a bhfuil a ré caite nuair a bheidh siad fós indeisithe, ó bheadh dramhaíl neamhriachtanach, neamhéifeachtúlachtaí eacnamaíocha, agus ualach míchuí ar úinéirí feithiclí mar thoradh air sin.
- (23) Ba cheart feithiclí a dhearadh agus a mhonarú ar shlí a gcuirfeadh teorainn le láithreach substaintí ar ábhar imní iad. I dteachtairacht an 14 Deireadh Fómhair 2020 uaidh dar teideal Chemicals Strategy for Sustainability – Towards a Toxic-Free Environment [Straitéis Ceimiceán um an Inbhuanaitheacht – I dTreo Timpeallacht Saor ó Thocsainí], shonraigh an Coimisiún go raibh substaintí ar ábhar imní iad le híoslghdú agus le hionadú a mhéid is féidir, agus go bhfuil deireadh le cur de réir a chéile leis na cinn is díobhálaí le haghaidh úsáid shochoaíoch neamhriachtanach, go háirithe i dtáirgí tomhaltais. Dá réir sin, ba cheart substaintí ar ábhar imní iad mar chomhábhair d'ábhair a úsáidtear i bhfeithiclí nó d'aon cheann de na páirteanna nó de na comhpháirteanna feithiclí a íoslghdú a mhéid is féidir chun a áirithiú nach mbíonn drochthionchar ag feithiclí, chomh maith le hábhair a athchúrsáiltear ó fheithiclí, ar an gcomhshaol ná ar shláinte an duine, ar feadh a saolré.

- (24) Le Treoir 2000/53/CE, cuirtear srian cheana féin ar úsáid luaidhe, caidmiam, mearcair agus cróimiam heicsifhiúsaigh i bhfeithiclí agus soláthraítear díolúintí, i gcás ina gceadaítear na substaintí sin a úsáid i bhfeidhmeanna áirithe. Ba cheart an Rialachán seo na rialacha reatha sin a ghlacadh chuige féin. Mar sin féin, chun comhleanúnachas na reachtaíochta maidir le ceimiceáin a áirithiú, ba cheart aghaidh a thabhairt ar shrianta maidir le cur ar an margadh agus úsáid substaintí eile i bhfeithiclí faoi Rialachán (CE) Uimh. 1907/2006 ó Pharlaimint na hEorpa agus ón gComhairle ⁽⁷⁾. Sa tslí chéanna, ba cheart srianta ar úsáid na substaintí a rialáiltear le Rialachán (AE) 2019/1021 ó Pharlaimint na hEorpa agus ón gComhairle ⁽⁸⁾ a urramú ar bhonn fhorálacha an Rialacháin sin.
- (25) Chun comhlíonadh an Rialacháin seo a éascú agus treoir a thabhairt ar shubstaintí ar ábhar inní iad a bheith i bhfeithiclí agus ina bpáirteanna agus ina gcomhpháirteanna, lena n-áirítear iad siúd a bhacann athúsáid agus athchúrsáil ábhar, nó a bhfuil éifeachtaí díobhálacha acu ar an tsláinte nó ar an gcomhshaol, is iomchuí don Choimisiún measúnú agus mapáil a dhéanamh ar na substaintí sin. Chuige sin, ba cheart don Choimisiún, le cúnamh ón nGníomhaireacht Eorpach Ceimiceán a bunaíodh faoi Rialachán (CE) Uimh. 1907/2006 ('an Gníomhaireacht'), tuarascáil a ullmhú ar shubstaintí ar ábhar inní iad a bheith i bhfeithiclí. Ba cheart a shainaithint sa tuarascáil sin a mhéid a bhacann na substaintí sin athúsáid agus athchúrsáil nó a mhéid a dhéanann siad dochar don tsláinte nó don chomhshaol, gan measúnuithe a cheanglaítear cheana féin faoi reachtaíocht eile an Aontais a dhúbláil. Ar bhonn a torthaí, ba cheart don Choimisiún bearta leantacha iomchuí a mheas agus a dhéanamh, lena n-áirítear, i gcás inarb ábhartha, gníomhartha tarmlichte a ghlacadh chun ceanglais faisnéise agus srianta a bhunú i gcás substaintí ar ábhar inní iad a mbíonn tionchar diúltach acu ar athúsáid agus athchúrsáil ábhar ar chúiseanna nach mbaineann go príomha le sábháilteacht cheimiceach.
- (26) Soláthraítear i dTreoir 2000/53/CE díolúintí ó na srianta ar úsáid luaidhe agus caidmiam i gceallraí a úsáidtear i bhfeithiclí, a nglacann an Rialachán seo chuige. Mar sin féin, déantar úsáid na substaintí i gceallraí a rialáil go cuimsitheach i Rialachán (AE) 2023/1542 ó Pharlaimint na hEorpa agus ón gComhairle ⁽⁹⁾. Dá bhrí sin, ba cheart aghaidh a thabhairt ar na substaintí sin sa Rialachán sin, agus ba cheart na srianta agus na díolúintí a bhaineann leo a aistriú le himeacht ama, de réir mar is iomchuí, chuig an Rialachán sin trí fhoráil leasaitheach a leagtar amach sa Rialachán seo.
- (27) Chun an dul chun cinn eolaíoch agus teicniúil a chur i gcuntas, ba cheart leanúint den chumhacht chun gníomhartha tarmlichte a ghlacadh i gcomhréir le hAirteagal 290 CFAE a tharmligeann chuig an gCoimisiún i leith leasú a dhéanamh ar dhíolúintí ó shrianta ar úsáid luaidhe, mearcair, caidmiam agus cróimiam heicsifhiúsaigh i bhfeithiclí faoin Rialachán seo. Roimh na díolúintí sin a mhodhnú nó a scriosadh, ba cheart tionchair shocheacnamaíocha an athraithe sin a mheasúnú, atá ar iarraidh i dTreoir 2000/53/CE, lena n-áirítear infhaighteacht na substaintí malartacha a mheas mar aon leis na tionchair ar an gcomhshaol agus ar shláinte an duine ar feadh shaoil na bhfeithiclí. Sula nglacfaidh sé gníomh tarmlichte den sórt sin, ba cheart don Choimisiún dul i gcomhairle le saineolaithe agus geallsealbhóirí ábhartha chun a áirithiú go gcuirfead tionchair shocheacnamaíocha níos leithne i gcuntas, mar aon leis na héifeachtaí ar an gcomhshaol agus ar shláinte an duine. Chun cinnteoireacht, comhordú agus bainistíocht éifeachtach a áirithiú i leith na ngnéithe teicniúla, eolaíocha agus riaracháin a bheidh i gceist leis an Rialachán seo a leasú maidir le srianta ar úsáid substaintí i bhfeithiclí, ba cheart don Gníomhaireacht cúnamh a thabhairt don Choimisiún sa mheasúnú sin.

⁽⁷⁾ Rialachán (CE) Uimh. 1907/2006 ó Pharlaimint na hEorpa agus ón gComhairle an 18 Nollaig 2006 maidir le Clárú, Meastóireacht, Údarú agus Srianadh Ceimiceán (REACH), lena mbunaítear Gníomhaireacht Eorpach Ceimiceán, lena leasaítear Treoir 1999/45/CE agus lena n-aisghairtear Rialachán (CEE) Uimh. 793/93 ón gComhairle agus Rialachán (CE) Uimh. 1488/94 ón gCoimisiún, chomh maith le Treoir 76/769/CEE ón gComhairle agus Treoracha 91/155/CEE, 93/67/CEE, 93/105/CE agus 2000/21/CE ón gCoimisiún (IO L 396, 30.12.2006, lch. 1, ELI: <http://data.europa.eu/eli/reg/2006/1907/oj>).

⁽⁸⁾ Rialachán (AE) 2019/1021 ó Pharlaimint na hEorpa agus ón gComhairle an 20 Meitheamh 2019 maidir le truaileáin orgánacha mharthanacha (IO L 169, 25.6.2019, lch. 45, ELI: <http://data.europa.eu/eli/reg/2019/1021/oj>).

⁽⁹⁾ Rialachán (AE) 2023/1542 ó Pharlaimint na hEorpa agus ón gComhairle an 12 Iúil 2023 maidir le ceallraí agus ceallraí dramhaíola, lena leasaítear Treoir 2008/98/CE agus Rialachán (AE) 2019/1020 agus lena n-aisghairtear Treoir 2006/66/CE (IO L 191, 28.7.2023, lch. 1, ELI: <http://data.europa.eu/eli/reg/2023/1542/oj>).

- (28) Chun an chiorclaíocht san earnáil mótarfheithiclí a mhéadú, ba cheart feithiclí a dhearadh agus a mhonarú de réir a chéile ar shlí a chuirfidh ábhair athchúrsáilte seachas amhábhair phríomhúla ina gcodanna díobh, agus feidhmíocht sábháilteachta feithiclí á coinneáil. Le húsáid ábhar athchúrsáilte, lamháiltear úsáid ábhar atá níos tíosaí ar acmhainní, déantar an táirgeadh a dhíchárbónú agus tionchair chomhshaoil dhiúltacha a bhaineann le húsáid na n-amhábhair príomhúil a laghdú. Cuirfidh ciorclaíocht mhéadaithe i gcás na bhfeithiclí a mhonaraítear i dtríú tíortha a chuirtear ar mhargadh an Aontais le hastaíochtaí gás ceaptha teasa a laghdú ar an leibhéal domhanda chomh maith, lena n-áirítear san Aontas. Neartaíonn sí uathriail straitéiseach agus iomaíochas an Aontais chomh maith trí spleáchais amhábhair agus fuinnimh atá nasctha le soláthar amhábhair príomhúil a laghdú, go háirithe trí chur le hamhábhair chriticiúla luachmhara a choinneáil laistigh den Aontas agus an margadh le haghaidh amhábhair thánaisteacha á threisiú ag an am céanna. Cé nach bhfuil aon cheanglas ann a bhaineann le húsáid an chion athchúrsáilte ar an leibhéal domhanda, tá ábhair athchúrsáilte ionchorpraithe ina bhfeithiclí ag roinnt mhaith monaróirí cheana féin. Ach spriocanna agus forálacha aonfhoirmeacha a leagan síos maidir leis an mbealach chun an cion athchúrsáilte a ríomh, soláthrófar deimhneacht dhlíthiúil agus rannchuideofar le hiomaíocht chothrom a chruthú idir monaróirí. Ba cheart go mbeidh feidhm ag na ceanglais maidir leis na monaróirí uile a bheartaíonn feithiclí a chur ar mhargadh an Aontais, lena n-áirítear trí mhargáí ar líne, gan beann ar an áit a bhfuil siad bunaithe. Agus tábhacht na slabhraí luacha domhanda san earnáil mótarfheithiclí á haithint, ba cheart a lamháil leis an Rialachán seo foinsiú amhábhair thánaisteacha ó lasmuigh den Aontas.
- (29) I bhfianaise ráta íseal na hathchúrsála le haghaidh plaisteach, go háirithe ó fheithiclí a bhfuil a ré caite, agus thionchair dhiúltacha fhoriomlána na bhfoirmeacha eile chun dramhaíl phlaisteach a chóireáil, is iomchuí glacadh na bplaisteach athchúrsáilte i bhfeithiclí a mhéadú. Chuige sin, ba cheart sprioc shainordaitheach i gcás plaistigh a athchúrsáiltear ó dhramhaíl iarthomhaltais a áireamh i bhfeithiclí nua. Dá réir sin, ba cheart plaisteach a athchúrsáiltear ó dhramhaíl phlaisteach iarthomhaltais a bheith i ngach cineál feithicle, agus na céatadáin ag ardú de réir a chéile. Ba cheart 20 % den sprioc sin den chion athchúrsáilte i gcás na bplaisteach sna cineálacha feithicle a bhaint amach trí phlaistigh a athchúrsáiltear ó fheithiclí a bhfuil a ré caite a chur san áireamh. Tá roghnú na bplaisteach a chlúdaítear faoi raon feidhme na spriocanna bunaithe ar na cineálacha in-athchúrsáilte plaisteach a shonraítear sa staidéar tiomnaithe ón Airmheán Comhpháirteach Taighde dar teideal *'Towards recycled plastic content targets in new passenger cars and light commercial vehicles – Technical proposals and analysis of impacts in the context of the review of the ELV Directive'* [I dtreo spriocanna cion plaisteach athchúrsáilte i ngluaisteáin nua paisinéirí agus i bhfeithiclí tráchtála éadroma – Tograí teicniúla agus anailís ar thionchair i gcomhthéacs an athbhreithnithe ar Threoir FRC] agus an measúnú tionchair ar an Rialachán seo. Sna doiciméid sin, ní chuirtear teirmithéachtaí seachas cúir pholúireatáin i suíocháin agus leaistiméirí san áireamh agus na spriocanna á ríomh, ó tá sé thar a bheith dúshlánach teirmithéachtaí a athchúrsáil. Comhlíonann go leor leaistiméirí, teirmithéachtaí agus ábhar trasnasctha coitianta an sainmhíniú ar pholaiméir dá dtagraítear sa sainmhíniú ar phlaistigh a leagtar amach i Rialachán (CE) Uimh. 1907/2006. Áirítear leaistiméirí, lena n-áirítear leaistiméirí teirmeaplaisteacha, is féidir a athphróiseáil ina dteirmeaplaistigh, faoi raon feidhme na spriocanna cion athchúrsáilte le haghaidh plaisteach dá bhforáiltear sa Rialachán seo. Mar sin féin, tá spriocanna cion athchúrsáilte le haghaidh leaistiméirí i mbonn á mbreithniú, ós táirge tosaíochta iad sin faoi Rialachán (AE) 2024/1781 ó Pharlaimint na hEorpa agus ón gComhairle ⁽¹⁰⁾ agus, mar sin, nach gclúdaítear iad faoi raon feidhme an Rialacháin seo. Chun coinníollacha aonfhoirmeacha a áirithiú chun an oibleagáid sin a chur chun feidhme, ba cheart cumhachtaí cur chun feidhme a thabhairt don Choimisiún chun modheolaíocht a bhunú chun sciar de na plaistigh a athchúrsáiltear ó dhramhaíl iarthomhaltais, agus de dhramhaíol iarthomhaltais ó fheithiclí a bhfuil a ré caite, a ríomh agus a fhíorú. Chun modhanna athchúrsála seachas athchúrsáil mheicniúil a lamháil, lena n-áirítear athchúrsáil cheimiceach, agus chun cur leis na spriocanna cion athchúrsáilte a bhaint amach, is gá rialacha breise a bhunú chun ábhar plaisteach athchúrsáilte a ríomh, a fhíorú agus a thuairisciú. Sna cásanna sin, is gá cuntasíocht mhaishothromaíochta, mar a thugtar uirthi, a thabhairt isteach i gcomhréir le modheolaíochtaí cuntasíochta maischothromaíochta is infheidhme maidir le hathchúrsáil plaisteach, agus saintréithe teicneolaíochtaí tiomnaithe athchúrsála le haghaidh plaisteach á gcur i gcuntas, amhaíl dramhaíl mótarfheithiclí mhionstíallta ilchineálach. I gcás ina bhfuil sé ródheacair na híoschéatadáin a chomhlíonadh mar gheall ar easpa infhaighteachta nó praghsanna iomarcacha plaisteach athchúrsáilte sonrach, ba cheart a chumhachtú don Choimisiún an Rialachán seo a fhorlíonadh trí mhaoluithe sealadacha ar na spriocanna cion plaisteach athchúrsáilte a leagan síos.

⁽¹⁰⁾ Rialachán (AE) 2024/1781 ó Pharlaimint na hEorpa agus ón gComhairle an 13 Meitheamh 2024 lena mbunaítear creat chun ceanglais éicidhearthóireachta le haghaidh táirgí inbhuanaithe a shocrú, lena leasaítear Treoir (AE) 2020/1828 agus Rialachán (AE) 2023/1542 agus lena n-aisghairtear Treoir 2009/125/CE (IO L, 2024/1781, 28.6.2024, ELI: <http://data.europa.eu/eli/reg/2024/1781/oj>).

- (30) Cuirtear úsáid plaisteach athchúrsáilte i bpacáistíocht phlaisteach i bhfeithiclí chun cinn ar an mbonn go dtáirgtear an cion athchúrsáilte féin ar shlí atá inbhuanaithe ó thaobh an chomhshaoil de, ionas go laghdaítear an lorg carbóin agus go spreagtar an geilleagar ciorclach. Chuige sin, is gá coimircí áirithe a chur i bhfeidhm chun a áirithiú nach gcealaítear, sa tslí ina bhfaightear cion athchúrsáilte, na tairbhí comhshaoil a bhaineann leis an ábhar athchúrsáilte sin a úsáid i bhfeithiclí. Is gá, dá bhrí sin, aghaidh a thabhairt ar na hábhair imní a bhaineann leis an gcomhshaoil ar shlí neamh-idirdhealaitheach ag féachaint do phlaisteach athchúrsáilte a tháirgtear sa bhaile agus do phlaisteach athchúrsáilte a allmhairítear araon. Chuige sin, chun go n-áireofar iad sna spriocanna cion athchúrsáilte a leagtar amach sa Rialachán, ba cheart do phlaistigh athchúrsáilte a bheith faoi réir coinníollacha coibhéiseacha maidir le ceanglais chun sláinte an duine, an aeráid agus an comhshaoil a chosaint, lena n-áirítear ar astaíochtaí agus ar bhainistiú dramhaíola, gan beann ar cibé acu a dhéantar an próiseas athchúrsála laistigh den Aontas nó lasmuigh de.
- (31) Níor cheart feidhm a bheith ag na coinníollacha is infheidhme maidir le hábhar a athchúrsáiltear i dtríú tíortha, lena n-áirítear na ceanglais iniúchóireachta, ach ón 14 Lúnasa 2030 agus ba cheart don Choimisiún measúnú níos cuimsithí a dhéanamh ar an tionchar a mheastar a bheidh ag na coinníollacha sin i bhfianaise éabhlóid staid an mhargaidh agus an chaidrimh trádála agus ba cheart dó a mheasúnú a thuairisciú do Pharlaimint na hEorpa agus don Chomhairle faoin 14 Lúnasa 2028.
- (32) Chun na spriocanna do chomhtháthú cion athchúrsáilte faoin Rialachán seo a bhaint amach, ba cheart don Choimisiún, faoin 14 Lúnasa 2032, athbhreithniú ar staid na forbartha teicneolaíche agus ar fheidhmíocht chomhshaoil plaisteach bithbhunaithe agus leaistiméirí ó athphróiseáil bonn i bhfeithiclí a fhoilsiú, agus, i gcás inarb iomchuí, togra reachtach a chur i láthair ina bhfuil ceanglais agus spriocanna inbhuanaitheachta.
- (33) Tá an earnáil mótarfeithiclí ar cheann de na húsáideoirí cruach is mó dá bhfuil ann agus tá glacadh reatha na cruach athchúrsáilte i bhfeithiclí nua fós íseal. Chun cur le hísliú an loirg carbóin a bhaineann le táirgeadh feithiclí nua agus tacú le haistriú na hearnála mótarfeithiclí i dtreo na haeráidneodrachta, ba cheart sciar íosta cruach a athchúrsáiltear ó dhramhaíl cruach iar-thomhaltais agus, i gcás inarb ábhartha, dramhaíl fheiriúil i bhfeithiclí nua a shocrú. Ba cheart, dá bhrí sin, an chumhacht chun gníomhartha a ghlacadh i gcomhréir le hAirteagal 290 CFAE a tharmligeán chuig an gCoimisiún i leith sciar íosta cruach a athchúrsáiltear ó dhramhaíl chruach iarthomhaltais a bhunú agus, i gcás inarb ábhartha, dramh feiriúil lena n-áirítear cruach charbóin chomhréidh agus fhada agus b'fhéidir aicmí táirgí cruach dosmálta, atá le bheith i láthair i gcineálacha feithiclí agus le hionchorprú iontu. Sula mbunófar sprioc amach anseo, ba cheart don Choimisiún staidéar tiomnaithe a dhéanamh lena gcumhdófar na tosca teicniúla, comhshaoil agus eacnamaíocha ábhartha uile a bhaineann le hindéantacht na sprice sin, lena n-áirítear tionchair ar earnálacha eile ina n-úsáidtear cruach agus astaíochtaí gás ceaptha teasa domhanda. Tá sé tábhachtach idirdhealú a dhéanamh idir aicmí éagsúla táirgí cruach laistigh den fheithicil, ó tháirgtear iad trí úsáid a bhaint as teicneolaíochtaí éagsúla a bhfuil srianta éagsúla orthu chun dramh feiriúil a úsáid maidir lena gcumas ábhar copair agus eilimintí fáin miotail eile a fhulaingt. Chun gnéithe neamhriachtanacha áirithe den Rialachán seo a fhorlíonadh, ba cheart an chumhacht chun gníomhartha a ghlacadh i gcomhréir le hAirteagal 290 CFAE a tharmligeán chuig an gCoimisiún i leith modheolaíocht a bhunú chun sciar na cruach a aisghabhtar ó dhramhaíl cruach iar-thomhaltais agus, i gcás inarb iomchuí, dramh feiriúil atá sa chineál feithicle agus atá ionchorpraithe ann a ríomh agus a fhíorú.
- (34) Tá an earnáil mótarfeithiclí ar cheann de na húsáideoirí alúmanaim is mó freisin, arb ionann í agus níos mó ná 40 % d'éileamh iomlán an Aontais, agus tá an úsáid ag dul i méid. Tá glacadh reatha an alúmanaim athchúrsáilte i bhfeithiclí nua íseal. Chun cur leis an lorg carbóin a bhaineann le táirgeadh feithiclí nua a laghdú agus chun tacú le haistriú na hearnála mótarfeithiclí i dtreo na haeráidneodrachta, tomhaltas fuinnimh agus costais a laghdú, agus athléimneacht a fheabhsú trí spleáchais ar sholáthairtí amhábhbar príomhúil a laghdú, is iomchuí glacadh alúmanaim athchúrsáilte i bhfeithiclí a mhéadú. Chuige sin, ba cheart an chumhacht chun gníomhartha a ghlacadh i gcomhréir le hAirteagal 290 CFAE a tharmligeán chuig an gCoimisiún i leith sciar íosta alúmanaim agus a chóimhiotail a athchúrsáiltear ó dhramhaíl iarthomhaltais i gcineálacha feithiclí agus, más infheidhme, ó dhramhaíl réamhthomhaltais, atá i láthair i gcineálacha feithiclí agus a ionchorpraítear iontu, a bhunú. Sula mbunófar sprioc amach anseo, ba cheart don Choimisiún staidéar tiomnaithe a dhéanamh lena gcumhdófar na tosca teicniúla, comhshaoil agus eacnamaíocha uile a bhaineann le hindéantacht na sprice sin. Chun gnéithe neamhriachtanacha áirithe den Rialachán seo a fhorlíonadh, ba cheart an chumhacht chun gníomhartha a ghlacadh i gcomhréir le hAirteagal 290 CFAE a tharmligeán chuig an gCoimisiún i leith modheolaíocht a bhunú chun sciar na cruach a aisghabhtar ó dhramhaíl iarthomhaltais agus, más infheidhme, ó dhramhaíl réamhthomhaltais atá sa chineál feithicle agus atá ionchorpraithe ann a ríomh agus a fhíorú.

- (35) Tá an deis ann úsáid an chion athchúrsáilte i bhfeithiclí a mhéadú i gcás ábhair eile a úsáideann an earnáil mótarfeithiclí go coiteann dá bhfuil margaí le haghaidh amhábhair thánaisteacha thearcfhorbartha, dá bhfuil an lorg comhshaoil atá nasctha le táirgeadh na n-amhábhair príomhúil ard nó dá bhfuil leibhéil athchúrsála teoranta, cé go bhfuil feabhas ag teacht ar theicneolaíochtaí sórtála agus athchúrsála. Mar sin, is iomchuí don Choimisiún measúnú a dhéanamh ar a inmhiannaithe agus a indéanta atá sé spriocanna a leagan amach maidir leis an gcion athchúrsáilte neoidimiam, diospróisiam, praiséidimiam, teirbiam, samairiam, nicile, cóbailt agus bóróin a úsáidtear i mbuanmhaighnéid agus le haghaidh maignéisiam agus a chóimhiotal, agus ar na tionchair a bheadh aige sin.
- (36) Chun borradh a chur faoi na margaí tearcfhorbartha le haghaidh amhábhair thánaisteacha, ba cheart an chumhacht chun gníomhartha a ghlacadh i gcomhréir le hAirteagal 290 CFAE a tharmligean chuig an gCoimisiún i leith sciar íosta maignéisiam agus a chóimhiotal, neoidimiam, diospróisiam, praiséidimiam, teirbiam samairiam, nicile, cóbailt nó bóróin a athchúrsáiltear ó dhramhaíl iarthomhaltais a bheidh i láthair agus a ionchorprófar sna cineálacha feithiclí a bhunú. Chun gnéithe neamhriachtanacha áirithe den Rialachán seo a fhorlíonadh, ba cheart an chumhacht chun gníomhartha a ghlacadh i gcomhréir le hAirteagal 290 CFAE a tharmligean chuig an gCoimisiún chun modheolaíocht a bhunú chun sciar na n-ábhar sin a aisghabhtar ó dhramhaíl iarthomhaltais, agus i gcás inarb ábhartha, ó dhramhaíl réamhthomhaltais i gcineálacha feithiclí. Tá gá leis an modheolaíocht chun na sainmhínte ar dhramh iarthomhaltais agus ar dhramh réamhthomhaltais a shoiléiriú. Tá sé sin ábhartha chun feabhsú na cáilíochta agus coimeád luacha a dhreasú le haghaidh codáin dramhaíola iarthomhaltais. Chun an dícharbónú a chur chun cinn trí chion athchúrsáilte níos mó a úsáid, is gá sainmhínte soiléire chun athchúrsáil draimh iarthomhaltais a dhreasú, agus an tráth céanna, úsáid draimh réamhthomhaltais á íoslaghdú, ina mbíonn an lorg carbóin céanna agus a bhíonn ag an amhábhair príomhúil go hiondúil.
- (37) I gcomhréir le ceanglais Rialachán (AE) 2024/1252, agus i bhfianaise gur gá forálacha a bhunú sa Rialachán seo maidir leis an gcion athchúrsáilte i bhfeithiclí agus faisnéis faoi pháirteanna agus comhpháirteanna ina bhfuil ábhair buanmhaighnéad a bhaint i bhfeithiclí, ba cheart feidhm a bheith ag na forálacha sin mar chur chun feidhme earnáilsonrach na bhforálacha atá i Rialachán (AE) 2024/1252. Áiríteofar leis sin go ndéanfar oibleagáidí éagsúla a bhaineann le faisnéis faoi bhaint na gcodanna agus na comhpháirteanna sin faoin Rialachán seo a shruthlíniú agus a chomhtháthú leis na cinn sin i gcás páirteanna agus comhpháirteanna eile. Tá feidhm ag na hoibleagáidí a bhaineann le lipéadú in Airteagal 28 de Rialachán (AE) 2024/1252.
- (38) Chun a áirithiú go ndéanfar ceallraí a athchúrsáil i gcomhréir le ceanglais Rialachán (AE) 2023/1542, agus gur féidir móitair ríomhthiomána, ina bhfuil cainníochtaí suntasacha de dhúile tearc-chré, a athsholáthar agus a athchúrsáil freisin, is gá ceanglais nua deartha a thabhairt isteach le haghaidh cineálacha feithicle nua, lena n-áiríteofar gur féidir le saoráidí cóireála nó oibreoirí deisiúcháin agus cothabhála údaráithe na ceallraí agus a bpacaí ceallraí agus na móitair ríomhthiomána sin a bhaint ar bhealach réidh le linn aon chéim de shaolré feithicle. Ba cheart don Choimisiún freisin forbairt caighdeán a spreagadh i gcás teicnící deartha agus cóimeála lena n-éascaítear cothabháil, deisiú agus athrú cuspóra ceallraí agus pacáí ceallraí. Ar bhonn níos leithne, chun an póitéinseal a uasmhéadú chun páirteanna agus comhpháirteanna feithiclí a athsholáthar, a athúsáid, a athchúrsáil, a athmhonarú nó a athfheistiú, agus chun dramhaíl a íoslaghdú, ba cheart feithiclí a dhearadh ar shlí a fhágann gur féidir an oiread páirteanna agus comhpháirteanna agus is féidir a bhaint. Ba cheart coincheap na hindéantachta teicniúla a léirmhíniú ar shlí a thacaíonn leis na cuspóirí sin agus a éascaíonn iad, agus é á aithint, i gcásanna áirithe, gur féidir le ceanglais sábháilteachta nó fheidhmiúla de pháirt údar a thabhairt le réitigh mhalartacha a theorannaíonn inbhainteacht páirte nó comhpháirte. Sna cásanna sin, ba cheart do mhonaróirí a léiriú go bhfuil gá le rogha den sórt sin. Chun an dul chun cinn teicniúil agus eolaíoch a chur i gcuntas, ba cheart an chumhacht chun gníomhartha a ghlacadh i gcomhréir le hAirteagal 290 CFAE a tharmligean chuig an gCoimisiún i leith an Rialachán seo a leasú trí athbhreithniú a dhéanamh ar an liosta páirteanna agus comhpháirteanna atá le dearadh lena mbaint ó fheithiclí agus lena n-athsholáthar. Chun coinníollacha aonfhoirmeacha a áirithiú do chur chun feidhme an cheanglais deartha sin, ba cheart cumhachtaí cur chun feidhme a thabhairt don Choimisiún.

- (39) Leis an gcóras cineálcheadaithe a leagtar síos i Rialachán (AE) 2018/858, ceanglaítear ar mhonaróirí a gcuid feithiclí, córas, comhpháirteanna agus aonad teicniúil faoi leith a dhéanamh i gcomhréir le cineál feithicle ceadaithe. Chun a áirithiú go gcomhlíonfaidh monaróirí na ceanglais chiorclaíochta is infheidhme maidir leo ag an gcéim chineálcheadaithe agus a leagtar síos sa Rialachán seo, agus gur féidir le húdaráis chineálcheadaithe an comhlíonadh a fhíorú, is gá do mhonaróirí an fhaisnéis, a cheanglaítear le haghaidh an nós imeachta cineálcheadaithe, a áireamh san fhilleán faisnéise. Chun an trédhearcacht a mhéadú agus chun a áirithiú go gcuirfear an fhaisnéis is gá faoi chineálcheadú i láthair ar shlí atá comhleánach leis na ceanglais i reachtaíocht eile lena rialaítear ceanglais cineálcheadaithe le haghaidh feithiclí, ba cheart don Choimisiún na rialacha a bhunaítear i Rialachán Cur Chun Feidhme (AE) 2020/683 ⁽¹¹⁾ ón gCoimisiún lena gcaighdeánaítear na doiciméid agus an fhaisnéis atá le háireamh san fhilleán faisnéise a leasú, agus sa tslí sin, na ceanglais riaracháin cineálcheadaithe a shonrú.
- (40) Chun a áirithiú go gcuirfidh monaróirí gluaisteán paisinéirí agus feithiclí tráchtála éadroma gníomhaíochtaí i bhfeidhm chun a áirithiú go gcomhlíonfaidh siad na ceanglais chiorclaíochta faoin Rialachán seo, agus chun iad a dhreasú chun ciorclaíocht na bhfeithiclí a fheabhsú, ba cheart dóibh straitéis chiorclaíochta chuimsitheach a tharraingt suas. Ba cheart an straitéis chiorclaíochta a ullmhú ar leibhéal an mhonaróra agus a uasdátú gach 5 bliana. Ba cheart cóip di a sholáthar do na húdaráis chineálcheadaithe agus don Choimisiún. Cé go soláthraítear í do na húdaráis chineálcheadaithe, níor cheart an straitéis chiorclaíochta a nascadh leis an bpróiseas cineálcheadaithe. Chun maoirseacht agus grinnscrúdú níos leithne a áirithiú, ba cheart don Choimisiún straitéisí ciorclaíochta na monaróirí, chomh maith lena leaganacha nuashonraithe, a chur ar fáil go poiblí, agus aird chuí á tabhairt ar aon fhaisnéis rúnda a chosaint. Ba cheart don Choimisiún tuarascáil a ullmhú agus a fhoilsiú, gach sé bliana ar a laghad, maidir le ciorclaíocht na hearnála mótarfeithiclí ar bhonn na straitéisí ciorclaíochta arna soláthar ag na monaróirí, i measc faisnéis eile.
- (41) Chun an trédhearcacht ar úsáid na n-ábhar athchúrsáilte ag an earnáil mótarfeithiclí a mhéadú agus chun dreasachtaí a sholáthar chun leibhéil an chion athchúrsáilte a mhéadú, ba cheart a cheangal ar mhonaróirí doiciméadacht theicniúil a sholáthar lena dtaispeánaí céatadán na n-ábhar athchúrsáilte atá i gcineálacha nua feithicle a chuirtear isteach lena gcineálcheadú. Ba cheart feidhm a bheith ag an gceanglas sin maidir le rogha ábhar a mbeadh tairbhí comhshaoil a bhfuil tábhacht ar leith ag baint leo mar thoradh ar mhéadú ar leibhéal an chion athchúrsáilte i bhfeithiclí. Ba cheart an dearbhú sainordaitheach a chur faoi bhráid an údaráis cineálcheadaithe in éineacht le doiciméid eile mar chuid den iarratas ar chineálcheadú.
- (42) Tá rochtain ar fhaisnéis atá cothrom le dáta agus cumarsáid thráthúil idir monaróirí agus oibreoirí bainistithe dramhaíola ar fud an tsabhra luacha mótarfeithiclí fíor-riachtanach chun athúsáid, athmhonarú agus athríochtú páirteanna agus comhpháirteanna feithicle a uasmhéadú agus chun athchúrsáil ardcháilíochta feithiclí a bhfuil a ré caite a áirithiú. Mar sin, ba cheart do mhonaróirí rochtain neamhsrionta, caighdeánaithe agus neamh-idirdhealaitheach a sholáthar d'oibreoirí bainistithe dramhaíola agus d'oibreoirí deisiúcháin agus cothabhála ar fhaisnéis, lena n-áirítear trí uirlisí reatha a úsáideann an tionscal gluaisteán, lena gcumasófar baint shábháilte páirteanna, comhpháirteanna agus ábhar áirithe atá i bhfeithicil. Níor cheart é a bheith d'oibleagáid ar mhonaróirí an fhaisnéis sin a sholáthar d'oibreoirí deisiúcháin agus cothabhála i gcás inar cuireadh an fhaisnéis sin ar fáil cheana féin de bhun reachtaíocht eile an Aontais. Ba cheart don fhaisnéis treoir a thabhairt d'oibreoirí bainistithe dramhaíola, d'fhoilsiitheoirí faisnéise teicniúla agus d'oibreoirí deisiúcháin agus cothabhála ar na céimeanna is gá chun rochtain a fháil ar cheallra feithiclí leictreacha agus a bpacáí ceallraí agus iad a bhaint, lena n-áirítear ar na huirlisí nó na teicneolaíochtaí a chumasaíonn a n-urscaoileadh go sábháilte, agus mótaí tiomána leictreacha. Ba cheart don fhaisnéis treoracha soiléire a sholáthar freisin faoi úsáid uirlisí nó teicneolaíochtaí le haghaidh na rochtana agus na bainte sin. Ba cheart don fhaisnéis cuidiú leis na páirteanna, comhpháirteanna agus ábhair a shainathint, a lonnú agus a bhaint, ar páirteanna, comhpháirteanna agus ábhair iad ar cheart a dhithruailliú agus a bhaint den fheithicil roimh an mionghearradh, mar aon le páirteanna agus comhpháirteanna, ina bhfuil na hamhábhair chriticiúla i mbuanmhaighnéid dá dtagraítear i Rialachán (AE) 2024/1252. Ba cheart go gcuirfeadh monaróirí faisnéis treorach faoi tharrtháil agus práinnfhreagairt ar fáil do sheirbhísí éigeandála chomh maith. Tá sé tábhachtach go n-urramófar cearta maoine intleachtúla go cuí, lena n-áirítear nach gcuirfidh rochtain ar fhaisnéis theicniúil isteach ar theicneolaíochtaí dílseánaigh ná ar rúin trádála. Ba cheart é sin a dhéanamh trí ardáin cumarsáide arna mbunú ag monaróirí agus ba cheart an fhaisnéis a sholáthar saor in aisce, gan costais riaracháin nach bhfuil ródhaor a chur san áireamh. Ba cheart do na húdaráis chineálcheadaithe a fhíorú go bhfuil an fhaisnéis is gá curtha isteach ag na monaróirí. Agus chun go gcuirfear i gcountas gur gá tacú le hiarfheistiú feithiclí mar bhealach chun astaíochtaí a laghdú, saolréanna feithiclí a leathnú, agus inbhuanaitheacht a chur chun cinn, ba cheart do mhonaróirí comhar cuí le hoibreoirí iarfheistithe a áirithiú freisin.

⁽¹¹⁾ Rialachán Cur Chun Feidhme (AE) 2020/683 ón gCoimisiún an 15 Aibreán 2020 lena gcuirtear Rialachán (AE) 2018/858 ó Pharlaimint na hEorpa agus ón gComhairle chun feidhme a mhéid a bhaineann leis na ceanglais riaracháin chun mótarfeithiclí agus a leantóirí, agus córas, comhpháirteanna agus aonad teicniúil ar leithligh atá ceaptha le haghaidh na bhfeithiclí sin, a cheadú agus faireachas margaidh a dhéanamh orthu (IO L 163, 26.5.2020, lch. 1, ELI: http://data.europa.eu/eli/reg_impl/2020/683/oj).

- (43) Ba cheart rochtain oibreoirí iarmhargaidh ar fhaisnéis maidir le baint páirteanna agus comhpháirteanna ó fheithicil a bhfuil a ré caite, lena n-áirítear d'fhonn athsholáthar na bpáirteanna agus na gcomhpháirteanna sin amach anseo, a ráthú chun rogha an tomhaltóra a choimirciú agus chun úsáid éifeachtúil acmhainní a áirithiú. Mar sin, is gá a áirithiú go soláthrófar d'oibreoirí bainistithe dramhaíola agus d'fhoilsitheoirí faisnéise teicniúla an fhaisnéis is gá chun na páirteanna agus na comhpháirteanna sin a bhaint go sábháilte agus go héifeachtach ó na feithicil a bhfuil a ré caite. Thairis sin, ba cheart an fhaisnéis sin a sholáthar d'oibreoirí a shaothraíonn gníomhaíocht ina bhfuil deisiú agus cothabháil feithicil, i gcás nach gcáilíonn siad mar oibreoirí bainistithe dramhaíola agus i gcásanna nach gclúdaítear an soláthar faisnéise sin cheana féin le reachtaíocht eile an Aontais agus sna cásanna sin amháin.
- (44) Cé go bhfuil méadú ag teacht ar an úsáid a bhaintear as códú digiteach chun páirteanna agus comhpháirteanna difriúla a bhfeithicil a rialú, leis an meastóireacht ar Threoir 2000/53/CE, sainithníodh go bhféadfadh an chódáil sin bac a chur ar acmhainneacht athúsáide, athmhonaraithe agus athriochtaithe páirteanna agus comhpháirteanna áirithe. Tá sé fíor-riachtanach mar sin go n-iarrtar ar mhonaróirí faisnéis a sholáthar lena bhfágfar gur féidir le hoibreoirí bainistithe dramhaíola gairmiúla agus oibreoirí deisiúcháin agus cothabhála na fadhbanna a bhaineann leis na páirteanna agus na comhpháirteanna atá códaithe go digiteach i bhfeithicil a shárú, i gcás ina gcuirfidh an chódáil sin cosc ar oibriochtaí deisiúcháin, cothabhála nó athsholáthair i bhfeithicil eile.
- (45) Ba cheart do mhonaróirí agus dá soláthróirí úsáid a bhaint as caighdeáin chun comhpháirteanna agus ábhair a chódú, a bunaíodh i gCinneadh 2003/138/CE⁽¹²⁾, ón gCoimisiún i dtosach báire, chun páirteanna, comhpháirteanna agus ábhair phlaisteacha agus leaistiméire feithicil a lipéadú agus a shainaithint. Ba cheart dóibh a áirithiú go ndéanfar páirteanna agus comhpháirteanna uile na bhfeithicil a mharcáil i gcomhréir le reachtaíocht eile is infheidhme an Aontais, go háirithe reachtaíocht a bhaineann lipéadú na gceallraí agus na mbuanmhaighnéad a áirítear i bhfeithicil a chuireann siad ar an margadh. Chun an dul chun cinn teicniúil agus eolaíoch a chur san áireamh, ba cheart an chumhacht chun gníomhartha a ghlacadh i gcomhréir le hAirteagal 290 CFAE a tharmligean chuig an gCoimisiún i leith an larscríbhinn a leasú lena sonraítear an bealach ba cheart páirteanna agus comhpháirteanna feithicil a lipéadú.
- (46) Chun cóireáil na bhfeithicil a bhfuil a ré caite a éascú, ba cheart go ndéanadh monaróirí faisnéis a sholáthar, trí uirlisí digiteacha, atá cruinn, iomlán agus cothrom le dáta faoi pháirteanna agus comhpháirteanna feithicil a bhaint agus a athsholáthar go sábháilte. Ba cheart pas digiteach ciorclaíochta feithicil a cheapadh mar sin agus a chur ar fáil mar iompróir sonraí le haghaidh na faisnéise sin, ar shlí a bheadh i gcomhréir le huirlisí agus le hardáin faisnéise dhigiteacha eile atá ann cheana nó a bhfuil tuilleadh forbartha á déanamh orthu san earnáil mótarfeithicil ar fheidhmíocht chomhshaoil na bhfeithicil agus é a ailíniú le forálacha comhfhreagracha i Rialachán (AE) 2023/1542, (AE) 2024/1781 agus (AE) 2024/1257⁽¹³⁾ ó Pharlaimint na hEorpa agus ón gComhairle. Chun coinníollacha aonfhoirmeacha chun cur chun feidhme an Rialacháin seo a áirithiú, ba cheart cumhachtaí cur chun feidhme a thabhairt don Choimisiún chun na ceanglais deartha agus oibrithe theicniúil i gcás an phas a leagan síos mar aon le rialacha maidir le suíomh an iompróra sonraí nó aitheantóra eile lenar féidir rochtain a fháil ar an bpas ar an bhfeithicil. Agus na rialacha i gcás an phas dhigitigh ciorclaíochta feithicil a leagan síos aige, ba cheart don Choimisiún an gá atá leis an ardleibhéal slándála agus príobháideachais a chur i gcuntas, lena n-áirítear maidir le sonraí oibriúcháin feithicil chun bagairtí cibearshlándála a chosc.

⁽¹²⁾ Cinneadh 2003/138/CE ón gCoimisiún an 27 Feabhra 2003 lena mbunaítear caighdeáin um chódáil chomhpháirteanna agus ábhair le haghaidh feithicil de bhun Threoir 2000/53/CE ó Pharlaimint na hEorpa agus ón gComhairle maidir le feithicil a bhfuil a ré caite (IO L 53, 28.2.2003, lch. 58, ELI: [http://data.europa.eu/eli/dec/2003/138\(1\)/oj](http://data.europa.eu/eli/dec/2003/138(1)/oj)).

⁽¹³⁾ Rialachán (AE) 2024/1257 ó Pharlaimint na hEorpa agus ón gComhairle an 24 Aibreán 2024 maidir le cineálcheadú mótarfeithicil agus inneall agus córas, comhpháirteanna agus aonad teicniúil ar leithligh atá ceaptha le haghaidh na bhfeithicil sin maidir lena n-astaíochtaí agus marthanacht ceallraí (Euro 7), lena leasaítear Rialachán (AE) 2018/858 ó Pharlaimint na hEorpa agus ón gComhairle agus lena n-aisghairtear Rialachán (CE) Uimh. 715/2007 agus (CE) Uimh. 595/2009 ó Pharlaimint na hEorpa agus ón gComhairle, Rialachán (AE) Uimh. 582/2011 ón gCoimisiún, Rialachán (AE) 2017/1151 ón gCoimisiún, Rialachán (AE) 2017/2400 ón gCoimisiún agus Rialachán Cur Chun Feidhme (AE) 2022/1362 ón gCoimisiún (IO L, 2024/1257, 8.5.2024, ELI: <http://data.europa.eu/eli/reg/2024/1257/oj>).

- (47) Is gá rialacha comhchuibhithe a leagan síos le haghaidh bainistiú dramhaíola feithiclí a bhfuil a ré caite chun a áirithiú go bhfuil táirgeoirí agus oibreoirí eacnamaíocha eile faoi réir na rialacha céanna ar fud na mBallstát. Ba cheart ardleibhéal cosanta le haghaidh an chomhshaoil agus shláinte an duine ar fud an Aontais a bheith ann dá thoradh sin. D'fhágfadh sé freisin go mbeadh tuilleadh comhchuibhithe ann ar cháilíocht na seirbhísí bainistithe dramhaíola a sholáthraíonn oibreoirí eacnamaíocha agus go n-éascófaí feidhmiú an mhargaidh le haghaidh amhábhair thánaisteacha.
- (48) Chun cóireáil shábháilte a bheidh neamhdhíobhálach don chomhshaoil a ráthú i leith feithiclí a bhfuil a ré caite, ba cheart d'aon bhunaíocht nó gnóthas a bheartaíonn oibríochtaí cóireála dramhaíola a dhéanamh le haghaidh na bhfeithiclí sin údarú a fháil ón údarás inniúil. Níor cheart an t-údarú a dheonú ach amháin má bhíonn an inniúlacht is gá ag an mbunaíocht nó ag an ngnóthas chun na hoibríochtaí cóireála a bhfuil a ré caite a dhéanamh ar feithiclí ar shlí a chomhlíonfaidh dlí an Aontais is infheidhme agus an dlí idirnáisiúnta is infheidhme, lena n-áirítear na ceanglais chóireála shonracha a leagtar síos sa Rialachán seo. Ina theannta sin, is iad na saoráidí cóireála údaráithe agus iad sin amháin ar cheart inniúlacht a bheith acu chun deimhnithe scríosta a eisiúint i gcomhréir leis an Rialachán seo.
- (49) I gcás ina dtabharfaidh táirgeoirí nó eagraíochtaí um fhreagracht táirgeoirí conarthaí i gcrích le saoráidí cóireála údaráithe chun a n-oibleagáidí freagrachta táirgeoirí a chomhlíonadh, ba cheart na conarthaí sin a bheith i gcomhréir le prionsabail dhlí na hiomaíochta agus níor cheart forálacha a áireamh iontu a bhfuil sé de chuspóir nó d'éifeacht acu iomaíocht a shrianadh nó a shaobhadh, go háirithe de réir bhrí Airteagail 101 agus 102 CFAE. Ba cheart go mbeadh na conarthaí sin cothrom, trédhearcach agus níor cheart go mbeadh téarmaí ná coinníollacha idirdhealaitheacha iontu. Chun comhlíonadh na gceanglas sin a éascú, ba cheart na Ballstáit a bheith in ann conradh samplach a sholáthar.
- (50) Bunaítear bunoibleagáid le Treoir 2000/53/CE le haghaidh táirgeoirí feithiclí chun cuid de na costais i dtaca le bailiú na bhfeithiclí a bhfuil a ré caite a chumhdach. Ag cur leis an oibleagáid sin, i gcomhréir leis an bprionsabal 'costas an truaillithe ar an truaillitheoir' agus i gcomhréir leis na híoscheanglais ghinearálta i gcás scéimeanna freagrachta leathnaithe táirgeora a leagtar amach i dTreoir 2008/98/CE ó Pharlaimint na hEorpa agus ón gComhairle ⁽¹⁴⁾, is iomchuí ceanglais a leagan síos ar leibhéal an Aontais maidir le freagrachtaí na monaróirí a bhaineann le bainistiú na bhfeithiclí a bhfuil a ré caite. Ba cheart freagracht leathnaithe táirgeora a bheith ar tháirgeoirí as na feithiclí a chuireann siad ar fáil ar an margadh den chéad uair laistigh de chríoch Ballstáit nuair a bheidh siad ina gcéim deireadh ré. Ba cheart a chumhdach leis an bhfreagracht leathnaithe táirgeora na hoibleagáidí chun a áirithiú go ndéanfar na feithiclí a chuireann na táirgeoirí ar an margadh i mBallstát a bhailiú agus a chóireáil i gcomhréir leis an Rialachán seo agus go gcomhlíonfaidh oibreoirí bainistithe dramhaíola a bhíonn ag cóireáil na bhfeithiclí sin na spriocanna athchúrsála a bhunaítear leis an Rialachán seo.
- (51) Chun éascaíocht a dhéanamh ar fhaireachán ar chomhlíontacht na dtáirgeoirí lena n-oibleagáidí um fhreagracht leathnaithe táirgeora, ba cheart do na Ballstáit clár táirgeoirí a bhunú nó clár atá ann cheana a úsáid. Ba cheart na ceanglais chlárúcháin a chomhchuibhiú ar fud an Aontais chun clárú a éascú, go háirithe i gcás ina gcuireann táirgeoirí feithiclí ar fáil i mBallstáit éagsúla. Ba cheart an clár a úsáid freisin chun feidhmíocht na n-oibleagáidí um fhreagracht leathnaithe táirgeora a thuairisciú d'údarás inniúla. Ba cheart na tréithe agus na gnéithe nós imeachta atá nasctha leis an gclár sin a bheith i gcomhréir le clár na dtáirgeoirí arna bhunú le Rialachán (AE) 2023/1542, chun go mbeidh táirgeoirí feithiclí agus táirgeoirí ceallraí in ann an clár ceannann céanna a úsáid. Chun gur féidir na táirgeoirí a chlárú i ngach Ballstát, ba cheart don Choimisiún suíomh gréasáin a bhunú ina mbeidh na naisc chuig na cláir náisiúnta uile.

⁽¹⁴⁾ Treoir 2008/98/CE ó Pharlaimint na hEorpa agus ón gComhairle an 19 Samhain 2008 maidir le dramhaíl agus lena n-aisghairtear Teoracha áirithe (IO L 312, 22.11.2008, lch. 3, ELI: <http://data.europa.eu/eli/dir/2008/98/oj>).

- (52) Faoi Airteagal 30 de Rialachán (AE) 2022/2065 ó Pharlaimint na hEorpa agus ón gComhairle ⁽¹⁵⁾, tá soláthraithe ardán ar líne a lamhálann do thomhaltóirí cianchonarthaí a thabhairt i gcrích le trádálaithe lena áirithiú nach féidir le trádálaithe na hardáin ar líne sin iad a úsáid ach chun teachtaireachtaí a chur chun cinn, nó chun táirgí nó seirbhísí a thairiscint do thomhaltóirí atá lonnaithe san Aontas más rud é, sula n-úsáidfear na hardáin sin chun na gcríoch sin, go bhfuil faisnéis áirithe faighte ag soláthraithe na n-ardán sin, i gcás inarb infheidhme maidir leis an trádálaí. Sa chomhthéacs sin, is táirgí feithiclí. Is féidir gur clár poiblí é clár na dtáirgeoirí a bhunaítear faoin Rialachán seo chun Airteagal 30(1), pointe (d), de Rialachán (AE) 2022/2065 a chomhlíonadh. Le féindeimhniúchán ón trádálaí chun gealltanais a thabhairt nach dtairgfear ach táirgí nó seirbhísí a chomhlíonann na rialacha is infheidhme de dhlí an Aontais de bhun Airteagal 30(1), pointe (e), de Rialachán (AE) 2022/2065, is féidir na ceanglais maidir le freagracht leathnaithe táirgeoira a leagtar síos faoin Rialachán seo a chumhdach freisin. Ar deireadh, chun críocha Airteagal 30(2) de Rialachán (AE) 2022/2065, i gcás nach bhfuil rochtain ag an bpobal ar an bhfaisnéis atá i gclár na dtáirgeoirí, ba cheart do na Ballstáit a áirithiú go dtabharfar rochtain, saor in aisce, ar an bhfaisnéis sin do sholáthraithe ardán ar líne, chun a ndícheall a dhéanamh lena mheasúnú an bhfuil an fhaisnéis iontaofa agus iomlán.
- (53) I gcás ina gcuirfidh an táirgeoir feithiclí ar fáil ar an margadh den chéad uair laistigh de chríoch Ballstáit nach bhfuil an táirgeoir bunaithe ann, ba cheart don táirgeoir sin ionadaí údaraithe a ainmniú le haghaidh na freagrachta leathnaithe táirgeoira. Má dhéanann ionadaí údaraithe amháin ionadaíocht do níos mó ná táirgeoir amháin i mBallstát, ba cheart don ionadaí údaraithe sin ainm agus sonraí teagmhála gach ceann de na táirgeoirí dá ndéantar ionadaíocht a chur ar fáil ar leithligh.
- (54) Ba cheart táirgeoirí a bheith in ann a roghnú cé acu a fheidhmeoidh siad a n-oibleagáidí um fhreagracht leathnaithe táirgeoira ar bhonn aonair nó ar bhonn comhchoiteann, trí bhíthin eagraíochtaí um fhreagracht táirgeoirí a ghlacfaidh an fhreagracht thar a gceann. Mar sin féin, ba cheart do na Ballstáit a bheith in ann a cheangal go ndéanfaidh eagraíocht um fhreagracht táirgeoirí ionadaíocht do tháirgeoir. Sna cásanna sin, níor cheart don Bhallstát a cheangal ar tháirgeoirí go ndéanfaidh eagraíocht shonrach um fhreagracht táirgeoirí ionadaíocht dóibh, ós rud é gur cheart solúbthacht a bheith ann maidir leis an líon eagraíochtaí um fhreagracht táirgeoirí is féidir a bheith i mBallstát. Ba cheart gurbh amhlaidh an cás freisin i mBallstáit ina bhfuil eagraíochtaí um fhreagracht táirgeoirí atá á reáchtáil ag an stát a fhéadfaidh a bheith faoi réir socruithe níos sonraí faoin dlí náisiúnta. Cé go lamháiltear struchtúir rialachais éagsúla le creatáil dlíthiúla na mBallstát, ba cheart d'eagraíochtaí um fhreagracht táirgeoirí oibriú, i bprionsabal, chun a áirithiú go n-úsáidtear táillí a bhailítear ó tháirgeoirí go heisiach chun na hoibleagáidí a bhaineann le bailiú agus cóireáil feithiclí a bhfuil a ré caite a chomhlíonadh chun oibleagáidí bainistithe dramhaíola a eagrú agus a mhaoiniú. Ba cheart do na heagraíochtaí uile um fhreagracht táirgeoirí rúndacht na sonraí a sholáthraíonn táirgeoirí dóibh a áirithiú. Chun a áirithiú go gcuirfear leasanna na n-oibreoirí eacnamaíocha uile san áireamh i gceart agus chun cás a sheachaint ina gcuirtear oibreoirí bainistithe dramhaíola faoi mhíbhuntáiste agus cinntí á ndéanamh i scéimeanna freagrachta leathnaithe táirgeoira, mar shampla d'fhéadfadh eagraíochtaí um fhreagracht táirgeoirí comhairliúchán struchtúrtha a dhéanamh uair sa bhliain ar a laghad le geallsealbhoirí leasmhara agus tuarascáil achomair ar an gcomhairliúchán sin a fhoilsiú ar a suíomh gréasáin, ina leagfar amach na príomhbharúlacha a gheofar mar aon le míniú ar an gcaoi ar tugadh aghaidh ar na barúlacha sin. Ba cheart stádas breathnóra a dheonú d'oibreoirí bainistithe dramhaíola i gcomhlachtaí rialaithe na n-eagraíochtaí um fhreagracht táirgeoirí, eadhon ar a mboird feidhmiúcháin, chun rialachas agus éifeachtúlacht fhoriomlán an chórais a fheabhsú, agus urraim á tabhairt ag an am céanna don ghá atá le coinbhleacht leasa a sheachaint. Ina theannta sin, ba cheart d'eagraíochtaí um fhreagracht táirgeoirí oibreoirí bainistithe dramhaíola a roghnú trí nós imeachta neamh-idirdhealaitheach bunaithe ar chritéir dhámhachtana thrédhearcacha.

⁽¹⁵⁾ Rialachán (AE) 2022/2065 ó Pharlaimint na hEorpa agus ón gComhairle an 19 Deireadh Fómhair 2022 maidir le Margadh Aonair do Sheirbhísí Digiteacha agus lena leasaítear Treoir 2000/31/CE (an Gníomh um Sheirbhísí Digiteacha) (IO L 277, 27.10.2022, lch. 1, ELI: <http://data.europa.eu/eli/reg/2022/2065/oj>).

- (55) Ba cheart do tháirgeoirí cuid de na costais a bhaineann le bailiú agus cóireáil na bhfeithiclí a bhfuil a ré caite a mhaoiniú, ar costais iad is gá chun na ceanglais a bhunaítear sa Rialachán seo a chomhlíonadh, go háirithe oibleagáidí a bhfuil sé d'aithne acu cáilíocht níos airde amhábhair tánaisteach arna n-aisghabháil ó fheithiclí á áirithiú. Ba cheart leibhéal beacht chostais na n-oibríochtaí sin ar cheart go gcumhdódh táirgeoirí iad a chinneadh trí ioncain na saoráidí cóireála údaráithe agus na n-oibreoirí bainistithe dramhaíola eile a chur i gcuntas, arb ioncain é a fhaightear ó dhíol páirteanna nó comhpháirteanna spártha athlámhe agus amhábhair tánaisteach a aisghabhtar ó fheithiclí a bhfuil a ré caite. Chuige sin, ba cheart do na húdaráis inniúla, i gcomhar le táirgeoirí agus le hoibreoirí bainistithe dramhaíola, faireachán a dhéanamh ar mheánchostais na n-oibríochtaí bailiúcháin, athchúrsála agus cóireála, mar aon le leibhéal na ranníocaíochtaí airgeadais a íocann na táirgeoirí chun a áirithiú go mbeidh leithdháileadh costas cothrom i bhfeidhm idir na hoibreoirí leasmhara uile.
- (56) Ba cheart do ranníocaíocht airgeadais na dtáirgeoirí costas na bhfeachtas oideachais a chumhdach freisin arb é is aithne dóibh an pobal a chur ar an eolas agus bailiú feithiclí a bhfuil a ré caite a mhéadú, chomh maith le costas bhunú an chórais fógartha chun deimhneithe scriosta a eisiúint agus a aistriú agus sonraí a bhailiú agus a thuairisciú do na húdaráis inniúla. Ina theannta sin, ós rud é go dtugtar isteach leis an Rialachán seo athruithe maidir le freagracht airgeadais na dtáirgeoirí chun feithiclí a bhfuil a ré caite a bhailiú, a chumhdaítear le Treoir 2000/53/CE, ba cheart forálacha iomchuí a dhéanamh chun an t-aistriú ó Threoir 2000/53/CE go dtí an Rialachán seo a chur i gcuntas.
- (57) Táirgeoirí a roghnaíonn a n-oibleagáidí um fhreagracht leathnaithe táirgeora a chomhlíonadh ar bhonn aonair, ba cheart dóibh ráthaíocht a sholáthar freisin a bheidh le húsáid chun costais an bhainistithe feithiclí a bhfuil a ré caite a chumhdach. Ba cheart na ráthaíochtaí sin a úsáid go háirithe i gcásanna ina mbeidh na táirgeoirí lena mbaineann dócmhainneach nó ina scoirfidh siad dá n-oibríochtaí go buan.
- (58) I gcás ina bhfeidhmeoidh táirgeoirí a n-oibleagáidí um fhreagracht leathnaithe táirgeora ar bhonn comhchoiteann laistigh d'eagraíocht um fhreagracht táirgeora, ba cheart na ranníocaíochtaí airgeadais a íocann an táirgeoir a mhodhnú ar bhonn critéir chomhchuíbhithe. Ba cheart dreasachtaí eacnamaíocha a chruthú leis na critéir sin chun go méadóidh na monaróirí an chiorclaíocht i ndearadh agus i dtáirgeadh na bhfeithiclí nua, agus an méid ábhar príomhúil agus athchúrsáilte i bhfeithiclí á chur san áireamh, a mhéid atá páirteanna, comhpháirteanna agus ábhair inti a bhíonn deacair le baint, díchoimeáil, athúsáid nó athchúrsáil, mar aon leis an méid substaintí guaiseacha atá inti. Chun saobhadh an mhargaidh aonair a sheachaint, ba cheart an chumhacht chun gníomhartha a ghlacadh i gcomhréir le hAirteagal 290 CFAE a tharmligean chuig an gCoimisiún i leith an Rialachán seo a fhorlíonadh trí rialacha mionsonracha a leagan síos chun an bealach ba cheart na critéir i dtaca le modhnú na ranníocaíochtaí airgeadais a íoctar le heagraíochtaí um fhreagracht táirgeoirí a chur i bhfeidhm.
- (59) Tá Ballstáit áirithe tar éis struchtúir um fhreagracht leathnaithe táirgeora agus córais bainistithe dramhaíola a bhunú cheana, arb iad is bonn le húdaruíthe náisiúnta agus socruithe conarthacha ábhartha, agus Treoir 2000/53/CE á cur chun feidhme acu. Ba cheart do na Ballstáit sin a bheith in ann leanúint de na struchtúir agus na córais sin a úsáid, ar choinníoll go gcomhlíonann siad an Rialachán seo.
- (60) Is minic a thagann feithiclí chun bheith ina bhfeithiclí a bhfuil a ré caite i mBallstát seachas an Ballstát inar cuireadh ar an margadh iad. Fad is féidir táirgeoir de réir bhrí an Rialachán seo a shainaithint sa Bhallstát ina dtagann an fheithicil chun bheith ina feithicil a bhfuil a ré caite, ba cheart don táirgeoir sin na costais ghaolmhara a bhaineann le bailiú agus cóireáil a chumhdach. Mar sin féin, ós rud é nach féidir i gcónaí táirgeoir a shainaithint sa Bhallstát ina dtagann an fheithicil chun bheith ina feithicil a bhfuil a ré caite tar éis di teorainn a thrasnú, is gá freisin rialacha a thabhairt isteach maidir le sásra um leithdháileadh costas trasteorann nár cheart feidhm a bheith aige ach amháin maidir leis an gcás sonrach sin agus i gcás feithiclí de chatagóir M_1 agus N_1 amháin. Ba cheart a áirithiú leis na rialacha sin go gcumhdófar na costais bhailiúcháin agus chóireála a thabhaíonn na hoibreoirí bainistithe dramhaíola sa Bhallstát ina dtagann an fheithicil chun bheith ina feithicil a bhfuil a ré caite. Níor cheart feidhm a bheith ag na hoibleagáidí a eascraíonn as an sásra um leithdháileadh costas trasteorann, lena n-áirítear ionadaithe údaráithe a cheapadh i ngach Ballstát, maidir le hallmhaoineoirí ná dáileoirí, chun ualach riaracháin ar na hoibreoirí sin a sheachaint. Ba cheart é a bheith d'oibleagáid ar gach monaróir feithiclí de chatagóirí M_1 agus N_1 ionadaí údaráithe a cheapadh don sásra trasteorann i ngach Ballstát, fógra a thabhairt do na húdaráis inniúla faoi na hainmniúcháin agus sásraí a chur ar bun le haghaidh comhar trasteorann le hoibreoirí bainistithe dramhaíola ábhartha. Ba cheart do mhonaróirí a bheith in ann sainordú a thabhairt d'eagraíocht um fhreagracht táirgeoirí gníomhú mar ionadaí údaráithe orthu le haghaidh an tsásra trasteorann. I gcás monaróirí atá bunaithe lasmuigh den Aontas, ba cheart é a bheith indéanta ionadaí aonair an mhonaróra san Aontas dá dtagraítear in Airteagal 13(4) de Rialachán (AE) 2018/858 a cheapadh chun na hoibleagáidí maidir leis an sásra trasteorann a chomhlíonadh agus chun sásra comhair trasteorann a bhunú. Ach sásra trasteorann den sórt sin a thabhairt isteach, rannchuidítear le cothroime iomaíochta a chruthú idir na saoráidí cóireála údaráithe ar fud an Aontais.

- (61) Chun a áirithiú go gcomhlíonfar na hoibleagáidí sin agus chun saobhadh an mhargaidh aonair a sheachaint, ba cheart an chumhacht chun gníomhartha a ghlacadh i gcomhréir le hAirteagal 290 CFAE a tharmligean chuig an gCoimisiún i leith tuilleadh rialacha mionsonraithe a leagan síos maidir leis na hoibleagáidí ar na táirgeoirí, na Ballstáit agus na hoibreoirí bainistithe dramhaíola agus tréithe na sásraí trasteorann.
- (62) Réamhriachtanas lárnach le haghaidh chóireáil fhónta na bhfeithiclí a bhfuil a ré caite is ea go ndéanfar na feithiclí uile a bhfuil a ré caite a bhailiú. Dá bhrí sin, ba cheart oibleagáidí áirithe a bhaineann leis an mbailiú a fhorchur leis an Rialachán seo go príomha ar na táirgeoirí agus, go tánaisteach, ar na Ballstáit. Ba cheart do tháirgeoirí a áirithiú go mbaileofar na feithiclí uile a bhfuil a ré caite a chuir siad ar fáil ar an margadh den chéad uair i gcríoch Ballstáit. Chuige sin, ba cheart do tháirgeoirí nó d'eagraíochtaí um fhreagracht táirgeoirí na córais bhailiúcháin a chur ar bun nó páirt a ghlacadh ina gcur ar bun agus ba cheart do na Ballstáit na bearta uile is gá a ghlacadh chun a áirithiú go mbeidh na córais bhailiúcháin i bhfeidhm agus go gcumasaíonn na córais sin cuspóirí an Rialacháin seo a chomhlíonadh. Leis na córais bhailiúcháin, ba cheart go mbeadh úinéirí feithiclí agus sealbhóirí feithiclí eile in ann an fheithicil a sheachadadh ar shaoráid chóireála údaráithe nó pointe bailiúcháin gan iarrachtaí ná costais gan ghá. Is éard a chiallaíonn sé sin go hiarbhaí gur cheart críoch iomlán gach Ballstáit a chumhdach go hiomchuí leis na córais sin agus a áirithiú go mbeidh fáil leormhaith ar shaoráidí cóireála údaráithe nó ar phointí bailiúcháin. Leis na córais sin, ba cheart gur féidir gach branda feithiclí a bhfuil a ré caite a bhailiú, mar aon le dramhpháirteanna ó dheisiú feithiclí.
- (63) Níor cheart feithiclí a bhfuil a ré caite a chóireáil ach amháin i saoráidí cóireála údaráithe, agus dá réir sin, bíonn ról rithábachtach ag na saoráidí sin i mbailiú na bhfeithiclí a bhfuil a ré caite. Mar sin féin, chun an bailiú a éascú agus infhaighteacht leormhaith na saoráidí a bhailíonn feithiclí a bhfuil a ré caite a áirithiú, foráiltear sa Rialachán seo gur féidir pointí bailiúcháin a bhunú. Bheadh ról na bpointí sin teoranta do bhailiú feithiclí a bhfuil a ré caite, iad a stóráil i ndálaí cearta agus iad a iompar chuig an tsaoráid chóireála údaráithe. Is gá cead sonrach chun pointe den sórt sin a oibriú. Ba cheart é a cheangal ar phointí bailiúcháin na feithiclí uile a bhfuil a ré caite a sheachadadh ar shaoráidí cóireála údaráithe.
- (64) Chun na feithiclí uile a bhfuil a ré caite a bhailiú go héifeachtach, is gá an pobal a chur ar an eolas gurb ann do na córais bhailiúcháin. Ba cheart úinéirí feithiclí a bheith ar an eolas gur féidir leo feithicil a bhfuil a ré caite a sheachadadh i bprionsabal, in éineacht leis an gceallra feithicle leictirí nó dá uireasa, ar phointe bailiúcháin nó ar shaoráid chóireála údaráithe saor in aisce, mura bhfuil páirteanna bunriachtanacha amhail an mótar ríomhthiomána, an t-inneall nó píosaí móra iomadúla den chabhalra ar iarraidh, chun gníomhaíochtaí díchóimeála neamhdhleathacha a chiorrú. I gcás ceallra feithicle leictirí a bheith ar iarraidh, ba cheart d'úinéir na feithicle a chruthú gur láimhseáil oibreoir gairmiúil an ceallra i gcomhréir le Rialachán (AE) 2023/1542. Chun cosc a chur ar dhíchóimeáil neamhdhleathach páirteanna agus comhpháirteanna luachmhara ó feithiclí a bhfuil a ré caite agus chun bailiú feithiclí iomlána a bhfuil a ré caite a chur chun cinn, d'fhéadfaí seachadadh saor in aisce feithiclí a bhfuil a ré caite a nascadh le soláthar dreasachtaí airgeadais. Leis an bhfeachtas oideachasúil ó na táirgeoirí nó ó na heagraíochtaí um fhreagracht táirgeoirí, ba cheart na hiarmhairtí don chomhshaol agus do shláinte an duine a bhaineann le feithiclí a bhfuil a ré caite a bhailiú agus a chóireáil go mícheart a chur i láthair freisin.
- (65) Ba cheart don tsaoráid chóireála údaráithe deimhniú scriosta a eisiúint d'úinéir deiridh na feithicle tráth a sheachadtar an fheithicil a bhfuil a ré caite. Is gá sin chun maoirseacht cheart ar bhainistiú na bhfeithiclí a bhfuil a ré caite a áirithiú. Leagtar síos na híoscheanglais maidir le deimhnithe den sórt sin faoi láthair i gCinneadh 2002/151/CE ón gCoimisiún ⁽¹⁶⁾ agus ba cheart ábhar an Chinnidh sin a áireamh sa Rialachán seo, in éineacht leis na hoiriúnuithe is gá. Ba cheart deimhnithe den sórt sin a eisiúint i bhformáid leictreonach d'úinéirí deiridh feithiclí a bhfuil a ré caite, agus ba cheart do na saoráidí cóireála údaráithe iad a sholáthar d'údaráis ábhartha an Bhallstáit trí nós imeachta um fhógra leictreonach chun clárú na feithicle a chur ar ceal. Leis an gcóras um fhógra leictreonach, ba cheart go mbeifí in ann an deimhniú scriosta a tharchur agus cóip den fhógra leictreonach a sholáthar d'úinéir deiridh na feithicle agus d'aon oibreoir eacnamaíoch atá ag gníomhú thar ceann an úinéara sin.

⁽¹⁶⁾ Cinneadh 2002/151/CE ón gCoimisiún an 19 Feabhra 2002 maidir le híoscheanglais chun an deimhniú scriosta arna eisiúint i gcomhréir le hAirteagal 5(3) de Threoir 2000/53/CE ó Pharlaimint na hEorpa agus ón gComhairle maidir le feithiclí a bhfuil a ré caite (IO L 50, 21.2.2002, lch. 94, ELI: [http://data.europa.eu/eli/dec/2002/151\(1\)/oj](http://data.europa.eu/eli/dec/2002/151(1)/oj)).

- (66) D'ainneoin oibleagáid i dTreoir 2000/53/CE chun na feithiclí uile a bhfuil a ré caite a aistriú lena gcóireáil chuig saoráid chóireála údaraithe, tá sciar an-mhór feithiclí ann nach eol cá bhfuil siad, agus a d'fhéadfadh a bheith cóireáilte nó onnmhairithe go neamhdhleathach mar fheithiclí a bhfuil a ré caite, nó nach bhfuil a stádas tuairiscithe i gceart d'údarais chlárúcháin na mBallstát. Tagraítear do na feithiclí sin mar 'feithiclí ar iarraidh'. Ba cheart do na Ballstáit a gcomhar a láidriú chun an líon feithiclí ar iarraidh a laghdú. Ach deimhnithe scriosta a eisiúint i mBallstát eile a aithint agus an oibleagáid a bheith ann údarais na mBallstát a chur ar an eolas, faoin áit a bhfuil an fheithicil cláraithe, go bhfuil deimhniú scriosta eisithe ina leith, ba cheart go lamhálfai feithiclí a bhfuil a ré caite a rianú níos fearr.
- (67) Chun bailiú éifeachtach feithiclí a bhfuil a ré caite a áirithiú, ba cheart oibleagáidí sainráite a dhíriú ar úinéirí feithiclí. Ba cheart dóibh a bhfeithicil a sheachadadh, nuair a bhaineann siad an chéim deireadh ré amach, ar phointí bailiúcháin nó saoráidí cóireála údaraithe. Nuair a dhéantar damáiste d'fheithicil agus nuair a bhíonn baint ag cuideachtaí árachais lena ndearbhú mar chailteanas iomlán teicniúil nó eacnamaíoch, ba cheart don chuideachta árachais nó d'aon saineolaí mótarfheithicil eile atá ag gníomhú thar a ceann measúnú a dhéanamh freisin ar cé acu atá nó nach bhfuil an fheithicil ina feithicil a bhfuil a ré caite i gcomhréir leis an Rialachán seo. I gcás feithiclí tréigthe, ba cheart do na húdarais ábhartha rialacha a leagan amach chun feithicil a dhearbhu mar fheithicil a bhfuil a ré caite agus leanúint ar aghaidh i gcomhréir leis an Rialachán seo. D'fhéadfadh sé go n-áireofaí ar fheithiclí tréigthe, mar shampla, feithiclí a fhágtar gan faire nó go neamhdhleathach ar mhaoín phoiblí, nó feithiclí atá páirceáilte ar mhaoín phríobháideach gan toiliú úinéir na maoine, nó feithiclí nár éilíodh ar ais tar éis do na húdarais inniúla fógra a thabhairt d'úinéir na feithicle.
- (68) Chun cóireáil aonfhoirmeach agus neamhdhióbhálach don chomhshaol a áirithiú i gcás feithiclí a bhfuil a ré caite san Aontas, tá sé fíor-riachtanach a áirithiú go nglacadh agus go ndéileálfadh na saoráidí cóireála údaraithe leis na feithiclí a bhfuil a ré caite, na páirteanna, na comhpháirteanna agus na hábhair uile, lena n-áirítear dramhpháirteanna a eascraíonn as deisiúcháin ar fheithiclí, i gcomhréir leis na coinníollacha a leagtar amach ina gceadanna, agus i gcomhréir leis na ceanglais a leagtar amach sa Rialachán seo, sna teicnící is fearr atá ar fáil, agus i dTreoir 2010/75/AE ó Pharlaimint na hEorpa agus ón gComhairle ⁽¹⁷⁾. Chun na ceanglais bhainte, na ceanglais cháilíochta agus na spriocanna aisghabhála ábhair a chomhlíonadh, is féidir gur oibreoir bainistithe dramhaíola aonair a dhéanfaidh cóireáil iomlán ar fheithicil a bhfuil a ré caite nó go ndéanfar í laistigh de shuiteáil aonair, ach ní gá an chóireáil sin a dhéanamh amhlaidh.
- (69) I bhfianaise an phríomhróil atá ag saoráidí cóireála údaraithe le linn feithiclí a bhfuil a ré caite a bhainistiú ar bhealach nach ndéanann dochar don chomhshaol ná do shláinte an duine agus a rannchuidíonn le cuspóirí geilleagair chiorclaigh an Aontais a bhaint amach, is gá oibleagáidí a leagan síos a mbeidh feidhm acu maidir leis na saoráidí sin agus lena gcumhdófar a gcuid gníomhaíochtaí uile, ó ghlacadh agus stóráil feithicle a bhfuil a ré caite go dtí an chóireáil deiridh a ndéantar uirthi.
- (70) Chun inrianaitheacht a gcuid gníomhaíochtaí a áirithiú, lena n-áirítear cáilíocht an draimh nó ábhar ionchuir ábhartha eile, ba cheart do na saoráidí cóireála údaraithe na hoibríochtaí cóireála a dhéanann siad a dhoiciméadú agus an taifead orthu a stóráil go leictreonach ar feadh 3 bliana ar a laghad, agus ba cheart dóibh a bheith in ann an taifead sin a chur faoi bhráid na n-údarás náisiúnta ábhartha, ar iarraidh a fháil.
- (71) Is é díthruailliú feithicle a bhfuil a ré caite an chéad chéim i dtreo cosc a chur ar dhamáiste don chomhshaol, ar shláinte an duine agus ar rioscaí don tsábháilteacht ceirde. Dá bhrí sin, tá sé bunriachtanach go ndéanfaí na hoibríochtaí díthruaillithe is gá ar fheithicil a bhfuil a ré caite laistigh de 30 lá tar éis í a sheachadadh ar an tsaoirid chóireála údaraithe, sula ndéantar aon chóireáil bhreise ar an bhfeithicil sin a bhfuil a ré caite. Le linn na céime sin, ba cheart dramh-olaí a bhailiú agus a stóráil ar leithligh ó na sreabháin agus na leachtanna eile, agus ba cheart iad a chóireáil a thuilleadh i gcomhréir le Treoir 2008/98/CE. Ba cheart caitheamh le cuisneáin i gcomhréir le Rialachán (AE) 2024/573 ó Pharlaimint na hEorpa agus ón gComhairle ⁽¹⁸⁾. Ina theannta sin, ba cheart na páirteanna, comhpháirteanna agus ábhair ina bhfuil luaidhe, caidmiam, mearcair agus cróimiam heicsifhiúsach a bhaint ón bhfeithicil a bhfuil a ré caite, chun éifeachtaí díobhálacha ar an duine nó ar an gcomhshaol a sheachaint.

⁽¹⁷⁾ Treoir 2010/75/AE ó Pharlaimint na hEorpa agus ón gComhairle an 24 Samhain 2010 maidir le hastaíochtaí tionsclaíocha agus tógála beostoic (cosc agus rialú comhtháite ar thruailliú) (IO L 334, 17.12.2010, lch. 17, ELI: <http://data.europa.eu/eli/dir/2010/75/oj>).

⁽¹⁸⁾ Rialachán (AE) 2024/573 ó Pharlaimint na hEorpa agus ón gComhairle an 7 Feabhra 2024 maidir le gáis ceaptha teasa fhluaíonithe, lena leasaítear Treoir (AE) 2019/1937 agus lena n-aisghairtear Rialachán (AE) Uimh. 517/2014 (IO L, 2024/573, 20.2.2024, ELI: <http://data.europa.eu/eli/reg/2024/573/oj>).

- (72) Chun a áirithiú go gcuirfear Rialachán (AE) 2023/1542, chun feidhme i gceart, tá gach ceallra a ionchorpraítear i bhfeithicil le baint ar leithligh ó fheithicil a bhfuil a ré caite agus le stóráil i limistéar ainmnithe le haghaidh tuilleadh cóireála.
- (73) Chun an acmhainneacht a bhaineann le hathúsáid, le hathmhonarú agus le hathriochtú páirteanna agus comhpháirteanna a uasmhéadú, agus chun ardluach ar na hábhair thánaisteacha a dhíorthaítear ó fheithicil a bhfuil a ré caite a chaomhnú, ba cheart páirteanna agus comhpháirteanna áirithe a bhaint ó fheithicil a bhfuil a ré caite go sainordaitheach roimh an mionghearradh. Ba cheart na páirteanna agus na comhpháirteanna sin a bhaint i bpróiseas díchoimeála láimhe, i bpróiseas díchoimeála leath-uathoibrithe nó i bpróiseas díchoimeála uathoibrithe ar bhealach neamhscriosach. Ba cheart go bhféadfaí imeacht ón gceanglas maidir le baint neamhscriosach shainordaitheach páirteanna agus comhpháirteanna, nuair a léiríonn saoráid chóireála údaraithe go mbaineann costais eacnamaíocha dhíréireacha leis an díchoimeáil láimhe, leis an díchoimeáil leath-uathoibrithe nó leis an díchoimeáil uathoibrithe ar bhealach neamhscriosach, ar costais iad nach féidir a chúiteamh leis an ioncam a bhfuiltear ag súil leis ó athúsáid, athmhonarú nó athriochtú na bpáirteanna agus na gcomhpháirteanna sin. I gcás den sórt sin, ba cheart go bhféadfaí na páirteanna agus na comhpháirteanna sin a bhaint ar bhealach scriosach chun ábhair ábhartha a scaradh amach roimh an mionghearradh. Is féidir páirteanna agus comhpháirteanna a dhíolmhú go hiomlán ó bhaint shainordaitheach, má ainmnítear amhlaidh iad sa Rialachán seo, má léiríonn an tsaoirid chóireála údaraithe go scarann teicneolaíochtaí iar-mhionghearrthóra ábhair ó na páirteanna agus na comhpháirteanna lena mbaineann ar bhealach chomh héifeachtúil céanna le próisis láimhe, le próisis leath-uathoibrithe nó le próisis uathoibrithe, agus go gcomhlíontar critéir agus teorainnluachanna an Rialachán seo. Chun dul chun cinn teicniúil agus eolaíoch a chur i gcuntas, ba cheart an chumhacht chun gníomhartha a ghlacadh i gcomhréir le hAirteagal 290 CFAE a tharmligean chuig an gCoimisiún i leith an larscríbhinn ábhartha a leasú.
- (74) A luaithe a bhainfidh na saoráidí cóireála údaraithe páirteanna agus comhpháirteanna ó fheithicil a bhfuil a ré caite, ba cheart dóibh measúnú cúramach agus cinneadh a dhéanamh cé acu atá nó nach bhfuil na páirteanna agus na comhpháirteanna sin oiriúnach lena n-athúsáid, lena n-athmhonarú nó lena n-athriochtú, bunaithe ar chritéir oibiachtúla atá nasctha leis na gnéithe teicniúla de na páirteanna agus na comhpháirteanna agus na ceanglais sábháilteachta feithicle.
- (75) Le Rialachán (AE) 2023/1542, leagtar amach rialacha maidir le hinbhuanaitheacht, feidhmíocht, sábháilteacht, bailiú, athchúrsáil agus dara húsáid ceallraí, chomh maith le rialacha maidir le faisnéis i dtaobh ceallraí a bhaint le haghaidh oibreoirí eacnamaíocha. Ba cheart an acmhainneacht a bhaineann le dara húsáid ceallraí a chur san áireamh sa Rialachán seo trí cheallraí feithicil leictreacha a eisiamh ó na páirteanna nó na comhpháirteanna bunriachtanacha, ionas go bhféadfar an fheithicil a thabhairt ar lámh lena cóireáil, saor in aisce, gan ceallra na feithicle leictre, ar choinníoll go soláthróidh úinéir deireanach na feithicle doiciméadacht lena gcruthaítear gur lámhseáil oibreoir gairmiúil an ceallra i gcomhréir le Rialachán (AE) 2023/1542.
- (76) Agus aitheantas á thabhairt don acmhainneacht a bhaineann le hathmhonarú agus athriochtú san earnáil mótarfeithicil agus don mhéid a rannchuidíonn siad leis an ngeilleagar ciorclach, is gá soiléireacht dhlíthiúil a sholáthar do na hoibreoirí eacnamaíocha a bhfuil baint acu leis an earnáil sin. Dá bhrí sin, maidir le páirteanna agus comhpháirteanna a bhaintear as feithicil a bhfuil a ré caite nó as oibríochtaí deisiúcháin agus cothabhála, atá oiriúnach lena n-athúsáid láithreach, nó lena n-athmhonarú nó lena n-athriochtú tuilleadh ag oibreoirí gairmiúla, ba cheart a shoiléiriú nár cheart a mheas gur dramhaíl iad. Chun ord na réiteach dramhaíola a urramú agus chun borradh a chur faoi úsáid chiorclach páirteanna spártha, níor cheart srian a chur le haistriú na bpáirteanna ná na gcomhpháirteanna sin idir oibreoirí eacnamaíocha, cé is moite de cheallraí. Ba cheart páirteanna agus comhpháirteanna a bhaintear as feithicil a bhfuil a ré caite a sheiceáil, a ghlanadh agus, i gcás inar gá, a thástáil i gceart ag saoráid chóireála údaraithe ionas go bhféadfaí iad a athúsáid láithreach gan aon réamhphróiseáil eile, nó, i gcásanna eile, go mbeidís oiriúnach lena n-athmhonarú nó lena n-athriochtú tuilleadh. Ba cheart páirteanna agus comhpháirteanna nach bhfuil oiriúnach lena n-athúsáid, lena n-athmhonarú nó lena n-athriochtú a mheas mar dhramhaíl agus ba cheart a n-onnmhairiú a bheith faoi réir Rialachán (AE) 2024/1157 ó Pharlaimint na hEorpa agus ón gComhairle⁽¹⁹⁾. Ba cheart do na húdaráis náisiúnta ábhartha a bheith in ann doiciméadacht a iarraidh, ón tsaoirid chóireála údaraithe a bhain an pháirt nó an chomhpháirt lena mbaineann, i gcás ina ndeimhníonn an tsaoirid chóireála údaraithe sin, trí mheasúnú tiomnaithe, oiriúnacht theicniúil na bpáirteanna agus na gcomhpháirteanna ábhartha lena n-athmhonarú, lena n-athriochtú nó lena n-athúsáid.

⁽¹⁹⁾ Rialachán (AE) 2024/1157 ó Pharlaimint na hEorpa agus ón gComhairle an 11 Aibreán 2024 maidir le loingsithe dramhaíola, lena leasaítear Rialachán (AE) Uimh. 1257/2013 agus (AE) 2020/1056 agus lena n-aisghairtear Rialachán (CE) Uimh. 1013/2006 (IO L, 2024/1157, 30.4.2024, ELI: <http://data.europa.eu/eli/reg/2024/1157/oj>).

- (77) Sa mheastóireacht uaidh ar Threoir 2000/53/CE, shuigh an Coimisiún go gcuireann soláthraithe neamhaitheanta páirteanna agus comhpháirteanna spártha athlámhe ar fáil don phobal agus gur minic a eascraíonn siad as gníomhaíochtaí neamhdhleathacha. Dá bhrí sin, ba cheart ceanglais nua a bhunú maidir le trádáil páirteanna agus comhpháirteanna athlámhe, athmhonaraithe nó athchóirithe. Ba cheart, thar aon ní eile, na páirteanna agus na comhpháirteanna sin a mharcáil le lipéad ar a léirítear ainm na comhpháirte nó na páirte, agus faisnéis teagmhála na saoráide cóireála údairithe a bhain an chomhpháirt nó an pháirt, agus ba cheart iad a chosaint go hiomchuí ar dhamáiste le linn iompar, luchtú agus dhíluchtú na bpáirteanna agus na gcomhpháirteanna. Ba cheart cóip den sonrasc nó den chonradh a bhaineann le haistriú na bpáirteanna sin a bheith ar fáil ag an tsaoráid chóireála údairithe a bhain an chomhpháirt nó an pháirt, i gcás ina n-iarrfaidh an t-údarás inniúil an doiciméadacht sin.
- (78) I gcás inar tomhaltóir é an t-úsáideoir deiridh, chumhdófaí, le Treoir (AE) 2019/771 ó Pharlaimint na hEorpa agus ón gComhairle ⁽²⁰⁾, díolachán na bpáirteanna agus na gcomhpháirteanna athlámhe, athmhonaraithe nó athchóirithe idir gnólachtaí agus tomhaltóirí. Ceanglaítear leis an Treoir sin go mbeidh na hearraí a dhíoltar i gcomhréir leis an gconradh díolacháin agus sonraítear inti dliteanas leigheasanna an díoltóra agus na dtomhaltóirí i gcás easpa comhréireachta, amhail deisiú saor in aisce nó athsholáthar na n-earraí. Ós rud é, de réir bhrí Threoir (AE) 2019/771, gur earraí athlámhe iad na páirteanna agus comhpháirteanna a baineadh agus go bhfuil siad oiriúnach lena n-athúsáid nó lena n-athchóiriú, is féidir leis an díoltóir agus leis an tomhaltóir teacht ar chomhaontú ar thréimhse dhliteanais nó ar theorann níos giorra, nach lú ná bliain amháin, má tá foráil déanta ag an mBallstát lena mbaineann d'fhéidearthacht den sórt sin. Moltar do na hoibreoirí eacnamaíocha lena mbaineann ráthaíochtaí tráchtála maidir leis na páirteanna agus na comhpháirteanna athúsáidte, athmhonaraithe agus athchóirithe a sholáthar do thomhaltóirí agus dá gcustaiméirí in idirbhearta gnólacht le gnólacht.
- (79) Ar mhaithe le sábháilteacht ar bhóithre agus le cosaint an chomhshaoil, níor cheart páirteanna agus comhpháirteanna áirithe a baineadh ó fheithiclí a bhfuil a ré caite a athúsáid, a athmhonarú ná a athríochtú. Níor cheart na páirteanna agus na comhpháirteanna sin a úsáid chun feithiclí nua a dhéanamh, ná i bhfeithiclí a cuireadh ar an margadh cheana féin, ach amháin i gcás ina léirítear sa mheasúnú teicniúil a rinneadh go gcomhlíonann siad na ceanglais feithicle is infheidhme. Níor cheart ach d'oibreoir deisiúcháin agus cothabhála cáilithe na páirteanna sin a shuiteáil.
- (80) Chun forbairt agus feidhmiú cuí an mhargaidh le haghaidh páirteanna agus comhpháirteanna in-athúsáidte, athríochtaithe agus athmhonaraithe agus iarfheistiú feithiclí san Aontas a spreagadh, ba cheart na Ballstáit a spreagadh chun athúsáid, athríochtú agus athmhonarú páirteanna agus comhpháirteanna a dhreasú ar an leibhéal náisiúnta, cibé acu a bhaintear le linn chéime úsáide nó ag céim deireadh ré na feithicle iad, chomh maith le hiarfheistiú feithiclí. Ba cheart na dreasachtaí sin a léiriú sna cláir chun dramhaíl a chosc a cheanglaítear ar na Ballstáit a bhunú de bhun Airteagal 29 de Threoir 2008/98/CE. Ba cheart don Choimisiún an malartú faisnéise idir na Ballstáit a éascú trína gcuid dea-chleachtas a chomhroinnt maidir leis na dreasachtaí a ghlactar ar an leibhéal náisiúnta, d'fhonn faireachán a dhéanamh ar a n-éifeachtacht.
- (81) Sa mheastóireacht uaidh ar Threoir 2000/53/CE, shuigh an Coimisiún go bhfuil an sainmhíniú ar athchúrsáil sa Treoir sin ró-leathan agus nach bhfuil sé i gcomhréir le Treoir 2008/98/CE, toisc go meastar ann gur oibríocht athchúrsála é 'aislónadh'. Dá bhrí sin, leis an Rialachán ba cheart an sainmhíniú ar athchúrsáil a ailíniú le Treoir 2008/98/CE trí aislónadh a eisiáimh óna raon feidhme.
- (82) Ba cheart feabhas leanúnach a chur ar athchúrsáil na bplaisteach uile ó fheithiclí a bhfuil a ré caite, agus tá sé tábhachtach soláthar leordhóthanach ábhar athchúrsáilte a áirithiú chun freastal ar an éileamh atá ann ar phlaistigh athchúrsáilte i bhfeithiclí. Dá bhrí sin, is gá sprioc shonrach athchúrsála 30 % de phlaistigh ó fheithiclí a bhfuil a ré caite a leagan síos. Bheadh an sprioc sin comhlántach leis an sprioc athúsáide agus athchúrsála 85 % agus leis an sprioc athúsáide agus aisghabhála 95 % d'fheithiclí a bhfuil a ré caite de réir meánmheáchan in aghaidh na feithicle agus in aghaidh na bliana. Chun cur chun feidhme na gceanglas sin ag oibreoirí bainistithe dramhaíola a éascú, tá gá le hidirthréimhse 3 bliana. Idir an dá linn, an sprioc atá ann faoi láthair chun 85 % a athúsáid agus a athchúrsáil chomh maith le 95 % d'fheithiclí a bhfuil a ré caite a athúsáid agus a aisghabháil, a leagtar síos le Treoir 2000/53/CE, agus atá bunaithe ar an sainmhíniú ar athchúrsáil sa Treoir sin, ba cheart go leanfaidís d'fheidhm a bheith aici. Ní áireofar i meáchan an phlaistigh a athchúrsáiltear agus i meáchan iomlán na bplaisteach dá dtagraítear sa chéad fhomhír leaistiméirí, teirmithéachtaí seachas cúir pholúireatáin a úsáidtear le haghaidh cúisínithe agus plaistigh ina bhfuil aon substaint dá dtagraítear in Airteagal 7 de Rialachán (AE) 2019/1021 nó atá éilithe ag aon substaint dá dtagraítear in Airteagal 7 den Rialachán sin nuair a sháraítear tairseacha Iarscríbhinn IV a ghabhann leis an Rialachán sin.

⁽²⁰⁾ Treoir (AE) 2019/771 ó Pharlaimint na hEorpa agus ón gComhairle an 20 Bealtaine 2019 maidir le gnéithe áirithe a bhaineann le conarthaí i ndáil le díolacháin earraí, lena leasaítear Rialachán (AE) 2017/2394 agus Treoir 2009/22/CE, agus lena n-aisghairtear Treoir 1999/44/CE (IO L 136, 22.5.2019, lch. 28, ELI: <http://data.europa.eu/eli/dir/2019/771/oj>).

- (83) Tá sé tábhachtach aisghabháil ábhar tánaisteach ardcháilíochta a mhéadú trí fheabhas a chur ar phróisis mhionghearrtha na bhfeithiclí a bhfuil a ré caite. Dá bhrí sin, níor cheart a cheadú feithiclí a bhfuil a ré caite, a bpáirteanna, a gcomhpháirteanna agus a n-ábhair a phróiseáil i mionghearrthóir in éineacht le dramhaíl ó phacáistíocht agus le dramhthrealamh leictreach agus leictreonach, ach amháin má chomhlíontar critéir shonracha agus na ceanglais cháilíochta le haghaidh codáin aschuir.
- (84) Chun cáilíocht na cóireála ar fheithiclí a bhfuil a ré caite a mhéadú tuilleadh, níor cheart go bhféadfaí ach codáin dramhaíola a chur i líonadh talún a eascraíonn as feithiclí mionghearrtha a bhfuil a ré caite, i gcás nach sáraíonn na codáin ina bhfuil dramhaíl neamhthámh na teorainnluachanna a leagtar amach sa Rialachán seo.
- (85) Déantar feithiclí a bhfuil a ré caite a aicmiú mar dhramhaíl ghuaiseach agus ní féidir iad a onnmhairiú chuig tíortha nach tíortha de chuid ECFE iad. Ba cheart go bhféadfaí feithiclí díthruaillithe a bhfuil a ré caite a chóireáil lasmuigh den Aontas i gcónaí, ar choinníoll go ndéantar na feithiclí díthruaillithe sin a bhfuil a ré caite a sheoladh i gcomhréir le Rialachán (AE) 2024/1157.
- (86) I gcás ina seoltar feithicil a bhfuil a ré caite ón Aontas chuig tríú tír, ba cheart don onnmhaireoir fianaise dhoiciméadach arna formheas ag an údarás inniúil sa tír cinn scríbe a sholáthar, lena ndearbhaítear go bhfuil na coinníollacha cóireála coibhéiseach den chuid is mó le ceanglais an Rialacháin seo, agus le ceanglais maidir leis an gcomhshaoil agus maidir le sláinte an duine a chosaint a leagtar síos i reachtaíocht eile de chuid an Aontais, i gcomhréir le Rialachán (AE) 2024/1157.
- (87) Chun a áirithiú go gcaitear le feithiclí a bhfuil a ré caite ar bhealach atá inbhuanaithe ó thaobh an chomhshaoil de, tá sé tábhachtach soiléireacht a sholáthar maidir le stádas feithicle ar feadh a ré ina hiomláine, go háirithe i gcásanna inar gá feithiclí athlámhe a idirdhealú ó fheithiclí a bhfuil a ré caite. Ba cheart a cheangal ar úinéir feithicle a bheartaíonn úinéireacht feithicle athlámhe a aistriú laistigh den Aontas, in imthosca áirithe, doiciméadacht a thíolacadh nach feithicil a bhfuil a ré caite í an fheithicil. Ba cheart a léiriú sa doiciméadacht sin go bhfuil an fheithicil ródacmhainneach nó ba cheart measúnú a sholáthar inti i gcomhréir leis an Rialachán seo, ina bhfuil critéir chun a chinneadh an feithicil a bhfuil a ré caite í an fheithicil. Ba cheart an measúnú sin a dhéanamh ar bhealach cascáideach, ó chritéir cheangailteacha go critéir tháscacha. A luaithe a chomhlíonfar critéir ceangailteach amháin, ba cheart a mheas gur feithicil a bhfuil a ré caite í an fheithicil. Mura gcomhlíontar aon chritéir ceangailteach, ba cheart na critéir tháscacha a sheiceáil. Má bhíonn feidhm ag ceann de na critéir tháscacha sin, bheadh gá le measúnú teicniúil breise chun a chinneadh cad iad na deisiúcháin is gá chun deimhniú ródacmhainneachta a fháil. Bunaithe ar an measúnú teicniúil sin, ba cheart an deis a bheith ag úinéir na feithicle a chinneadh ar cheart an fheithicil a dhiúscairt. Más rud é, laistigh de 5 bliana tar éis an mheasúnaithe theicniúil sin, nach bhfaighidh úinéir na feithicle deimhniú ródacmhainneachta, ba cheart a mheas gur feithicil a bhfuil a ré caite í an fheithicil lena mbaineann. Ar feadh na tréimhse 5 bliana sin, ba cheart gurbh ionann an measúnú teicniúil agus doiciméadacht nach feithicil a bhfuil a ré caite í an fheithicil. Ba cheart gur saineolaí neamhspleách mótarfeithiclí a dhéanann an measúnú deireadh ré, ach is faoi gach Ballstát a bheadh sé cinneadh a dhéanamh cén chaoi ar cheart na saineolaithe neamhspleácha mótarfeithiclí sin a cheapadh. Ba cheart gur gairmithe iad na saineolaithe neamhspleácha mótarfeithiclí a bhfuil saineolas acu i réimse na teicneolaíochta mótarfeithiclí, i réimse an deisiúcháin agus na cothabhála nó i réimse an mheasúnaithe ar luach feithiclí, a cheaptar chun saineolas neamhchlaonta a sholáthar, gan leasanna coinbhleachta a bheith acu leis na páirtithe lena mbaineann. Chun ualaí iomarcacha ar dhaoine nádúrtha nach oibreoirí eacnamaíocha iad a sheachaint agus chun díriú go príomha ar chás fhormhór na bhfeithiclí a fhéadfaidh a bheith a bhfuil a ré caite, níor cheart feidhm a bheith ag an gceanglas doiciméadachta ach amháin maidir leis na húinéirí feithiclí sin in imthosca sonraithe. Ba cheart baint a bheith ag na cásanna sin le díolacháin feithiclí ar dhearbhaigh cuideachta árachais gur cailteanas iomlán eacnamaíoch iad nó i gcás ina dtugtar an díolachán i gcrích go hiomlán trí ardán ar líne, gan an fheithicil a aistriú go fisiciúil idir an díoltóir agus an ceannaitheoir nó aon duine atá ag gníomhú thar a gceann.

- (88) Is gá a áirithiú, i gcás ina ndéanfaidh cuideachta árachais nó aon saineolaí mótarfheithicilí atá ag gníomhú thar a ceann measúnú ar dhamáiste d'fheithicil ar bhain tionóisc di, go ndéanfaí a fhíorú leis an measúnú sin, go háirithe, an gcáilíonn an fheithicil mar fheithicil a bhfuil a ré caite, i gcomhréir leis na critéir a leagtar síos sa Rialachán seo. Chun dul i ngleic le gníomhaíochtaí neamhdhleathacha agus chun sainaithint chuí feithicilí a bhfuil a ré caite a áirithiú, ba cheart údarais inniúla na mBallstát a chumhachtú, i gcás amhrais maidir le stádas feithicle athláimhe, doiciméadacht a iarraidh ar úinéir na feithicle chun a dheimhniú nach feithicil a bhfuil a ré caite í an fheithicil. Ba cheart gur measúnú deireadh ré a dhéanfaí i gcomhréir leis an Rialachán seo nó deimhniú ródacmhainneachta bailí a bheadh sa doiciméadacht sin. Is féidir le húdarais inniúla úsáid a bhaint as an saincheart sin gan beann ar cé acu a bhí nó nach raibh baint ag an bhfeithicil le tionóisc. Tá an cumhachtú sin infheidhme freisin maidir le feithicilí sainchuspóireacha, nár cheart a bheith faoi réir na rialacha lena rialaítear stádas na bhfeithicilí murach sin. Ba cheart na Ballstáit a bheith in ann feithicilí de chatagóir L1e, L2e agus L6e a dhíolmhú ó na rialacha maidir le stádas na feithicle sa reachtaíocht náisiúnta. Ba cheart an chumhacht chun gníomhartha a ghlacadh faoi Airteagal 290 CFAE a tharmligean chuig an gCoimisiún chun na critéir sa Rialachán seo a leasú chun a chinneadh an feithicil a bhfuil a ré caite í feithicil trí chritéir a bhaint ar dá réir a mheastar gur feithicil a bhfuil a ré caite feithicil i gcás ina dtugann dul chun cinn teicneolaíoch i réimsí na hinrianaitheachta, na hindeisitheachta agus na sábháilteachta údar leordhóthanach le scriosadh den sórt sin.
- (89) Chun a áirithiú nach mbainfear an bonn ón margadh inmheánach agus ós rud é go bhfuil dúshlán thábhachtacha chomhshaoil agus sláinte poiblí ag baint le honnmhairiú feithicilí athláimhe mar a dhoiciméadaítear i gClár Comhshaoil na Náisiún Aontaithe, is iomchuí ceanglais shonracha a leagan síos maidir le honnmhairiú feithicilí athláimhe. Ba cheart na ceanglais sin a bhunú ar chritéir oibiachtúla ar dá réir ní feithicil a bhfuil a ré caite feithicil athláimhe agus ní mór í a bheith ródacmhainneach de bhun Threoir 2014/45/AE ó Pharlaimint na hEorpa agus ón gComhairle⁽²¹⁾. Ba cheart a áirithiú leis sin nach féidir ach feithicilí athláimhe atá oiriúnach lena dtiomáint ar bhóithre an Aontais a onnmhairiú chuig tríú tír. Chun go bhféadfaidh údarais chustaim a fhíorú go mbeidh na ceanglais sin á gcomhlíonadh tráth an onnmhairiúcháin, ba cheart a cheangal ar aon duine a onnmhairéoidh feithicil athláimhe an Uimhir Aitheantais Feithicle (VIN) a sholáthar do na húdarais sin mar aon le ráiteas lena ndearbhaítear nach feithicil a bhfuil a ré caite í an fheithicil athláimhe agus go meastar í a bheith ródacmhainneach.
- (90) Tá sé tábhachtach sásra a bhunú lena bhféadfar fíorú éifeachtach a dhéanamh go bhfuil na ceanglais onnmhairiúcháin á gcomhlíonadh ag feithicilí athláimhe gan bac a chur ar an trádáil idir an tAontas agus tríú tíortha. Dá bhrí sin, ba cheart don Choimisiún córas leictreonach a bhunú, á chur ar a gcumas do na húdarais sna Ballstáit faisnéis a mhalartú agus a fhíorú i bhfíor-am faoin VIN agus faoi stádas ródacmhainneachta na bhfeithicilí athláimhe atá le honnmhairiú. I bhfianaise na ngnéithe agus na bhfeidhmiúlachtaí atá aige cheana féin atá nasctha le faisnéis a bhaineann le feithicilí atá cláraithe san Aontas a chomhroinnt idir údarais chlárúcháin feithicilí, d'fhorbair an Coimisiún MOVE-HUB, ar ardán malartaithe teachtaireachtaí é, chun teachtaireachtaí a mhalartú chun cláir leictreonacha náisiúnta na mBallstát a idirnascaidh. Ba cheart do na Ballstáit a bheith in ann an Córas Eorpach Faisnéise maidir le Gluaisteáin agus Ceadúnais Tiomána (EUCARIS) a úsáid chun nascadh le córas leictreonach MOVE-HUB. I láthair na huair, leis an ardán éascaítear idirnascaidh leictreonach seo a leanas go léir: cláir de ghnóthais iompair de bhóthar (ERRU), na cláir um cheadúnais tiomána (RESPER), na cláir um oiliúint ghairmiúil do thiománaithe (ProDriveNet), an fógra maidir le teipeanna cigireachta cois bóthair ar fheithicilí (RSI) agus na cláir um chártaí tacagraif tiománaithe (TACHOnet). Dá bhrí sin, ba cheart feidhmiúlachtaí MOVE-HUB a leathnú tuilleadh chun go bhféadfar faisnéis a mhalartú agus a fhíorú maidir leis an VIN agus maidir le stádas ródacmhainneachta na bhfeithicilí athláimhe atá le honnmhairiú. Chun go bhféadfaidh na húdarais chustaim a fhíorú go leictreonach agus go huathoibríoch an gcomhlíonann feithicil athláimhe atá le honnmhairiú na ceanglais onnmhairiúcháin, ba cheart an córas leictreonach a oibríonn MOVE-HUB a idirnascaidh le Timpeallacht an Ionaigh Ilfhreastail AE maidir le Custam, i gcomhréir le Rialachán (AE) 2022/2399 ó Pharlaimint na hEorpa agus ón gComhairle⁽²²⁾. Déantar foráil sa Rialachán sin do chreat cuimsitheach de rialuithe uathoibríthe, a bhfuil feidhm acu maidir le foirmiúlacht neamhchustam shonrach de chuid an Aontais. Dá bhrí sin, ba cheart na príomheilimintí atá le rialú a leagan amach sa Rialachán seo, agus is faoi Rialachán (AE) 2022/2399 a leagfaí síos na bearta teicniúla de chur chun feidhme an rialaithe sin.

(21) Treoir 2014/45/AE ó Pharlaimint na hEorpa agus ón gComhairle an 3 Aibreán 2014 maidir le tástálacha tréimhsiúla ródacmhainneachta ar mhótarfheithicilí agus ar leantóirí mótarfheithicilí agus lena n-aisghairtear Treoir 2009/40/CE (IO L 127, 29.4.2014, lch. 51, ELI: <http://data.europa.eu/eli/dir/2014/45/oj>).

(22) Rialachán (AE) 2022/2399 ó Pharlaimint na hEorpa agus ón gComhairle an 23 Samhain 2022 lena mbunaítear Timpeallacht Ionaigh Ilfhreastail an Aontais Eorpaigh maidir le Custaim agus lena leasaítear Rialachán (AE) Uimh. 952/2013 (IO L 317, 9.12.2022, lch. 1, ELI: <http://data.europa.eu/eli/reg/2022/2399/oj>).

- (91) Chun coinníollacha aonfhoirmeacha a áirithiú maidir le cur chun feidhme na gceanglas onnmhairiúcháin, ba cheart cumhachtaí cur chun feidhme a thabhairt don Choimisiún chun na córais leictreonacha is gá a fhorbairt agus chun iad a dhéanamh oibríochtúil leis na córais náisiúnta.
- (92) Ba cheart d'údaráis inniúla na mBallstát dul i gcomhar le chéile chun cur chun feidhme éifeachtach a áirithiú maidir leis na ceanglais lena rialaítear onnmhairiú feithiclí athláimhe agus chun cúnamh frithpháirteach a sholáthar. Ba cheart malartú faisnéise a áireamh leis an gcúnamh sin chun stádas feithiclí roimh a n-onnmhairiú a fhíorú, lena n-áirítear faisnéis chlárúcháin a dhearbhu sa Bhallstát ina raibh siad cláraithe roimhe sin. Ba cheart an méid seo a leanas, inter alia, a bheith i gceist leis an gcomhar: rochtain a thabhairt ar dhoiciméid agus ar fhaisnéis ábhartha, lena n-áirítear torthaí na n-cigireachtaí, agus cloí leis an dlí is infheidhme maidir le cosaint sonraí lena rialaítear an t-údarás iarrata. Thairis sin, ar mhaithe le comhar cuimsitheach, ba cheart d'údaráis inniúla na mBallstát dul i gcomhar leis na húdaráis ó thríú tíortha.
- (93) Tá sé tábhachtach go mbíonn údaráis chustaim in ann rialuithe a dhéanamh ar fheithiclí athláimhe atá le honnmhairiú i gcomhréir le Rialachán (AE) Uimh. 952/2013 ó Pharlaimint na hEorpa agus ón gComhairle ⁽²³⁾. Tá sciar nach beag d'fheithiclí athláimhe a fhágann an tAontas ag déanamh ar thíortha ina bhfuil ceanglais maidir le allmhairiú bunaithe nó ina bhféadfaí iad a bhunú, cuir i gcás ceanglais i ndáil le haois na feithicle nó lena hastaíochtaí. Tá sé tábhachtach go mbíonn na húdaráis chustaim, trí Thimpeallacht Ionaid Ilfhreastail an Aontais Eorpaigh maidir le Custam, in ann fíorú leictreonach agus uathoibríoch a dhéanamh, an bhfuil na ceanglais sin á gcomhlíonadh ag feithicil athláimhe atá le honnmhairiú, i gcás ina ndéanfaidh na tríú tíortha lena mbaineann an fhaisnéis faoi na ceanglais sin a fhógairt don Choimisiún go hoifigiúil. Chun comhlíonadh a éascú, ba cheart don Choimisiún na coinníollacha sonracha ar tugadh fógra ina leith agus a bhaineann le cosaint an chomhshaoil nó na sábháilteachta ar bhóithre arna bhforchur ag tríú tíortha a fhoilsiú agus a thabhairt cothrom le dáta ar thairseach thiomnaithe ar líne. Chun an comhshaoil agus an tsábháilteacht ar bhóithre i dtríú tíortha a chosaint, ba cheart an chumhacht chun gníomhartha tarmlichte a ghlacadh i gcomhréir le hAirteagal 290 CFAE a tharmligeann chuig an gCoimisiún i dtaca leis na ceanglais sin a leagan amach.
- (94) Chun cosc a chur ar an riosca go n-onnmhaireofar feithiclí gan na doiciméid is gá lena léirítear VIN agus ródacmhainneacht na feithicle agus ar an riosca nach mbraithfear neamhchomhlíonadh na gceanglas onnmhairithe ach amháin nuair a bheidh an fheithicil imithe ón Aontas cheana féin, níor cheart cur i bhfeidhm nósanna imeachta an teachta isteach i dtaifid an dearbhóra agus an fhéinmheasúnaithe a leagtar amach i Rialachán (AE) Uimh. 952/2013 a lamháil. Leis na nósanna imeachta sin, chuirfí cosc ar údaráis chustaim rialuithe fíor-ama a dhéanamh trí Thimpeallacht Ionaid Ilfhreastail an Aontais Eorpaigh maidir le Custam, rud a mhéadódh an riosca go sárófaí rialacha an Aontais maidir le honnmhairiú feithiclí athláimhe.
- (95) Sa mheastóireacht uaidh ar Threoir 2000/53/CE, mheas an Coimisiún gur easnamh sa Treoir sin í an easpa ceanglas maidir le cigireachtaí sainordaitheacha. Dá bhrí sin, ba cheart oibleagáidí áirithe a fhorchur ar na Ballstáit leis an Rialachán seo, arb oibleagáidí iad a bhaineann le gníomhaíochtaí neamhdhleathacha a bhrath i réimse bhailiú, chóireáil agus onnmhairiú na bhfeithiclí a bhfuil a ré caite agus a bpáirteanna agus a gcomhpháirteanna, chomh maith le híoscheanglais a leagan amach maidir le minicíocht na gcigireachtaí, a raon feidhme agus saintréithe na saoráidí atá faoi réir na gcigireachtaí sin. Dhéanfaí iomaíochas na saoráidí cóireála údaráithe i ndáil leis na hoibreoirí neamhdhleathacha a chosaint mar sin agus dhéanfaí comhlíonadh leanúnach coinníollacha na gceadanna agus na gceanglas maidir le bailiú agus cóireáil feithiclí a bhfuil a ré caite a áirithiú.

⁽²³⁾ Rialachán (AE) Uimh. 952/2013 ó Pharlaimint na hEorpa agus ón gComhairle an 9 Deireadh Fómhair 2013 lena leagtar síos Cód Custaim an Aontais (IO L 269, 10.10.2013, lch. 1, ELI: <http://data.europa.eu/eli/reg/2013/952/oj>).

- (96) Chun forfheidhmiú éifeachtach an Rialacháin seo a áirithiú, is gá do na Ballstáit straitéisí cigireachta a bhunú atá ceaptha chun gníomhaíochtaí neamhdhleathacha a bhrath le linn bailiú, cóireáil agus onnmhairiú feithiclí a bhfuil a ré caite, chomh maith lena bpáirteanna agus a gcomhpháirteanna. Ba cheart foráil a dhéanamh leis na straitéisí sin maidir leis na gníomhaíochtaí a leagtar amach sa Rialachán seo chun comhlíonadh a choimirciú agus chun rannchuidiú le cleachtais neamhdhleathacha san earnáil a chosc. Ba cheart do na Ballstáit cigireachtaí a dhéanamh gach bliain féilire. Ba cheart eintitis a oibríonn go dlíthiúil agus gníomhaíochtaí neamhdhleathacha amhrasta araon a chumhdach leis na cigireachtaí sin. Ba cheart an t-íoslión cigireachtaí atá le déanamh gach bliain i ngach Ballstát a bheith ag comhfhreagairt do mhéid nach lú ná 10 % de shaoráidí cóireála údaráithe agus de phointí bailiúcháin údaráithe a oibríonn laistigh den Bhallstát sin. Ní mór a chur i dtábhacht gur cheart na cigireachtaí a dhéantar faoin Rialachán seo a bheith comhlántach le cigireachtaí ar loingsithe feithiclí a bhfuil a ré caite, a rialaítear go cuimsitheach i Rialachán (AE) 2024/1157.
- (97) Ba cheart do na Ballstáit sásraí comhair a bhunú ar an leibhéal náisiúnta agus idirnáisiúnta ionas gur féidir cigireachtaí a dhéanamh ar bhealach éifeachtúil agus é mar chuspóir acu cosc agus brath cóireála neamhdhleathach agus onnmhairiú feithiclí a bhfuil a ré caite a éascú, agus aghaidh a thabhairt ar shaincheist na bhfeithiclí atá ar iarraidh. Ba cheart malartú sonraí clárúcháin feithicle a chumasú leis na sásraí sin, rud a bhfuil gá leis chun na feithiclí a rianú agus chun a sheiceáil an gcuirtear cóireáil chuí orthu nuair a bhaineann siad an chéim deireadh ré amach. Chun comhar a chothú ar fud an Aontais maidir leis na hábhair sin, ba cheart don Choimisiún agus do na Ballstáit úsáid ghníomhach a bhaint as gníomhaireachtaí ábhartha atá ann cheana, amhail Gníomhaireacht an Aontais Eorpaigh i ndáil le Comhar i bhForfheidhmiú an Dlí (Europol), arna bhunú le Rialachán (AE) 2016/794 ó Pharlaimint na hEorpa agus ón gComhairle⁽²⁴⁾, chomh maith le gréasáin forfheidhmiúcháin atá tiomnaithe d'aghaidh a thabhairt ar an gcoireacht chomhshaoil ar fud an Aontais.
- (98) Ba cheart do na Ballstáit gach beart forfheidhmithe is gá a dhéanamh chun dul i ngleic le cóireáil neamhdhleathach ar fheithiclí a bhfuil a ré caite, chun díobhála don chomhshaoil nó do shláinte an duine de dheasca na ngníomhaíochtaí sin a chosc. Dá bhrí sin, aon bhunaíocht nó gnóthas a dhéanann cóireáil ar fheithiclí a bhfuil a ré caite gan cead bailí, nó a sháraíonn na coinníollacha nó na ceanglais a leagtar amach sa chead, ba cheart iad a chur faoi réir pionós. Ba cheart do na Ballstáit féachaint ar bhearta eile freisin, amhail an cead a tharraingt siar nó oibríochtaí oibreora a chur ar fionraí chun comhlíonadh éifeachtach an Rialacháin seo a áirithiú.
- (99) Ba cheart do na Ballstáit rialacha a leagan síos ar phionóis is infheidhme maidir le sárúithe ar an Rialachán seo agus ba cheart dóibh a áirithiú go gcuirtear na rialacha sin chun feidhme. Ba cheart na pionóis a bhunú go háirithe i gcás sárúithe ar na forálacha maidir le honnmhairiú feithiclí athlámhe, maidir le feithiclí a bhfuil a ré caite a sheachadadh ar shaoráidí cóireála údaráithe nó ar phointí bailiúcháin agus maidir le trádáil páirteanna agus comhpháirteanna úsáidte, athmhonaraithe nó athriochtaithe. Ba cheart do na pionóis dá bhforáiltear a bheith éifeachtach, comhréireach agus athchomhairleach.
- (100) Is gá oibleagáidí tuairiscithe a bhunú chun cur chun feidhme cuí reachtaíocht an Aontais, mar aon le faireachán agus meastóireacht uirthi, a áirithiú agus chun faisnéis atá cothrom le dáta agus trédhearcach a sholáthar do mhargáí. Tá sonraí cearta agus bailí fíor-riachtanach chun go bhféadfaidh an Coimisiún measúnú a dhéanamh cé acu a fheidhmíonn nó nach bhfeidhmíonn na bearta dá bhforáiltear sa Rialachán seo i gceart agus chun tuilleadh coigeartuithe a mholadh, i gcás inar gá, a bhfuil sé d'aidhm acu cóireáil fhónta ó thaobh an chomhshaoil de a áirithiú le haghaidh feithiclí a bhfuil a ré caite nó cur chun feidhme an Rialacháin seo a chuíchóiriú. D'fhoill srian a chur leis an ualach a bhaineann le tuairisciú, níor cheart ach sonraí atá fíor-riachtanach chun an Rialachán seo a chur chun feidhme a thuairisciú agus ba cheart an tuairisciú a éascú trí uirlisí digiteacha. Ar bhonn na n-eilimintí sin, ba cheart a shonrú cé na sonraí atá le tuairisciú ag oibreoirí eacnamaíocha do na húdaráis ábhartha agus ag na Ballstáit don Choimisiún. Chun coinníollacha aonfhoirmeacha a áirithiú i gcás cur chun feidhme ceanglais tuairiscithe, ba cheart cumhachtaí cur chun feidhme a thabhairt don Choimisiún. Leis na gníomhartha cur chun feidhme, ar cheart iad a chur in ionad Chinneadh 2005/293/CE ón gCoimisiún⁽²⁵⁾, ba cheart modheolaíocht a leagan síos freisin chun ríomh agus fíorú a dhéanamh ar baineadh amach na spriocanna athúsáide, athchúrsála agus aisghabhála.

⁽²⁴⁾ Rialachán (AE) 2016/794 ó Pharlaimint na hEorpa agus ón gComhairle an 11 Bealtaine 2016 maidir le Gníomhaireacht an Aontais Eorpaigh i ndáil le Comhar i bhForfheidhmiú an Dlí (Europol) agus lena n-aisghairtear Cinntí 2009/371/CGB, 2009/934/CGB, 2009/935/CGB, 2009/936/CGB agus 2009/968/CGB ón gComhairle agus a ghabhann ionad na gCinntí sin (IO L 135, 24.5.2016, lch. 53, ELI: <http://data.europa.eu/eli/reg/2016/794/oj>).

⁽²⁵⁾ Cinneadh 2005/293/CE ón gCoimisiún an 1 Aibreán 2005 lena leagtar síos rialacha mionsonraithe maidir le faireachán a dhéanamh ar na spriocanna athúsáide/aisghabhála agus na spriocanna athúsáide/athchúrsála a leagtar amach i dTreoir 2000/53/CE ó Pharlaimint na hEorpa agus ón gComhairle maidir le feithiclí a bhfuil a ré caite (IO L 94, 13.4.2005, lch. 30, ELI: <http://data.europa.eu/eli/dec/2005/293/oj>).

- (101) Tá ról tábhachtach ag údaráis inniúla na mBallstát maidir le comhlíonadh na n-oibleagáidí a bhunaítear faoin Rialachán seo a bhaineann le bailiú agus bainistiú feithiclí a bhfuil a ré caite a fhíorú, lena n-áirítear rianú níos fearr ag na húdaráis sin ar an áit a bhfuil na feithiclí agus láimhseáil neamhdhleathach feithiclí a bhfuil a ré caite a chomhrac. Dá bhrí sin, ba cheart do na Ballstáit a cheangal go soláthródh oibreoirí bainistithe dramhaíola agus oibreoirí eacnamaíocha ábhartha eile sonraí do na húdaráis inniúla lenar féidir leo faireachán níos fearr a dhéanamh ar an gcaoi a bhfuil na forálacha maidir le bailiú agus bainistíocht feithiclí a bhfuil a ré caite á gcur chun feidhme.
- (102) Chun coinníollacha aonfhoirmeacha a áirithiú maidir leis an Rialachán seo a chur chun feidhme, ba cheart cumhachtaí cur chun feidhme a thabhairt don Choimisiún. Ba cheart na cumhachtaí sin a fheidhmiú i gcomhréir le Rialachán (AE) Uimh. 182/2011 ó Pharlaimint na hEorpa agus ón gComhairle ⁽²⁶⁾.
- (103) Agus gníomhartha tarmligthe á nglacadh faoin Rialachán seo, tá sé tábhachtach, go háirithe, go rachadh an Coimisiún i mbun comhairliúcháin iomchuí le linn a chuid oibre ullmhúcháin, lena n-áirítear ar leibhéal na saineolaithe, agus go ndéanfar na comhairliúcháin sin i gcomhréir leis na prionsabail a leagtar síos i gComhaontú Idirinstitiúideach an 13 Aibreán 2016 maidir le Reachtóireacht Níos Fearr ⁽²⁷⁾. Go háirithe, chun rannpháirtíocht chomhionann in ullmhú na ngníomhartha tarmligthe a áirithiú, faigheann Parlaimint na hEorpa agus an Chomhairle na doiciméid uile ag an am céanna leis na saineolaithe sna Ballstáit, agus bíonn rochtain chórasach ag a gcuid saineolaithe ar chruinnithe ghrúpaí saineolaithe an Choimisiúin a bhíonn ag déileáil le hullmhú na ngníomhartha tarmligthe.
- (104) Iarscríbhinn II a ghabhann le Rialachán (AE) 2019/1020 ó Pharlaimint na hEorpa agus ón gComhairle ⁽²⁸⁾, lena liostaítear reachtaíocht an Aontais um chomhchuíbhiú gan forálacha maidir le pionóis, ba cheart í a leasú chun Treoracha 2000/53/CE agus 2005/64/CE a scriosadh ón liosta sin toisc gur gá go mbeadh forálacha pionóis sa Rialachán atá i bhfeidhm faoi láthair.
- (105) Is gá a áirithiú go ndéanfar forálacha agus ceanglais an Rialacháin seo a bhaineann le cineálcheadú a fhíorú le linn phróiseas cineálcheadaithe an Aontais. Ba cheart, dá bhrí sin, Rialachán (AE) 2018/858 a leasú dá réir.
- (106) Aithníodh go bhfuil feithiclí ar iarraidh ar cheann de na dúshláin is mó a bhaineann le cur chun feidhme Threoir 2000/53/CE. In éagmais córas éifeachtúil lenar féidir faisnéis a mhalartú i bhfíor-am idir na Ballstáit maidir le stádas clárúcháin feithiclí, is amhlaidh a chuirtear bac ar inrianaitheacht agus sainaithníodh é sin mar chúis leis an líon ard 'feithiclí ar iarraidh' san Aontas. Chun aghaidh a thabhairt air sin, mhol an Coimisiún athbhreithniú a dhéanamh ar Threoir 1999/37/CE ón gComhairle ⁽²⁹⁾ maidir leis na doiciméid chlárúcháin le haghaidh feithiclí. Leis an athbhreithniú sin, ba cheart a cheangal ar na Ballstáit sonraí a thaifeadadh go leictreonach, i gcás feithiclí atá cláraithe ar a gcríoch, lenar féidir na cúiseanna le clárú feithicle a chealú a dhoiciméadú i gceart, go háirithe i gcás inar caitheadh le feithicil mar fheithicil a bhfuil a ré caite i saoráid chóireála údaráithe, inar athchláraíodh i mBallstát eile í, inar onnmhairíodh go tríú tír lasmuigh den Aontas í, nó inar goideadh í. Thairis sin, chun cosc a chur ar dhíchóimeáil nó onnmhairiú neamhdhleathach feithiclí a díchláraíodh go sealadach, ba cheart é a chur d'oibleagáid ar úinéirí feithiclí aon athrú ar a n-úinéireacht a thuairisciú go pras don údarás náisiúnta clárúcháin feithiclí. Leis na leasuithe sin, comhlánaítear na ceanglais atá ar na Ballstáit cheana sonraí a thaifeadadh go leictreonach maidir le gach feithicil atá cláraithe ar a gcríoch agus cuirtear leis na ceanglais sin.

⁽²⁶⁾ Rialachán (AE) Uimh. 182/2011 ó Pharlaimint na hEorpa agus ón gComhairle an 16 Feabhra 2011 lena leagtar síos na rialacha agus na prionsabail ghinearálta a bhaineann leis na sásraí maidir le rialú ag na Ballstáit ar fheidhmiú cumhachtaí cur chun feidhme ag an gCoimisiún (IO L 55, 28.2.2011, lch. 13, ELI: <http://data.europa.eu/eli/reg/2011/182/oj>).

⁽²⁷⁾ IO L 123, 12.5.2016, lch. 1, ELI: http://data.europa.eu/eli/agree_interinstitut/2016/512/oj.

⁽²⁸⁾ Rialachán (AE) 2019/1020 ó Pharlaimint na hEorpa agus ón gComhairle an 20 Meitheamh 2019 maidir le faireachas margaidh ar tháirgí agus comhlíonadh táirgí agus lena leasaítear Treoir 2004/42/CE agus Rialachán (CE) Uimh. 765/2008 agus (AE) Uimh. 305/2011 (IO L 169 25.6.2019, lch. 1, ELI: <http://data.europa.eu/eli/reg/2019/1020/oj>).

⁽²⁹⁾ Treoir 1999/37/CE ón gComhairle an 29 Aibreán 1999 maidir le doiciméid chlárúcháin le haghaidh feithiclí (IO L 138, 1.6.1999, lch. 57, ELI: <http://data.europa.eu/eli/dir/1999/37/oj>).

- (107) I bhfianaise an ghá atá ann ardleibhéal cosanta ar an gcomhshaol a áirithiú agus an dul chun cinn eolaíoch a chur i gcuntas, ba cheart don Choimisiún tuarascáil a chur faoi bhráid Pharlaimint na hEorpa agus na Comhairle maidir le cur i bhfeidhm an Rialacháin seo agus an tionchar atá aige ar fheidhmiú an mhargaidh aonair agus ar an gcomhshaol. Ba cheart don Choimisiún, inter alia, meastóireacht a áireamh ina thuarascáil ar na forálacha maidir le feithiclí nua a dhearadh, lena n-áirítear na spriocanna i gcás in-athúsáidteachta, in-athchúrsáilteachta agus in-aisghabhálachta, maidir le bainistiú feithiclí a bhfuil a ré caite, lena n-áirítear na spriocanna athchúrsála, agus pionóis chomh maith le measúnú ar an ngá atá le raon feidhme na bhforálacha a leathnú tuilleadh, ar forálacha iad is infheidhme maidir le feithiclí de chatagóir L, feithiclí tromshaothair, feithiclí a chineálcheadaítear i gcineálcheadú ilchéimneach agus maidir le mótarcharbháin, agus lena n-áirítear carbháin leantóra a thagann faoi raon feidhme an Rialacháin seo. Ba cheart don mheastóireacht sin díriú ní hamháin ar ghnéithe a bhaineann le cóireáil feithiclí a bhfuil a ré caite, ach freisin ar an ábharthacht agus ar an mbreisluach a bhaineann le ceanglais dearaidh a leagan síos agus meastóireacht a dhéanamh ar a mhéid a réitíodh saincheist na bhfeithiclí atá ar iarraidh, lena n-áirítear meastacháin ar líon na bhfeithiclí atá ar iarraidh agus ar thionchar na mbeart maidir le honnmhairiú feithiclí athláimhe, agus ar an ngá atá le bearta breise a áireamh chun aghaidh a thabhairt ar shaincheist inrianaitheacht na bhfeithiclí. Maidir leis sin, ba cheart athbhreithniú a dhéanamh sa mheastóireacht sin ar éifeachtacht, idir-inoibritheacht agus iontaofacht na gcóras náisiúnta clárúcháin feithiclí agus ar a malartú trasteorann faisnéise chun sainaithint, stádas agus inrianaitheacht chruinn feithiclí ar feadh a saolré a áirithiú. Ba cheart don Choimisiún athbhreithniú a dhéanamh freisin ar staid na forbartha teicneolaíche agus ar fheidhmíocht chomhshaoil an ábhair phlaistigh bhithbhunaithe i bhfeithiclí agus ar leaistiméirí a dhíorthaítear ó athphróiseáil bonn i bhfeithiclí nua agus d'fhéadfadh sé togra reachtach a thiolaicadh chun spriocanna ábhartha a leagan síos, i gcás inarb iomchuí. I gcás leaistiméirí a dhíorthaítear ó athphróiseáil bonn, ba cheart tús áite a thabhairt do mheasúnú a dhéanamh ar a mhéid is féidir iad a chomhtháthú sna spriocanna atá ann cheana i gcás ábhar plaisteach athchúrsáilte.
- (108) Ba cheart a áireamh sa tuarascáil ón gCoimisiún freisin meastóireacht ar na bearta a bhaineann le faisnéis a sholáthar faoi shubstaintí i bhfeithiclí ar ábhar imní iad agus ar a mhéid is gá le feabhas a chur ar inrianaitheacht na substaintí sin. Ba cheart meastóireacht a dhéanamh inti freisin ar cé acu is gá nó nach gá bearta a thabhairt isteach lena dtabharfaí aghaidh ar na substaintí is féidir difear a dhéanamh do chóireáil feithiclí nuair a bhaineann siad an chéim deireadh ré amach, chun í a ailíniú ar bhonn níos dlúithe le Rialachán (AE) 2024/1781.
- (109) Ba cheart don Choimisiún meastóireacht a dhéanamh freisin, bunaithe ar na dearbhuithe a dhéanann monaróirí, i dtaobh an bhfuil monaróirí ar an mbóthar ceart chun na spriocanna maidir le plaisteach athchúrsáilte a chomhlíonadh. Ba cheart meastóireacht a dhéanamh sa mheasúnú go háirithe ar infhaighteacht teicneolaíochtaí oiriúnacha athchúrsála plaisteacha, ar infhaighteacht leordhóthanach plaistigh athchúrsáilte, ar leibhéal cáilíochta an phlaistigh athchúrsáilte i gcomparáid leis an leibhéal sábháilteachta is gá agus ar dheacrachtaí teicniúla agus eacnamaíocha chun an sprioc a bhaint amach. I gcás inarb iomchuí, ba cheart togra reachtach ón gCoimisiún chun na forálacha ábhartha den Rialachán seo a leasú a bheith ag gabháil leis an meastóireacht.
- (110) Is gá foráil a dhéanamh chun am leordhóthanach a thabhairt d'oibreoirí eacnamaíocha a n-oibleagáidí faoin Rialachán seo a chomhlíonadh, agus do na Ballstáit chun an bonneagar rialacháin is gá a bhunú chun é a chur i bhfeidhm. Ba cheart, dá bhrí sin, cur i bhfeidhm an Rialacháin seo a chur siar.
- (111) Chun gur féidir leis na Ballstáit na bearta riaracháin is gá a dhéanamh maidir le córais bhailiúcháin a bhunú, agus leanúnachas a choimeád le haghaidh oibreoirí eacnamaíocha agus oibreoirí bainistithe dramhaíola, ba cheart aisghairm Threoir 2000/53/CE a chur siar.
- (112) Ní athraítear leis an Rialachán seo na rialacha maidir le srianta ar úsáid luaidhe, caidmiam mearcair agus cróimiam heicsifhiúsaigh i bhfeithiclí a bunaíodh faoi Threoir 2000/53/CE ná na díolúintí ó na srianta sin. Mar sin féin, leagtar síos rialacha níos soiléire leis maidir leis an gcaoi a ndéanfar fíorú ar chomhlíonadh na srianta sin, chomh maith le comhlíonadh ceanglas ciorclaíochta eile, le linn an phróisis cineálcheadaithe. Chun a áirithiú go mbeidh am leordhóthanach ag monaróirí chun na rialacha sin a chomhlíonadh, ba cheart a gcur i bhfeidhm a chur siar. Dá bhrí sin, ba cheart forálacha Threoir 2000/53/CE maidir le srianta ar úsáid luaidhe, caidmiam mearcair agus cróimiam heicsifhiúsaigh a bheith i bhfeidhm go dtí go mbeidh feidhm ag na rialacha sa Rialachán seo, chun leanúnachas a áirithiú agus chun a chinntiú nach bhfuil na substaintí sin sna feithiclí a chuirtear ar mhargadh an Aontais, i gcásanna seachas na cásanna dá bhforáiltear sa Treoir sin.

- (113) Ina theannta sin, soláthraítear leis an Rialachán seo forálacha níos soiléire maidir le freagracht leathnaithe táirgeora ná na cinn a leagtar síos i dTreoir 2000/53/CE. Ó tharla go mbíonn roinnt ama i gceist le scéimeanna den sórt sin agus na forálacha náisiúnta is gá maidir le húdarú táirgeoirí agus eagraíochtaí um fhreagracht táirgeoirí a bhunú, ba cheart cur i bhfeidhm na bhforálacha sin a chur siar. Ba cheart forálacha comhfhreagracha Threoir 2000/53/CE leanúint de bheith i bhfeidhm go dtí go mbeidh feidhm ag na forálacha sa Rialachán seo chun leanúnachas a áirithiú maidir leis na táirgeoirí a mhaoiníonn na costais a bhaineann le feithiclí i ndeireadh a ré a bhailiú.
- (114) Tá ceanglais nua sa Rialachán seo maidir le cóireáil feithiclí a bhfuil a ré caite, go háirithe maidir le páirteanna agus comhpháirteanna a bhaint chun a n-athúsáid, a n-athmhonarú nó a n-athriochtú a chur chun cinn chomh maith le cáilíocht na bpróiseas athchúrsála a mhéadú. Teastaíonn am ó oibreoirí bainistithe dramhaíola chun iad féin a oiriúnú do na ceanglais nua sin agus dá bhrí sin, ba cheart a gcur i bhfeidhm a chur siar. Ba cheart forálacha comhfhreagracha Threoir 2000/53/CE leanúint de bheith i bhfeidhm go dtí go mbeidh feidhm ag na ceanglais sa Rialachán seo chun leanúnachas a áirithiú i dtaobh cóireáil feithiclí a bhfuil a ré caite.
- (115) Chun leanúnachas a áirithiú, ba cheart feidhm a bheith ag na hoibleagáidí faoi Threoir 2000/53/CE maidir le tuairisciú agus na hoibleagáidí gaolmhara maidir le tarchur sonraí chuig an gCoimisiún go dtí go nglacfaidh an Coimisiún na rialacha nua maidir le ríomh agus na formáidí tuairiscithe nua faoin Rialachán seo.
- (116) Ba cheart cur i bhfeidhm na bhforálacha uile a bhaineann le feithiclí de chatagóir L agus feithiclí de chatagóirí M₁, M₂, N₁, N₂, N₃ agus O a chur siar chun am leordhóthanach a sholáthar d'oibreoirí chun na ceanglais nua a chomhlíonadh. Tá tábhacht ar leith ag baint leis sin a mhéid a bhaineann le ceadanna le haghaidh saoráidí cóireála údaráithe atá in ann díthruailliú a dhéanamh mar aon le tuilleadh cóireála ar na feithiclí sin.
- (117) Ar mhaithe le soiléireacht, réasúnaíocht agus simpliú, ós rud é go bhfuil na rialacha uile maidir le cineálcheadú mótarfeithiclí i dtaca le hin-athúsáidteacht, in-athchúrsáilteacht agus in-aisghabhálacht na mótarfeithiclí sin sa Rialachán seo, ba cheart aisghairm Threoir 2005/64/CE a chur siar. Leis sin, soláthraítear am leordhóthanach do mhonaróirí chun a áirithiú go gcomhlíonann na cineálacha feithicle a dhearann agus a thógann siad na ceanglais chiorclaíochta agus d'údaráis chineálcheadaithe chun na rialacha nua a chur chun feidhme.
- (118) Maidir le cuspóirí an Rialacháin seo, is é sin rannchuidiú le feidhmiú an mhargaidh aonair, na drochthionchair ó bhainistiú feithiclí a bhfuil a ré caite a chosc agus a laghdú agus ardleibhéal cosanta ar an gcomhshaol agus ar shláinte an duine a áirithiú, ós rud é nach féidir leis na Ballstáit iad a ghnóthú go leordhóthanach agus, de bharr go bhfuil gá le comhchuibhiú, gur fearr is féidir iad a ghnóthú ar leibhéal an Aontais, féadfaidh an tAontas bearta a ghlacadh, i gcomhréir le prionsabal na coimhdeachta a leagtar amach in Airteagal 5 den Chonradh ar an Aontas Eorpach. I gcomhréir le prionsabal na comhréireachta a leagtar amach san Airteagal sin, ní théann an Rialachán seo thar a bhfuil riachtanach chun na cuspóirí sin a ghnóthú.

- (119) Tharraing an Ríocht Aontaithe siar as an Aontas Eorpach an 1 Feabhra 2020. Tugadh an Comhaontú um Tharraingt Siar ⁽³⁰⁾ i gcrích idir an tAontas Eorpach agus an Comhphobal Eorpach do Fhuinneamh Adamhach, de pháirt, agus an Ríocht Aontaithe, den pháirt eile. Tugadh i gcrích é le Cinneadh (AE) 2020/135 ón gComhairle ⁽³¹⁾ agus tháinig sé i bhfeidhm an 1 Feabhra 2020. Leis an gComhaontú um Tharraingt Siar, déantar foráil d'idirthréimhse ar tháinig deireadh léi an 31 Nollaig 2020. Ag deireadh na hidirthréimhse, scoir dlí an Aontais d'fheidhm a bheith aige sa Ríocht Aontaithe, agus tháinig an Prótacal maidir le hÉirinn/Tuaisceart Éireann ('Creat Windsor') ⁽³²⁾, ar dlúthchuid den Chomhaontú um Tharraingt Siar é, i bhfeidhm. I gcomhréir le hAirteagal 5(4) de Chreat Windsor agus le pointe 9 d'Iarscríbhinn 2 a ghabhann le Creat Windsor, tá feidhm ag Treoir 2005/64/CE, chomh maith le gníomhartha dlí an Aontais lena gcuirtear chun feidhme, lena leasaítear nó lena n-ionadaítear an Treoir sin, maidir leis an Ríocht Aontaithe agus sa Ríocht Aontaithe i ndáil le Tuaisceart Éireann. Tagann an Rialachán seo in ionad Threoir 2005/64/CE agus dá bhrí sin bheadh feidhm aige maidir leis an Ríocht Aontaithe agus sa Ríocht Aontaithe i ndáil le Tuaisceart Éireann. I bhfianaise raon feidhme Chreat Windsor, is iomchuí, dá bhrí sin, a shonrú nár cheart feidhm a bheith ag forálacha áirithe den Rialachán seo maidir leis an Ríocht Aontaithe agus sa Ríocht Aontaithe i ndáil le Tuaisceart Éireann,

TAR ÉIS AN RIALACHÁN SEO A GHLACADH:

CAIBIDIL I FORÁLACHA GINEARÁLTA

Airteagal 1

Ábhar

Leis an Rialachán seo, leagtar síos ceanglais chiorclaíochta maidir le dearadh agus táirgeadh feithiclí a bhaineann le hin-athúsáidteacht, in-athchúrsáilteacht agus in-aisghabhálacht agus le húsáid cion athchúrsáilte, atá le fíorú tráth cineálcheadaithe na bhfeithiclí, agus maidir le ceanglais faisnéise agus lipéadaithe le haghaidh páirteanna, comhpháirteanna agus ábhar i bhfeithiclí. Leagtar síos ceanglais leis freisin maidir le freagracht leathnaithe táirgeora, bailiú agus cóireáil feithiclí a bhfuil a ré caite, chomh maith le honnmhairiú feithiclí athlámhse ón Aontas chuig tríú tíortha.

Airteagal 2

Raon feidhme

1. Beidh feidhm ag an Rialachán seo maidir leis an méid seo a leanas:
 - (a) feithiclí agus feithiclí a bhfuil a ré caite de chatagóirí M_1 agus N_1 dá dtagraítear in Airteagal 4(1), pointí (a)(i) agus (b)(i), de Rialachán (AE) 2018/858;
 - (b) ón 1 Meán Fómhair 2029, maidir le feithiclí sainchuspóireacha agus feithiclí sainchuspóireacha a bhfuil a ré caite, mar a shainmhínítear in Airteagal 3, pointe (31), de Rialachán (AE) 2018/858, de chatagóirí M_1 agus N_1 ;
 - (c) ón 1 Meán Fómhair 2031, maidir le feithiclí agus feithiclí a bhfuil a ré caite de chatagóirí M_2 , M_3 , N_2 , N_3 agus O dá dtagraítear in Airteagal 4(1) de Rialachán (AE) 2018/858;
 - (d) ón 1 Meán Fómhair 2031, maidir le feithiclí sainchuspóireacha agus feithiclí sainchuspóireacha a bhfuil a ré caite, mar a shainmhínítear in Airteagal 3, pointe (31), de Rialachán (AE) 2018/858, de chatagóirí M_2 , M_3 , N_2 , N_3 agus O;
 - (e) ón 1 Meán Fómhair 2031 maidir le feithiclí agus feithiclí a bhfuil a ré caite de chatagóir L, dá dtagraítear in Airteagal 4(2) de Rialachán (AE) Uimh. 168/2013 ó Pharlaimint na hEorpa agus ón gComhairle ⁽³³⁾.

⁽³⁰⁾ Comhaontú maidir le Ríocht Aontaithe na Breataine Móire agus Thuaisceart Éireann a bheith ag tarraingt siar as an Aontas Eorpach agus as an gComhphobal Eorpach do Fhuinneamh Adamhach (IO L 29, 31.1.2020, lch. 7, ELI: http://data.europa.eu/eli/treaty/withd_2020/sign).

⁽³¹⁾ Cinneadh (AE) 2020/135 ón gComhairle an 30 Eanáir 2020 maidir le tabhairt i gcrích an Chomhaontaithe maidir le Ríocht Aontaithe na Breataine Móire agus Thuaisceart Éireann a bheith ag tarraingt siar as an Aontas Eorpach agus as an gComhphobal Eorpach do Fhuinneamh Adamhach (IO L 29, 31.1.2020, lch. 1, ELI: <http://data.europa.eu/eli/dec/2020/135/oj>).

⁽³²⁾ Dearbhú Comhpháirteach Uimh. 1/2023 ón Aontas agus ón Ríocht Aontaithe sa Chomhchoiste a bunaíodh leis an gComhaontú maidir le Ríocht Aontaithe na Breataine Móire agus Thuaisceart Éireann a bheith ag tarraingt siar as an Aontas Eorpach agus as an gComhphobal Eorpach do Fhuinneamh Adamhach an 24 Márta 2023 (IO L 102, 17.4.2023, lch. 87).

⁽³³⁾ Rialachán (AE) Uimh. 168/2013 ó Pharlaimint na hEorpa agus ón gComhairle an 15 Eanáir 2013 maidir le ceadú agus faireachas margaidh ar fheithiclí dhá nó trí roth agus cuadrothair (IO L 60, 2.3.2013, lch. 52, ELI: <http://data.europa.eu/eli/reg/2013/168/oj>).

2. D'ainneoin mhír 1, ní bheidh feidhm ag an Rialachán seo maidir leis an méid seo a leanas:
- (a) feithiclí a tháirgtear i sraitheanna beaga, mar a shainmhínítear in Airteagal 3, pointe (30), de Rialachán (AE) 2018/858;
 - (b) feithiclí de chatagóir L a tháirgtear i sraitheanna beaga dá dtagraítear in Airteagal 42 de Rialachán (AE) Uimh. 168/2013;
 - (c) feithiclí arna ndearadh agus arna dtógáil nó arna n-oiriúnú lena n-úsáid ag na seirbhísí armtha amháin, dá dtagraítear in Airteagal 2(2), pointe (d), de Rialachán (AE) 2018/858;
 - (d) feithiclí arna ndearadh agus arna dtógáil lena n-úsáid ag na seirbhísí armtha, ag an gcosaint shibhialta, ag seirbhísí dóiteáin, ag fórsaí atá freagrach as an ord poiblí a choinneáil ar bun agus ag seirbhísí leighis éigeandála, dá dtagraítear in Airteagal 2(2), pointe (e), de Rialachán (AE) Uimh. 168/2013;
 - (e) feithiclí ar díol spéise staire iad, mar a shainmhínítear in Airteagal 3, pointe (7), de Threoir 2014/45/AE, lena n-áirítear a bpáirteanna inaitheanta agus na comhpháirteanna is gá dá ngníomhaíochtaí cothabhála agus is gá chun a stádas stairiúil a chaomhnú don tréimhse ina meastar gur feithiclí ar díol spéise staire iad na feithiclí sin;
 - (f) feithiclí mórspéise cultúrtha don tréimhse ina n-aithníonn na húdaráis inniúla na feithiclí sin go hoifigiúil mar fheithiclí den sórt sin agus i gcomhréir leis an nós imeachta a leagtar amach in Iarscríbhinn 11 a ghabhann leis an Rialachán seo;
 - (g) carbháin leantóra dá dtagraítear i bpointe 5.6 d'Iarscríbhinn I a ghabhann le Rialachán (AE) 2018/858;
 - (h) feithiclí sainchuspóireacha mar a shainmhínítear in Airteagal 3, pointe (31), de Rialachán (AE) 2018/858 de chatagóirí M_2 , M_3 , N_2 , N_3 nó O arna dtáirgeadh ag monaróir ísealtáirgeachta;
 - (i) rothair atá deartha i gcomhair troitheála de chatagóir L1e-A dá dtagraítear i gcritéar (9) d'Iarscríbhinn I a ghabhann le Rialachán (AE) Uimh. 168/2013, nó L1e-B, dá dtagraítear i bpointe 1.1.2 d'Iarscríbhinn XIX a ghabhann le Rialachán Tarmligthe (AE) Uimh. 3/2014 ón gCoimisiún ⁽³⁴⁾.
3. D'ainneoin mhír 1, pointe (c), ní bheidh feidhm ag na forálacha seo a leanas maidir le feithiclí ná feithiclí a bhfuil a ré caite de chatagóirí M_2 , M_3 , N_2 , N_3 agus O:
- (a) Airteagal 4 maidir le hin-athúsáidteacht, in-athchúrsáilteacht agus in-aisghabhálacht feithiclí;
 - (b) Airteagal 5 maidir le ceanglais i dtaca le substaintí i bhfeithiclí;
 - (c) Airteagal 6 maidir le cion íosta athchúrsáilte i bhfeithiclí;
 - (d) Airteagal 8 maidir le hoibleagáidí ginearálta;
 - (e) Airteagal 9 maidir leis an straitéis chiorclaíochta;

⁽³⁴⁾ Rialachán Tarmligthe (AE) Uimh. 3/2014 ón gCoimisiún an 24 Deireadh Fómhair 2013 lena bhforlíontar Rialachán (AE) Uimh. 168/2013 ó Pharlaimint na hEorpa agus ón gComhairle maidir le ceanglais sábháilteachta feidhmiúla feithiclí chun feithiclí dhá nó trí roth agus cuadrothair a cheadú (IO L 7, 10.1.2014, lch. 1, ELI: http://data.europa.eu/eli/reg_del/2014/3/oj).

- (f) Airteagal 10 maidir le dearbhú i dtaca leis an gcion athchúrsáilte atá i bhfeithiclí;
- (g) Airteagal 12 maidir le lipéadú na bpáirteanna, na gcomhpháirteanna agus na n-ábhar atá i bhfeithiclí;
- (h) Airteagal 13 maidir le Pas Digiteach Ciorclaíochta Feithicle;
- (i) Airteagal 21 maidir le modhnú táillí;
- (j) Airteagal 22 maidir leis an sásra um leithdháileadh costas le haghaidh feithiclí a thagann chun bheith ina bhfeithiclí a bhfuil a ré caite i mBallstát eile;
- (k) Airteagal 33 maidir le spriocanna athúsáide, athchúrsála agus aisghabhála;
- (l) Airteagal 35(2) maidir le loingsithe feithiclí a bhfuil a ré caite.

4. D'ainneoin mhír 1, pointe (e), ní bheidh feidhm ag na forálacha seo a leanas maidir le feithiclí ná feithiclí a bhfuil a ré caite de chatagóir L:

- (a) Airteagal 4 maidir le hin-athúsáidteacht, in-athchúrsáilteacht agus in-aisghabhálacht feithiclí;
- (b) Airteagal 5 maidir le ceanglais i dtaca le substaintí i bhfeithiclí;
- (c) Airteagal 6 maidir le cion íosta athchúrsáilte i bhfeithiclí;
- (d) Airteagal 9 maidir leis an straitéis chiorclaíochta;
- (e) Airteagal 10 maidir le dearbhú i dtaca leis an gcion athchúrsáilte atá i bhfeithiclí;
- (f) Airteagal 13 maidir le Pas Digiteach Ciorclaíochta Feithicle;
- (g) Airteagal 21 maidir le modhnú táillí;
- (h) Airteagal 22 maidir leis an sásra um leithdháileadh costas le haghaidh feithiclí a thagann chun bheith ina bhfeithiclí a bhfuil a ré caite i mBallstát eile;
- (i) Airteagal 33 maidir le spriocanna athúsáide, athchúrsála agus aisghabhála;
- (j) Airteagal 35(2) maidir le loingsithe feithiclí a bhfuil a ré caite;
- (k) Airteagal 38 maidir le húdarás inniúil um fheithiclí athlámhe a onnmhairiú chuig tríú tíortha;
- (l) Airteagal 39 maidir le rialuithe agus ceanglais i dtaca le honnmhairiú feithiclí athlámhe;
- (m) Airteagal 40 maidir le fíorú uathoibrithe ar an bhfaisnéis faoi stádas feithicle;
- (n) Airteagal 41 maidir le bainistiú riosca agus rialuithe custaim;
- (o) Airteagal 42 maidir le fionraí;

- (p) Airteagal 43 maidir le scaoileadh le honnmhairiú;
 - (q) Airteagal 44 maidir le diúltú do scaoileadh le honnmhairiú;
 - (r) Airteagal 45 maidir le comhar i measc na n-údarás agus malartú faisnéise;
 - (s) Airteagal 46 maidir le córais leictreonacha.
5. D'ainneoin mhír 1, pointe (b) agus (d), ní bheidh feidhm ag na forálacha seo a leanas maidir le feithiclí sainchuspóireacha ná feithiclí sainchuspóireacha a bhfuil a ré caite:
- (a) Airteagal 4 maidir le hin-athúsáidteacht, in-athchúrsáilteacht agus in-aisghabhálacht feithiclí;
 - (b) Airteagal 6 maidir le cion íosta athchúrsáilte i bhfeithiclí;
 - (c) Airteagal 7 maidir le dearadh chun gur féidir páirteanna agus comhpháirteanna áirithe i bhfeithiclí a bhaint agus a athsholáthar;
 - (d) Airteagal 8 maidir le hoibleagáidí ginearálta;
 - (e) Airteagal 9 maidir leis an straitéis chiorclaíochta;
 - (f) Airteagal 10 maidir le dearbhú i dtaca leis an gcion athchúrsáilte atá i bhfeithiclí;
 - (g) Airteagal 11 maidir le faisnéis faoi bhaint agus athsholáthar na bpáirteanna, na gcomhpháirteanna agus na n-ábhar atá i bhfeithiclí;
 - (h) Airteagal 12 maidir le lipéadú na bpáirteanna, na gcomhpháirteanna agus na n-ábhar atá i bhfeithiclí;
 - (i) Airteagal 13 maidir le Pas Digiteach Ciorclaíochta Feithicle;
 - (j) Airteagal 14 maidir le húdarás inniúil um fheithiclí a bhfuil a ré caite a bhainistiú;
 - (k) Airteagal 15 maidir le saoráidí cóireála údaráithe;
 - (l) Airteagal 17 maidir le hEagraíochtaí um Fhreagracht Táirgeoirí;
 - (m) Airteagal 18 maidir le comhlíonadh na freagrachta leathnaithe táirgeora a údarú;
 - (n) Airteagal 19 maidir le clárú;
 - (o) Airteagal 21 maidir le modhnú táillí;
 - (p) Airteagal 22 maidir leis an sásra um leithdháileadh costas le haghaidh feithiclí a thagann chun bheith ina bhfeithiclí a bhfuil a ré caite i mBallstát eile;
 - (q) Airteagal 33 maidir le spriocanna athúsáide, athchúrsála agus aisghabhála;
 - (r) Airteagal 35(2) maidir le loingsithe feithiclí a bhfuil a ré caite;
 - (s) Airteagal 36 maidir le húinéireacht feithiclí athláimhe a aistriú laistigh den Aontas;
 - (t) Airteagal 37(1) maidir le stádas na feithicle;

- (u) Airteagal 38 maidir le húdarás inniúil um fheithiclí athláimhe a onnmhairiú chuig tríú tíortha;
- (v) Airteagal 39 maidir le rialuithe agus ceanglais i dtaca le honnmhairiú feithiclí athláimhe;
- (w) Airteagal 40 maidir le fíorú uathoibrithe ar an bhfaisnéis faoi stádas feithicle;
- (x) Airteagal 41 maidir le bainistiú riosca agus rialuithe custaim;
- (y) Airteagal 42 maidir le fionraí;
- (z) Airteagal 43 maidir le scaoileadh le honnmhairiú;
- (aa) Airteagal 44 maidir le diúltú do scaoileadh le honnmhairiú;
- (ab) Airteagal 45 maidir le comhar i measc na n-údarás agus malartú faisnéise;
- (ac) Airteagal 46 maidir le córais leictreonacha.

6. D'ainneoin mhír 1, beidh feidhm ag an méid seo a leanas:

- (a) ní bheidh feidhm ag Airteagail 4 go 13 maidir le páirteanna d'fheithicil a cineálcheadaíodh i gcineálcheadú ilchéimneach ar chatagóir M_2 , M_3 , N_2 , N_3 nó O seachas an bhonnfheithicil; beidh feidhm ag na forálacha eile den Rialachán seo a mhéid a bheidh feidhm acu maidir le catagóir na feithicle lena mbaineann;
- (b) ní bheidh feidhm ag Airteagal 5 maidir le feithiclí sainchuspóireacha de chatagóirí M_2 , M_3 , N_2 , N_3 nó O;
- (c) maidir le feithiclí de chatagóir L, ní bheidh feidhm ag Airteagail 7 agus 11 ach amháin maidir le hiontrálacha 1, 2, 3, 4, 5, 7, 10 agus 11 de Chuid C d'Iarscríbhinn VII;
- (d) ní bheidh feidhm ag Airteagal 7 maidir le feithiclí de chatagóirí M_2 , M_3 , N_2 , N_3 agus O ach amháin maidir le hiontrálacha 1, 3, 4 agus 5 de Chuid C d'Iarscríbhinn VII;
- (e) ní bheidh feidhm ag Airteagal 8 maidir le feithiclí de chatagóir L ach amháin i ndáil leis na hoibleagáidí is infheidhme maidir le feithiclí den sórt sin;
- (f) ní bheidh feidhm ag Airteagal 16, pointe (b), maidir le feithiclí de chatagóir L, agus feithiclí de chatagóirí M_2 , M_3 , N_2 , N_3 , nó O agus feithiclí sainchuspóireacha de chatagóirí M_1 , M_2 , M_3 , N_1 , N_2 , N_3 , agus O;
- (g) féadfaidh na Ballstáit feithiclí de chatagóirí L1e, L2e agus L6e a dhíolmhú ó na hoibleagáidí faoi Airteagal 23(6) agus Airteagail 25, 36 agus 37;
- (h) maidir le feithiclí de chatagóir L agus feithiclí de chatagóirí M_2 , M_3 , N_2 , N_3 , agus O agus maidir le feithiclí sainchuspóireacha de chatagóirí M_2 , M_3 , N_2 , N_3 agus O, ní bheidh feidhm ag Airteagal 29 ach amháin maidir le hiontrálacha 1, 2, 3, 4, 5, 7, 10 agus 11 de Chuid C d'Iarscríbhinn VIII;
- (i) maidir le feithiclí de chatagóir L agus maidir le feithiclí de chatagóirí M_2 , M_3 , N_2 , N_3 , agus O, ní bheidh feidhm ag Airteagail 47 go 50 ach amháin maidir le tuairisciú agus forfheidhmiú na n-oibleagáidí is infheidhme maidir le catagóirí feithiclí den sórt sin;

Airteagal 3
Sainmhínte

Chun críocha an Rialacháin seo, beidh feidhm ag na sainmhínte seo a leanas:

- (1) ciallaíonn ‘feithicil’ aon fheithicil mar a shainmhínítear in Airteagal 3, pointe (15), de Rialachán (AE) 2018/858 nó a liostaítear in Airteagal 4(2) de Rialachán (AE) Uimh. 168/2013;
- (2) ciallaíonn ‘feithicil a bhfuil a ré caite’ feithicil ar dramhaíl í mar a shainmhínítear in Airteagal 3, pointe (1), de Threoir 2008/98/CE, nó ar dramhaíl í de réir larscríbhinn I den Rialachán seo;
- (3) ciallaíonn ‘cineál feithicle’ aon chineál feithicle mar a shainmhínítear in Airteagal 3, pointe (32), de Rialachán (AE) 2018/858 nó cineál feithicle mar a shainmhínítear in Airteagal 3, pointe (73), de Rialachán (AE) Uimh. 168/2013;
- (4) ciallaíonn ‘athúsáid’ aon oibríocht ina mbaintear úsáid arís as páirteanna nó comhpháirteanna ó fheithiclí a bhfuil a ré caite chun na críche céanna dár ceapadh iad;
- (5) ciallaíonn ‘in-athúsáidteacht’ an fhéidearthacht páirteanna nó comhpháirteanna a aistríodh ó fheithicil a bhfuil a ré caite a athúsáid;
- (6) ciallaíonn ‘in-athchúrsáilteacht’ an fhéidearthacht páirteanna, comhpháirteanna nó ábhair a aistríodh ó fheithicil a bhfuil a ré caite a athchúrsáil;
- (7) ciallaíonn ‘in-aisghabhálacht’ an fhéidearthacht páirteanna, comhpháirteanna nó ábhair a aistríodh ó fheithicil a bhfuil a ré caite a aisghabháil;
- (8) ciallaíonn ‘soláthróir’ aon duine nádúrtha nó dlítheanach a sholáthraíonn páirteanna, comhpháirteanna nó ábhair do mhonaróir a bhaineann úsáid astu chun feithiclí a mhonarú;
- (9) ciallaíonn ‘plaisteach’ polaiméir de réir bhrí Airteagal 3, pointe (5), de Rialachán (CE) Uimh. 1907/2006, a bhféadfadh breiseáin nó substaintí eile a bheith curtha leis, agus atá in ann feidhmiú mar an phríomhchomhpháirt struchtúrach de tháirgí deiridh, cé is moite de pholaiméirí nádúrtha nár athraíodh go ceimiceach;
- (10) ciallaíonn ‘amhábhair chriticiúla’ amhábhair chriticiúla de réir bhrí Airteagal 4(1) de Rialachán (AE) 2024/1252;
- (11) ciallaíonn ‘dramhaíl réamhthomhaltais’ ábhar a atreoraítear ón sruth dramhaíola le linn próiseas monaraíochta, cé is moite d’athúsáid ábhar amhail athoibriú, athlíomh nó dramh a ghintear i bpróiseas agus ar féidir é a mhínghlánadh laistigh den phróiseas céanna a ghin é;
- (12) ciallaíonn ‘dramhaíl iarthomhaltais’ dramhaíl a gineadh ó tháirgí a cuireadh ar an margadh nó a soláthraíodh lena ndáileadh, lena dtomhailt nó lena n-úsáid i dtríú tír le linn gníomhaíocht tráchtála, bíodh sin ar íocaíocht nó saor in aisce;
- (13) ciallaíonn ‘baint’ láimhseáil láimhe, mheicniúil, cheimiceach, theirmeach nó miotalóireachta, arb é an toradh a bhíonn uirthi go mbíonn na páirteanna, na comhpháirteanna nó na hábhair spriocdhírthe ó fheithiclí a bhfuil a ré caite in-sainitheanta go haonarach mar shreabh aschuir ar leithligh nó mar chuid de shreabh aschuir;

- (14) ciallaíonn ‘mótar ríomhthiomána’ mótar leictreach a thiontaíonn cumhacht ionchuir leictreach go cumhacht aschuir mheicniúil chun fórsa tarraingthe a sholáthar d’fheithicil;
- (15) ciallaíonn ‘ceallra feithiclí leictreacha’ ceallra feithiclí leictreacha mar a shainmhínítear in Airteagal 3(1), pointe (14), de Rialachán (AE) 2023/1542;
- (16) ciallaíonn ‘saoráid chóireála údaraithe’ aon bhunaíocht nó aon ghnóthas a cheadaítear i gcomhréir le Treoir 2008/98/CE agus leis an Rialachán seo chun oibríochtaí bailithe, stórála agus cóireála a dhéanamh ar fheithiclí a bhfuil a ré caite, lena n-áirítear a bpáirteanna agus a gcomhpháirteanna;
- (17) ciallaíonn ‘mionghearradh’ oibríocht a úsáidtear chun feithicil a bhfuil a ré caite a stróiceadh ina bpíosai nó a scoilteadh;
- (18) ciallaíonn ‘cóireáil’ aon ghníomhaíocht a tharlaíonn tar éis don fheithicil a bhfuil a ré caite a bheith tugtha ar láimh do shaoráid lena díthruailliú, lena díchóimeáil, lena dlúthú, lena gearradh, lena mionghearradh, lena haisghabháil nó lena hullmhú sula ndéanfar an dramhaíl ón mionghearrthóir a dhiúscairt, agus aon oibríocht eile a dhéantar chun an fheithicil a bhfuil a ré caite agus a páirteanna, comhpháirteanna agus ábhair a aisghabháil nó a dhiúscairt;
- (19) ciallaíonn ‘oibreoir deisiúcháin agus cothabhála’ duine nádúrtha nó dlítheanach a thugann faoi ghníomhaíocht ghairmiúil a bhaineann go díreach nó go hindíreach le deisiú agus cothabháil feithiclí, lena n-áirítear deisitheoirí, monaróirí nó dáileoirí trealaimh deisiúcháin, uirlisí nó páirteanna spártha, mar aon le foilsitheoirí faisnéise teicniúla, clubanna gluaistean, oibreoirí cabhrach ar thaobh an bhóthair, oibreoirí a thairgeann seirbhísí cigireachta agus tástála, oibreoirí a thairgeann oiliúint do shuiteálaithe, mar aon le monaróirí agus deisitheoirí trealaimh le haghaidh feithiclí breosla ailtéarnaigh;
- (20) ciallaíonn ‘cur ar fáil ar an margadh’ feithicil a sholáthar lena dáileadh nó lena húsáid ar an margadh le linn gníomhaíocht tráchtála, bíodh sin ar íocaíocht nó saor in aisce;
- (21) ciallaíonn ‘cur ar an margadh’ feithicil a chur ar fáil ar mhargadh an Aontais den chéad uair;
- (22) ciallaíonn ‘oibreoir bainistithe dramhaíola’ aon duine nádúrtha nó dlítheanach a dhéileálann ar bhonn gairmiúil le bailiú nó cóireáil feithiclí a bhfuil a ré caite, lena n-áirítear a bpáirteanna agus a gcomhpháirteanna;
- (23) ciallaíonn ‘táirgeoir’ aon mhonaróir, allmhaireoir nó dáileoir, gan beann ar an teicníc dhíolta a úsáidtear, lena n-áirítear trí bhíthin cianchonarthaí mar a shainmhínítear in Airteagal 2, pointe (7), de Threoir 2011/83/AE ó Pharlaimint na hEorpa agus ón gComhairle⁽³⁵⁾, a chuireann feithicil ar fáil den chéad uair lena dáileadh nó lena húsáid, laistigh de chríoch Ballstáit ar bhonn gairmiúil;
- (24) ciallaíonn ‘eagraíocht um fhreagracht táirgeoirí’ eintiteas dlítheanach a eagraíonn comhlíonadh oibleagáidí maidir le freagracht leathnaithe táirgeora, ó thaobh airgeadais de nó ó thaobh airgeadais agus oibríochta de, thar ceann roinnt táirgeoirí;
- (25) ciallaíonn ‘ionadaí údaraithe maidir leis an bhfreagracht leathnaithe táirgeora’ duine nádúrtha nó dlítheanach atá bunaithe i mBallstát ina gcuireann an táirgeoir feithicil ar fáil ar an margadh den chéad uair, seachas an Ballstát nó an tríú tír ina bhfuil an táirgeoir bunaithe, agus a gceapann an táirgeoir é i gcomhréir le hAirteagal 8a(5), an tríú fomhír, de Threoir 2008/98/CE chun na hoibleagáidí ar an táirgeoir sin faoi Chaibidil IV den Rialachán seo a chomhlíonadh;

⁽³⁵⁾ Treoir 2011/83/AE ó Pharlaimint na hEorpa agus ón gComhairle an 25 Deireadh Fómhair 2011 maidir le cearta tomhaltóirí, lena leasaítear Treoir 93/13/CEE ón gComhairle agus Treoir 1999/44/CE ó Pharlaimint na hEorpa agus ón gComhairle agus lena n-aisghairtear Treoir 85/577/CEE ón gComhairle agus Treoir 97/7/CE ó Pharlaimint na hEorpa agus ón gComhairle (IO L 304, 22.11.2011, lch. 64, ELI: <http://data.europa.eu/eli/dir/2011/83/oj>).

- (26) ciallaíonn ‘ionadaí údaraithe maidir leis an sásra trasteorann’ duine nádúrtha nó dlítheanach atá bunaithe i mBallstát agus atá ceaptha ag an monaróir i gcomhréir le hAirteagal 22;
- (27) ciallaíonn ‘amhábhair thánaisteacha’ ábhair is féidir a úsáid in ionad amhábhair phríomhúla agus a fuarthas trí phróisis athchúrsála;
- (28) ciallaíonn ‘úinéir feithicle’ aon duine nádúrtha nó dlítheanach a shealbhaíonn ceart úinéireachta feithicle nó sealbhóir deimhnithe clárúcháin feithicle nó, mura féidir sealbhóir an chirt úinéireachta ná sealbhóir an deimhnithe clárúcháin feithicle a shainaithint, sealbhóir na feithicle;
- (29) ciallaíonn ‘teicneolaíocht iar-mhionghearrthóra’ na teicnící agus na teicneolaíochtaí a úsáidtear chun ábhair a phróiseáil ó fheithiclí a bhfuil a ré caite, i ndiaidh mionghearradh a dhéanamh orthu, lena n-aisghabháil a thuilleadh i gcomhréir le Cuid G, pointe 2, d’Iarscríbhinn VIII;
- (30) ciallaíonn ‘athmhonarú’ gníomhaíochtaí gairmiúla trína monaraítear páirt nó comhpháirt nua chun filleadh ar an riocht céanna le riocht nua ó pháirteanna agus ó chomhpháirteanna a bhaintear as feithiclí nó as feithiclí a bhfuil a ré caite agus trína ndéantar athrú amháin ar a laghad a dhéanann difear do shábháilteacht, saolré, feidhmíocht, cuspóir nó cineál na páirte nó na comhpháirte, i bpróiseas atá i gcomhréir le sonraíochtaí teicniúla sonracha, lena n-áirítear caighdeáin innealtóireachta, cháilíochta agus tástála;
- (31) ciallaíonn ‘athriochtú’ gníomhaíochtaí a dhéantar chun páirt nó comhpháirt a baineadh ó fheithiclí nó ó fheithiclí a bhfuil a ré caite a ullmhú, a ghlanadh, a thástáil, a sheirbhísiú agus, i gcás inar gá, a dheisiú, chun a feidhmíocht nó a feidhmiúlacht a athchóiriú faoi chuimsiú na húsáide beartaithe agus an raoin feidhmíochta dár ceapadh ar dtús iad ag céim an dearaidh tráth curtha na páirte nó na comhpháirte ar an margadh;
- (32) ciallaíonn ‘dramhaíl neamhthámh’ dramhaíl nach gcomhlíonann na coinníollacha maidir leis an sainmhíniú ar ‘dhramhaíl thámh’ a leagtar síos in Airteagal 2, pointe (e), de Threoir 1999/31/CE ón gComhairle ⁽³⁶⁾;
- (33) ciallaíonn ‘feithicil athlámhe’ feithicil a cláraíodh i mBallstát nó i dtríú tír agus nach feithicil a bhfuil a ré caite í;
- (34) ciallaíonn ‘feithicil athlámhe atá le honnmhairiú’ feithicil athlámhe atá le cur faoin nós imeachta custaim, mar a leagtar síos in Airteagal 269 de Rialachán (AE) Uimh. 952/2013;
- (35) ciallaíonn ‘oibreoir eacnamaíoch’ táirgeoir, bailitheoir, cuideachta árachais feithiclí, soláthróir, oibreoir deisiúcháin agus cothabhála, oibreoir bainistithe dramhaíola, lena n-áirítear díchoimeálaí nó athchúrsálaí, agus aon oibreoir eile a bhfuil baint aige i ndearadh feithiclí, i dtrádáil feithiclí athlámhe, i ndíchoimeáil, in athúsáid, nó i mbainistiú feithiclí a bhfuil a ré caite, in athmhonarú agus in athriochtú páirteanna, comhpháirteanna agus ábhar ó fheithiclí;
- (36) ciallaíonn ‘feithicil ródacmhainneach’ feithicil atá ródacmhainneach i gcomhréir le Treoir 2014/45/AE;
- (37) ciallaíonn ‘oibreoir iarfheistithe’ aon duine dlítheanach a mhonaraíonn fearas leictreach tiontaithe nó a dhéanann feithiclí faoi thiomáint ag inneall dócháin inmheánaigh a thiontú go feithiclí ceallra-leictreacha nó feithiclí breosla-chille;
- (38) ciallaíonn ‘pointe bailiúcháin’ oibreoir eacnamaíoch seachas saoráid chóireála údaraithe, a stóráilann feithiclí a bhfuil a ré caite go sealadach agus a ullmhaíonn aistriú na bhfeithiclí a bhfuil a ré caite arna mbailiú chuig saoráidí cóireála údaraithe lena gcóireáil;

⁽³⁶⁾ Treoir 1999/31/CE ón gComhairle an 26 Aibreán 1999 maidir le líonadh talún le dramhaíl (IO L 182, 16.7.1999, lch. 1, ELI: <http://data.europa.eu/eli/dir/1999/31/oj>).

- (39) ciallaíonn ‘dramhaíl’, ‘dramh-olaí’, ‘sealbhóir dramhaíola’, ‘bainistiú dramhaíola’, ‘bailiú’, ‘cosc’, ‘aisghabháil’, ‘athchúrsáil’, ‘aislónadh’, ‘diúscairt’ agus ‘scéim freagrachta leathnaithe táirgeora’ dramhaíl, dramh-olaí, sealbhóir dramhaíola, bainistiú dramhaíola, bailiú, cosc, aisghabháil, athchúrsáil, aislónadh, diúscairt agus scéim freagrachta leathnaithe táirgeora mar a shainmhínítear in Airteagal 3, pointí (1), (3), (6), (9), (10), (12), (15), (17), (17a), (19) agus (21), faoi seach, de Threoir 2008/98/CE;
- (40) seachas le haghaidh feithicilí de chatagóir L: ciallaíonn ‘cineálcheadú’, ‘cineálcheadú ilchéimneach’, ‘comhpháirt’, ‘páirteanna’, ‘páirteanna spártha’, ‘bonnfheithicil’, ‘feithicil a tháirgtear i sraitheanna beaga’, ‘feithicil shainchuspóireach’, ‘údarás faireachais margaidh’, ‘údarás ceadúcháin’, ‘monaróir’, ‘allmhaireoir’ agus ‘dáileoir’ cineálcheadú, cineálcheadú ilchéimneach, comhpháirt, páirteanna, páirteanna spártha, bonnfheithicil, feithicil a tháirgtear i sraitheanna beaga, feithicil shainchuspóireach, údarás faireachais margaidh, údarás ceadúcháin, monaróir, allmhaireoir agus dáileoir mar a shainmhínítear in Airteagal 3, pointí (1), (8), (19), (21), (23), (24), (30), (31), (35), (36), (40), (42) agus (43), faoi seach, de Rialachán (AE) 2018/858;
- (41) le haghaidh feithicilí de chatagóir L: ciallaíonn ‘cineálcheadú’, ‘bonnfheithicil’, ‘comhpháirt’, ‘páirteanna’, ‘páirteanna spártha’, ‘monaróir’, ‘allmhaireoir’, ‘dáileoir’, ‘údarás ceadúcháin’ agus ‘údarás faireachais margaidh’ cineálcheadú, bonnfheithicil, comhpháirt, páirteanna, páirteanna spártha, monaróir, allmhaireoir, dáileoir, údarás ceadúcháin agus údarás faireachais margaidh mar a shainmhínítear in Airteagal 3, pointí (1), (11), (16), (18), (21), (47), (49), (50), (56) agus (57), faoi seach, de Rialachán (AE) Uimh. 168/2013, agus ciallaíonn ‘feithicil a tháirgtear i sraitheanna beaga’ ‘feithicil a tháirgtear i sraitheanna beaga’ mar a shainmhínítear in Airteagal 42 den Rialachán sin;
- (42) ciallaíonn ‘clárú’, ‘deimhniú clárúcháin’, ‘sealbhóir de dheimhniú clárúcháin’, ‘fionraí’ agus ‘clárú a chealú’ clárú, deimhniú clárúcháin, sealbhóir de dheimhniú clárúcháin, fionraí agus clárú a chealú mar a shainmhínítear in Airteagal 2, pointí (b), (c), (d), (e) agus (f), faoi seach, de Threoir 1999/37/CE;
- (43) ciallaíonn ‘feithicil ar díol spéise staire í’, ‘tástáil ródacmhainneachta’ agus ‘deimhniú ródacmhainneachta’ feithicil ar díol spéise staire í, tástáil ródacmhainneachta agus deimhniú ródacmhainneachta mar a shainmhínítear in Airteagal 3, pointí (7), (9) agus (12), faoi seach, de Threoir 2014/45/AE;
- (44) ciallaíonn ‘substaint ar ábhar inní í’ agus ‘iompróir sonraí’ substaint ar ábhar inní í agus iompróir sonraí mar a shainmhínítear in Airteagal 2, pointí (27) agus (29), faoi seach, de Rialachán (AE) 2024/1781;
- (45) ciallaíonn ‘údarás chustaim’ údarás chustaim mar a shainmhínítear in Airteagal 5, pointe (1), de Rialachán (AE) Uimh. 952/2013;
- (46) ciallaíonn ‘ardán ar líne’ ardán ar líne mar a shainmhínítear in Airteagal 3, pointe (i), de Rialachán (AE) 2022/2065;
- (47) ciallaíonn ‘monaróir ísealtáirgeachta’ monaróir ísealtáirgeachta mar a shainmhínítear in Airteagal 3, pointe (48), de Rialachán (AE) 2024/1257;
- (48) ciallaíonn ‘ceallra modhanna éadroma iompair’ nó ‘ceallra LMT’ ceallra modhanna éadroma iompair nó ceallra LMT, faoi seach, mar a shainmhínítear in Airteagal 3, pointe (11), de Rialachán (AE) 2023/1542;
- (49) ciallaíonn ‘dramhaíl ó phacáistíocht’ dramhaíl ó phacáistíocht mar a shainmhínítear in Airteagal 3, pointe (25), de Rialachán (AE) 2025/40 ó Pharlaimint na hEorpa agus ón gComhairle⁽³⁷⁾;

⁽³⁷⁾ Rialachán (AE) 2025/40 ó Pharlaimint na hEorpa agus ón gComhairle an 19 Nollaig 2024 maidir le pacáistíocht agus dramhaíl ó phacáistíocht, lena leasaítear Rialachán (AE) 2019/1020 agus Treoir (AE) 2019/904, agus lena n-aisghairtear Treoir 94/62/CE (IO L, 2025/40, 22.1.2025, ELI: <http://data.europa.eu/eli/reg/2025/40/oj>).

- (50) ciallaíonn ‘dramhthrealamh leictreach agus leictreonach’ dramhthrealamh leictreach agus leictreonach mar a shainmhínítear in Airteagal 3(1), pointe (e), de Threoir 2012/19/AE ó Pharlaimint na hEorpa agus ón gComhairle ⁽³⁸⁾;
- (51) ciallaíonn ‘plaistigh bhithbhunaithe’ plaistigh bhithbhunaithe mar a shainmhínítear in Airteagal 3, pointe (53), de Rialachán (AE) 2025/40;
- (52) ciallaíonn ‘mínghlánadh’ mínghlánadh mar a shainmhínítear in Airteagal 3, pointe (13), de Rialachán (AE) 2024/573.

CAIBIDIL II

CEANGLAIS CHIORCLAÍOCHTA

Airteagal 4

In-athúsáidteacht, in-athchúrsáilteacht agus in-aisghabhálacht feithiclí

1. Gach feithicil a bhaineann le cineál feithicle ar a ndéantar cineálcheadú ón 1 Meán Fómhair 2032 faoi Rialachán (AE) 2018/858, tógfar í ar bhealach go mbeidh sí:
- (a) in-athúsáidte nó in-athchúrsáilte go dtí íosmhéid 85 % de réir maise;
 - (b) in-athúsáidte nó in-aisghabhála go dtí íosmhéid 95 % de réir maise.
2. I gcás gach cineáil feithicle dá dtagraítear i mír 1, déanfaidh monaróirí na bearta seo a leanas:
- (a) na sonraí is gá a bhailiú tríd an slabhra soláthair iomlán, go háirithe cineál agus mais na n-ábhar uile a úsáidtear agus na feithiclí á dtógáil, chun comhlíonadh leanúnach an Rialacháin seo a áirithiú;
 - (b) na sonraí iomchuí eile uile a bhaineann le feithiclí a cheanglaítear leis an bpróiseas ríomha dá dtagraítear i bpointe (e) a choimeád;
 - (c) nósanna imeachta a bhunú chun cruinneas agus iomláine na faisnéise a fhaightear ó na soláthróirí a fhíorú;
 - (d) miondealú na n-ábhar a bhainistiú agus a dhoiciméadú;
 - (e) na rátaí in-athúsáidteachta, in-athchúrsáilteachta agus in-aisghabhálachta a ríomh chun críocha mhír 1 den Airteagal seo i gcomhréir leis an modheolaíocht arna bunú ag an gCoimisiún faoi mhír 3 den Airteagal seo nó, sula nglactar an mhodheolaíocht sin agus sula dtagann sí i bhfeidhm, i gcomhréir le caighdeán idirnáisiúnta ISO 22628:2002 in éineacht leis na heilimintí a leagtar amach i gCuid A d'Iarscríbhinn III a ghabhann leis an Rialachán seo;
 - (f) páirteanna agus comhpháirteanna na bhfeithiclí atá déanta as polaiméirí agus leaistiméirí a mharcáil i gcomhréir le hAirteagal 12(1);
 - (g) a áirithiú nach n-athúsáidfear na páirteanna agus comhpháirteanna a liostaítear i gCuid E d'Iarscríbhinn VIII agus feithiclí nua á dtógáil.
3. Glacfaidh an Coimisiún faoin 28 Feabhra 2029, gníomh cur chun feidhme lena mbunaítear modheolaíocht nua maidir le rátaí in-athúsáidteachta, in-athchúrsáilteachta agus in-aisghabhálachta feithicle a ríomh agus a fhíorú, agus na heilimintí a leagtar amach in Iarscríbhinn III a ghabhann leis an Rialachán seo agus i gcaighdeán idirnáisiúnta ISO 22628:2002 á gcur san áireamh. Déanfar an gníomh cur chun feidhme sin a ghlacadh i gcomhréir leis an nós imeachta scrúdúcháin dá dtagraítear in Airteagal 52(2).

⁽³⁸⁾ Treoir 2012/19/AE ó Pharlaimint na hEorpa agus ón gComhairle an 4 Iúil 2012 maidir le dramhthrealamh leictreach agus leictreonach (DTLL) (IO L 197, 24.7.2012, lch. 38, ELI: <http://data.europa.eu/eli/dir/2012/19/oj>).

Airteagal 5

Ceanglais i dtaca le substaintí i bhfeithiclí

1. Déanfar láithreacht substaintí ar ábhar inní iad i bhfeithiclí agus ina bpáirteanna agus ina gcomhpháirteanna a íoslaghdú a mhéid is féidir.

2. Faoi 14 Feabhra 2028, ullmhóidh an Coimisiún tuarascáil maidir le láithreacht substaintí ar ábhar inní iad i bhfeithiclí, chun a chinneadh a mhéid a bhfuil tionchar diúltach acu ar athúsáid agus athchúrsáil ábhar nó a mhéid a bhfuil drochthionchar acu ar an gcomhshaol nó ar an tsláinte. Tabharfaidh an Ghníomhaireacht cúnamh don Choimisiún maidir le gnéithe den tsábháilteacht cheimiceach. Ní chumhdófar leis an tuarascáil substaintí ar ábhar inní iad i bpáirteanna agus i gcomhpháirteanna feithicle a gceanglaítear sainathint nó measúnú ina leith cheana féin le reachtaíocht eile de chuid an Aontais. Cuirfidh an Coimisiún an tuarascáil faoi bhráid Pharlaimint na hEorpa agus faoi bhráid na Comhairle, ina leagtar amach a thorthaí, agus breithneoidh sé ar na bearta leantacha iomchuí. Má mheasann Ballstát go ndéanann substaint difear diúltach d'athúsáid agus d'athchúrsáil ábhar i bhfeithicil ina bhfuil sí i láthair, déanfaidh sé, faoi 14 Feabhra 2029, an fhaisnéis sin a sholáthar don Choimisiún agus, maidir le gnéithe den tsábháilteacht cheimiceach, don Ghníomhaireacht freisin agus, i gcás ina mbeidh fáil orthu, déanfaidh sé tagairt d'aon mheasúnuithe riosca ábhartha nó do shonraí ábhartha eile.

3. Tugtar de chumhacht don Choimisiún gníomhartha tarmligthe a ghlacadh i gcomhréir le hAirteagal 51 chun an Rialachán seo a fhorlónadh trí cheanglais faisnéise agus srianta a bhunú maidir le láithreacht substaintí ar ábhar inní iad a dhéanann difear diúltach d'athúsáid agus d'athchúrsáil ábhar i bhfeithicil ina bhfuil siad i láthair agus ina bpáirteanna agus ina gcomhpháirteanna, ar chúiseanna nach mbaianeann go príomha le sábháilteacht cheimiceach.

4. Aon chineál feithicle ar a ndéantar cineálcheadú ón 1 Meán Fómhair 2032, faoi Rialachán (AE) 2018/858, nó aon pháirteanna nó comhpháirteanna nua a chuirtear ar an margadh le haghaidh na feithicle sin, ní bheidh luaidhe, mearcair, caidmiam nó cróimiam heicsifhiúsach ann.

5. De mhaolú ar mhír 4 den Airteagal seo, féadfaidh luaidhe, mearcair, caidmiam nó cróimiam heicsifhiúsach a bheith i gcineálacha feithicle nó i bpáirteanna agus i gcomhpháirteanna a chuirtear ar an margadh le haghaidh na bhfeithiclí sin faoi na coinníollacha agus suas leis na luachanna uastiúchana a leagtar síos in Iarscríbhinn IV a ghabhann leis an Rialachán seo. Ní bheidh feidhm ag míreanna 2, 3 agus 4 den Airteagal seo ná ag an mír seo maidir le ceallraí atá ionchorpraithe i bhfeithiclí a bhfuil feidhm ag Rialachán (AE) 2023/1542 maidir leo.

6. Tugtar de chumhacht don Choimisiún gníomhartha tarmligthe a ghlacadh i gcomhréir le hAirteagal 51 chun Iarscríbhinn IV a leasú chun í a chur in oiriúint don dul chun cinn eolaíoch agus teicniúil trí na nithe seo a leanas a dhéanamh:

(a) luachanna uastiúchana a bhunú ar suas leo a bhfuil luaidhe, mearcair, caidmiam nó cróimiam heicsifhiúsach le glacadh i bpáirteanna, comhpháirteanna agus ábhair aonchineálacha sonracha feithicilí;

(b) páirteanna, comhpháirteanna agus ábhair aonchineálacha áirithe feithicilí a dhíolmhú ón toirmeasc ar luaidhe, mearcair, caidmiam nó cróimiam heicsifhiúsach a bheith iontu a leagtar amach i mír 4 i gcás ina gcomhlíonfar na coinníollacha seo a leanas:

(i) ní féidir úsáid na substaintí sin a sheachaint;

(ii) léirítear gur mó na tairbhí socheacnamaíocha ná an riosca don chomhshaol nó do shláinte an duine a eascraíonn as úsáid na substaintí sin;

(iii) níl aon substaintí ná teicneolaíochtaí malartacha oiriúnacha ann;

- (c) páirteanna, comhpháirteanna agus ábhair aonchineálacha feithiclí a scriosadh ó larscríbhinn IV, más féidir úsáid luaidhe, mearcair, caidmiam nó cróimiam heicsifhiúsaigh a sheachaint;
- (d) na páirteanna, comhpháirteanna agus ábhair aonchineálacha ó fheithiclí atá le baint a ainmniú sula ndéanfar cóireáil bhreise orthu agus a cheangal go ndéanfaí iad a lipéadú nó a dhéanamh in-sainaitheanta trí mhodhanna iomchuí eile.

Tugtar de chumhacht don Choimisiún gníomhartha tarmligthe a ghlacadh i gcomhréir le hAirteagal 51 chun larscríbhinn IV a leasú, go háirithe trí dhíolúintí áirithe le haghaidh ábhair aonchineálacha agus comhpháirteanna a bhaint ón liosta, i gcásanna ina dtugtar aghaidh ar an díolúine shonrach faoi reachtaíocht eile de chuid an Aontais.

Agus gníomh tarmligthe de bhun na míre seo á ghlacadh aige, cuirfidh an Coimisiún san áireamh an tionchar socheacnamaíoch a bhíonn ag díolúine ar an srian ar úsáid luaidhe, mearcair, caidmiam nó cróimiam heicsifhiúsaigh i gcineálacha feithicle a thabhairt isteach, a mhodhnú nó a scriosadh, lena n-áirítear infhaighteacht roghanna malartacha agus na tionchair ar an gcomhshaol agus ar shláinte an duine ar fud shaolré iomlán na bhfeithiclí.

7. Arna iarraidh sin don Choimisiún, ullmhóidh an Ghníomhaireacht tuarascáil laistigh de 12 mhí, bunaithe inter alia ar chomhairliúchán le geallsealbhóirí, maidir le hindéantacht theicniúil agus eacnamaíoch na roghanna malartacha ar dhíolúintí atá ann cheana a liostaítear in larscríbhinn IV agus, ar bhonn an mheasúnaithe sin, ullmhóidh sí togra cuí-reasúnaithe maidir leis an leasú sonrach ar aon díolúine den sórt sin.

8. A luaithe a gheobhaidh an Ghníomhaireacht an iarraidh ón gCoimisiún, foilseoidh sí fógra ar a suíomh gréasáin go n-ullmhófar tuarascáil maidir le leasú féideartha ar dhíolúine a liostaítear in larscríbhinn IV agus iarraidh sí ar Bhallstáit agus ar na páirtithe leasmhara uile barúlacha a chur isteach laistigh de 12 sheachtain ó dháta foilsithe an fhógra sin. Foilseoidh an Ghníomhaireacht na barúlacha uile a gheobhaidh sí ó na Ballstáit agus ó pháirtithe leasmhara ar a suíomh gréasáin.

9. 12 mhí ar a dhéanaí i ndiaidh an tuarascáil dá dtagraítear i mír 7 a bheith curtha faoi bhráid an Choimisiúin, déanfaidh an Coiste um Anailís Shocheacnamaíoch na Gníomhaireachta, a bunaíodh de bhun Airteagal 76(1), pointe (d), de Rialachán (CE) Uimh. 1907/2006, tuairim a ghlacadh ar an tuarascáil agus ar na leasuithe sonracha atá beartaithe. Cuirfidh an Ghníomhaireacht an tuairim sin faoi bhráid an Choimisiúin gan mhoill.

Airteagal 6

Cion íosta athchúrsáilte i bhfeithiclí

1. An plaisteach atá i ngach cineáil nua feithicle ar a ndéantar cineálcheadú ón 1 Meán Fómhair 2032 ar aghaidh, faoi Rialachán (AE) 2018/858, beidh íosmhéid 15 % de phlaisteach arna athchúrsáil de réir meáchain ó dhramhaíl phlaisteach iarthomhaltais ann.

An plaisteach atá i ngach cineáil nua feithicle ar a ndéantar cineálcheadú ón 1 Meán Fómhair 2036 ar aghaidh, faoi Rialachán (AE) 2018/858, beidh íosmhéid 25 % de phlaisteach arna athchúrsáil de réir meáchain ó dhramhaíl phlaisteach iarthomhaltais ann.

2. Bainfear amach 20 % ar a laghad den sprioc a leagtar amach i mír 1 trí phlaistigh arna n-athchúrsáil ó fheithiclí a bhfuil a ré caite nó ó pháirteanna agus ó chomhpháirteanna a bhaintear ó fheithiclí le linn na céime úsáide a áireamh sa chineál feithicle lena mbaineann.

3. Ní áireofar i meáchan an phlaistigh atá i ngach cineáil nua feithicle lena mbaineann ná i meáchan an phlaistigh athchúrsáilte dá dtagraítear i míreanna 1 agus 2 leaistiméirí ó bhoinn agus ó theirmithéachtaí seachas cúir polúireatáin a úsáidtear le haghaidh cúisínithe.

4. Chun críocha na n-oibleagáidí a leagtar síos i míreanna 1, 2 agus 3, déanfar cion athchúrsáilte a aisghabháil ó dhramhaíl iarthomhaltais a athchúrsáladh i gceann díobh seo a leanas:

(a) suiteáil atá lonnaithe san Aontas; nó

(b) ón 14 Lúnasa 2030, suiteáil atá lonnaithe i dtríú tír, ar choinníoll go gcomhlíonann an tsuiteáil sin ceanglais larscríbhinn XIII.

Faoi 30 Meán Fómhair 2028, déanfaidh an Coimisiún measúnú níos cuimsithí ar an tionchar a mheastar a bheidh aige ar thrádáil dhomhanda, agus ar thionscail athchúrsála agus tionscail gluaisteán an Aontais agus cuirfidh sé a mheasúnú faoi bhráid Pharlaimint na hEorpa agus na Comhairle.

5. Faoi 31 Lúnasa 2028, glacfaidh an Coimisiún gníomh cur chun feidhme i gcomhréir le hAirteagal 52(2) chun an mhodheolaíocht a bhunú maidir le ríomh agus fíorú a dhéanamh, chun críocha mhíreanna 1 go 4 den Airteagal seo, ar sciar na bplaisteach arna n-athchúrsáil ó dhramhaíl iarthomhaltais, agus ó fheithiclí a bhfuil a ré caite, atá i láthair agus arna n-ionchorprú i gcineálacha feithicle.

Beidh feidhm ag modheolaíocht chuntasaíochta maidir le maischothromaíocht i dtaca le plaisteach athchúrsáilte a fhaightear ó mhodhanna athchúrsála seachas athchúrsáil mheicniúil, i gcomhréir leis na modheolaíochtaí cuntasaíochta maidir le maischothromaíocht is infheidhme i dtaca le hathchúrsáil plaisteach i gcomhréir leis an sainmhíniú ar athchúrsáil i dTreoir 2008/98/CE.

Áireofar sa mhodheolaíocht fíorúcháin oibleagáid ar mhonaróirí chun a áirithiú go gcomhlíonfaidh gach suiteáil atá lonnaithe i dtríú tír a tháirgeann ábhar ó chion athchúrsáilte atá á úsáid acu larscríbhinn XIII, agus go mbeidh iniúchadh á dhéanamh ar gach suiteáil den sórt sin atá lonnaithe i dtríú tír gach 5 bliana ar a laghad ag eintiteas tríú páirtí neamhspleách de bhun larscríbhinn XIV. Fíorófar leis na hiniúchtaí sin go bhfuil na coinníollacha a leagtar amach i míreanna 1 go 4 den Airteagal seo á gcomhlíonadh.

Beidh feidhm ag an gceanglas iniúcháireachta a leagtar amach sa tríú fomhír den mhír seo agus na ceanglais agus na critéir a leagtar amach in larscríbhinn XIII maidir le hábhar a athchúrsáiltear i dtríú tíortha ón 14 Lúnasa 2030.

6. Tabharfar de chumhacht don Choimisiún gníomhartha tarmlichte a ghlacadh i gcomhréir le hAirteagal 51 chun míreanna 1 agus 2 den Airteagal seo a fhorlíonadh trí mhaoluithe sealadacha a leagan síos ar na spriocanna maidir le cion plaisteach athchúrsáilte, nó uainiú i gcás ina mbeadh sé ródheacaí na híoschéatadáin d'ábhar athchúrsáilte a chomhlíonadh mar gheall ar easpa infhaighteachta nó praghsanna iomarcacha ar phlaistigh athchúrsáilte shonracha.

7. Faoi 30 Meán Fómhair 2027, déanfaidh an Coimisiún measúnú ar a indéanta a bheadh sé ceanglas a bhunú maidir le sciar íosta de chruach athchúrsáilte, agus na nithe seo a leanas á gcur san áireamh go háirithe:

(a) infhaighteacht reatha agus réamh-mheasta draimh fheiriúil, agus cruach cothrom agus fada agus, i gcás inarb ábhartha, aicmí táirgí cruach dosmálta á gcur san áireamh;

(b) an sciar reatha de dhramh feiriúil i leath-tháirgí agus táirgí idirmheánacha cruach éagsúla a bhaineann le haicmí cruach a úsáidtear i bhfeithiclí agus athruithe a bhfuiltear ag súil leo a bhaineann le haistriú an tionscail ghluaisteán;

(c) glacadh féideartha draimh fheiriúil ag monaróirí i bhfeithiclí a bheidh le cineálcheadú amach anseo agus an rannchuidiú féideartha faoi seach le leibhéil úsáide níos airde draimh i bhfianaise na srianta éagsúla comhdhéanaimh is infheidhme maidir le gach aicme táirgí cruach;

(d) éileamh coibhneasta na hearnála mótarfheithiclí i gcomparáid leis an éileamh ar dhramh feiriúil ó eárnálacha eile i bhfianaise an chumais cion copair a fhulaingt, agus cuimsiú dramh-ábhar neamhbheartaithe eile;

- (e) inmharthanacht eacnamaíoch, dul chun cinn teicniúil agus eolaíoch, lena n-áirítear athruithe ar infhaighteacht teicneolaíochtaí athchúrsála a bhaineann le rátaí athchúrsála cruach, chomh maith leis an ngá le haghaidh a thabhairt ar chlistí margaidh lena gcuirtear bac ar úsáid draimh fheiriúil iarthomhaltais i gcomparáid le úsáid draimh fheiriúil réamhthomhaltais;
- (f) an rannchuidiú ó sciar íosta de chion athchúrsáilte cruach i bhfeithiclí le huathriail straitéiseach oscailte an Aontais, agus lena chuspóirí aeráide, comhshaoil agus tionsclaíocha, go háirithe maidir le margáí luaidhe comhlántacha a chruthú le haghaidh táirgeadh cruach dícharbónaithe;
- (g) an gá atá le tionchair dhiúltacha dhíríreacha ar inacmhainneacht feithiclí a chosc; agus
- (h) an tionchar ar chostais agus iomaíochas foriomlán na hearnála mótarfeithiclí agus an slabhra luacha cruach mótarfeithiclí ar fad;

Faoi 30 Meán Fómhair 2028, glacfaidh an Coimisiún gníomh tarmligthe, i gcomhréir le hAirteagal 51, chun an Rialachán seo a fhorlíonadh trí sciar íosta cruach arna hathchúrsáil ó dhramhaíl chruach iarthomhaltais agus, i gcás inarb ábhartha, dramh feiriúil atá le bheith i láthair agus le hionchorprú i gcineálacha feithicle atá le cineálcheadú i gcomhréir leis an Rialachán seo agus le Rialachán (AE) 2018/858. Socrófar leis an ngníomh tarmligthe sin freisin dáta chur i bhfeidhm na hoibleagáide sciar íosta de chion athchúrsáilte a bheith ann tráth nach déanaí ná 14 Lúnasa 2033. Ní mheasfar go dtagann cruach a úsáidtear mar ábhair threisithe i mbonn faoi raon feidhme an ghnímh tharmligthe sin.

Faoi 30 Meán Fómhair 2028, glacfaidh an Coimisiún gníomh tarmligthe i gcomhréir le hAirteagal 51, lena mbunaítear modheolaíocht chun ríomh agus fíorú a dhéanamh ar sciar cruach arna hathchúrsáil ó dhramhaíl chruach iarthomhaltais i gcineálacha feithicle agus, más infheidhme, ó dhramh feiriúil, atá i láthair agus i gcineálacha feithicle agus a ionchorpraítear iontu.

8. Faoi 30 Meán Fómhair 2027, déanfaidh an Coimisiún measúnú ar a indéanta a bheadh sé ceanglas a bhunú maidir le sciar íosta alúmanaim agus a chóimhiotail, arna n-athchúrsáil ó dhramhaíl iarthomhaltais atá i láthair i gcineálacha feithicle agus a ionchorpraítear iontu, agus na nithe seo a leanas á gcur san áireamh go háirithe:

- (a) infhaighteacht reatha agus réamh-mheasta alúmanaim agus a chóimhiotail arna n-athchúrsáil ó dhramhaíl réamhthomhaltais agus iarthomhaltais;
- (b) na sciartha reatha de chion athchúrsáilte ó dhramhaíl iarthomhaltais in alúmanam agus a chóimhiotail i bhfeithiclí a chuirtear ar an margadh;
- (c) inmharthanacht eacnamaíoch, dul chun cinn teicniúil agus eolaíoch, lena n-áirítear athruithe ar infhaighteacht teicneolaíochtaí athchúrsála a bhaineann leis an gcineál ábhar a athchúrsáiltear, agus a rátaí athchúrsála;
- (d) an rannchuidiú ó sciar íosta de chion athchúrsáilte alúmanaim i bhfeithiclí le huathriail straitéiseach oscailte an Aontais, lena chuspóirí comhshaoil, aeráide, agus tionsclaíocha, go háirithe maidir le margáí luaidhe comhlántacha a chruthú le haghaidh táirgeadh alúmanaim dhícharbónaithe agus a chóimhiotail;
- (e) an gá atá le tionchair dhiúltacha dhíríreacha ar inacmhainneacht feithiclí ina bhfuil alúmanam agus a chóimhiotail a chosc; agus
- (f) an tionchar ar chostais agus iomaíochas foriomlán na hearnála mótarfeithiclí.

Faoi 30 Meán Fómhair 2028, glacfaidh an Coimisiún gníomh tarmligthe, i gcomhréir le hAirteagal 51, chun an Rialachán seo a fhorlíonadh trí íoschion alúmanaim athchúrsáilte agus a chóimhiotail atá le bheith i láthair agus le hionchorprú i gcineálacha feithicle atá le cineálcheadú i gcomhréir leis an Rialachán seo agus le Rialachán (AE) 2018/858 a bhunú. Socrófar leis an ngníomh tarmligthe sin freisin dáta chur i bhfeidhm na hoibleagáide sciar íosta de chion athchúrsáilte a bheith ann tráth nach déanaí ná an 14 Lúnasa 2033.

Faoin 30 Meán Fómhair 2028, glacfaidh an Coimisiún gníomh tarmligthe i gcomhréir le hAirteagal 51, lena mbunaítear modheolaíocht chun ríomh agus fíorú a dhéanamh ar sciar alúmanaim agus a chóimhiotail arna hathchúrsáil ó dhramhaíl iarthomhaltais i gcineálacha feithicle agus, más infheidhme, ó dhramhaíl réamhthomhaltais, atá i láthair i gcineálacha feithicle agus a ionchorpraítear iontu.

9. Faoin 31 Lúnasa 2029, déanfaidh an Coimisiún measúnú ar a indéanta a bheadh sé ceanglas a bhunú maidir le sciar íosta de na nithe seo a leanas:

- (a) maignéisiam agus a chóimhiotail, arna n-athchúrsáil ó dhramhaíl réamhthomhaltais agus iarthomhaltais agus atá i láthair i gcineálacha feithicle agus a ionchorpraítear iontu; agus
- (b) neoidimiam, diospróisiam, praiséidimiam, teirbiam, samairiam, nicil, cóbalt nó bórón arna n-athchúrsáil ó dhramhaíl iarthomhaltais agus, i gcás inarb ábhartha, ó dhramhaíl réamhthomhaltais, agus atá i láthair i mbuanmhaighnéid agus a ionchorpraítear iontu.

Cuirfear an méid seo a leanas san áireamh sa mheasúnú indéantachta:

- (a) infhaighteacht reatha agus réamh-mheasta na n-ábhar dá dtagraítear sa chéad fhomhír, pointí (a) agus (b), arna n-athchúrsáil ó dhramhaíl réamhthomhaltais agus iarthomhaltais;
- (b) na sciarta reatha de chion athchúrsáilte ó dhramhaíl iarthomhaltais sna hábhair dá dtagraítear sa chéad fhomhír, pointí (a) agus (b), i bhfeithiclí a chuirtear ar an margadh;
- (c) inmharthanacht eacnamaíoch, dul chun cinn teicniúil agus eolaíoch, lena n-áirítear athruithe ar infhaighteacht teicneolaíochtaí athchúrsála a bhaineann leis an gcineál ábhar a athchúrsáiltear, agus a rátaí athchúrsála;
- (d) an rannchuidiú ó sciar íosta de chion athchúrsáilte na n-ábhar dá dtagraítear sa chéad fhomhír, pointí (a) agus (b) i bhfeithiclí le huathriail straitéiseach an Aontais agus lena chuspóirí aeráide agus comhshaoil;
- (e) tionchair fhéideartha ar fheidhmiú feithiclí i ngeall ar chion athchúrsáilte na n-ábhar dá dtagraítear sa chéad fhomhír, pointí (a) agus (b), a ionchorprú i bpáirteanna agus comhpháirteanna feithiclí;
- (f) an gá atá le tionchair dhiúltacha dhíreireacha ar inacmhainneacht na bhfeithiclí ina bhfuil na hábhair dá dtagraítear sa chéad fhomhír, pointí (a) agus (b), a chosc;
- (g) an tionchar ar chostais agus iomaíochas foriomlán na hearnála mótarfeithiclí.

Tar éis an measúnú dá dtagraítear sa chéad fhomhír a thabhairt chun críche, tugtar de chumhacht don Choimisiún gníomh tarmligthe a ghlacadh, i gcomhréir le hAirteagal 51, chun an Rialachán seo a fhorlónadh trí sciar íosta de na nithe seo a leanas a bhunú:

- (a) maignéisiam agus a chóimhiotail, arna n-athchúrsáil ó dhramhaíl iarthomhaltais agus, i gcás inarb ábhartha, ó dhramhaíl réamhthomhaltais, atá i láthair i gcineálacha feithicle agus a ionchorpraítear iontu; agus
- (b) neoidimiam, diospróisiam, praiséidimiam, teirbiam, samairiam, nicil, cóbalt nó bórón arna n-athchúrsáil ó dhramhaíl iarthomhaltais agus, i gcás inarb ábhartha, ó dhramhaíl réamhthomhaltais, atá i láthair i mbuanmhaighnéid agus a ionchorpraítear iontu.

Leis an ngníomh tarmligthe dá dtagraítear sa tríú fhomhír, socrófar freisin dáta chur i bhfeidhm na hoibleagáide sciar íosta de chion athchúrsáilte a bheith ann.

Faoin 30 Meán Fómhair 2029, glacfaidh an Coimisiún gníomh tarmligthe i gcomhréir le hAirteagal 51, lena mbunaítear an mhodheolaíocht chun ríomh agus fíorú a dhéanamh ar sciar na n-ábhar athchúrsáilte dá dtagraítear sa tríú fhomhír atá i láthair i gcineálacha feithicle agus a ionchorpraítear iontu.

*Airteagal 7***Dearadh chun gur féidir páirteanna agus comhpháirteanna áirithe i bhfeithiclí a bhaint agus a athsholáthar**

1. Gach feithicil a bhaineann le cineál nua feithicle nua ar a ndéantar cineálcheadú ón 1 Meán Fómhair 2032 faoi Rialachán (AE) 2018/858 agus Rialachán (AE) Uimh. 168/2013, dearfar iad ar bhealach nach gcuirfear bac ar shaoráidí cóireála údaráithe na páirteanna agus na comhpháirteanna a liostaítear i gCuid C d'Iarscríbhinn VIII a bhaint den fheithicil lena mbaineann le linn chéim dhramhaíola na feithicle d'fhonn iad a athsholáthar, a athúsáid, a athchúrsáil, a athmhonarú nó a athriochtú i gcás ina bhfuil sé indéanta go teicniúil.
2. Gach feithicil a bhaineann le cineál nua feithicle ar a ndéantar cineálcheadú ón 1 Meán Fómhair 2032 faoi Rialachán (AE) 2018/858, dearfar í ionas gur féidir le saoráidí cóireála údaráithe nó oibreoirí deisiúcháin agus cothabhála, ar bhealach éasca agus neamhscriosach, na ceallraí feithicle leictreacha agus a gceallra-phacaí agus na mótair ríomhthiomána a bhaint agus a athsholáthar ón bhfeithicil le linn chéim úsáide agus chéim dhramhaíola na feithicle.
3. Tugtar de chumhacht don Choimisiún gníomhartha tarmlichte a ghlacadh i gcomhréir le hAirteagal 51 chun mír 2 a leasú trí pháirteanna agus comhpháirteanna breise a liostaítear i gCuid C d'Iarscríbhinn VIII a áireamh, agus an dul chun cinn teicniúil agus eolaíoch á chur san áireamh.
4. Féadfaidh an Coimisiún gníomhartha cur chun feidhme a ghlacadh lena leagfar síos na coinníollacha maidir le dearadh chun páirteanna agus comhpháirteanna dá dtagraítear i mír 2 a bhaint agus a athsholáthar, i gcás inar gá, chun cur chun feidhme comhchuíbhithe na hoibleagáide a leagtar amach sa mhír sin a áirithiú. Glacfar na gníomhartha cur chun feidhme sin i gcomhréir leis an nós imeachta scrúdúcháin dá dtagraítear in Airteagal 52(2).
5. Ní chuirfidh monaróirí bac ar pháirteanna agus comhpháirteanna feithicle a bhaint agus a athsholáthar trí úsáid a bhaint as nuashonruithe bogearraí, mura bhforáiltear a mhalairt i ndlí an Aontais.

CAIBIDIL III

OIBLEAGÁIDÍ NA MONARÓIRÍ*Airteagal 8***Oibleagáidí ginearálta**

1. Léireoidh monaróirí go ndéantar cineálcheadú ar na cineálacha nua feithicle a mhonaraíonn siad agus a chuirtear ar an margadh, i gcomhréir le ceanglais Rialachán (AE) 2018/858, Rialachán (AE) Uimh. 168/2013 agus ceanglais an Rialacháin seo.
2. Chun críocha cineálcheadaithe do chineálacha feithicle a bhfuil feidhm ag na ceanglais in Airteagail 4, 5, 6 nó 7 maidir leo, soláthróidh an monaróir an doiciméadacht lena léireofar comhlíonadh na gceanglas sin agus déanfaidh sé an méid seo a leanas:
 - (a) í a áireamh san fhilleán faisnéise dá dtagraítear in Airteagal 24 de Rialachán (AE) 2018/858 nó in Airteagal 27 de Rialachán (AE) Uimh. 168/2013, de réir mar is infheidhme; agus
 - (b) í a chur faoi bhráid an údaráis cineálcheadaithe i gcomhréir le hAirteagal 23 de Rialachán (AE) 2018/858 nó in Airteagal 26 de Rialachán (AE) Uimh. 168/2013, de réir mar is infheidhme.

3. Chun críocha cineálcheadaithe d'fheithiclí a bhfuil feidhm ag na ceanglais a leagtar amach in Airteagal 10 den Rialachán seo maidir leo, déanfaidh an monaróir an fhaisnéis dá dtagraítear in Airteagal 10(1) den Rialachán seo a tharraingt suas agus í a chur faoi bhráid an údaráis cineálcheadaithe, i gcomhréir le hAirteagal 24(1), pointe (a), de Rialachán (AE) 2018/858, in éineacht leis an iarratas ar chineálcheadú dá dtagraítear in Airteagal 23 den Rialachán sin.

4. Chun críocha cineálcheadaithe d'fheithiclí a bhfuil feidhm ag na ceanglais a leagtar amach in Airteagal 11 den Rialachán seo maidir leo, cuirfidh an monaróir an dearbhú lena ndearbhaítear comhlíonadh an cheanglais a leagtar amach in Airteagal 11(1) den Rialachán seo faoi bhráid an údaráis cineálcheadaithe, i gcomhréir le hAirteagal 24(1), pointe (a), de Rialachán (AE) 2018/858, nó le hAirteagal 27(1) de Rialachán (AE) Uimh. 168/2013, de réir mar is infheidhme, in éineacht leis an iarratas ar chineálcheadú.

Airteagal 9

Straitéis chiorclaíochta;

1. Déanfaidh gach monaróir, amhail ón 1 Meán Fómhair 2029, straitéis chiorclaíochta a tharraingt suas ar leibhéal an mhonaróra.
2. Tabharfar tuairisc sa straitéis chiorclaíochta ar na gníomhaíochtaí a dhéanfaidh an monaróir chun obair leantach a dhéanamh ar a oibleagáidí chun a áirithiú go gcomhlíonfar na ceanglais chiorclaíochta i gCaibidil II.
3. Beidh na heilimintí a leagtar síos i gCuid A d'Iarscríbhinn V sa straitéis chiorclaíochta.
4. Soláthróidh gach monaróir cóip den straitéis chiorclaíochta d'údaráis cineálcheadaithe na mBallstát agus don Choimisiún laistigh de 30 lá tar éis í a tharraingt suas.
5. Déanfaidh gach monaróir faireachán agus obair leantach ar na gníomhaíochtaí atá sa straitéis chiorclaíochta agus tabharfaidh sé an straitéis cothrom le dáta, ina léireofar na hathruithe nua ábhartha ar an straitéis chiorclaíochta, gach 5 bliana i gcomhréir le Cuid B d'Iarscríbhinn V. Cuirfidh an monaróir straitéis chiorclaíochta nuashonraithe ar fáil don Choimisiún.
6. Cuirfidh an Coimisiún na straitéisí chiorclaíochta agus aon nuashonrú ar na straitéisí sin ar fáil go poiblí, cé is moite d'fhaisnéis rúnda.
7. Faoi 31 Lúnasa 2033 agus ar a laghad gach 6 bliana ina dhiaidh sin, déanfaidh an Coimisiún tuarascáil ar chiorclaíocht na hearnála mótarfheithiclí a tharraingt suas agus a fhoilsiú. Beidh an tuarascáil sin bunaithe go háirithe ar straitéisí chiorclaíochta agus nuashonruithe ar na straitéisí sin.

Airteagal 10

Dearbhú i dtaca leis an gcion athchúrsáilte atá i bhfeithiclí

1. Dearbhóidh monaróirí, i gcás gach cineáil nua feithicle ar a ndéantar cineálcheadú faoi Rialachán (AE) 2018/858 amhail ón gcéad lá den mhí i ndiaidh 12 mhí ó ghlacadh na modheolaíochtaí faoi seach chun an sciar de chion athchúrsáilte ó dhramhaíl iarthomhaltas i gcineálacha feithicle a ríomh agus a fhíorú, dá dtagraítear in Airteagal 6 den Rialachán seo, an sciar faoi seach de chion athchúrsáilte den mhéid seo a leanas:

(a) neoidimiam, diospróisiam, praiséidimiam, teirbiam, samairiam, nicil, cóbalt agus bórón i mbuanmhaighnéid i mótair ríomhthiomána;

(b) alúmanam agus a chóimhiotail;

(c) maignéisiam agus a chóimhiotail;

(d) cruach agus a chóimhiotail;

(e) plaistigh.

Bainfidh an dearbhú le cion athchúrsáilte na n-ábhar sin atá sa chineál feithicle agus léireofar ann, in aghaidh an sciar ábhair, agus i gcás comhpháirteanna plaisteacha atá níos troime ná 100 gram, cé acu a dhéantar nó nach ndéantar an t-ábhar a athchúrsáil ó dhramhaíl réamhthomhaltais nó ó dhramhaíl iarthomhaltais.

2. Fíoróidh na húdaráis chineálcheadaithe go bhfuil an doiciméadacht is gá curtha isteach ag na monaróirí agus go bhfuil an fhaisnéis dá dtagraítear i mír 1 ina cuid di.

3. De mhaolú ar mhír 1, ní bheidh feidhm ag an gceanglas maidir leis an sciar de chion athchúrsáilte in ábhar áirithe a dhearbhu i gcás ina bhfuil sprioc tagtha chun bheith infheidhme le haghaidh an ábhair sin faoi Airteagal 6.

Airteagal 11

Faisnéis faoi bhaint agus athsholáthar na bpáirteanna, na gcomhpháirteanna agus na n-ábhar atá i bhfeithicilí

1. Ón 1 Meán Fómhair 2029 ar aghaidh, soláthróidh monaróirí, i gcás cineálacha nua feithicilí a cineálcheadaíodh, rochtain neamhshrianta, chaighdeánaithe agus neamh-idirdhealaitheach d'oibreoirí bainistithe dramhaíola, d'fhoilsitheoirí faisnéise teicniúla agus d'oibreoirí deisiúcháin agus cothabhála, ar an bhfaisnéis a liostaítear in Iarscríbhinn VI, lena gcumasófar rochtain ar an méid seo a leanas agus baint agus athsholáthar sábháilte an mhéid seo a leanas, mura bhfuil an fhaisnéis sin ar fáil faoi reachtaíocht eile de chuid an Aontais:

(a) ceallraí feithicilí leictreacha agus a gceallra-phacaí atá ionchorpraithe san fheithicil;

(b) páirteanna, comhpháirteanna agus ábhair ina bhfuil na sreabháin agus na leachtanna a liostaítear i gCuid B d'Iarscríbhinn VIII agus atá i láthair i bhfeithicilí;

(c) páirteanna agus comhpháirteanna a liostaítear i gCuid C d'Iarscríbhinn VIII atá i láthair i bhfeithicilí;

(d) páirteanna agus comhpháirteanna ina bhfuil na hamhábhair chriticiúla dá dtagraítear in Airteagal 28(1), pointe (b), de Rialachán (AE) 2024/1252 tráth an chineálcheadaithe den fheithicil;

(e) comhpháirteanna agus páirteanna i bhfeithicil atá códaithe go digiteach, i gcás ina gcuireann an códú sin cosc ar iad a dheisiú, a chothabháil nó a athsholáthar i bhfeithicil eile.

Ní bheidh feidhm ag pointe (e) den chéad fhomhír maidir le faisnéis atá le soláthar d'fhoilsitheoirí faisnéise teicniúla.

2. Cuirfidh monaróirí faisnéis teorach maidir le tarrtháil agus práinnfhreagairt ar fáil do sheirbhísí éigeandála.

3. Áiritheoidh monaróirí comhar leis na saoráidí cóireála údairithe, leis na foilsitheoirí faisnéise teicniúla, leis na hoibreoirí iarfheistithe, agus leis na hoibreoirí deisiúcháin agus cothabhála trí na hardáin chumarsáide is gá a bhunú chun an fhaisnéis dá dtagraítear i mír 1 agus an fhaisnéis a shonraítear in Iarscríbhinn VI a sholáthar agus a choimeád cothrom le dáta.

Soláthróidh na monaróirí an fhaisnéis dá dtagraítear sa chéad fhomhír saor in aisce. Féadfaidh na monaróirí muirir réasúnta agus chomhréireacha a bhailiú ó oibreoirí bainistithe dramhaíola, ó fhoilsitheoirí faisnéise teicniúla agus ó oibreoirí deisiúcháin agus cothabhála a mhéid is gá chun na costais riaracháin iarbhir arna dtabhú chun an fhaisnéis is gá a dhéanamh inrochtana trí ardáin chumarsáide a chumhdach.

4. Tugtar de chumhacht don Choimisiún gníomhartha tarmligthe a ghlacadh i gcomhréir le hAirteagal 51 chun larscríbhinn VI a leasú trí athbhreithniú a dhéanamh ar liosta na bpáirteanna, na gcomhpháirteanna agus na n-ábhar i bhfeithiclí agus ar raon feidhme na faisnéise atá le soláthar ag na monaróirí. Cuirfidh an Coimisiún i gcuntas forbairtí teicniúla agus rialála, teicneolaíocht faisnéise reatha agus forbairtí intuatha i dteicneolaíocht feithiclí.

Airteagal 12

Lipéadú na bpáirteanna, na gcomhpháirteanna agus na n-ábhar atá i bhfeithiclí

1. Úsáidfídh monaróirí agus a soláthróirí ainmníocht na gcaighdeán códaithe maidir le comhpháirteanna agus ábhair a liostaítear i bpointí 1, 2 agus 3 d'larscríbhinn VII chun páirteanna, comhpháirteanna agus ábhair feithiclí a lipéadú agus a shainaithint.

2. Tugtar de chumhacht don Choimisiún gníomhartha tarmligthe a ghlacadh i gcomhréir le hAirteagal 51 chun larscríbhinn VII a leasú chun í a oiriúnú don dul chun cinn teicniúil agus eolaíoch.

Airteagal 13

Pas Digiteach Ciorclaíochta Feithicle

1. Ón 1 Meán Fómhair 2032, beidh Pas Digiteach Ciorclaíochta Feithicle ag gach feithicil a chuirfear ar an margadh, a bheidh ailínithe, idir-inoibritheach agus, i gcás inar féidir, comhtháite i bpassanna comhshaoil eile a bhaineann le feithiclí arna mbunú faoi dhlí an Aontais, go háirithe na pasanna dá dtagraítear in Airteagal 77 de Rialachán (AE) 2023/1542, in Airteagal 3, pointe (68), de Rialachán (AE) 2024/1257 agus le pasanna ábhartha eile arna mbunú de bhun Rialachán (AE) 2024/1781.

2. Beidh an Pas Digiteach Ciorclaíochta Feithicle d'fheithicil atá á cur ar an margadh inrochtana saor in aisce agus beidh an méid seo a leanas ann, i bhformáid dhigiteach:

(a) an fhaisnéis dá dtagraítear in Airteagal 11;

(b) an fhaisnéis faoi pháirteanna ina bhfuil luaidhe, mearcair, caidmiam nó cróimiam heicsifhiúsach san fheithicil dá dtagraítear sa mhaolú a leagtar amach in Airteagal 5(5);

(c) dearbhú maidir le sciar an chion athchúrsáilte plaisteach agus na hábhair a liostaítear in Airteagal 10(1);

(d) catalóg oifigiúil na bpáirteanna spártha le haghaidh an chineáil feithicle lena mbaineann.

3. I gcás ina bhfuil faisnéis a cheanglaítear faoin Airteagal seo inrochtana cheana féin trí phas dá dtagraítear i mír 1 seachas an Pas Digiteach Ciorclaíochta Feithicle, ní dhéanfar an fhaisnéis a cheanglaítear faoi mhír 2 a dhúbailt sa Phas Digiteach Ciorclaíochta Feithicle, ar choinníoll go n-áirithítear idir-inoibritheacht.

4. Áiríteoidh an monaróir a chuirfidh an fheithicil ar an margadh go mbeidh an fhaisnéis, dá dtagraítear i mír 2, cruinn, iomlán agus cothrom le dáta.

5. Leis an bhfaisnéis uile a áireofar sa Phas Digiteach Ciorclaíochta Feithicle, comhlíonfar na rialacha arna mbunú ag an gCoimisiún faoi mhír 6, agus:

- (a) beidh sí bunaithe ar chaighdeáin oscailte;
- (b) forbrófar i bhformáid idir-inoibritheach í;
- (c) beidh sí inaistrithe trí líonra malartaithe sonraí idir-inoibritheach oscailte gan gaibhniú díoltóirí;
- (d) beidh sí meaisín-inléite, struchtúrtha agus inchuadaithe.

6. Faoi 14 Lúnasa 2030, glacfaidh an Coimisiún gníomhartha cur chun feidhme lena leagfar síos rialacha maidir leis an méid seo a leanas:

- (a) modh agus buncheanglais an réitigh theicniúil atá le húsáid chun rochtain a fháil ar an bPas Digiteach Ciorclaíochta Feithicle ar bhealach nach gcuireann bac ar aon réiteach teicneolaíoch;
- (b) na ceanglais theicniúla maidir le dearadh agus oibriú le haghaidh an Phas Dhigitigh Ciorclaíochta Feithicle, lena n-áirítear rialacha maidir leis na nithe seo a leanas:
 - (i) ailíniú agus idir-inoibritheacht an Phas Dhigitigh Ciorclaíochta Feithicle le pasanna eile a cheanglaítear le reachtaíocht an Aontais;
 - (ii) stóráil agus próiseáil na faisnéise a áirítear sa Phas Digiteach Ciorclaíochta Feithicle;
 - (iii) infhaighteacht an Phas Dhigitigh Ciorclaíochta Feithicle tar éis don mhonaróir, atá freagrach as na hoibleagáidí a leagtar amach i mír 4 a chomhlíonadh, scor de bheith ann nó tar éis dó deireadh a chur lena ghníomhaíocht san Aontas;
- (c) tabhairt isteach, modhnú agus tabhairt cothrom le dáta na faisnéise a áirítear sa Phas Digiteach Ciorclaíochta Feithicle ag tríú páirtithe seachas an monaróir;
- (d) na coinníollacha maidir le rochtain ar an bPas Digiteach Ciorclaíochta Feithicle, lena n-áirítear an ceart rochtana agus na rialacha ábhartha maidir le sonraí a chosaint agus ceartha maoine intleachtúla a chosaint;
- (e) suíomh an iompróra sonraí nó aitheantóra eile lena gcumasaítear rochtain ar Phas Digiteach Ciorclaíochta Feithicle na feithicle.

Agus na rialacha dá dtagraítear sa chéad fhomhír á leagan síos, cuirfidh an Coimisiún san áireamh an gá atá le hardleibhéal slándála agus príobháideachais a áirithiú.

Déanfar na gníomhartha cur chun feidhme dá dtagraítear sa chéad fhomhír a ghlacadh i gcomhréir leis an nós imeachta scrúdúcháin dá dtagraítear in Airteagal 52(2).

CAIBIDIL IV

FEITHICLÍ A BHFUIL A RÉ CAITE A BHAINISTIÚ

ROINN 1

Forálacha ginearálta*Airteagal 14***Údarás inniúil um fheithiclí a bhfuil a ré caite a bhainistiú**

1. Ainmneoidh na Ballstáit údarás inniúil amháin nó níos mó le bheith freagrach as na hoibleagáidí faoin gCaibidil seo, go háirithe as faireachán agus fíorú a dhéanamh ar chomhlíonadh a gcuid oibleagáidí ag oibreoirí eacnamaíocha, ag táirgeoirí agus ag eagraíochtaí um fhreagracht táirgeoirí mar a leagtar amach in Airteagail 15 go 37 agus in Iarscríbhinn I.
2. Féadfaidh gach Ballstát pointe teagmhála amháin a ainmniú, i measc na n-údarás inniúil dá dtagraítear i mír 1, chun cumarsáid a dhéanamh leis an gCoimisiún.
3. Leagfaidh na Ballstáit síos na mionsonraí a bhaineann le heagrúchán agus oibríocht na n-údarás inniúil, lena n-áirítear na rialacha riaracháin agus nós imeachta maidir leis na nithe seo a leanas:
 - (a) táirgeoirí a chlárú i gcomhréir le hAirteagal 19;
 - (b) údarú a thabhairt do tháirgeoirí agus d'eagraíochtaí um fhreagracht táirgeoirí i gcomhréir le hAirteagal 18;
 - (c) formhaoirseacht ar chur chun feidhme na n-oibleagáidí um fhreagracht leathnaithe táirgeora i gcomhréir le hAirteagail 16 agus 20;
 - (d) bailiú sonraí faoi fheithiclí agus feithiclí a bhfuil a ré caite i gcomhréir le hAirteagail 19(12) agus 50(6);
 - (e) faisnéis a chur ar fáil i gcomhréir le hAirteagal 50.
4. Faoi 30 Meitheamh 2027, déanfaidh na Ballstáit ainmneacha agus seoltaí na n-údarás inniúil arna n-ainmniú de bhun mhír 1 a chur in iúl don Choimisiún. Cuirfidh na Ballstáit aon athruithe ar ainmneacha nó ar sheoltaí na n-údarás inniúil sin in iúl don Choimisiún gan moill mhíchuí.

*Airteagal 15***Saoráidí cóireála údaraithe**

1. Gan dochar do Threoir 2010/75/AE, aon bhunaíocht nó aon ghnóthas a bhfuil sé beartaithe aige oibríochtaí cóireála a dhéanamh ar fheithiclí a bhfuil a ré caite, gheobhaidh sé cead ón údarás inniúil i gcomhréir le hAirteagal 23 de Threoir 2008/98/CE agus comhlíonfaidh sé na coinníollacha a leagtar síos sa chead sin.
2. Chun gur féidir cead dá dtagraítear i mír 1 den Airteagal seo a eisiúint, fíoróidh an t-údarás inniúil an bhfuil an acmhainneacht is gá ag an mbunaíocht nó ag an ngnóthas chun na hoibleagáidí a leagtar amach in Airteagal 26 a chomhlíonadh.

3. Leis na ceadanna dá dtagraítear i mír 1 den Airteagal seo, léireofar go mbeidh an inniúlacht ag na saoráidí cóireála deimhniú scriosta a eisiúint, dá dtagraítear in Airteagal 25.

De mhaolú ar an gcéad fhomhír den mhír seo, féadfaidh na Ballstáit foráil a dhéanamh faoina gcreataí dlíthiúla náisiúnta go bhfuil saoráidí cóireála údaráithe inniúil chun an deimhniú scriosta dá dtagraítear in Airteagal 25 a eisiúint.

4. Féadfaidh táirgeoirí nó, i gcás a gceaptha faoi Airteagal 17(1), eagraíochtaí um fhreagracht táirgeoirí conarthaí a thabhairt i gcrích le saoráidí cóireála údaráithe chun a n-oibleagáidí um fhreagracht táirgeora a chomhlíonadh. Beidh na conarthaí sin cothrom agus trédhearcach agus ní bheidh téarmaí ná coinníollacha idirdhealaitheacha iontu.

Féadfaidh Ballstáit conradh samplach a sholáthar chun comhlíonadh an Airteagail seo a éascú.

5. Áiríteoidh na Ballstáit, maidir leis na coinníollacha agus na nósanna imeachta chun an cead a dheonú, go ndéanfar iad a chomhordú go hiomlán i gcás ina mbeidh baint ag níos mó ná údarás inniúil amháin nó níos mó ná bunaíocht nó gnóthas amháin leis na nósanna imeachta sin um cheadanna, agus é beartaithe acu oibríochtaí cóireála a dhéanamh ar fheithiclí a bhfuil a ré caite, chun cur chuige comhtháite éifeachtach ag na húdaráis inniúla uile a ráthú.

6. Tugtar de chumhacht don Choimisiún gníomh cur chun feidhme a ghlacadh lena leagtar síos ceanglais mhionsonraithe is infheidhme maidir leis na conarthaí dá dtagraítear i mír 4 den Airteagal seo, d'fhonn téarmaí agus coinníollacha cothroma, trédhearcacha agus neamh-idirdhealaitheacha a áirithiú. Déanfar an gníomh cur chun feidhme sin a ghlacadh i gcomhréir leis an nós imeachta scrúdúcháin dá dtagraítear in Airteagal 52(2).

ROINN 2

Freagracht Leathnaithe Táirgeora

Airteagal 16

Freagracht leathnaithe táirgeora

1. Ón 1 Meán Fómhair 2029, beidh freagracht leathnaithe táirgeora ar tháirgeoirí as feithiclí a chuirfidh siad ar fáil ar an margadh den chéad uair laistigh de chríoch Ballstáit, lena n-áirítear i gcás inar cuireadh an fheithicil ar fáil ar an margadh roimhe sin i mBallstát eile seachas an Ballstát ar laistigh dá chríoch a chuirtear an fheithicil ar fáil. Beidh an scéim freagrachta leathnaithe táirgeora i gcomhréir le hAirteagail 8 agus 8a de Threoir 2008/98/CE agus comhlíonfaidh sí ceanglais na Caibidle seo.

2. Áireofar leis an bhfreagracht leathnaithe táirgeora an oibleagáid ar tháirgeoirí an méid seo a leanas a áirithiú:

(a) maidir le feithiclí a chuir siad ar fáil ar an margadh den chéad uair laistigh de chríoch Bhallstáit agus a thagann chun bheith ina bhfeithiclí a bhfuil a ré caite:

(i) go mbaileofar iad i gcomhréir le hAirteagal 23;

(ii) go ndéanfar cóireáil orthu i gcomhréir le hAirteagal 26;

(b) na hoibreoirí bainistithe dramhaíola a dhéanann cóireáil ar fheithiclí a bhfuil a ré caite dá dtagraítear i bpointe (a), comhlíonfaidh siad na spriocanna a leagtar síos in Airteagal 33.

3. Sna réigiúin is forimeallaí dá dtagraítear in Airteagal 349 CFAE, féadfaidh na Ballstáit oibleagáidí na dtáirgeoirí dá dtagraítear i míreanna 1 agus 2 den Airteagal seo a oiriúnú chun na costais a bhaineann le bainistiú feithiclí a bhfuil a ré caite a chumhdach agus saintréithe na réigiún sin á gcur i gcuntas.

4. Sa bhreis ar an bhfaisnéis dá dtagraítear in Airteagal 8a(3), pointe (e), de Threoir 2008/98/CE, foilseoidh táirgeoirí, i gcás ina gcomhlíontar oibleagáidí freagrachta leathnaithe táirgeora ar bhonn aonair, nó eagraíochtaí um fhreagracht táirgeoirí arna gceapadh i gcás ina gcomhlíontar oibleagáidí freagrachta leathnaithe táirgeora ar bhonn comhchoiteann, ar a suíomhanna gréasáin uair sa bhliain, faoi réir rúndacht tráchtála agus thionsclaíoch, an fhaisnéis maidir le bailiú feithiclí a bhfuil a ré caite agus baint amach spriocanna maidir le hathúsáid agus athchúrsáil, athúsáid agus aisghabháil agus athchúrsáil phlaisteach a rinne siad féin, i gcás ina gcomhlíontar oibleagáidí freagrachta leathnaithe táirgeora ar bhonn aonair, nó a rinne na táirgeoirí a cheap an eagraíocht um fhreagracht táirgeoirí sin i gcás ina gcomhlíontar oibleagáidí freagrachta leathnaithe táirgeora ar bhonn comhchoiteann.

Airteagal 17

Eagraíochtaí um Fhreagracht Táirgeoirí

1. Féadfaidh táirgeoirí a roghnú a n-oibleagáidí um fhreagracht leathnaithe táirgeora a chomhlíonadh ar bhonn aonair nó féadfaidh siad eagraíocht um fhreagracht táirgeoirí arna húdará i gcomhréir le hAirteagal 18 a cheapadh chun na hoibleagáidí um fhreagracht leathnaithe táirgeora a chomhlíonadh thar a gceann.

Féadfaidh na Ballstáit bearta a ghlacadh chun a cheangal ar tháirgeoirí eagraíocht um fhreagracht táirgeoirí a cheapadh chun a n-oibleagáidí um fhreagracht leathnaithe a chomhlíonadh thar a gceann.

2. Áiríteoidh eagraíochtaí um fhreagracht táirgeoirí rúndacht na sonraí ina seilbh a mhéid a bhaineann le faisnéis dílseánaigh nó faisnéis is inchurtha go díreach i leith táirgeoirí aonair nó a n-ionadaithe údaráithe le haghaidh na freagrachta leathnaithe táirgeora.

3. De bhreis ar an bhfaisnéis dá dtagraítear in Airteagal 16(4), cuirfidh eagraíochtaí um fhreagracht táirgeoirí an fhaisnéis faoin nós imeachta roghnúcháin a chuirtear i bhfeidhm i gcomhréir le mír 5 den Airteagal seo ar fáil go poiblí.

4. Áiríteoidh eagraíochtaí um fhreagracht táirgeoirí idirphlé rialta idir geallsealbhóirí de bhun Airteagal 8a(6) de Threoir 2008/98/CE. Oibreoirí bainistithe dramhaíola atá gníomhach i mbailiú agus i gcóireáil feithiclí a bhfuil a ré caite, ainmneoidh siad comhaltaí breathnóra ar bhoird feidhmiúcháin na n-eagraíochtaí um fhreagracht táirgeoirí.

5. Beidh na hoibreoirí bainistithe dramhaíola faoi réir nós imeachta roghnúcháin neamh-idirdhealaitheach, bunaithe ar chritéir thrédhearcacha dhámhachtana, arna dhéanamh ag táirgeoirí nó ag eagraíochtaí um fhreagracht táirgeoirí agus nach gcuireann ualach díréireach ar fhiontair bheaga agus mheánmhéide.

Airteagal 18

Comhlíonadh na freagrachta leathnaithe táirgeora a údará

1. Déanfaidh táirgeoirí, i gcás ina mbeidh oibleagáidí um fhreagracht leathnaithe táirgeora á gcomhlíonadh ar bhonn aonair, agus eagraíochtaí um fhreagracht táirgeoirí arna gceapadh i gcás ina mbeidh oibleagáidí um fhreagracht leathnaithe táirgeora á gcomhlíonadh ar bhonn comhchoiteann, iarratas ar údará ón údarás inniúil.

2. Ní dheonófar an t-údarú ach amháin i gcás ina léireofar go bhfuil na ceanglais a leagtar síos in Airteagal 8a(3), pointí (a) go (d), de Threoir 2008/98/CE á gcomhlíonadh agus gur leordhóthanach na bearta arna gcur i bhfeidhm ag an táirgeoir nó ag an eagraíocht um fhreagracht táirgeoirí chun na hoibleagáidí a leagtar amach sa Chaibidil seo a chomhlíonadh maidir leis an líon feithiclí arna chur ar fáil ar an margadh den chéad uair laistigh de chríoch Bhallstáit ag an táirgeoir nó na táirgeoirí a ngníomhaíonn an eagraíocht um fhreagracht táirgeoirí thar a gceann.

Ní fhéadfar táirgeoirí, i gcás ina mbeidh oibleagáidí um fhreagracht leathnaithe táirgeora á gcomhlíonadh ar bhonn aonair, ná eagraíochtaí um fhreagracht táirgeoirí, i gcás ina mbeidh oibleagáidí um fhreagracht leathnaithe táirgeora á gcomhlíonadh ar bhonn comhchoiteann, a chlárú ach amháin i gcás inar thug an t-údarás inniúil an t-údarú sin dó i gcomhréir leis an Airteagal seo. Tá an méid sin gan dochar don fhéidearthacht an nós imeachta clárúcháin de bhun Airteagal 19 agus an nós imeachta údarúcháin de bhun an Airteagail seo a chomhcheangal in aon nós imeachta amháin.

3. Déanfaidh na Ballstáit, ina mbearta lena leagtar síos rialacha riaracháin agus nós imeachta dá dtagraítear in Airteagal 14(3), pointe (b), mionsonraí an nós imeachta údarúcháin a áireamh, a d'fhéadfadh a bheith éagsúil ag brath ar cibé acu a bhaineann sé le comhlíonadh aonair nó comhlíonadh comhchoiteann na n-oibleagáidí um fhreagracht leathnaithe táirgeora, agus na módúlachtaí chun comhlíonadh ag táirgeoirí agus ag eagraíochtaí um fhreagracht táirgeoirí a fhíorú, lena n-áirítear an fhaisnéis a bheidh le soláthar ag táirgeoirí nó ag eagraíochtaí um fhreagracht táirgeoirí chun na críche sin.

4. Tabharfaidh an táirgeoir nó an eagraíocht um fhreagracht táirgeoirí fógra don údarás inniúil gan moill mhíchúil maidir le haon athruithe ar an bhfaisnéis san údarú, le haon athruithe a bhaineann le téarmaí an údaraithe nó le scor buan na n-oibríochtaí.

5. Déanfar an sásra féinrialaithe dá bhforáiltear in Airteagal 8a(3), pointe (d), de Threoir 2008/98/CE go rialta, agus gach 3 bliana ar a laghad, agus arna iarraidh sin ag an údarás inniúil, chun a fhíorú go bhfuil na forálacha sa phointe sin á gcomhlíonadh agus go bhfuil na coinníollacha maidir le húdarú dá dtagraítear i mír 2 den Airteagal seo á gcomhlíonadh i gcónaí. Déanfaidh an táirgeoir nó an eagraíocht um fhreagracht táirgeoirí, arna iarraidh sin, tuarascáil féinrialaithe agus, i gcás inar gá, an dréachtphlean gníomhaíochta ceartaithí a chur faoi bhráid an údaráis inniúil. Gan dochar do na hinniúlachtaí faoi mhír 6 den Airteagal seo, féadfaidh an t-údarás inniúil barúlacha a thabhairt maidir leis an tuarascáil féinrialaithe agus maidir leis an dréachtphlean gníomhaíochta ceartaithí, agus cuirfidh sé aon bharúlacha den sórt sin in iúl don táirgeoir nó don eagraíocht um fhreagracht táirgeoirí. Déanfaidh an táirgeoir nó an eagraíocht um fhreagracht táirgeoirí an plean gníomhaíochta ceartaithí a tharraingt suas agus a chur chun feidhme ar bhonn na mbarúlacha sin.

6. Féadfaidh an t-údarás inniúil a chinneadh an t-údarú a chúlghairm mura gcomhlíonann an táirgeoir nó an eagraíocht um fhreagracht táirgeoirí a thuilleadh na ceanglais maidir le bailiú agus cóireáil feithiclí a bhfuil a ré caite a eagrú, nó má mhainníonn sé tuairisciú don údarás inniúil, nó má mhainníonn sé fógra a thabhairt don údarás inniúil faoi aon athrú a bhaineann le téarmaí an údaraithe, nó má scoir sé de bheith i mbun oibríochta.

Airteagal 19

Clárú

1. Faoin 31 Lúnasa 2029, bunóidh gach Ballstát clár táirgeoirí, nó úsáidfídh sé clár táirgeoirí atá ann cheana, a fhónfaidh chun faireachán a dhéanamh ar chomhlíonadh cheanglais na Caibidle seo ag táirgeoirí.

Soláthrófar leis an gclár naisc chuig suíomhanna gréasáin de chláir náisiúnta táirgeoirí eile chun clárú na dtáirgeoirí nó clárú na n-ionadaithe údaraithe le haghaidh na freagrachta leathnaithe táirgeora a éascú agus, má tá fáil orthu, do na suíomhanna gréasáin náisiúnta ar a bhfuil faisnéis faoin nós imeachta um chlárú.

Faoin 31 Lúnasa 2029, bunóidh an Coimisiún suíomh gréasáin ina mbeidh na naisc chuig na cláir náisiúnta uile de tháirgeoirí chun clárú sna Ballstáit uile a éascú.

Cuirfidh na Ballstáit an Coimisiún ar an eolas faoi na naisc chuig a gcláir náisiúnta táirgeoirí laistigh de 30 lá ón dáta a sheolfar na cláir sin.

2. Cláróidh táirgeoirí leis an gclár náisiúnta dá dtagraítear i mír 1. Chuige sin, cuirfidh siad iarratas isteach ar chlárú i ngach Ballstát ina gcuireann siad feithicil ar fáil ar an margadh den chéad uair.

Cuirfidh táirgeoirí an t-iarratas ar chlárú isteach trí chóras leictreonach próiseála sonraí dá dtagraítear i mír 8, pointe (a).

Ní chuirfidh táirgeoirí feithicilí ar fáil ar mhargadh Ballstáit, ach amháin má bhíonn siad cláraithe sa Bhallstát sin, nó, i gcás údaraithe, má bhíonn a n-ionadaithe údaraithe le haghaidh na freagrachta leathnaithe táirgeora cláraithe sa Bhallstát sin.

3. Áireofar an fhaisnéis a liostaítear in Iarscríbhinn IX san iarratas ar chlárú. Féadfaidh Ballstát faisnéis bhreise nó doiciméid bhreise a iarraidh, de réir mar is gá, chun clár na dtáirgeoirí a úsáid ar bhealach éifeachtúil.

4. De mhaolú ar mhír 3 den Airteagal seo, soláthrófar an fhaisnéis dá dtagraítear i bpointe 1(d) d'Iarscríbhinn IX san iarratas ar chlárú faoi mhír 3 den Airteagal seo nó san iarratas ar údarú faoi Airteagal 18.

5. I gcás inar cheap táirgeoir eagraíocht um fhreagracht táirgeoirí i gcomhréir le hAirteagal 17(1), comhlíonfaidh an eagraíocht sin na hoibleagáidí faoin Airteagal seo *mutatis mutandis* mura sonraíonn an Ballstát, ina gcuirtear an feithicil ar fáil ar an margadh den chéad uair, a mhalairt.

6. Féadfaidh ionadaí údaraithe le haghaidh na freagrachta leathnaithe táirgeora na hoibleagáidí faoin Airteagal seo a chomhlíonadh thar ceann táirgeora.

Má dhéanann ionadaí údaraithe amháin ionadaíocht do níos mó ná táirgeoir amháin i mBallstát, déanfaidh an t-ionadaí údaraithe sin ainm agus sonraí teagmhála gach ceann de na táirgeoirí dá ndéantar ionadaíocht a chur ar fáil ar leithligh.

7. Féadfaidh na Ballstáit a chinneadh gur aon nós imeachta amháin atá sa nós imeachta clárúcháin de bhun an Airteagail seo agus an nós imeachta údarúcháin de bhun Airteagal 18, ar choinníoll go gcomhlíonann an t-iarratas ar údarú na ceanglais a leagtar amach i míreanna 3 go 6 den Airteagal seo.

8. Déanfaidh an t-údarás inniúil an méid a leanas:

(a) cuirfidh sé faisnéis faoin bpróiseas iarratais ar fáil ar a shuíomh gréasáin trí chóras leictreonach próiseála sonraí;

(b) deonóidh sé clárúcháin agus soláthróidh sé uimhir chlárúcháin laistigh d'uastréimhse 12 sheachtain ón tráth a sholáthraítear an fhaisnéis uile a cheanglaítear de bhun mhíreanna 2 agus 3.

9. Féadfaidh an t-údarás inniúil an méid seo a leanas a dhéanamh:

(a) modúlachtaí a leagan síos i leith cheanglais agus phróiseas an chlárúcháin gan ceanglais shubstainteacha a chur leis na cinn a leagtar síos de bhun mhíreanna 2 agus 3;

(b) táillí atá costas-bhunaithe agus comhréireach a mhuirearú ar tháirgeoirí chun na hiarratais dá dtagraítear i mír 2 den Airteagal seo agus in Airteagal 18(1) a phróiseáil.

10. Féadfaidh an t-údarás inniúil diúltú do tháirgeoir a chlárú nó clárú an táirgeora a tharraingt siar i gcás nach gcuirtear an fhaisnéis dá dtagraítear i mír 3 den Airteagal seo agus an fhianaise dhoiciméadach ghaolmhar ar fáil nó nach leor iad, nó i gcás nach gcomhlíonann an táirgeoir na ceanglais a leagtar síos i bpointe (d) d'Iarscríbhinn IX a thuilleadh.

Déanfaidh an t-údarás inniúil clárú an táirgeora a tharraingt siar murab ann don táirgeoir a thuilleadh.

11. An táirgeoir, nó, i gcás inarb infheidhme, ionadaí údaraithe an táirgeora le haghaidh na freagrachta leathnaithe táirgeora nó an eagraíocht um fhreagracht táirgeoirí arna ceapadh thar ceann na dtáirgeoirí dá ndéanann sí ionadaíocht, tabharfaidh sé nó sí fógra don údarás inniúil gan moill mhíchúil faoi aon athrú ar an bhfaisnéis sa chlárúchán agus faoi aon scor buan a mhéid a bhaineann leis na feithiclí dá dtagraítear sa chlárúchán a chur ar fáil ar an margadh laistigh de chríoch an Bhallstáit.

12. An táirgeoir, nó, i gcás inarb infheidhme, ionadaí údaraithe an táirgeora le haghaidh na freagrachta leathnaithe táirgeora nó an eagraíocht um fhreagracht táirgeoirí, tuairisceoidh sé nó sí don údarás inniúil atá freagrach as an gclár maidir le feidhmíocht na n-oibleagáidí um fhreagracht leathnaithe táirgeora.

I gcás nach bhfuil an fhaisnéis atá i gclár na dtáirgeoirí inrochtana don phobal, áiritheoidh na Ballstáit go mbeidh rochtain saor in aisce ag na soláthraithe ar ardáin ar líne, lena bhféadfaidh tomhaltóirí cianchonarthaí a chur i gcrích le táirgeoirí, ar an bhfaisnéis sin.

Airteagal 20

Freagracht airgeadais na dtáirgeoirí

1. Leis na ranníocaíochtaí airgeadais a íocfaidh an táirgeoir, cumhdófar na costais seo a leanas a bhaineann leis na feithiclí a chuireann an táirgeoir ar fáil ar an margadh den chéad uair laistigh de chríoch Ballstáit:

- (a) na costais a bhaineann le bailiú feithiclí a bhfuil a ré caite, ar costais iad atá riachtanach chun na ceanglais in Airteagail 23 go 25 a chomhlíonadh agus chun iad a iompar ina dhiaidh sin ar bhealach éifeachtúil agus na costais a bhaineann le cóireáil feithiclí a bhfuil a ré caite, ar costais iad atá riachtanach chun na ceanglais in Airteagail 26 go 30, 33 agus 35 a chomhlíonadh, agus aon ioncam ó oibreoirí bainistithe dramhaíola a fuarthas ó dhíolacháin na bpáirteanna spártha athlámhe agus na gcomhpháirteanna spártha athlámhe, na bhfeithiclí a bhfuil a ré caite arna ndíthruailliú, nó na n-amhábhair tánaisteach arna n-aisghabháil ó pháirteanna, ó chomhpháirteanna agus ó ábhair den sórt sin, á chur i gcuntas; beidh na costais sin bunaithe ar ríomh meánchostais;
- (b) na costais a bhaineann le feachtais ardaithe feasachta a reáchtáil arb é is aidhm dóibh an pobal a chur ar an eolas agus feabhas a chur ar bhailiú feithiclí a bhfuil a ré caite;
- (c) na costais a bhaineann leis an gcóras fógartha dá dtagraítear in Airteagal 25 a bhunú;
- (d) na costais riaracháin a bhaineann le sonraí a bhailiú agus a chur ar fáil agus le tuairisciú do na húdaráis inniúla;

Maidir le feithiclí a thagann faoi raon feidhme Threoir 2000/53/CE agus a cuireadh ar fáil ar an margadh roimh an 13 Lúnasa 2026, agus de mhaolú ar an gcéad fhomhír, pointe (a), agus mír 2 den Airteagal seo, i mBallstáit nach raibh ar na táirgeoirí, i gcomhréir le hAirteagal 5(4), an dara fhomhír de Threoir 2000/53/CE, na costais uile, ach cuid shuntasach díobh, a íoc, comhfhreagróidh na ranníocaíochtaí airgeadais nach mór do tháirgeoir na bhfeithiclí sin a dhéanamh do leibhéal arb ionann é agus cuid shuntasach de na costais dá dtagraítear ann.

2. Leis na ranníocaíochtaí airgeadais a íocann na táirgeoirí a chuireann an fheithicil ar fáil ar an margadh den chéad uair laistigh de chríoch Ballstáit, cumhdófar freisin na costais dá dtagraítear i mír 1, pointe (a), a bhaineann le feithiclí nach féidir an táirgeoir a shainathint lena n-aghaidh nó nach ann a thuilleadh dóibh sa Bhallstát ina ndearnadh feithicil a bhfuil a ré caite den fheithicil, i gcomhréir lena sciar féin den mhargadh.

3. Leis na ranníocaíochtaí airgeadais a íocfaidh na táirgeoirí a chuireann feithiclí sainchuspóireacha ar fáil ar an margadh, ní chumhdófar ach na costais dá dtagraítear i mír 1, pointe (a), a bhaineann le bailiú agus díthruailliú na bhfeithiclí sin.

4. I gcás chomhlíonadh aonair na n-oibleagáidí um fhreagracht leathnaithe táirgeora, soláthróidh na táirgeoirí ráthaíocht le haghaidh feithiclí a chuireann siad ar fáil ar an margadh den chéad uair i gcríoch Ballstáit. Áiríteofar leis an ráthaíocht sin go maoiníofar na hoibríochtaí dá dtagraítear i mír 1 a bhaineann leis na feithiclí sin, lena n-áirítear i gcás ina scoirtear go buan dá n-oibríochtaí nó i gcás dócmhainneachta.

Is é an Ballstát ina gcuirtear an fheithicil ar fáil ar an margadh den chéad uair a chinnfidh méid na ráthaíochta, agus cuirfidh sé san áireamh na critéir a leagtar síos in Airteagal 21.

D'fhéadfadh an ráthaíocht a bheith i bhfoirm rannpháirtíochta ag an táirgeoir sna scéimeanna iomchuí a bhaineann le maoiniú an bhainistithe ar fheithiclí a bhfuil a ré caite, ráthaíocht airgeadais nó árachas coibhéiseach.

5. Nuair a dhéantar feithicil nua a chineálcheadú i gcineálcheadú ilchéimneach, measfar gurb é táirgeoir na bonnfheithicle táirgeoir na feithicle lánchríochnaithe agus féadfaidh sé ranníocaíochtaí pro rata a bhailiú ó mhonaróirí na bpáirteanna, seachas an bhonnfheithicil, a cineálcheadaíodh sa chineálcheadú ilchéimneach. Ní chumhdófar leis na ranníocaíochtaí pro rata sin ach costais i ndáil le díthruailliú i gcomhréir le hAirteagal 28 agus baint páirteanna agus comhpháirteanna i gcomhréir le hAirteagal 29.

Micrifhiontair, mar a shainmhínítear in Airteagal 2(3) den Iarscríbhinn a ghabhann le Moladh 2003/361/CE⁽³⁹⁾ ón gCoimisiún, beidh siad díolmhaithe ó na ranníocaíochtaí sin.

6. Déanfaidh an t-údarás inniúil, i ndlúthchomhar le táirgeoirí, le heagraíochtaí um fhreagracht táirgeoirí agus le hoibreoirí bainistithe dramhaíola, faireachán ar na nithe seo a leanas:

- (a) meánchostais na n-oibríochtaí bailiúcháin, athchúrsála agus cóireála agus ioncaim na n-oibreoirí bainistithe dramhaíola;
- (b) an leibhéal ranníocaíochtaí airgeadais atá le híoc ag na táirgeoirí leis na heagraíochtaí um fhreagracht táirgeoirí arna gceapadh i gcás chomhlíonadh comhchoiteann na n-oibleagáidí um fhreagracht leathnaithe táirgeora ionas go leithdháilfear na costais go cothrom idir na hoibreoirí leasmhara uile.

Airteagal 21

Modhnú táillí

1. I gcás chomhlíonadh comhchoiteann na n-oibleagáidí um fhreagracht leathnaithe táirgeora, áiríteoidh eagraíochtaí um fhreagracht táirgeoirí go ndéanfar na ranníocaíochtaí airgeadais arna n-íoc ag táirgeoirí leo a mhodhnú ach na nithe seo a leanas ar a laghad a chur i gcuntas:

- (a) meáchan na feithicle, gan ceallraí feithiclí leictreacha a áireamh;
- (b) ráta in-athchúrsáilteachta agus in-athúsáidteachta an chineáil feithicle lena mbaineann an fheithicil, ar bhonn na faisnéise arna cur faoi bhráid an údarais cineálcheadaithe i gcomhréir le hAirteagal 4;
- (c) an t-am is gá chun an fheithicil a dhíchóimeáil ag saoráid chóireála údaráithe, go háirithe i gcás páirteanna agus comhpháirteanna ar gá iad a bhaint roimh an mionghéarradh faoi Airteagal 29;
- (d) sciar na n-ábhar agus na substaintí a chuireann cosc ar phróiseas athchúrsála ardcháilíochta;

⁽³⁹⁾ Moladh 2003/361/CE ón gCoimisiún an 6 Bealtaine 2003 maidir leis an sainmhíniú ar mhicrifhiontair agus ar fhiontair bheaga agus mheánmhéide (tugadh fógra faoi leis an doiciméad C(2003) 1422) (IO L 124, 20.5.2003, lch. 36, ELI: <http://data.europa.eu/eli/reco/2003/361/oj>).

(e) an céatadán de chion athchúrsáilte na n-ábhar a liostaítear in Airteagail 6 agus 10 a úsáidtear san fheithicil;

(f) láithreacht agus méid na substaintí dá dtagraítear in Airteagal 5(4).

2. Tugtar de chumhacht don Choimisiún gníomhartha tarmligthe a ghlacadh i gcomhréir le hAirteagal 51, chun an Rialachán seo a fhorlíonadh trí rialacha mionsonraithe a bhunú maidir leis an gcaoi a gcuirfear na critéir dá bhforáiltear i mír 1 den Airteagal seo i bhfeidhm.

Airteagal 22

Sásra um leithdháileadh costas le haghaidh feithicilí a thagann chun bheith ina bhfeithicilí a bhfuil a ré caite i mBallstát eile

1. D'ainneoin Airteagal 16 agus Airteagal 20(2), i gcás ina dtagann feithicil sa chatagóir M_1 nó N_1 chun bheith ina feithicil a bhfuil a ré caite i mBallstát seachas an Ballstát ar cuireadh an fheithicil ar an margadh laistigh dá chríoch, agus nach féidir aon táirgeoir a shainaithint ar chríoch an Bhallstáit ina dtagann sí chun bheith ina feithicil a bhfuil a ré caite, áiríteoidh monaróir na feithicle sin go gcumhdófar costais na n-oibríochtaí bainistithe dramhaíola dá dtagraítear in Airteagal 20(1), pointí (a) agus (d), arna dtabhú ag oibreoirí bainistithe dramhaíola.

2. D'fhonn a oibleagáidí faoi mhír 1 a chomhlíonadh, déanfaidh monaróir an méid seo a leanas:

(a) ionadaí údaráithe maidir leis an sásra trasteorann i ngach Ballstát a ainmniú trí shainordú i scríbhinn agus fógra a thabhairt do na húdaráis inniúla faoi na hainmniúcháin; agus

(b) sásraí comhair trasteorann a bhunú i gcomhar leis na hoibreoirí bainistithe dramhaíola a dhéanann na hoibríochtaí bainistithe dramhaíola dá dtagraítear in Airteagal 20(1), pointí (a) agus (d).

Is é ionadaí údaráithe an mhonaróra dá dtagraítear i bpointe (a) den chéad fhomhír den mhír seo a dhéanfaidh na cúraimí a shonraítear sa sainordú a fuarthas ón monaróir. Féadfaidh monaróir eagraíocht um fhreagracht táirgeoirí a ainmniú chun gníomhú mar a ionadaí údaráithe.

I gcás ina bhfuil an monaróir bunaithe lasmuigh den Aontas, féadfaidh ionadaí an mhonaróra san Aontas arna cheapadh i gcur i bhfeidhm Airteagal 13(4) de Rialachán (AE) 2018/858 oibleagáidí an mhonaróra faoi phointí (a) agus (b) den chéad fhomhír seo a chomhlíonadh.

3. Léireoidh monaróirí dá dtáirgeoirí go gcomhlíontar na ceanglais a leagtar amach i mír 2.

4. Ní chuirfidh táirgeoirí ar fáil ar mhargadh Ballstáit ach na feithicilí sin ó mhonaróirí a thaispeáin go bhfuil na ceanglais a leagtar amach i mír 2 comhlíonta acu.

5. An Ballstát inar tháinig an fheithicil chun bheith ina feithicil a bhfuil a ré caite, déanfaidh sé faireachán i dtaobh an bhfuil míreanna 1 agus 2 den Airteagal seo comhlíonta ag monaróirí agus ag a n-ionadaithe údaráithe. Beidh an faireachán bunaithe ar an bhfaisnéis arna tuairisciú agus arna fíorú ag monaróirí agus ag a n-ionadaithe údaráithe do na húdaráis inniúla faoi chur chun feidhme mhíreanna 1 agus 2 den Airteagal seo, go háirithe maidir le ríomh agus leithdháileadh na gcostas a bhaineann le feithicilí a bhfuil a ré caite a bhainistiú dá dtagraítear i mír 1 den Airteagal seo, agus aird chuí a tabhairt ar rúndacht ghnó agus ábhair imní eile a bhaineann le hiomaíochas.

6. I gcás inar gá chun a áirithiú go gcomhlíonfar an tAirteagal seo, agus faisnéis arna soláthar ag na Ballstáit de bhun na ngníomhaíochtaí comhair agus faireacháin dá dtagraítear i míreanna 2 agus 5 den Airteagal seo á cur i gcuntas, tugtar de chumhacht don Choimisiún gníomhartha tarmligthe a ghlacadh i gcomhréir le hAirteagal 51 den Rialachán seo. Beidh sé d'aidhm ag na gníomhartha sin, go háirithe, saobhadh an mhargaidh aonair a sheachaint agus cothrom iomaíochta a áirithiú d'oibreoirí eacnamaíocha atá bunaithe laistigh den Aontas agus lasmuigh de. Féadfar rialacha mionsonraithe a leagan síos sna gníomhartha tarmligthe maidir le hoibleagáidí na monaróirí, go háirithe iad siúd atá bunaithe lasmuigh den Aontas, ionadaithe údaraithe na monaróirí, táirgeoirí, na mBallstát agus na n-oibreoirí bainistithe dramhaíola agus gnéithe na sásraí dá dtagraítear san Airteagal seo.

ROINN 3

Feithiclí a bhfuil a ré caite a bhailiú

Airteagal 23

Feithiclí a bhfuil a ré caite a bhailiú

1. Áiríteoidh táirgeoirí go mbaileofar gach feithicil a bhfuil a ré caite a chuir siad ar fáil ar an margadh ar chríoch Ballstáit den chéad uair, nuair a thiocfaidh na feithiclí sin chun bheith ina bhfeithiclí a bhfuil a ré caite.

2. Chun críoch mhír 1, déanfaidh na táirgeoirí nó, i gcás a gceaptha i gcomhréir le hAirteagal 17(1), na heagraíochtaí um fhreagracht táirgeoirí, córais bhailiúcháin, lena n-áirítear pointí bailiúcháin, a chur ar bun, nó beidh siad rannpháirteach i gcur ar bun na gcóras sin.

Glacfaidh na Ballstáit na bearta is gá chun a áirithiú go ndéanfaidh táirgeoirí nó, i gcás a gceaptha i gcomhréir le hAirteagal 17(1), eagraíochtaí um fhreagracht táirgeoirí, córais bhailiúcháin a chur ar bun le haghaidh na bhfeithiclí uile a bhfuil a ré caite.

3. Áiríteoidh na táirgeoirí nó, i gcás a gceaptha i gcomhréir le hAirteagal 17(1), na heagraíochtaí um fhreagracht táirgeoirí, go ndéanfar na nithe seo a leanas leis na córais bhailiúcháin dá dtagraítear i mír 2 den Airteagal seo:

(a) cumhdófar críoch iomlán an Bhallstáit;

(b) cuirfear líon leormhaith saoráidí cóireála údaraithe nó pointí bailiúcháin ar fáil dóibh, agus méid agus dlús an daonra mar aon le líon measta na bhfeithiclí a bhfuil a ré caite á gcur i gcuntas, gan bheith teoranta do limistéir inar brabúsaí an bailiú agus an bainistiú ina dhiaidh sin;

(c) áiritheofar go mbaileofar dramhpháirteanna a eascraíonn as deisiúcháin ar fheithiclí;

(d) cumasófar bailiú na bhfeithiclí a bhfuil a ré caite, gan beann ar a dtionscnamh;

(e) cumasófar seachadadh saor in aisce na bhfeithiclí uile a bhfuil a ré caite chuig pointí bailiúcháin nó chuig saoráidí cóireála údaraithe mar a fhoráiltear in Airteagal 24(2).

4. Déanfaidh táirgeoirí nó, i gcás a gceaptha i gcomhréir le hAirteagal 17(1), eagraíochtaí um fhreagracht táirgeoirí liosta na bpointí bailiúcháin agus na saoráidí cóireála údaraithe a fhoilsiú agus a thabhairt cothrom le dáta go tráthrialta ar a suíomhanna gréasáin agus déanfaidh siad feachtais oideachais lena gcuirfear chun cinn na córais bhailiúcháin le haghaidh feithiclí a bhfuil a ré caite agus lena gcuirfear eolas ar fáil faoi na hiarmhairtí comhshaoil a bhaineann le feithiclí a bhfuil a ré caite a bhailiú agus a láimhseáil go míchuí. Féadfaidh na Ballstáit a cheangal go ndéanfar na feachtais oideachais a chomhordú laistigh den Bhallstát, i gcomhar leis na táirgeoirí nó, i gcás a gceaptha i gcomhréir le hAirteagal 17(1), leis na heagraíochtaí um fhreagracht táirgeoirí agus leis na húdaráis inniúla araon.

5. Féadfaidh na Ballstáit pointí bailiúcháin seachas saoráidí cóireála údaraithe a údarú chun feithiclí a bhfuil a ré caite a bhailiú.

Gheobhaidh na pointí bailiúcháin cead ón údarás inniúil i gcomhréir le hAirteagal 23 de Threoir 2008/98/CE agus comhlíonfaidh siad na coinníollacha a leagtar síos sa chead sin. Chun cead a eisiúint, fíoróidh an t-údarás inniúil go bhfuil an acmhainneacht is gá ag an mbunaíocht nó ag an ngnóthas sin chun na hoibleagáidí seo a leanas a chomhlíonadh:

- (a) feithiclí a bhfuil a ré caite a bhailiú agus iad a stóráil go sealadach i gcomhréir le Cuid A d'Iarscríbhinn VIII;
- (b) ullmhú le haghaidh na feithiclí a bhfuil a ré caite arna mbailiú a aistriú chuig saoráidí cóireála údaraithe trí sceitheadh sreabhán de thaisme agus rochtain neamhúdairithe ar an bpointe bailiúcháin a chosc;
- (c) a ráthú go n-aistreofar gach feithicil a bhfuil a ré caite arna bailiú chuig saoráid chóireála údaraithe laistigh de 2 mhí ón tráth a bhfuarthas iad;

6. Eiseoidh na pointí bailiúcháin doiciméad i bhformáid leictreonach, lena ndeimhneofar go bhfuarthas an fheithicil a bhfuil a ré caite, chuig úinéir na feithicle, agus soláthróidh siad é trí nós imeachta um fhógra leictreonach arna bhunú i gcomhréir le hAirteagal 25(2) d'údarás ábhartha an Bhallstáit, lena n-áirítear na húdaráis inniúla arna n-ainmniú faoi Airteagal 14.

Airteagal 24

Feithiclí a bhfuil a ré caite a sheachadadh

1. Déanfaidh úinéir feithicle, agus aon oibreoir eacnamaíoch a ghníomhaíonn thar ceann úinéir na feithicle, ar feithicil í a thagann chun bheith ina feithicil a bhfuil a ré caite, í a sheachadadh chuig saoráid chóireála údaraithe nó chuig pointe bailiúcháin gan moill mhíchuí. Ní bheidh feidhm ag an oibleagáid sin maidir le carbháin mhótair, dá dtagraítear i gCuid A, pointe 5.1, d'Iarscríbhinn I a ghabhann le Rialachán (AE) 2018/858, atá tagtha chun bheith ina bhfeithiclí a bhfuil a ré caite fad a úsáidtear na feithiclí sin chun críoch tithíochta.

Déanfar gach feithicil a bhfuil a ré caite nach féidir aon úinéir a shainaithint ina leith a sheachadadh lena cóireáil chuig saoráidí cóireála údaraithe.

2. Beidh úinéir deiridh feithicle in ann feithicil a bhfuil a ré caite a sheachadadh chuig saoráid chóireála údaraithe nó pointe bailiúcháin saor in aisce mura rud é go mbeidh aon cheann de pháirteanna nó comhpháirteanna fíor-riachtanacha na feithicle in easnamh san fheithicil a bhfuil a ré caite, nó mura rud é go mbeidh dramhaíl inti a cuireadh leis an bhfeithicil a bhfuil a ré caite.

3. Is iad seo a leanas na páirteanna fíor-riachtanacha chun críche an Airteagail seo:

- (a) mótair ríomhthiomána;
- (b) ceallraí feithiclí leictreacha;
- (c) innill;
- (d) píosaí móra iomadúla cabhalra.

4. I gcás ina mbeidh ceallra na feithicle leictirí ar iarraidh ó fheithicil a bhfuil a ré caite, beidh seachadadh na feithicle a bhfuil a ré caite fós saor in aisce má sholáthraíonn úinéir deiridh na feithicle doiciméadacht lena gcruthaítear gur láimhseáil oibreoir gairmiúil an ceallra feithicle leictirí i gcomhréir le Rialachán (AE) 2023/1542.

5. I gcás feithiclí ar dhearbhaigh cuideachtaí árachais gur cailteanais theicniúla iomlána iad, beidh seachadadh na bhfeithiclí sin a bhfuil a ré caite saor in aisce d'ainneoin go bhfuil na páirteanna fíor-riachtanacha a leagtar amach i mír 2 in easnamh.

*Airteagal 25***Deimhniú scriosta**

1. Eiseoidh saoráidí cóireála údaraithe deimhniú scriosta chuig úinéir deiridh na feithicle ar sheachadadh na feithicle a bhfuil a ré caite chuig an tsaoráid chóireála údaraithe. Eiseofar an deimhniú scriosta i gcomhréir leis an teimpléad a leagtar amach in Iarscríbhinn X.
2. Eiseofar an deimhniú scriosta i bhformáid leictreonach agus soláthrófar é trí nós imeachta um fhógra leictreonach chuig údaráis ábhartha an Bhallstáit, lena n-áirítear na húdaráis inniúla arna n-ainmniú faoi Airteagal 14. Soláthróidh an tsaoráid chóireála údaraithe cóip den fhógra leictreonach d'úinéir deiridh na feithicle agus d'aon oibreoir eacnamaíoch atá ag gníomhú thar ceann úinéir na feithicle.
3. I gcás ina bhfuil an fheithicil a bhfuil a ré caite, ar eisíodh deimhniú scriosta ina leith i mBallstát, cláraithe i mBallstát eile, cuirfidh na húdaráis ábhartha arna n-ainmniú ag an mBallstát inar eisíodh an deimhniú scriosta in iúl do na húdaráis ábhartha arna n-ainmniú ag an mBallstát ina bhfuil an fheithicil cláraithe gur eisíodh deimhniú scriosta don fheithicil atá i gceist.
4. Ní chuirfidh na húdaráis chlárúcháin feithicle ábhartha clárú feithicle a bhfuil a ré caite ar ceal ach amháin tar éis dóibh an deimhniú scriosta a fháil le haghaidh na feithicle sin.
5. Aithneofar deimhnithe scriosta a eiseofar i mBallstát amháin i ngach Ballstát eile.

ROINN 4

Cóireáil feithicilí a bhfuil a ré caite*Airteagal 26***Oibleagáidí ar shaoráidí cóireála údaraithe**

1. Áiríteoidh saoráidí cóireála údaraithe go nglacfar agus go ndéileálfar le gach feithicil a bhfuil a ré caite in éineacht lena páirteanna, a comhpháirteanna agus a hábhair, chomh maith le dramhpháirteanna a eascraíonn as deisiúcháin ar fheithicilí, i gcomhréir leis na coinníollacha a leagtar amach ina gceadanna, agus i gcomhréir leis an Rialachán seo. Féadfár cóireáil na bhfeithicilí a bhfuil a ré caite a dhéanamh ar bhonn aonair ag saoráid chóireála údaraithe amháin nó, cé is moite de dhíthruailliúcháin, i gcomhar le saoráidí cóireála údaraithe eile.
2. Déanfaidh saoráidí cóireála údaraithe na nithe seo a leanas:
 - (a) na feithicilí uile a bhfuil a ré caite agus a bpáirteanna, a gcomhpháirteanna agus a n-ábhair a stóráil, go sealadach fiú, i gcomhréir leis na híoscheanglais a leagtar amach i gCuid A d'Iarscríbhinn VIII;
 - (b) na feithicilí uile a bhfuil a ré caite a dhíthruailliú, i gcomhréir le hAirteagal 28 agus leis na híoscheanglais a leagtar amach i gCuid B d'Iarscríbhinn VIII;
 - (c) na páirteanna agus na comhpháirteanna a liostaítear i gCuid C d'Iarscríbhinn VIII a bhaint den fheithicil a bhfuil a ré caite i gcomhréir le hAirteagal 29 agus 30;
 - (d) gach feithicil a bhfuil a ré caite agus a bpáirteanna, a gcomhpháirteanna agus a n-ábhair a chóireáil i gcomhréir le hAirteagal 27 go 31, 33, 34, agus 35 den Rialachán seo agus le hIarscríbhinn VIII a ghabhann leis, le hord na réiteach dramhaíola agus leis na ceanglais ghinearálta a leagtar síos in Airteagal 4 de Threoir 2008/98/CE;
 - (e) na teicnící is fearr atá ar fáil a chur i bhfeidhm mar a shainmhínítear in Airteagal 3, pointe (10), de Threoir 2010/75/AE, i gcás inarb infheidhme;

- (f) an fheithicil a bhfuil a ré caite a chóireáil laistigh de 12 mhí ón dáta seachadta.

I dteannta na gceanglas a leagtar amach in Airteagal 35 de Threoir 2008/98/CE, déanfaidh na saoráidí cóireála údaraithe an taifead ar na hoibríochtaí cóireála uile a stóráil go leictreonach, ar oibríochtaí iad dá dtagraítear i bpointí (a) go (e) den chéad fhomhír den mhír seo, agus a dhéantar ar fheithicilí a bhfuil a ré caite ar feadh 3 bliana, agus beidh siad in ann an fhaisnéis sin a chur i láthair, arna iarraidh sin do na húdaráis náisiúnta ábhartha.

3. Tugtar de chumhacht don Choimisiún gníomhartha tarmligthe a ghlacadh i gcomhréir le hAirteagal 51 chun larscríbhinn VIII a leasú trí na híoscheanglais chóireála le haghaidh feithicilí a bhfuil a ré caite a chur in oiriúint don dul chun cinn eolaíoch agus teicniúil, i dteicneolaíochtaí cóireála, lena n-áirítear:

- (a) na páirteanna agus na comhpháirteanna a liostaítear i gCuid C d'larscríbhinn VIII a chur isteach, a scriosadh nó a athbhreithniú;
- (b) athbhreithniú a dhéanamh ar na spriocluachanna le haghaidh na gcodán aschuir a liostaítear i gCuid G, pointe 2, d'larscríbhinn VIII;
- (c) liosta na gcineálacha cóimhiotail alúmanaim a liostaítear i gCuid G, pointe 2(b) agus (c), d'larscríbhinn VIII a leathnú;
- (d) ceanglais cháilíochta a chur isteach chun feabhas a chur ar dheighilt plaisteach in-athchúrsáilte agus spriocluachanna le haghaidh teicneolaíochtaí athchúrsála ina dhiaidh sin is infheidhme maidir le Cuid G, pointe 2, d'larscríbhinn VIII.

4. Spreagfaidh na Ballstáit saoráidí cóireála údaraithe chun córais bainistíochta comhshaoil dheimhnithe a thabhairt isteach agus chun iniúchtaí a dhéanamh i gcomhréir le Rialachán (CE) Uimh. 1221/2009.

Airteagal 27

Ceanglais ghinearálta i dtaca le mionghearradh

1. Ón 1 Meán Fómhair 2029, iarrfaidh saoráidí cóireála údaraithe agus oibreoirí bainistithe dramhaíola eile a dhéanann oibríochtaí mionghearrtha go seachadfar feithicilí a bhfuil a ré caite chucu lena mionghearradh, nó páirteanna agus comhpháirteanna struchtúracha móra ón bhfionnadh nó ón gcabhalra ó fheithicilí a bhfuil a ré caite de chatagóirí N_2 , N_3 , M_2 , M_3 agus O a sheachadtar chucu lena mionghearradh nó lena ngearradh:

- (a) atá díthruaillithe i gcomhréir le hAirteagal 28 agus a bpáirteanna agus a gcomhpháirteanna bainte i gcomhréir le hAirteagal 29; agus
- (b) cóip den deimhniú scriosta ag gabháil leo a eisíodh le haghaidh na feithicle lena mbaineann a bhfuil a ré caite.

2. Saoráidí cóireála údaraithe agus oibreoirí bainistithe dramhaíola a dhéanann oibríochtaí mionghearrtha agus a fhaigheann feithicilí a bhfuil a ré caite nach gcomhlíonann na ceanglais a leagtar amach i mír 1, déanfaidh siad an méid seo a leanas:

- (a) an neamhchomhlíonadh a thuairisciú don údarás inniúil, lena n-áirítear ainm agus sonraí teagmhála an duine nádúrtha nó dhlítheanaigh a sheachaid an fheithicil a bhfuil a ré caite chuig an tsaoráid chóireála údaraithe nó chuig oibreoir bainistithe dramhaíola eile lena mionghearradh;
- (b) staonadh ó na feithicilí sin a bhfuil a ré caite a úsáid ina n-oibríochtaí mionghearrtha mura n-údaraíonn an t-údarás inniúil na hoibríochtaí sin nó go dtí go ndéanfar na bearta is gá chun an fheithicil a bhfuil a ré caite a chóireáil i gcomhréir le hAirteagal 28 agus 29 agus deimhniú scriosta a eisiúint i gcomhréir le hAirteagal 25.

3. Ní cheadófar do shaoráidí cóireála údaraithe ná d'oibreoirí bainistithe dramhaíola a dhéanann feithiclí a bhfuil a ré caite a mhionghearradh, feithiclí a bhfuil a ré caite, a bpáirteanna, a gcomhpháirteanna ná a n-ábhair a mheascadh le dramhaíl eile, lena n-áirítear dramhaíl ó phacáistíocht agus dramhthrealamh leictreach agus leictreonach, ach amháin má chomhlíontar critéir agus teorainnluachanna Chuid G, pointí 1 agus 2, d'Iarscríbhinn VIII.

Airteagal 28

Feithiclí a bhfuil a ré caite a dhíthruailliú

1. Laistigh de 30 lá tar éis feithicil a bhfuil a ré caite a sheachadadh chuig an tsaoráid chóireála údaraithe, déanfaidh an tsaoráid sin an fheithicil sin a dhíthruailliú sula ndéanfar tuilleadh cóireála uirthi, i gcomhréir leis na híoscheanglais a leagtar amach i gCuid B d'Iarscríbhinn VIII.

2. Déanfar na sreabháin agus na leachtanna a liostaítear i gCuid B d'Iarscríbhinn VIII a bhailiú agus a stóráil ar leithligh, i gcomhréir leis na ceanglais a leagtar amach i gCuid A d'Iarscríbhinn VIII. Déanfar dramh-olaí a bhailiú agus a stóráil ar leithligh ó na sreabháin agus na leachtanna eile agus déanfar cóireáil orthu i gcomhréir le hAirteagal 21 de Threoir 2008/98/CE.

3. Bainfear na páirteanna, comhpháirteanna agus ábhair ina bhfuil na substaintí dá dtagraítear in Airteagal 5(4) den Rialachán seo ó na feithiclí a bhfuil a ré caite agus láimhseálfar i gcomhréir le hAirteagal 17 de Threoir 2008/98/CE iad.

4. Bainfear na ceallraí ar leithligh ó fheithiclí a bhfuil a ré caite agus stórálfar i limistéar ainmnithe iad le haghaidh tuilleadh cóireála i gcomhréir le hAirteagal 70(3) de Rialachán (AE) 2023/1542.

5. Déanfar na páirteanna, na comhpháirteanna agus na hábhair a díthruaillíodh a láimhseáil agus a lipéadú i gcomhréir le hAirteagail 18 agus 19 de Threoir 2008/98/CE.

6. Déanfaidh an tsaoráid chóireála údaraithe díthruailliú na bhfeithiclí a bhfuil a ré caite a dhoiciméadú, tríd an bhfaisnéis a liostaítear i gCuid B, pointe 4, d'Iarscríbhinn VIII a thairgeadh agus an fhaisnéis sin le haghaidh gach bliana féilire a thuairisciú d'údarás inniúil an Bhallstáit.

Airteagal 29

Baint shainordaitheach páirteanna agus comhpháirteanna lena n-athúsáid, lena n-athmhonarú, lena n-athriochtú, agus lena n-athchúrsáil roimh an mionghearradh

1. Ón 1 Meán Fómhair 2029, áiritheoidh saoráidí cóireála údaraithe go mbaintear na páirteanna agus comhpháirteanna a liostaítear i gCuid C d'Iarscríbhinn VIII ó fheithicil a bhfuil a ré caite roimh an mionghearradh nó an dlúthú, tar éis thabhairt i gcrích na n-oibriúcháin díthruailliúcháin dá dtagraítear in Airteagal 28.

Bainfidh saoráidí cóireála údaraithe páirteanna agus comhpháirteanna a liostaítear i gCuid C d'Iarscríbhinn VIII ag a bhfuil acmhainneacht athúsáide, athmhonaraithe nó athriochtaithe ar bhealach neamhscriosach.

Ní bheidh feidhm ag an dara fómhír den mhír seo má léiríonn saoráid chóireála údaraithe go bhfuil costais eacnamaíocha dhíréireacha i gceist leis an díchoimeáil láimhe, leis an díchoimeáil leath-uathoibrithe nó leis an díchoimeáil uathoibrithe de pháirteanna agus comhpháirteanna a liostaítear i gCuid C d'Iarscríbhinn VIII ar bhealach neamhscriosach, ar costais iad nach féidir a chúiteamh leis an ioncam a bhfuiltear ag súil leis ó athúsáid, athmhonarú nó athriochtú na bpáirteanna agus na gcomhpháirteanna sin.

2. Ní cheanglófar ar shaoráid chóireála údaraithe páirteanna agus comhpháirteanna a liostaítear i gCuid C d'Iarscríbhinn VIII a bhaint, cé is moite díobh siúd atá le baint ar bhealach neamhsciosach i gcomhréir le mír 1 den Airteagal seo, má léiríonn sí go bhfuil teicneolaíochtaí iar-mhionghearrthóra ina n-ábhair ar leithligh ó pháirteanna agus ó chomhpháirteanna a ainmnítear sa dara colún de Chuid C d'Iarscríbhinn VIII chomh héifeachtúil céanna le próisis díchoimeála láimhe, le próisis díchoimeála leath-uathoibrithe nó próisis díchoimeála uathoibrithe agus go gcomhlíontar critéir agus teorainnluachanna Chuid G, pointí 1 agus 2, d'Iarscríbhinn VIII.

Chun críocha na chéad fhomhíre, soláthróidh an tsaoráid chóireála údaraithe an fhaisnéis a liostaítear i gCuid G, pointe 3, d'Iarscríbhinn VIII.

3. I dteannta na n-oibleagáidí a leagtar amach in Airteagal 35 de Threoir 2008/98/CE, coinneoidh na saoráidí cóireála údaraithe taifid de na feithiclí a bhfuil a ré caite a phróiseáiltear gan a bpáirteanna, comhpháirteanna agus ábhair a bhaint roimh ré i gcomhréir le mír 2 den Airteagal seo, lena n-áirítear ainm agus seoladh na saoráidí cóireála, agus VIN na bhfeithiclí a bhfuil a ré caite lena mbaineann.

Soláthróidh na saoráidí cóireála údaraithe an fhaisnéis sna taifid dá dtagraítear sa chéad fhomhír den mhír seo don údaráis iniúil i gcomhréir le hAirteagal 50(6).

Airteagal 30

Ceanglais a bhaineann leis na páirteanna agus na comhpháirteanna arna mbaint

1. Déanfar na páirteanna agus comhpháirteanna uile a baineadh as feithicil a bhfuil a ré caite a mheasúnú de bhun Airteagal 29(1) chun a chinneadh cé acu an bhfuil, nó nach bhfuil, siad oiriúnach le haghaidh:

(a) athúsáide, i gcomhréir le Cuid D, pointe 1(a), d'Iarscríbhinn VIII;

(b) athmhonaraithe nó athríochtaithe, i gcomhréir le Cuid D, pointe 1(b), d'Iarscríbhinn VIII;

(c) athchúrsála; nó

(d) oibríochtaí cóireála eile, agus na ceanglais chóireála sonracha i gCuid F d'Iarscríbhinn VIII á gcur i gcountas.

Déanfar an measúnú trí indéantacht teicniúil na bpróiseas dá dtagraítear sa chéad fhomhír agus sna ceanglais um shábháilteacht feithicilí a chur i gcountas go háirithe.

2. Maidir leis na páirteanna agus comhpháirteanna arna mbaint a bheidh oiriúnach lena n-athúsáid, lena n-athmhonarú nó lena n-athríochtú, déanfar iad:

(a) a lipéadú i gcomhréir le Cuid D, pointe 2, d'Iarscríbhinn VIII; agus

(b) a chosaint go hiomchuí in aghaidh díobhála le linn iompair, lódála agus dílódála.

3. Ní dhéanfar na páirteanna agus na comhpháirteanna a liostaítear i gCuid E d'Iarscríbhinn VIII a athúsáid mura ndearbhaítear leis an measúnú dá dtagraítear i mír 1 go gcomhlíonann úsáid na bpáirteanna agus na comhpháirteanna sin na ceanglais is infheidhme maidir le feithiclí mar a leagtar amach i Rialacháin (AE) 2018/858 agus (AE) Uimh. 168/2013. Ní fhéadfar na páirteanna agus na comhpháirteanna sin a aistriú chuig oibreoir eacnamaíoch eile lena n-athúsáid ach amháin más oibreoir deisiúcháin agus cothabhála cáilithe a dhéanfaidh iad a shuiteáil.

4. Ní mheasfar gur dramhaíl iad na páirteanna agus na comhpháirteanna ó fheithicilí a bhfuil a ré caite nó ó oibríochtaí deisiúcháin agus cothabhála atá oiriúnach lena n-athúsáid, lena n-athmhonarú nó lena n-athriochtú. Cuirfidh saoráidí cóireála údaraithe an méid seo a leanas ar fáil, arna iarraidh sin, do na húdaráis náisiúnta ábhartha:

(a) doiciméadacht lena ndeimhnítear an measúnú dá dtagraítear i mír 1 lena léirítear go bhfuil na páirteanna agus na comhpháirteanna oiriúnach chun críocha athúsáide, athmhonaraithe nó athriochtaithe; agus

(b) cóip den sonrasc nó den chonradh a bhaineann le haistriú na bpáirteanna agus na gcomhpháirteanna sin.

5. Ní bheidh feidhm ag an Airteagal seo maidir le ceallraí a bhfuil feidhm ag Rialachán (AE) 2023/1542 maidir leo.

6. Áiríteoidh saoráidí cóireála údaraithe go ndéanfar páirteanna agus comhpháirteanna arna mbaint, nach bhfuil oiriúnach lena n-athúsáid, lena n-athmhonarú ná lena n-athriochtú, a sheoladh lena gcóireáil i gcomhréir le mír 1, an chéad fhomhír, pointí (c) agus (d).

Airteagal 31

Trádáil na bpáirteanna agus na gcomhpháirteanna athláimhe, athmhonaraithe nó athriochtaithe

1. Ón 1 Meán Fómhair 2029, áiríteoidh aon oibreoir eacnamaíoch a dhíolann páirteanna agus comhpháirteanna spártha athláimhe, athmhonaraithe nó athriochtaithe go mbeidh an lipéadú arna chur ag saoráidí cóireála údaraithe i gcomhréir le hAirteagal 30(2), pointe (a), ar pháirteanna agus comhpháirteanna.

2. I gcás ina ndíoltar na páirteanna agus na comhpháirteanna athláimhe, athmhonaraithe nó athriochtaithe le tomhaltóirí, áiríteoidh na hoibreoirí eacnamaíocha go mbeidh na páirteanna agus na comhpháirteanna sin in ann a bhfeidhmeanna agus a bhfeidhmíocht riachtanach a choinneáil trí ghnáthúsáid agus go gcomhlíonfar leo na ceanglais eile is infheidhme maidir leis na hearraí a dhíoltar i gcomhréir le Treoir (AE) 2019/771.

3. Beidh feidhm ag na ceanglais sin ar oibreoirí eacnamaíocha i mír 1 agus 2, gan beann ar an teicníc trádála a úsáidtear, lena n-áirítear díolacháin ar líne.

Airteagal 32

Páirteanna agus comhpháirteanna a athúsáid, a athmhonarú agus a athriochtú

1. Ón 1 Meán Fómhair 2029, dreasóidh na Ballstáit athúsáid, athmhonarú, iarfheistiú agus athriochtú páirteanna agus comhpháirteanna, cé acu ar baineadh iad le linn chéim úsáide nó deireadh ré feithicle.

Féadfar an méid seo leanas a áireamh leis na dreasachtaí dá dtagraítear sa chéad fhomhír:

(a) ceanglas ar oibreoirí cothabhála agus deisiúcháin a thairiscint do chustaiméirí feithicil a dheisiú le páirteanna agus comhpháirteanna spártha athláimhe, athmhonaraithe nó athriochtaithe in éineacht leis an tairiscint an fheithicil a dheisiú le páirteanna agus comhpháirteanna nua, ar choinníoll go bhfoirmlítear ceanglas den sórt sin gan costais iomarcacha ná ualaí riaracháin a chruthú do mhicrifhiontair agus d'fhiontair bheaga;

(b) dreasachtaí eacnamaíocha atá ceaptha chun an margadh le haghaidh páirteanna agus comhpháirteanna spártha athláimhe, athmhonaraithe nó athriochtaithe a spreagadh.

2. Áireoidh na Ballstáit sna cláir maidir le dramhaíl a chosc a cheanglaítear de bhun Airteagal 29 de Threoir 2008/98/CE na dreasachtaí dá dtagraítear i mír 1 den Airteagal seo.

3. Déanfaidh an Coimisiún malartú faisnéise agus comhroinnt dea-chleachtas i measc na mBallstát maidir leis na dreasachtaí dá dtagraítear i mír 1 a éascú.

Déanfaidh an Coimisiún faireachán ar éifeachtacht na ndreasachtaí a thugann Ballstáit.

Airteagal 33

Spriocanna athúsáide, athchúrsála agus aisghabhála

1. Ón 1 Eanáir 2030, glacfaidh na Ballstáit na bearta is gá chun a áirithiú go n-áiritheoidh na táirgeoirí nó, i gcás a gceaptha i gcomhréir le hAirteagal 17(1), na heagraíochtaí um fhreagracht táirgeoirí, go mbainfidh oibreoirí bainistithe dramhaíola na spriocanna seo a leanas amach:

- (a) is ionann athúsáid agus aisghabháil, arna ríomh le chéile, agus 95 % ar a laghad, de réir meánmheáchan in aghaidh na feithicle, gan ceallraí a chur san áireamh, agus in aghaidh na bliana;
- (b) is ionann athúsáid agus athchúrsáil, arna ríomh le chéile, agus 85 % ar a laghad, de réir meánmheáchan in aghaidh na feithicle, gan ceallraí a chur san áireamh, agus in aghaidh na bliana.

2. Ón 1 Eanáir 2032, glacfaidh na Ballstáit na bearta is gá chun a áirithiú go n-áiritheoidh na táirgeoirí nó, i gcás a gceaptha i gcomhréir le hAirteagal 17(1), eagraíochtaí um fhreagracht táirgeoirí go mbainfidh oibreoirí bainistithe dramhaíola sprioc bhliantúil amach maidir le hathchúrsáil plaisteach arb ionann í agus 30 % ar a laghad de mheánmheáchan iomlán na bplaisteach sna feithiclí a bhfuil a ré caite.

Ní áireofar i meáchan an phlaistigh a athchúrsáiltear agus i meáchan iomlán na bplaisteach dá dtagraítear sa chéad fhomhír leaistiméirí, teirmithéachtaí seachas cúir polúireatáin a úsáidtear le haghaidh cúisínithe, agus plaisteach ina bhfuil aon substaint dá dtagraítear in Airteagal 7 de Rialachán (AE) 2019/1021 nó atá éillithe ag aon substaint mar sin nuair a sháraítear tairseacha larscríbhinn IV a ghabhann leis an Rialachán sin.

Airteagal 34

Cosc ar dhramhaíl neamhthámh a chur i líonadh talún

Ón 1 Meán Fómhair 2029, ní ghlacfar i líonadh talún le hiarmhar na bpíosáí troma agus éadroma mhionghearrtha a bheidh fágtha tar éis chóireáil na bhfeithiclí a bhfuil a ré caite, ina bhfuil dramhaíl neamhthámh má sháraíonn siad na teorainnluachanna a leagtar amach i gCuid G, pointí 2(d) agus 2(e), d'Iarscríbhinn VIII.

Airteagal 35

Loingsithe feithiclí a bhfuil a ré caite

1. Féadfar tabhairt faoi chóireáil feithiclí a bhfuil a ré caite lasmuigh den Bhallstát lena mbaineann nó lasmuigh den Aontas, ar choinníoll go bhfuil loingsiú na bhfeithiclí a bhfuil a ré caite nó na dramhaíola a tháirgtear sa phróiseas cóireála i gcomhréir le Rialachán (AE) 2024/1157.

2. Maidir le loingsithe feithiclí a bhfuil a ré caite ón Aontas chuig tríú tír i gcomhréir le mír 1 den Airteagal seo, ní chomhairfear iad i dtreo comhlíonadh oibleagáidí agus spriocanna a leagtar amach in Airteagal 33 ach amháin má sholáthraíonn onnmhaireoir na bhfeithiclí a bhfuil a ré caite fianaise dhoiciméadach arna formheas ag an údarás inniúil cinn scríbe, lena léirítear gur tharla an chóireáil i ndálaí a mheastar a bheith coibhéiseach leis na ceanglais a leagtar síos sa Rialachán seo agus le ceanglais maidir le cosaint an chomhshaoil agus cosaint shláinte an duine a leagtar síos i reachtaíocht eile de chuid an Aontais.

CAIBIDIL V

ÚINÉIREACTH A AISTRIÚ AGUS IDIRDHEALÚ IDIR FEITHICLÍ ATHLÁIMHE AGUS FEITHICLÍ A BHFUIL A RÉ CAITE

*Airteagal 36***Úinéireacht feithiclí athlámhe a aistriú laistigh den Aontas**

1. Chun úinéireacht feithicle athlámhe a aistriú laistigh den Aontas, tabharfaidh oibreoir eacnamaíoch doiciméadacht d'aon duine nádúrtha nó dlítheanach a bhfuil spéis aige úinéireacht a fháil ar an bhfeithicil lena mbaineann a léiríonn nach feithicil a bhfuil a ré caite í, gan beann ar an teicníc trádála arna húsáid, lena n-áirítear trí bhíthin ceantanna tiomnaithe le haghaidh oibreoirí eacnamaíocha, cianchonarthaí nó ardáin ar líne. Léireofar sa doiciméadacht sin gur feithicil ródacmhainneach í nó is éard a bheidh inti measúnú i gcomhréir le hlarscríbhinn I lena gcruthófar nach feithicil a bhfuil a ré caite í.

2. Chun úinéireacht feithicle athlámhe a aistriú laistigh den Aontas, ní cheanglófar ar dhaoine nádúrtha nach oibreoirí eacnamaíocha iad an doiciméadacht dá dtagraítear i mír 1 a sholáthar ach amháin sna cásanna seo a leanas:

- (a) nuair a dhearbhaíonn cuideachta árachais gur caillteanas iomlán eacnamaíoch an fheithicil;
- (b) nuair a thugtar an díolachán i gcrích go hiomlán trí bhíthin ardán ar líne, gan an fheithicil a aistriú go fisiciúil idir an díoltóir agus an ceannaitheoir nó aon duine atá ag gníomhú thar a gceann.

*Airteagal 37***Stádas na feithicle**

1. Agus measúnú á dhéanamh ar an damáiste a rinneadh d'fheithicil a bhí i dtimpiste, déanfaidh an chuideachta árachais, nó aon saineolaí mótarfeithicil eile a dhéanann measúnú thar a ceann, measúnú freisin ar cé acu atá nó nach bhfuil an fheithicil ina feithicil a bhfuil a ré caite i gcomhréir le hlarscríbhinn I.

2. Féadfaidh na húdaráis inniúla a cheangal ar úinéir feithicle, i gcás ina bhfuil amhras gur feithicil a bhfuil a ré caite í feithicil athlámhe, doiciméadacht a thabhairt nach feithicil a bhfuil a ré caite í an fheithicil lena mbaineann. Is éard a bheidh sa doiciméadacht sin measúnú i gcomhréir le hlarscríbhinn I nó deimhniú bailí ródacmhainneachta.

3. Tugtar de chumhacht don Choimisiún gníomhartha tarmlichte a ghlacadh, i gcomhréir le hAirteagal 51 den Rialachán seo, chun an Rialachán seo a leasú trí na critéir arna liostú in Iarscríbhinn I a bhaint chun a chinneadh an feithicil a bhfuil a ré caite í feithicil athlámhe, ar choinníoll go dtugann dul chun cinn teicneolaíoch i réimse na hinrianaitheachta, na hindeisitheachta agus na sábháilteachta údar le teorainn a chur leis na cásanna ina measfar gur feithicil a bhfuil a ré caite í an fheithicil.

CAIBIDIL VI

FEITHICLÍ ATHLÁIMHE A ONNMHAIRIÚ CHUIG TRÍÚ TÍORTHA

Airteagal 38

Údarás inniúil um fheithiclí athlámhe a onnmhairiú chuig tríú tíortha

1. Ainmneoidh na Ballstáit údarás inniúil amháin nó níos mó a bheidh freagrach as na hoibleagáidí arna leagan síos sa Chaibidil seo.
2. Faoi 30 Meán Fómhair 2027, déanfaidh na Ballstáit ainmneacha agus seoltaí na n-údarás inniúil arna n-ainmniú de bhun mhír 1 a chur in iúl don Choimisiún. Cuirfidh na Ballstáit aon athruithe ar ainmneacha nó ar sheoltaí na n-údarás inniúil sin in iúl don Choimisiún gan moill mhíchuí.

Airteagal 39

Rialuithe agus ceanglais i dtaca le honnmhairiú feithiclí athlámhe

1. Ón 1 Meán Fómhair 2031, beidh feithiclí athlámhe atá le honnmhairiú faoi réir na rialuithe agus na gceanglas a leagtar síos sa Chaibidil seo.
2. Tá an Chaibidil seo gan dochar d'aon fhoráil eile den Rialachán agus gan dochar do ghníomhartha dlí eile de chuid an Aontais lena rialaítear earraí a scaoileadh lena n-onnmhairiú, go háirithe Rialachán (AE) Uimh. 952/2013 agus Airteagail 46, 47, 267 agus 269 de.
3. Ní féidir feithiclí athlámhe a onnmhairiú ach amháin i gcás:
 - (a) nach feithiclí a bhfuil a ré caite iad; agus
 - (b) ina bhfuil siad ródacmhainneach ar an dáta a thaisctear an dearbhú onnmhairiúcháin, mura rud é gur aithníodh iad mar fheithiclí mórspéise cultúrtha i gcomhréir le hAirteagal 2(2), pointe (f), agus Iarscríbhinn II.
4. Soláthrófar nó cuirfear ar fáil d'údaráis chustaim an fhaisnéis seo a leanas faoi gach feithicil athlámhe atá le honnmhairiú:
 - (a) VIN na feithicle athlámhe agus aitheantas an Bhallstáit inar cláraíodh an fheithicil go deireanach;
 - (b) ráiteas lena ndeimhnítear go gcomhlíonann an fheithicil athlámhe na ceanglais a leagtar amach i mír 3 den Airteagal seo, nó tugtar dearbhú dá dtagraítear in Iarscríbhinn II.
5. Chun comhlíonadh na Caibidle seo a fhíorú maidir le cead a thabhairt feithicil athlámhe a scaoileadh lena honnmhairiú:
 - (a) go dtí go mbeidh an t-idirnasc dá dtagraítear in Airteagal 46(4) oibríochtúil, déanfaidh na húdaráis chustaim faisnéis a mhalartú agus oibriú i gcomhar leis na húdaráis inniúla i gcomhréir le hAirteagal 45, agus, i gcás inar gá, cuirfidh siad san áireamh an malartú faisnéise agus an comhar sin chun cead a thabhairt feithicil athlámhe a scaoileadh lena honnmhairiú;
 - (b) nuair a bheidh an t-idirnasc dá dtagraítear in Airteagal 46(4) oibríochtúil, beidh feidhm ag Airteagal 40, Airteagal 41(2) agus (3) agus Airteagal 43(3), agus tabharfar fógraí agus déanfar malartuithe eile faoi Airteagail 42, 43 agus 44 trí bhíthin na gcóras leictreonach sin.

6. Ní bheidh feithicil athláimhe atá le honnmhairiú faoi réir:

(a) iontrála i dtaifid an dearbhóra de bhun Airteagal 182 de Rialachán (AE) Uimh. 952/2013;

(b) féinmheasúnaithe de bhun Airteagal 185 de Rialachán (AE) Uimh. 952/2013.

Airteagal 40

Fíorú uathoibríthe ar an bhfaisnéis faoi stádas feithicle

1. Sula scaoilfear feithicil athláimhe lena honnmhairiú, fíoróidh na húdaráis chustaim go leictreonach agus go huathoibríoch trí na córais leictreonacha dá dtagraítear in Airteagal 46(4) an bhfuil an fheithicil ródacmhainneach, bunaithe ar an VIN agus ar an bhfaisnéis faoi Bhallstát an chláirúcháin dheireanaigh. Ní bheidh feidhm ag an oibleagáid sin maidir le feithicilí a aithníodh mar fheithicilí mórspéise cultúrtha i gcomhréir le hAirteagal 2(2), pointe (f), agus larscríbhinn II.

2. I gcás nach gcomhfhreagraíonn an fhaisnéis a thugtar nó a chuirtear ar fáil d'údaráis chustaim don fhaisnéis atá sna cláir náisiúnta feithicilí agus sna córais leictreonacha náisiúnta maidir le ródacmhainneacht de bhun mhír 1, ní scaoilfidh na húdaráis chustaim an fheithicil sin lena honnmhairiú agus cuirfidh siad an duine nádúrtha nó dlítheanach lena mbaineann ar an eolas faoi sin trí na córais sin.

Airteagal 41

Bainistiú riosca agus rialuithe custaim

1. Chun na forálacha a leagtar síos in Airteagal 39 a fhorfheidhmiú, déanfaidh na húdaráis chustaim rialuithe ar fheithicilí athláimhe atá le honnmhairiú i gcomhréir leis na forálacha maidir le bainistiú riosca agus rialuithe custaim a leagtar síos faoi Rialachán (AE) Uimh. 952/2013. Gan dochar d'Airteagal 40 den Rialachán seo, beidh na rialuithe sin bunaithe ar anailís riosca go príomha, mar a bhunaítear i Rialachán (AE) Uimh. 952/2013.

2. I dteannta an bhainistithe riosca dá dtagraítear i mír 1 den Rialachán seo, a luaithe a bheidh an t-idirnasc dá dtagraítear in Airteagal 46 i bhfeidhm, beidh an fhaisnéis sna córais leictreonacha dá dtagraítear in Airteagal 46(1) agus fíoróidh na húdaráis chustaim go huathoibríoch agus go leictreonach tríd an idirnasc dá dtagraítear in Airteagal 46(4) an gcomhlíonann feithicil athláimhe atá le honnmhairiú coinníollacha sonracha a bhaineann le cosaint an chomhshaoil nó le sábháilteacht ar bhóithre i gcomhréir le mír 3 den Airteagal seo.

3. Tugtar de chumhacht don Choimisiún gníomhartha tarmligthe a ghlacadh i gcomhréir le hAirteagal 51 chun an Rialachán seo a fhorlíonadh trí na coinníollacha comhlíontachta dá dtagraítear i mír 2 den Airteagal seo a leagan amach i ndáil le coinníollacha sonracha a chuirtear i bhfeidhm maidir le hallmhairiú feithicilí athláimhe ag tríú tír an allmhairithe nasctha le cosaint an chomhshaoil agus sábháilteacht ar bhóithre, i gcás inar thug an tríú tír sin fógra faoi na coinníollacha sin don Choimisiún. Beidh na coinníollacha sin infhíoraithe i bhfianaise na faisnéise atá ar fáil sna córais leictreonacha dá dtagraítear in Airteagal 46(1).

4. Déanfaidh an Coimisiún na coinníollacha sonracha ar tugadh fógra dó ina leith atá nasctha le cosaint an chomhshaoil nó le sábháilteacht ar bhóithre arna bhforchur ag tríú tíortha dá dtagraítear i mír 3 a fhoilsiú ar thairseach thiomnaithe ar líne agus déanfaidh sé iad a thabhairt cothrom le dáta go rialta.

*Airteagal 42***Fionraí**

1. I gcás ina mbeidh forais réasúnta ann lena chreidiúint go bhféadfadh sé nach gcomhlíonann feithicil athláimhe ceanglais na Caibidle seo, cuirfidh na húdaráis chustaim scaoileadh na feithicle athláimhe sin lena honnmhairiú ar fionraí láithreach bonn, tabharfaidh siad fógra láithreach do na húdaráis inniúla arna n-ainmniú faoi Airteagal 38 faoin bhfionraí agus tarchuirfidh siad an fhaisnéis ábhartha uile is gá do na húdaráis inniúla chun a chinneadh an gcomhlíonann an feithicil athláimhe ceanglais an Rialacháin seo agus an bhféadfar í a scaoileadh lena honnmhairiú.
2. Chun a chinneadh an gcomhlíonann feithicil athláimhe, faoi réir na fionraí dá dtagraítear i mír 1, an Rialachán seo, féadfaidh na húdaráis inniúla a iarraidh, ar aon duine atá bainteach le honnmhairiú na feithicle athláimhe sin, faisnéis bhreise, lena n-áirítear faisnéis faoi dhíolachán nó aistriú úinéireacht na feithicle, mar shampla cóip den sonrasc nó den chonradh, agus fianaise dhoiciméadach go bhfuil úsáid bhreise i ndán don feithicil athláimhe sin.

*Airteagal 43***Scaoileadh le honnmhairiú**

1. I gcás inar cuireadh scaoileadh na feithicle athláimhe lena honnmhairiú ar fionraí i gcomhréir le hAirteagal 42, scaoilfear an feithicil athláimhe sin lena honnmhairiú nuair a chomhlíontar na ceanglais agus foirmiúlachtaí eile uile a bhaineann leis an scaoileadh sin agus nuair a chomhlíontar aon cheann de na coinníollacha seo a leanas:
 - (a) níor iarr na húdaráis inniúla arna n-ainmniú faoi Airteagal 38, laistigh de 4 lá oibre ó thús na fionraí, ar na húdaráis chustaim an fhionraí a choinneáil ar bun; nó
 - (b) chuir na húdaráis inniúla arna n-ainmniú faoi Airteagal 38 in iúl do na húdaráis chustaim gur fhormheas siad scaoileadh na feithicle athláimhe lena honnmhairiú de bhun na Caibidle seo.
2. Ní mheasfar gur cruthúnas ar chomhlíonadh dhlí an Aontais ná, go háirithe, an Rialacháin seo ná Rialachán (AE) Uimh. 952/2013, é an scaoileadh le honnmhairiú.
3. Tabharfaidh na húdaráis chustaim fógra go huathoibríoch maidir le himeacht na feithicle ón Aontas tríd an idirnasca dá dtagraítear in Airteagal 46(4) d'údarás clárúcháin feithicilí Bhallstát an chláirúcháin dheireanaigh. Déanfaidh an t-údarás clárúcháin feithicilí a thaifeadadh ina chlár náisiúnta feithicilí gur onnmhairíodh an feithicil chuig tríú tír.

*Airteagal 44***Diúltú do scaoileadh le honnmhairiú**

1. I gcás ina gcinneann an t-údarás inniúil nach gcomhlíonann feithicil athláimhe, ar tugadh fógra faoina fionraí i gcomhréir le hAirteagal 42, an Chaibidle seo, ceanglóidh an t-údarás inniúil láithreach ar na húdaráis chustaim gan í a scaoileadh lena honnmhairiú agus tabharfaidh sé fógra dóibh faoi sin.
2. Ar fháil an fhógra ón údarás inniúil de bhun mhír 1, ní scaoilfidh na húdaráis chustaim an feithicil athláimhe lena honnmhairiú.

*Airteagal 45***Comhar i measc na n-údarás agus malartú faisnéise**

1. Tabharfaidh údaráis inniúla na mBallstát cúnamh dá chéile go frithpháirteach chun an Chaibidil seo a chur chun feidhme trí mhalartú faisnéise ar leibhéal déthaobhach, go háirithe chun stádas feithicle a fhíorú, lena n-áirítear a stádas clárúcháin a fhíorú sa Bhallstát ina raibh sí cláraithe roimhe sin.

2. I gcás inarb iomchuí, rachaidh údaráis inniúla na mBallstát i gcomhar le húdaráis riaracháin ó thríú tíortha freisin. Féadfar a áireamh ar an gcomhar sin comhroinnt faisnéise ábhartha, cigireachtaí comhpháirteacha a dhéanamh, agus cineálacha eile cúnamh fhrithpháirtigh a mheastar a bheith riachtanach chun a áirithiú go gcomhlíonfar na dlíthe agus na rialacháin is infheidhme lena rialáitear onnmhairiú feithiclí athláimhe.

3. Rachaidh údaráis chustaim agus údaráis inniúla na mBallstát i gcomhar le chéile i gcomhréir le hAirteagal 47(2) de Rialachán (AE) Uimh. 952/2013 agus malartóidh siad an fhaisnéis is gá chun a bhfeidhmeanna faoin Rialachán seo a chomhlíonadh, lena n-áirítear trí mheán leictreonach. I gcomhréir le hAirteagal 12(1) agus Airteagal 16(1) de Rialachán (AE) Uimh. 952/2013, féadfaidh na húdaráis chustaim faisnéis rúnda a fuair siad agus a ndualgais á bhfeidhmiú acu, nó a cuireadh ar fáil dóibh ar bhonn rúnda, a chur in iúl d'údarás inniúil an Bhallstáit ina bhfuil an t-oibreoir nó an trádálaí bunaithe.

4. I gcás ina bhfaighidh údaráis inniúla faisnéis i gcomhréir le míreanna 1 go 3, féadfaidh na húdaráis inniúla sin an fhaisnéis sin a chur in iúl d'údaráis inniúla ó Bhallstáit eile.

5. Malartófar faisnéis a bhaineann le riosca mar a leanas:

(a) idir údaráis chustaim i gcomhréir le hAirteagal 46(5) de Rialachán (AE) Uimh. 952/2013;

(b) idir údaráis chustaim agus an Coimisiún i gcomhréir le hAirteagal 47(2) de Rialachán (AE) Uimh. 952/2013;

(c) idir údaráis chustaim agus údaráis inniúla, lena n-áirítear údaráis inniúla ó Bhallstáit eile, i gcomhréir le hAirteagal 47(2) de Rialachán (AE) Uimh. 952/2013.

*Airteagal 46***Córais leictreonacha**

1. Úsáidfear an córas leictreonach MOVE-HUB a d'fhorbair an Coimisiún chun VIN agus faisnéis eile faoi chlárúchán agus stádas ródacmhainneachta na feithicle a mhalartú idir cláir náisiúnta feithiclí agus córais leictreonacha maidir le ródacmhainneacht sna Ballstáit, agus chun Timpeallacht Ionaid Ilfhreastail an Aontais Eorpaigh maidir le Custam a idirnascadh, i gcás inar gá le haghaidh rialuithe agus ceanglas a leagtar síos sa Chaibidil seo.

2. Soláthróidh córas leictreonach MOVE-HUB dá dtagraítear i mír 1 na feidhmiúlachtaí seo a leanas ar a laghad:

- (a) na sonraí a mhalartú i bhfíor-am leis na cláir náisiúnta feithiclí agus le córais leictreonacha náisiúnta maidir le ródacmhainneacht na mBallstát atá idirnasctha leis;
- (b) seiceáil leictreonach uathoibríthe a chumasú ar na sonraí a chuirtear ar fáil i ndeimhniú ródacmhainneachta dá dtagraítear in Iarscríbhinn II a ghabhann le Treoir 2014/45/AE, ón gcéad dáta de chlárúchán feithicle, chomh maith leis an mBallstát inar cláraíodh an fheithicil go deireanach, dá dtagraítear i dTreoir 1999/37/CE, chun a chinneadh an gcomhlíonann feithicil athláimhe na ceanglais a leagtar síos in Airteagal 39, Airteagal 40(1) agus Airteagal 41;
- (c) idirnascadh le Timpeallacht Ionaid Ilfhreastail an Aontais Eorpaigh maidir le Custam, i gcomhréir le Rialachán (AE) 2022/2399 chun sonraí a mhalartú agus tacú leis an bpróiseas malartaithe faisnéise dá dtagraítear in Airteagal 40(1) agus 41(2), chomh maith le tacú leis na fógraí dá dtagraítear in Airteagal 42, 43 agus 44;
- (d) chun críocha an chomhair le tríú tíortha faoi Airteagal 45(2), malartú leictreonach faisnéise a chumasú leis na húdaráis inniúla i dtríú tíortha a thug fógra don Choimisiún de bhun Airteagal 41(2) faoi na coinníollacha sonracha maidir le honnmhairiú feithiclí athláimhe a chuireann siad i bhfeidhm.

3. Déanfaidh na Ballstáit a gcláir náisiúnta feithiclí agus a gcórais leictreonacha náisiúnta maidir le ródacmhainneacht a idirnascadh le córas leictreonach MOVE-HUB dá dtagraítear i mír 1. Beidh an t-idirnasc sin oibríochtúil laistigh de 2 bhliain tar éis ghlacadh an ghnímh cur chun feidhme dá dtagraítear i mír 5.

4. Déanfaidh an Coimisiún córas MOVE-HUB dá dtagraítear i mír 1 den Airteagal seo a idirnascadh le Córas Malartaithe Deimhnithe Thimpeallacht Ionaid Ilfhreastail an Aontais Eorpaigh maidir le Custam a bunaíodh in Airteagal 4 de Rialachán (AE) 2022/2399, ionas gur féidir na rialuithe uathoibríthe dá dtagraítear in Airteagal 40 agus 41(2) agus na fógraí dá dtagraítear in Airteagal 42, 43 agus 44 a dhéanamh. Beidh an t-idirnasc sin oibríochtúil laistigh de 4 bliana tar éis ghlacadh an ghnímh cur chun feidhme dá dtagraítear i mír 5 den Airteagal seo.

5. Glacfaidh an Coimisiún, faoin 30 Meán Fómhair 2028, na gníomhartha cur chun feidhme lena leagtar síos na socruithe is gá chun feidhmiúlachtaí MOVE-HUB dá dtagraítear i mír 2 a chur chun feidhme, lena n-áirítear na bearta teicniúla is gá chun córais leictreonacha náisiúnta a idirnascadh le MOVE-HUB, na coinníollacha maidir le nascadh le MOVE-HUB, na sonraí atá le tarchur ag na córais náisiúnta agus an fhormáid chun na sonraí sin a tharchur trí na córais náisiúnta idirnasctha. Déanfar na gníomhartha cur chun feidhme sin a ghlacadh i gcomhréir leis an nós imeachta scrúdúcháin dá dtagraítear in Airteagal 52(2).

CAIBIDIL VII
FORFHEIDHMIÚ

Airteagal 47

Cigireachtaí

1. Bunóidh na Ballstáit, chun an Rialachán seo a fhorfheidhmiú, straitéisí cigireachta a bheidh dírithe ar ghníomhaíochtaí neamhdhleathacha a bhrath a mhéid a bhaineann le feithiclí a bhfuil a ré caite, mar aon lena bpáirteanna agus lena gcomhpháirteanna, a bhailiú, a chóireáil agus a onnmhairiú. Déanfar foráil sna straitéisí sin do na cigireachtaí dá dtagraítear i míreanna 2, 3 agus 4.
2. Déanfaidh na Ballstáit, chun an Rialachán seo a fhorfheidhmiú, cigireacht ar an méid seo a leanas:
 - (a) saoráidí cóireála údaraithe;
 - (b) pointí bailiúcháin;
 - (c) saoráidí agus oibreoirí eacnamaíocha eile a d'fhéadfadh a bheith bainteach le bailiú, cóireáil agus onnmhairiú feithiclí a bhfuil a ré caite, nó le páirteanna agus comhpháirteanna spártha athlámhe a dhíol.
3. Déanfar líon iomlán na n-oibreoirí arna liostú i mír 2 a bheidh faoi réir cigireachta gach bliain féilire a ríomh mar 10 % ar a laghad de na hoibreoirí a liostaítear i mír 2, pointí (a) agus (b).
4. Ina theannta sin, déanfaidh na Ballstáit cigireachtaí rialta agus rioscabhunaithe a bhaineann le honnmhairiú feithiclí athlámhe chun comhlíonadh Airteagal 39 a fhíorú.
5. Chun idirdhealú a dhéanamh idir feithiclí athlámhe agus feithiclí a bhfuil a ré caite, féadfaidh údaráis inniúla na mBallstát cigireacht a dhéanamh ar lastais feithiclí athlámhe a bhfuil amhras ann gur feithiclí a bhfuil a ré caite iad, chun a fhíorú an gcomhlíontar na ceanglais a leagtar síos in Airteagal 36 agus in Iarscríbhinn I, agus faireachán a dhéanamh ar na lastais sin dá réir sin.
6. I gcás ina suífidh údaráis inniúla Ballstáit go bhfuil feithicil a bhfuil a ré caite amháin nó níos mó i gceist le lastas beartaithe feithiclí athlámhe, féadfar na costais a bhaineann le hanailísí, cigireachtaí agus stóráil iomchuí na bhfeithiclí a bhfuil amhras ann gur feithiclí a bhfuil a ré caite iad a ghearradh ar na daoine a shocraíonn lastas na bhfeithiclí sin.

Airteagal 48

Comhar maidir le forfheidhmiú ar an leibhéal náisiúnta agus idir na Ballstáit

1. Bunóidh na Ballstáit, a mhéid a bhaineann leis na húdaráis inniúla ábhartha uile a bhfuil baint acu le forfheidhmiú an Rialachán seo, sásraí éifeachtacha chun é a chur ar a gcumas do na húdaráis sin comhoibriú agus comhordú a dhéanamh ar bhonn intíre maidir le forbairt agus cur chun feidhme beartas agus gníomhaíochtaí forfheidhmiúcháin a bhaineann le faireachán a dhéanamh ar chlárú, díchlárú, fionraí agus cealú an chlárúcháin feithiclí, ar dheimhniú scríosta, ar onnmhairiú feithiclí athlámhe chomh maith le cóireáil agus onnmhairiú neamhdhleathach feithiclí a bhfuil a ré caite a chosc.

2. Oibreoidh na Ballstáit i gcomhar le chéile, go déthaobhach agus go hiltáobhach, chun cosc agus brath cóireála neamhdhleathaí agus onnmhairithe neamhdhleathaigh feithiclí a bhfuil a ré caite a éascú agus chun aghaidh a thabhairt ar shaincheist na bhfeithiclí atá ar iarraidh. Déanfaidh siad faisnéis ábhartha maidir le clárú, díchlárú agus fionraí agus cealú an chlárúcháin feithiclí a mhalartú, tríd an gcóras leictreonach malartaithe dá dtagraítear in Airteagal 46. Ina theannta sin, déanfaidh siad faisnéis ábhartha a mhalartú maidir le saoráidí cóireála údaráithe agus oibreoirí deisiúcháin agus cothabhála nach gceadaítear mar shaoráidí cóireála údaráithe, agus saoráidí agus oibreoirí eacnamaíocha eile, a fhéadfaidh oibríochtaí a dhéanamh a bhaineann le cóireáil feithiclí a bhfuil a ré caite. Comhroinnfidh siad faisnéis, taithí agus eolas maidir le gníomhaíochtaí neamhdhleathacha atá nasctha le feithiclí a bhfuil a ré caite, bearta forfheidhmiúcháin agus gníomhaíochtaí comhpháirteacha ar bhonn rialta laistigh de struchtúir bhunaithe, amhail líonraí forfheidhmiúcháin, gníomhaireachtaí agus an Coiste arna mbunú de bhun Airteagal 52 den Rialachán seo.

Áireofar ar mhalartú na sonraí clárúcháin feithicle rochtain ar shonraí maidir le feidhmíocht agus maidir le cineál agus torthaí na seiceálacha a rinneadh, agus na sonraí sin a mhalartú le húdaráis inniúla na mBallstát eile chun forfheidhmiú an Rialacháin seo a éascú.

3. Tabharfaidh na Ballstáit fógra don Choimisiún faoi na baill bhuana foirne atá freagrach as an gcomhar dá dtagraítear i mír 2 den Airteagal seo agus in Airteagal 45.

Airteagal 49

Pionóis

Faoi 1 Meán Fómhair 2029, déanfaidh na Ballstáit na rialacha a bhaineann leis na pionóis is infheidhme maidir le sáruithe ar Airteagal 15(1), Airteagal 16, Airteagal 18(1), Airteagal 22(1) agus (2), Airteagail 23 agus 24, Airteagal 25(1) agus (2), Airteagail 26 go 31, agus Airteagail 33, 34, 36, 37 agus 39 den Rialachán seo a leagan síos, agus glacfaidh siad gach beart is gá lena áirithiú go gcuirfear chun feidhme iad. Beidh na pionóis dá bhforáiltear éifeachtach, comhréireach agus athchomhairleach. Tabharfaidh na Ballstáit fógra don Choimisiún faoi na rialacha sin agus na bearta sin gan mhoill agus tabharfaidh siad fógra dó, gan mhoill, faoi aon leasú ina dhiaidh sin a dhéanfaidh difear dóibh.

Airteagal 50

Tuairisciú don Choimisiún

1. Ón 1 Meán Fómhair 2029, cuirfidh na Ballstáit ar fáil go poiblí i bhfoirm chomhiomlánaithe le haghaidh gach bliana féilire agus san fhormáid arna bunú ag an gCoimisiún de bhun mhír 5, na sonraí seo a leanas, a bheidh bunaithe ar an bhfaisnéis agus ar na sonraí a fhaightear ó tháirgeoirí, eagraíochtaí um fhreagracht táirgeoirí agus oibreoirí bainistithe dramhaíola:

- (a) an líon feithiclí cláraithe sa Bhallstát;
- (b) an líon feithiclí a cuireadh ar fáil ar an margadh den chéad uair laistigh de chríoch an Bhallstáit;
- (c) líon agus meáchan na bhfeithiclí a bhfuil a ré caite a bailíodh agus a díthruaillíodh sa Bhallstát;
- (d) líon agus meáchan na bhfeithiclí a bhfuil a ré caite a athchúrsáladh laistigh de chríoch an Bhallstáit;
- (e) líon agus meáchan na bhfeithiclí a bhfuil a ré caite a onnmhairíodh nó a seoladh le haghaidh tuilleadh cóireála chuig Ballstát eile nó tríú tír;
- (f) líon agus meáchan na bhfeithiclí a bhfuil a ré caite a allmhairíodh nó a seoladh le haghaidh cóireáil bhreise ó thríú tír;
- (g) líon na bhfeithiclí athláimhe a scaoileadh lena n-onnmhairiú agus líon na bhfeithiclí athláimhe a allmhairíodh;
- (h) an líon deimhnithe scriosta a eisíodh;

- (i) meáchan foriomlán agus, i gcás inarb ábhartha, méid na bpáirteanna, na gcomhpháirteanna agus na n-ábhar a bhaintear as feithiclí a bhfuil a ré caite chun críche:
 - (i) athúsáide;
 - (ii) athmhonaraithe nó athriochtaithe;
 - (iii) athchúrsála;
 - (iv) aisghabhála, lena n-áirítear athghabháil fuinnimh;
 - (v) diúscartha;
- (j) méid agus meáchan feithiclí a bhfuil a ré caite a cóireáladh ar bhealach difriúil ná mar a léirítear i bpointe (d);
- (k) méid agus meáchan na bhfeithiclí a bhfuil a ré caite a úsáideadh le haghaidh aislíonta;
- (l) rátaí na spriocanna a leagtar síos in Airteagal 33 a bhain na hoibreoirí bainistithe dramhaíola uile atá gníomhach sa Bhallstát amach;
- (m) úsáid na díolúine dá bhforáiltear in Airteagal 29(2), agus an chaoi a ndearna an Ballstát tuairiscithe faireachán air;
- (n) sonraí maidir le heagraíochtaí um fhreagracht táirgeoirí, lena n-áirítear ainmneacha na ndaoine dlítheanacha dá ndéanann siad ionadaíocht;
- (o) sonraí maidir le cur chun feidhme Airteagal 21;
- (p) cainníochtaí na bpáirteanna agus na gcomhpháirteanna ina bhfuil méideanna ábhartha amhábhhar criticiúil a bhaintear as feithiclí a bhfuil a ré caite agus cainníochtaí na n-amhábhhar criticiúil a aisghabháiltear as na páirteanna agus comhpháirteanna sin.

Cuirfidh na Ballstáit na sonraí dá dtagraítear sa chéad fhomhír ar fáil go poiblí laistigh de 18 mí tar éis dheireadh na tréimhse tuairiscithe dá mbailítear iad. Beidh na sonraí inléite, insórtáilte agus inchuadaithe ag meaisín, agus urramófar leo caighdeáin oscailte d'úsáid ag tríú páirtithe. Tabharfaidh na Ballstáit fógra don Choimisiún nuair a chuirfear na sonraí dá dtagraítear sa chéad fhomhír ar fáil.

Is é a bheidh sa chéad tréimhse tuairiscithe an chéad bhliain féilire tar éis ghlacadh an ghnímh cur chun feidhme dá dtagraítear i mír 5.

2. Beidh tuarascáil seiceála cáilíochta ag gabháil leis na sonraí a chuirfidh na Ballstáit ar fáil i gcomhréir le mír 1. Déanfar an fhaisnéis sin a chur i láthair san fhormáid arna bunú ag an gCoimisiún de bhun mhír 5.

3. Gach cúig bliana, déanfaidh na Ballstáit tuarascáil a tharraingt suas ina ndéanfar achoimre ar an méid seo a leanas:

- (a) dreasachtaí a tugadh isteach chun athúsáid, athmhonarú agus athriochtú páirteanna agus comhpháirteanna a chur chun cinn i gcomhréir le hAirteagal 32 agus a dtionchar measta;
- (b) cur i bhfeidhm pionós agus smachtbhannaí eile a bheartaítear ina ndlí náisiúnta as sárúithe ar an Rialachán seo arna nglacadh i gcomhréir le hAirteagal 49, lena n-áirítear liosta de chineál sárúithe ar tugadh fógra fúthu agus cineálacha na mbeart a glacadh;

(c) torthaí na gcigireachtaí a rinneadh i gcomhréir le hAirteagal 47;

(d) an bealach a cuireadh i bhfeidhm na sainmhínithe ar 'feithicil a bhfuil a ré caite' agus 'feithicil athláimhe', lena n-áirítear deacrachtaí praiticiúla ar thángthas orthu sa chomhthéacs sin.

Cuirfidh na Ballstáit an tuarascáil sin faoi bhráid an Choimisiúin laistigh de 6 mhí ó dheireadh na tréimhse 5 bliana a chumhdaítear léi. Soláthrófar an chéad tuarascáil don Choimisiún faoin 1 Meán Fómhair 2032.

Déanfaidh an Coimisiún athbhreithniú ar na tuarascálacha arna dtíolacadh ag na Ballstáit agus tarraingeoidh sé suas agus foilseoidh sé tuarascálacha ar an bhfaisnéis a fuarthas chun tacú leis an meastóireacht ar chur chun feidhme an Rialacháin seo sna Ballstáit agus chun malartú faisnéise a éascú maidir leis na dea-chleachtais a chuirtear i bhfeidhm sna Ballstáit.

4. Chun faireachán a dhéanamh ar chur chun feidhme an Rialacháin seo, baileoidh agus athbhreithneoidh an Coimisiún an fhaisnéis a chuirfear ar fáil i gcomhréir leis an Airteagal seo.

5. Glacfaidh an Coimisiún gníomhartha cur chun feidhme lena leagfar síos na nithe a leanas:

(a) an mhodheolaíocht agus na rialacha maidir le sonraí a ríomh, a fhíorú agus a thuairisciú i gcomhréir le mír 1, lena n-áirítear:

(i) an mhodheolaíocht chun méid agus meáchan na bpáirteanna, na gcomhpháirteanna agus na n-ábhar a bhaintear chun na gcríoch dá dtagraítear i mír 1, pointí (i), (j), (k) agus (p) a chinneadh;

(ii) an mhodheolaíocht chun meáchan na dramhaíola athchúrsáilte a chinneadh, lena n-áirítear cinneadh na bpointí ríofa agus na bpointí tomhais, agus, más gá, féidearthachtaí a bhaineann le meánrátaí caillteanais a chur i bhfeidhm;

(iii) an mhodheolaíocht chun baint amach na spriocanna athúsáide, athchúrsála agus aisghabhála dá dtagraítear in Airteagal 33 a ríomh agus a fhíorú, lena n-áirítear i gcás mionghearradh comhcheangailte feithiclí a bhfuil a ré caite le dramhaíl eile dá dtagraítear in Airteagal 27 agus i gCuid G, pointe 3, d'Iarscríbhinn VIII;

(b) an fhormáid le haghaidh an tuairiscithe don Choimisiún dá dtagraítear i mír 1, chomh maith leis an bhformáid le haghaidh na tuarascála seiceála cáilíochta.

Glacfar na gníomhartha cur chun feidhme sin faoin 31 Márta 2029, i gcomhréir leis an nós imeachta scrúdúcháin dá dtagraítear in Airteagal 52(2).

6. Soláthróidh táirgeoirí, eagraíochtaí um fhreagracht táirgeoirí, oibreoirí bainistithe dramhaíola agus oibreoirí eacnamaíocha ábhartha eile sonraí cruinne agus iontaofa do na húdaráis inniúla lenar féidir leis na Ballstáit a n-oibleagáidí tuairiscithe faoin Airteagal seo a chomhlíonadh.

CAIBIDIL VIII

CUMHACHTAÍ TARMLOGTHE AGUS NÓS IMEACHTA COISTE

Airteagal 51

An tarmloghean a fheidhmiú

1. Is faoi réir na gcoinníollacha a leagtar síos san Airteagal seo a thugtar an chumhacht don Choimisiún chun gníomhartha tarmlogthe a ghlacadh.
2. Tabharfar an chumhacht don Choimisiún chun gníomhartha tarmlogthe dá dtagraítear in Airteagail 5(3), 5(6), 6(6) go (9), 7(3), 11(4), 12(2), 21(2), 22(6), 26(3), 37(3) agus 41(3) a ghlacadh ar feadh tréimhse 5 bliana ón 13 Lúnasa 2026. Déanfaidh an Coimisiún, tráth nach déanaí ná 9 mí roimh dheireadh na tréimhse 5 bliana, tuarascáil a tharraingt suas maidir le tarmloghean na cumhachta. Déanfar tarmloghean na cumhachta a fhadú go hintuigthe go ceann tréimhsí comhfhaid, mura rud é go gcuireann Parlaimint na hEorpa nó an Chomhairle in aghaidh an fhadaíthe sin tráth nach déanaí ná 3 mhí roimh dheireadh gach tréimhse.
3. Féadfaidh Parlaimint na hEorpa nó an Chomhairle tarmloghean na cumhachta dá dtagraítear in Airteagail 5(3), 5(6), 6(6) go (9), 7(3), 11(4), 12(2), 21(2), 22(6), 26(3), 37(3) agus 41(3) a chúlghairm aon tráth. Le cinneadh chun cúlghairm a dhéanamh, cuirfear deireadh le tarmloghean na cumhachta atá sonraithe sa chinneadh sin. Gabhfaidh éifeacht leis an lá tar éis fhoilsiú an chinnidh in *Iris Oifigiúil an Aontais Eorpaigh* nó ar dháta is déanaí a shonrófar sa chinneadh. Ní dhéanfaidh sé difear do bhailíocht aon ghnímh tharmlogthe atá i bhfeidhm cheana.
4. Sula nglacfaidh sé gníomh tarmlogthe, rachaidh an Coimisiún i mbun comhairliúcháin le saineolaithe arna n-ainmniú ag gach Ballstát i gcomhréir leis na prionsabail a leagtar síos i gComhaontú Idirinstitiúideach an 13 Aibreán 2016 maidir le Reachtóireacht Níos Fearr.
5. A luaithe a ghlacfaidh sé gníomh tarmlogthe, tabharfaidh an Coimisiún fógra, an tráth céanna, do Pharlaimint na hEorpa agus don Chomhairle faoi.
6. Ní thiocfaidh gníomh tarmlogthe a ghlactar de bhun Airteagail 5(3), 5(6), 6(6) go (9) 7(3), 11(4), 12(2), 21(2), 22(6), 26(3), 37(3) agus 41(3) i bhfeidhm ach amháin mura mbeidh aon agóid curtha in iúl ag Parlaimint na hEorpa nó ag an gComhairle laistigh de thréimhse 2 mhí tar éis fógra faoin ngníomh sin a thabhairt do Pharlaimint na hEorpa agus don Chomhairle nó más rud é, roimh dhul in éag na tréimhse sin, go mbeidh Parlaimint na hEorpa agus an Chomhairle araon tar éis a chur in iúl don Choimisiún nach ndéanfaidh siad aon agóid. Déanfar an tréimhse sin a fhadú 2 mhí ar thionscnamh Pharlaimint na hEorpa nó na Comhairle.

Airteagal 52

Nós imeachta coiste

1. Déanfaidh an coiste a bunaíodh le hAirteagal 39 de Threoir 2008/98/CE cúnamh a thabhairt don Choimisiún. Beidh an coiste sin ina choiste de réir bhrí Rialachán (AE) Uimh. 182/2011.
2. I gcás ina ndéantar tagairt don mhír seo, beidh feidhm ag Airteagal 5 de Rialachán (AE) Uimh. 182/2011.

CAIBIDIL IX

LEASUITHE

*Airteagal 53***Leasuithe ar Rialachán (AE) 2023/1542**

Leasaítear Iarscríbhinn I a ghabhann le Rialachán (AE) 2023/1542 i gcomhréir le hlarscríbhinn XII a ghabhann leis an Rialachán seo.

*Airteagal 54***Leasuithe ar Rialachán (AE) 2019/1020**

I Rialachán (AE) 2019/1020, Iarscríbhinn II, scriostar pointí 10 agus 11.

*Airteagal 55***Leasuithe ar Rialacháin (AE) 2018/858 agus (AE) Uimh. 168/2013**

Leasaítear Iarscríbhinn II a ghabhann le Rialachán (AE) 2018/858 agus Iarscríbhinn II a ghabhann le Rialachán (AE) Uimh. 168/2013 i gcomhréir le hlarscríbhinn XI a ghabhann leis an Rialachán seo.

CAIBIDIL X

FORÁLACHA CRÍOCHNAITHEACHA

*Airteagal 56***Athbhreithniú**

1. Faoi 31 Nollaig 2035, déanfaidh an Coimisiún athbhreithniú agus tuarascáil a tharraingt suas maidir le cur i bhfeidhm an Rialacháin seo agus a thionchar ar an gcomhshaol, ar shláinte an duine agus ar fheidhmiú an mhargaidh aonair agus cuirfidh sé faoi bhráid Pharlaimint na hEorpa agus na Comhairle í. I gcás inarb iomchuí, beidh togra reachtach chun na forálacha ábhartha den Rialachán seo a leasú ag gabháil leis an tuarascáil.
2. Agus an dul chun cinn teicniúil agus an taithí phraiticiúil a fuarthas sna Ballstáit chomh maith le haon athbhreithniú a dhéanfar ar Rialachán (CE) Uimh. 1907/2006 á gcur san áireamh, áireoidh an Coimisiún, ina thuarascáil, meastóireacht ar an méid seo a leanas:
 - (a) an gá atá le raon feidhme an Rialacháin seo a leathnú, go háirithe forálacha Chaibidil II agus III, chomh maith le Caibidil IV Roinn II, chuig feithiclí de chatagóir L mar a shainmhínítear in Airteagal 4(2) de Rialachán (AE) Uimh. 168/2013 agus chuig feithiclí de chatagóirí M₂, M₃, N₂, N₃ agus O mar a shainmhínítear in Airteagal 4(1) de Rialachán (AE) 2018/858;
 - (b) an gá atá le raon feidhme na bhforálacha is infheidhme a leathnú chuig feithiclí atá cineálcheadaithe i gcineálcheadú ilchéimneach agus chuig carbháin mhótair agus chun carbháin leantóra a áireamh i raon feidhme an Rialacháin seo;
 - (c) an gá atá le raon feidhme an Rialacháin seo, go háirithe Caibidil VI a leathnú chuig feithiclí de chatagóir L, mar a shainmhínítear in Airteagal 4(2) de Rialachán (AE) Uimh. 168/2013;
 - (d) na bearta a bhaineann le soláthar faisnéise faoi shubstaintí ar ábhar imní iad a bheith i bhfeithiclí agus an gá atá le forálacha breise a thabhairt isteach chun aghaidh a thabhairt ar shubstaintí ar ábhar imní iad a d'fhéadfadh difear a dhéanamh d'athchúrsáil ardcháilíochta feithiclí a bhfuil a ré caite;

- (e) na bearta maidir le bainistiú feithiclí a bhfuil a ré caite a leagtar síos i gCaibidil IV, lena n-áirítear na leibhéil spriocanna a leagtar síos in Airteagal 33 agus a riachtanaí atá sé iad a athbhreithniú;
- (f) an gá atá le raon feidhme an Rialacháin seo a leathnú i ndáil le spriocleibhéil athchúrsála, mar a leagtar síos in Airteagal 33, chuig na catagóirí feithiclí nach bhfuil feidhm ag Airteagal 33 maidir leo faoin Rialachán seo;
- (g) sáruithe agus éifeachtacht, comhréireacht agus athchomhairleacht na bpionós a leagtar amach in Airteagal 49;
- (h) an gá le hAirteagal 5 a leasú;
- (i) a mhéid a réitíodh an tsaincheist maidir le feithiclí atá ar iarraidh, lena n-áirítear meastacháin maidir le líon na bhfeithiclí atá ar iarraidh agus tionchar na mbeart i ndáil le honnmhairiú feithiclí athláimhe, agus an gá atá le bearta breise a áireamh lena dtugtar aghaidh ar shaincheist na hinrianaitheachta feithiclí;
- (j) na ceanglais maidir le cion plaistigh athchúrsáilte, lena n-áirítear spriocanna agus oibleagáidí le haghaidh suiteálacha athchúrsála laistigh agus lasmuigh den Aontas mar a leagtar síos in Airteagal 6(1) go (4) den Rialachán seo, agus an gá atá le hathbhreithniú ar an mbonn sin, lena n-áirítear meastóireacht ar fhorbairtí maidir le cruach agus alúmanam a bhaineann le hAirteagal 6(7) agus (8) den Rialachán seo agus faoi reachtaíocht ábhartha eile de chuid an Aontais, amhail Rialachán (AE) 2025/40 nó Rialachán (AE) 2024/1781, chun comhleanúnachas agus ailíniú a áirithiú;
- (k) an sásra um leithdháileadh costas le haghaidh feithiclí atá ar tí a bheith ina bhfeithiclí a bhfuil a ré caite i mBallstát eile a leagtar síos in Airteagal 22 agus an gá atá le hathbhreithniú air;
- (l) forálacha maidir le próisis a d'fhéadfadh difear a dhéanamh d'athchúrsáil ardcháilíochta ar fheithiclí a bhfuil a ré caite;
- (m) tionchar na ndifríochtaí sna critéir náisiúnta ródacmhainneachta ar onnmhairí feithiclí athláimhe.
- (n) éifeachtacht, idir-inoibritheacht agus iontaofacht na gcóras náisiúnta clárúcháin feithiclí agus a malartú trasteorann faisnéise chun sainathint, stádas agus inrianaitheacht chruinn feithiclí ar feadh a saolré a áirithiú, agus aird ar leith ar an méid seo a leanas:
 - (i) an tionchar a bhíonn ag díchlárú sealadach ar chruinneas, inrochtaineacht agus inrianaitheacht taifead feithiclí, lena n-áirítear an ról atá aige maidir le feithiclí atá ar iarraidh a shainaithint;
 - (ii) an gá atá le híoscheanglais maidir le díchlárú feithiclí ar fud an Aontais, amhail uasfhad agus coinníollacha diana athnuachana a bhunú, inrianaitheacht feithiclí a neartú agus a gcóireáil neamhdhleathach a chosc.

3. Faoi 31 Nollaig 2033, déanfaidh an Coimisiún athbhreithniú ar staid na forbartha teicneolaíche, na feidhmíochta comhshaoil agus eacnamaíche agus infhaighteacht an chion phlaistigh bhithbhunaithe agus leaistiméirí a dhíorthaítear ó athphróiseáil bonn i bhfeithiclí nua, agus na critéir inbhuanaitheachta a leagtar síos in Airteagal 29 de Threoir (AE) 2018/2001 agus aon chritéir inbhuanaitheachta atá le leagan síos le haghaidh bonn faoi Rialachán (AE) 2024/1781 á gcur san áireamh.

4. I gcás inarb iomchuí agus bunaithe ar an athbhreithniú dá dtagraítear i mír 3, féadfaidh an Coimisiún togra reachtach a chur i láthair chun an méid a leanas a dhéanamh:

- (a) ceanglais inbhuanaitheachta a leagan síos maidir le bunábhar bithbhunaithe i bplaisteach a úsáidtear i bhfeithiclí;
- (b) spriocanna a leagan síos maidir le húsáid bunábhair bhithbhunaithe i bplaisteach a úsáidtear i bhfeithiclí a mhéadú;
- (c) spriocanna a leagan síos chun úsáid leaistiméirí a dhíorthaítear ó athphróiseáil bonn ó fheithiclí a áireamh;
- (d) measúnú a dhéanamh ar a mhéid a fhéadfar na spriocanna dá dtagraítear i bpointe (b) a chomhcheangal leis na spriocanna a leagtar amach in Airteagal 6(1) nó a chur leo;
- (e) measúnú a dhéanamh ar a mhéid a fhéadfar na spriocanna dá dtagraítear i bpointe (c) a chomhcheangal leis na spriocanna a leagtar amach in Airteagal 6(1);
- (f) modhnú a dhéanamh, i gcás inarb iomchuí, ar an sainmhíniú ar phlaisteach bithbhunaithe a leagtar amach in Airteagal 3(1), pointe (53), de Rialachán (AE) 2025/40, ar an sainmhíniú ar phlaisteach in Airteagal 3(1), pointe (9), den Rialachán seo agus ar raon feidhme na spriocanna maidir le plaisteach athchúrsáilte mar a shonraítear in Airteagal 6(1) den Rialachán seo;
- (g) modhnú a dhéanamh, i gcás inarb iomchuí, ar an modheolaíocht ríofa agus fíorúcháin dá dtagraítear in Airteagal 6(2) agus ar na ceanglais maidir le suiteálacha a phróiseálann leaistiméirí ó bhoinn atá bunaithe san Aontas agus i dtríú tíortha.

5. I gcás inarb iomchuí chun inrianaitheacht éifeachtach agus aonfhoirmeach feithiclí a bhfuil a ré caite a áirithiú, agus bunaithe ar an athbhreithniú dá dtagraítear i mír 2, pointe (n), féadfaidh an Coimisiún togra reachtach a chur i láthair maidir le rialacha i ndáil le feithiclí a dhíchúlú ar fud an Aontais.

6. Faoi 14 Lúnasa 2031, déanfaidh an Coimisiún meastóireacht chun a mheas, bunaithe ar na dearbhuithe arna ndéanamh faoi Airteagal 10, an bhfuil monaróirí ar an mbóthar ceart chun na spriocanna maidir le plaisteach athchúrsáilte a leagtar síos in Airteagal 6(1) a chomhlíonadh. Measfar, go háirithe, an méid seo a leanas sa mheastóireacht:

- (a) infhaighteacht teicneolaíochtaí iomchuí chun plaisteach a athchúrsáil;
- (b) infhaighteacht leordhóthanach ar phlaisteach athchúrsáilte;
- (c) leibhéal cáilíochta an phlaistigh athchúrsáilte i gcomparáid leis an leibhéal sábháilteachta is gá; agus
- (d) deacrachtaí teicniúla agus eacnamaíocha chun na spriocanna maidir le plaisteach athchúrsáilte a bhaint amach.

Ar bhonn an mheasúnaithe sin, féadfaidh an Coimisiún, i gcás inarb iomchuí, togra reachtach a chur faoi bhráid Pharlaimint na hEorpa agus na Comhairle chun na spriocanna a leagtar síos in Airteagal 6(1) a leasú chun foráil a dhéanamh maidir le maoluithe ar raon feidhme, uainiú nó leibhéal na gcéatadán íosta a leagtar amach ann.

Airteagal 57

Aisghairm agus forálacha idirthréimhseacha

1. Déantar Treoir 2000/53/CE a aisghairm le héifeacht ón 1 Meán Fómhair 2028.

Mar sin féin, leanfar d'fheidhm a bheith ag na forálacha seo a leanas de Threoir 2000/53/CE:

- (a) Airteagal 4(2) agus Iarscríbhinn II, go dtí an 31 Lúnasa 2032; mar sin féin, scoirfidh iontrálacha 5(a), 5(b)(i), 5(b)(ii) agus 16 d'Iarscríbhinn II a ghabhann le Treoir 2000/53/CE d'fheidhm a bheith acu ón 13 Lúnasa 2026;
- (b) Airteagal 5(4), an dara fomhír, Airteagal 6(3), an dara fomhír, Airteagal 7(1), Airteagal 8(3) agus (4), go dtí an 31 Lúnasa 2029;

- (c) Airteagal 6(3), an chéad fhomhír, agus Iarscríbhinn I go dtí an 31 Lúnasa 2029;
 - (d) Airteagal 7(2), pointe (b), go dtí an 31 Nollaig 2030;
 - (e) Airteagal 9(1a), an chéad fhomhír agus an tríú fhomhír, Airteagal 9(1b) agus Airteagal 9(1d), go dtí an 31 Lúnasa 2029;
 - (f) Airteagal 9(1a), an dara fhomhír, go dtí an 31 Lúnasa 2031;
2. Déantar Treoir 2005/64/CE a aisghairm le héifeacht ón 31 Lúnasa 2032.

Mar sin féin, déantar Airteagal 6(3) di a aisghairm le héifeacht ón 31 Lúnasa 2029.

3. Déanfar tagairtí do na Treoracha aisghairthe a fhorléiriú mar thagairtí don Rialachán seo agus léifear iad i gcomhréir leis na táblaí comhghaoil atá in Iarscríbhinn XV.
4. De mhaolú ar Airteagal 8(2) den Rialachán seo, go dtí an 14 Lúnasa 2032, i gcás ina dtagraítear san Airteagal sin d'Airteagal 4 den Rialachán seo, déanfar an tagairt sin a fhorléiriú mar thagairt d'Airteagal 5 de Threoir 2005/64/CE.

De mhaolú ar Airteagal 8(2) den Rialachán seo, go dtí 14 Lúnasa 2032 [72 mhí ó dháta theacht i bhfeidhm an Rialacháin seo], i gcás ina dtagraítear san Airteagal sin d'Airteagal 5 den Rialachán seo, déanfar an tagairt sin a fhorléiriú mar thagairt d'Airteagal 6(2) de Threoir 2005/64/CE.

Airteagal 58

Infheidhmeacht maidir leis an Ríocht Aontaithe agus sa Ríocht Aontaithe i ndáil le Tuaisceart Éireann

1. Ní bheidh feidhm ag Airteagal 14 ach amháin i ndáil le hAirteagal 30, Airteagal 31 agus Airteagal 35(1) maidir leis an Ríocht Aontaithe agus sa Ríocht Aontaithe i ndáil le Tuaisceart Éireann.
2. Ní bheidh feidhm ag Airteagail 15 go 29, Airteagail 32, 33 go 34 agus Airteagal 35(2) maidir leis an Ríocht Aontaithe agus sa Ríocht Aontaithe i ndáil le Tuaisceart Éireann.
3. Ní bheidh feidhm ag Airteagail 47(2), pointe (a), agus Airteagal 47(3) maidir leis an Ríocht Aontaithe agus sa Ríocht Aontaithe i ndáil le Tuaisceart Éireann.
4. Ní bheidh feidhm ag Airteagal 48(1) agus (2) a mhéid a bhaineann le cosc a chur ar chóireáil neamhdhleathach feithiclí a bhfuil a ré caite maidir leis an Ríocht Aontaithe agus sa Ríocht Aontaithe i ndáil le Tuaisceart Éireann.
5. Ní bheidh feidhm ag Airteagal 48(2) a mhéid a bhaineann le malartú faisnéise ábhartha i ndáil le saoráidí cóireála údaráithe maidir leis an Ríocht Aontaithe agus sa Ríocht Aontaithe i ndáil le Tuaisceart Éireann.
6. Ní bheidh feidhm ag Airteagal 49 maidir leis an Ríocht Aontaithe agus sa Ríocht Aontaithe i ndáil le Tuaisceart Éireann a mhéid a bhaineann le hAirteagal 15(1), Airteagal 16, Airteagal 19(1), Airteagal 22(1) agus (2), Airteagal 23, Airteagal 24, Airteagal 25(1) agus (2), Airteagail 27 go 29, Airteagal 33 agus Airteagal 34.
7. Ní bheidh feidhm ag Airteagail 50(1), pointí (c), (d), (h), (i)(iii), (i)(iv), (i)(v), (j), (k), (l), (m), (n) agus (o) ná Airteagal 50(3), pointe (a), maidir leis an Ríocht Aontaithe agus sa Ríocht Aontaithe i ndáil le Tuaisceart Éireann.

*Airteagal 59***Teacht i bhfeidhm agus cur i bhfeidhm**

1. Tiocfaidh an Rialachán seo i bhfeidhm an fichiú lá tar éis lá a fhoilsithe in *Iris Oifigiúil an Aontais Eorpaigh*.
2. Beidh feidhm aige ón 1 Meán Fómhair 2028.

Mar sin féin, beidh feidhm ag Airteagail 4(3), 5(2) go (9), 6(4) go (9), 6(11), 7(3), 7(4), 9(7), 11(4), 12(2), 13(6), 14(4), 15(6), 21(2), 22(6), 26(3), 37(3), 41(3), 46(5) agus 50(5) ón 14 Meán Fómhair 2026, beidh feidhm ag Airteagal 53 ón 13 Lúnasa 2026 agus beidh feidhm ag Airteagal 55 ón 1 Meán Fómhair 2032.

Beidh an Rialachán seo ina cheangal go huile agus go hiomlán agus beidh sé infheidhme go díreach sna Ballstáit.

Arna dhéanamh in Strasbourg, an 8 Iúil 2026.

Thar ceann Pharlaimint na hEorpa

An tUachtarán

R. METSOLA

Thar ceann na Comhairle

An tUachtarán

T. BYRNE

IARSCRÍBHINN I

CRITÉIR CHUN A CHINNEADH AN FEITHICIL A BHFUIL A RÉ CAITE Í AN FHEITHICIL

Leagtar síos san Iarscríbhinn seo na critéir chun a chinneadh an feithicil a bhfuil a ré caite í an fheithicil, agus cuirfear i bhfeidhm í mar a leanas:

Leagtar síos i gCuid A na critéir chun measúnú a dhéanamh ar dho-dheisitheacht feithicle. Má chomhlíontar ceann amháin nó níos mó de na critéir sin, measfar gur feithicil a bhfuil a ré caite í an fheithicil.

Mura gcomhlíontar aon chritéir ó Chuid A, déanfar measúnú ar an bhfeithicil i gcomhréir leis na critéir dá bhforáiltear i gCuid B. Má chomhlíontar ceann amháin nó níos mó de na critéir i gCuid B, cinnfear trí mheasúnú teicniúil cé na deisiúcháin is gá chun deimhniú ródacmhainneachta a fháil i gcomhréir le Treoir 2014/45/AE sa Bhallstát inar cláraíodh an fheithicil roimh an deisiú. Bunaithe ar an measúnú teicniúil sin, cinnfidh úinéir na feithicle an mian leis nó léi an fheithicil a dhiúscairt.

Más rud é, laistigh de 5 bliana tar éis an mheasúnaithe theicniúil sin, nach bhfaigheann úinéir na feithicle deimhniú ródacmhainneachta i gcomhréir le Treoir 2014/45/AE, measfar gur feithicil a bhfuil a ré caite í an fheithicil. Ar feadh na tréimhse 5 bliana sin, is ionann an measúnú teicniúil sin agus doiciméadacht nach feithicil a bhfuil a ré caite í an fheithicil.

Is saineolaí neamhspleách ar mhótarfeithicilí a dhéanfaidh an measúnú dá dtagraítear san Iarscríbhinn seo. Féadfaidh na Ballstáit liosta uileghabhálach de shaineolaithe neamhspleácha mótarfeithicilí a bhunú chun na measúnuithe sin a dhéanamh.

Tar éis iarraidh a fháil ó úinéir feithicle, féadfaidh údaráis inniúla an Bhallstáit inar cláraíodh an fheithicil, nó ceann dá chomhlachtaí údarúcháin ceaptha, feithicil a mheastar a bheith ina feithicil a bhfuil a ré caite i gcomhréir leis an Iarscríbhinn seo a dhíolmhú ó bheith ina feithicil a bhfuil a ré caite, i gcás go bhfuil an fheithicil lena mbaineann faoi réir deisiúcháin.

CUID A

NA CRITÉIR LE HAGHAIDH MEASÚNÚ AR FHEITHICILÍ A BHFUIL A RÉ CAITE

Is feithicil a bhfuil a ré caite í feithicil nuair a chomhlíonann sí ceann amháin nó níos mó de na critéir seo a leanas:

- (a) rinneadh í a ghearradh ina píosaí nó a dhíchóimeáil chun a páirteanna a athúsáid;
- (b) dódh í go dtí an pointe ina bhfuil urrann an innill nó urrann an phaisinéara scriosta go hiomlán;
- (c) rinneadh í a thumadh in uisce go leibhéal os cionn na deaise;
- (d) ní féidir ceann amháin nó níos mó de na comhpháirteanna seo a leanas den fheithicil, ó thaobh na teicneolaíochta de, a dheisiú ná a athsholáthar:
 - (i) comhpháirteanna cúplála talún (mar shampla boinn agus rothaí), crochadh, stiúradh, coscánú, agus na comhpháirteanna rialaithe díobh;
 - (ii) daingnitheoirí agus ailt suíochán;
 - (iii) málaí aeir, réamhtheannasóirí, criosanna sábhála, agus na comhpháirteanna oibriúcháin forimeallacha díobh;
 - (iv) cabhail agus fonnadh nó sceall na feithicle;

- (e) tá lochtanna teicniúla ar a chomhpháirteanna struchtúracha agus sábháilteachta atá dochúlaithe agus a fhágann nach féidir iad a athsholáthar;
- (f) tugadh ar láimh do phointe bailiúcháin nó do shaoráid chóireála údaráithe í lena cóireáil;
- (g) dhearbhaigh cuideachta árachais gur chaillteanas teicniúil iomlán í, bunaithe ar an measúnú teicniúil a rinne saineolaí mótarfheithiclí uirthi.

CUID B

LIOSTA CRITÉAR TÁSCACH MAIDIR LE FEITHICLÍ A BHFUIL A RÉ CAITE

Mura bhfuil feidhm ag aon chritéar ó Chuid A, déanfar measúnú ar an bhfeithicil i gcomhréir leis na critéir seo a leanas:

- (a) tá sí tréigthe nó tá na modhanna lenar féidir í a shainaithint in easnamh, go háirithe an VIN;
- (b) ní thugtar cosaint leormhaith ar dhamáiste di le linn stórála, iompair, luchtaithe agus díluchtaithe;
- (c) na costais is gá chun an fheithicil a dheisiú chun riocht teicniúil a chur uirthi a bheadh leordhóthanach chun deimhniú ródacmhainneachta a fháil arna gcur lena luach reatha, is mó iad ná a margadhluach measta tar éis a deisithe;
- (d) tumadh in uisce í go leibhéal faoi bhun na deaise, agus rinneadh damáiste don inneall nó don chóras leictreach;
- (e) scaoileadh a breosla nó a gala breosla scaoilte rud a fhágann go bhfuil baol dóiteáin nó pléasctha ann dá dheasca;
- (f) tá gás sceite óna córas gáis leachtaigh agus tá baol dóiteáin nó pléasctha ann dá dheasca;
- (g) scaoileadh a leachtanna oibriúcháin (breosla, leacht coscán, leacht frithreo, aigéad ceallra, tuaslagán leictrilíte, leacht fuaraithe) agus tá an baol ann go dtruailleofar uisce dá dheasca;
- (h) rinneadh í a dhíchóimeáil; nó
- (i) tá pointe iontrála amháin nó níos mó aici a táthaíodh nó a dúnadh le cúirinsliú.

IARSCRÍBHINN II

CRITÉIR LE HAGHAIDH STÁDAS FEITHICLÍ MÓRSPÉISE CULTÚRTHA A AITHINT

1. Féadfaidh údaráis inniúla an Bhallstáit ina gcláraítear feithicil, nó ceann dá chomhlachtaí údaraíthe atá ceaptha, aitheantas a thabhairt d'fheithicil mar fheithicil mórspéise cultúrtha má chomhlíonann sí na critéir uile seo a leanas:
 - (a) tá a luach nó a stádas stairiúil nó cultúrtha uathúil doiciméadaithe ag úinéir na feithicle nó ag údaráis inniúla an Bhallstáit inar cláraíodh an fheithicil nó is feithicil aonair mhodhnaithe nó saincheaptha í a formheasadh ina haonar i gcomhréir le Rialachán (AE) 2018/858 nó leis an dlí náisiúnta;
 - (b) is eol cé hé nó hí úinéir na feithicle agus is féidir é nó í a shainaithint;
 - (c) is féidir páirteanna na feithicle a shainaithint le sraithuimhir, nó le sainaitheantas eile arna soláthar ag an monaróir nó arna sannadh ag an údarás inniúil;
 - (d) is féidir an fheithicil a shainaithint trí VIN, nó trí shraithuimhir, nó trí shainaitheantas eile arna sholáthar ag an monaróir nó arna shannadh ag údarás inniúil.

Ar iarratas ó úinéir na feithicle, eiseoidh údaráis inniúla an Bhallstáit inar cláraíodh an fheithicil deimhniú lena n-aithnítear an fheithicil mar fheithicil mórspéise cultúrtha i gcás ina gcomhlíontar na critéir atá leagtha amach sa chéad fhomhír den phointe seo.

Ar iarratas ó úinéir na feithicle, cúlghairfidh údaráis inniúla an Bhallstáit inar cláraíodh an fheithicil an deimhniú dá dtagraítear sa dara fhomhír den phointe seo.
2. Déanfaidh úinéir na feithicle mórspéise cultúrtha an méid seo a leanas a áirithiú:
 - (a) go ndéanfar an fheithicil a stóráil, a iompar nó a úsáid ar dhóigh atá fónta ó thaobh an chomhshaoil de i gcomhréir le dlí an Aontais nó leis an dlí náisiúnta;
 - (b) go ndéanfar an deimhniú dá dtagraítear sa dara fhomhír de phointe 1 a sholáthar do na húdaráis, nó a chur ar fáil dóibh, arna iarraidh sin dóibh.
3. Déanfar comhlíonadh na gcritéir a leagtar amach i bpointí 1 agus 2 ag an bhfeithicil a fhíorú gach 5 bliana ar a laghad, nó i gcás ina n-athrófar úinéireacht na feithicle.

IARSCRÍBHINN III

NA RÁTAÍ IN-ATHÚSÁIDTEACHTA, IN-ATHCHÚRSÁILTEACHTA AGUS IN-AISGHABHÁLACHTA A RÍOMH

Chun críocha na hlarscríbhinne seo, ciallaíonn 'feithicil thagartha' an leagan laistigh de chineál feithicle, a shainaithníonn an t-údarás cineálcheadúcháin, i gcomhairle leis an monaróir agus i gcomhréir leis na critéir a leagtar síos i gCuid A, mar an leagan is achrannaí i dtéarmaí in-athúsáidteachta, in-athchúrsáilteachta agus in-aisghabhálachta.

CUID A

1. Na hábhair atá i láthair san fheithicil agus na sciarta díobh agus na háiteanna a bhfuil siad faoi seach, sonrófar iad sin in éineacht le haon fhaisnéis is gá chun na rátaí in-athchúrsáilteachta agus in-aisghabhálachta a ríomh i gceart.
2. Sloinnfear maiseanna in kg go hionad deachúil amháin. Ríomhfar na rátaí mar chéatadán go hionad deachúil amháin, agus slánófar ansin iad mar seo a leanas:
 - (a) má tá an figiúr i ndiaidh an phointe dheachúil idir 0 agus 4, slánófar an t-iomlán síos;
 - (b) má tá an figiúr i ndiaidh an phointe dheachúil idir 5 agus 9, slánófar an t-iomlán suas.
3. Chun na feithiclí tagartha a roghnú, cuirfear na critéir seo a leanas san áireamh:
 - (a) an cineál cabhalra;
 - (b) na leibhéil chóirithe atá le fáil;
 - (c) an trealamh roghnach atá le fáil is féidir a fheistiú faoi fhreagracht an mhonaróra.
4. Má theipeann ar an údarás cineálcheadúcháin agus ar an monaróir go comhpháirteach an leagan is achrannaí a shainaithint i gcineál feithicle, ó thaobh in-athúsáidteachta, in-athchúrsáilteachta agus in-aisghabhálachta de, roghnófar feithicil thagartha amháin le haghaidh:
 - (a) gach 'cineál cabhalra', mar a shainmhínítear i gCuid C, pointe 2, d'Iarscríbhinn I a ghabhann le Rialachán (AE) 2018/858 i gcás feithiclí M_1 ;
 - (b) gach 'cineál cabhalra', i.e. veain, cábán fonnaidh, truailín, etc., i gcás feithiclí N_1 .
5. Chun críocha na seiceálacha ar ábhair agus ar mhaiseanna comhpháirteanna, cuirfidh an monaróir feithiclí agus comhpháirteanna ar fáil de réir mar a mheasann an t-údarás cineálcheadúcháin gá a bheith leo.

CUID B

1. Chun gur féidir iad a mheas mar chomhpháirteanna nó páirteanna in-athúsáidte, beifear in ann na comhpháirteanna nó na páirteanna a bhaint go héasca agus ar bhealach neamhscriosach.
2. Measfar mais iomlán na bpáirteanna, na gcomhpháirteanna agus na n-ábhar in-athúsáidte a bheith 100 % in-athúsáidte, in-athchúrsáilte agus in-aisghabhála.

3. Páirteanna, comhpháirteanna agus ábhair a liostaítear i gCuid B, pointí 1, 2 agus 3, d'Iarscríbhinn VIII, measfar iad a bheith 0 % in-athúsáidte agus 100 % in-athchúrsáilte agus in-aisghabhála. Páirteanna agus comhpháirteanna a liostaítear i gCuid E d'Iarscríbhinn VII, measfar iad a bheith 0 % in-athúsáidte agus 100 % in-athchúrsáilte agus in-aisghabhála. Áiritheofar leis an modheolaíocht sin, i gcás leasú ar Iarscríbhinn VII a mbeidh leathnú an liosta páirteanna agus comhpháirteanna a liostaítear i gCuid E den Iarscríbhinn sin mar thoradh air, go measfar na páirteanna agus na comhpháirteanna nua a bheith 0 % in-athúsáidte agus 100 % in-athchúrsáilte agus in-aisghabhála.
4. Beidh ríomh na rátaí in-athúsáidteachta, in-athchúrsáilteachta agus in-aisghabhálachta comhleanúnach leis an straitéis chiorclaíochta, lena léireofar dul chun cinn teicneolaíoch i dteicneolaíochtaí cóireála deireadh ré.

IARSCRÍBHINN IV

COINNÍOLLACHA AGUS UASLUACHANNA TIÚCHANA MAIDIR LE LUADHE, MEARCAIR, CAIDMIAM AGUS CRÓIMIAM HEICSIHFHÍSACH A BHEITH IN ÁBHAIR, I bPÁIRTEANNA AGUS I gCOMHPHÁIRTEANNA

Glacfar le huasluach tiúchana substaintí suas le 0,1 % de réir meáchain in ábhar aonchineálach i gcomhair luaidhe, cróimiam heicsifhiúsach agus mearcair agus suas le 0,01 % de réir meáchain in ábhar aonchineálach le haghaidh caidmiam.

Maidir le páirteanna spártha a chuirtear ar an margadh tar éis an 1 Iúil 2003 agus a úsáidtear le haghaidh feithiclí a cuireadh ar an margadh roimh an 1 Iúil 2003, cé is moite d'eirí cothromaíochta le haghaidh rothaí, scuaba carbóin do mhótair leictreacha agus líneálacha coscáin, díolmhófar iad ó Airteagal 5(4).

Ábhair, páirteanna agus comhpháirteanna aonchineálacha	Raon feidhme agus dáta éaga na díolúine	Le lipéadú nó a bheith in-sainaitheanta i gcomhréir le h Airteagal 5(6), pointe (d)
--	---	---

Luaidhe mar eilimint chóimhiotalaithe

1(a). Cruach chun críoch meaisínithe agus baisc comhpháirteanna cruach galbhánaithe teothumtha ina bhfuil suas le 0,35 % luaidhe de réir meáchain		
1(b). Leathán cruach galbhánaithe go leanúnach ina bhfuil suas le 0,35 % luaidhe de réir meáchain	Feithiclí a cineálcheadaíodh roimh an 1 Eanáir 2016 agus páirteanna spártha le haghaidh na bhfeithiclí sin	
2(a). Alúmanam chun críoch meaisínithe ina bhfuil cion luaidhe suas le 2 % de réir meáchain	Mar pháirteanna spártha le haghaidh feithiclí a cuireadh ar an margadh roimh an 1 Iúil 2005	
2(b). Alúmanam ina bhfuil cion luaidhe suas le 1,5 % de réir meáchain	Mar pháirteanna spártha le haghaidh feithiclí a cuireadh ar an margadh roimh an 1 Iúil 2008	
2(c)(i). Cóimhiotail alúmanaim chun críoch meaisínithe ina bhfuil cion luaidhe suas le 0,4 % de réir meáchain	Feithiclí a cineálcheadaíodh roimh an 1 Eanáir 2028 agus páirteanna spártha le haghaidh na bhfeithiclí sin	
2(c)(ii). Cóimhiotail alúmanaim nach n-áirítear in iontráil 2(c)(i) ina bhfuil cion luaidhe suas le 0,4 % de réir meáchain ⁽²⁾	Feithiclí a cineálcheadaíodh roimh an 1 Eanáir 2027 agus páirteanna spártha le haghaidh na bhfeithiclí sin	
2(c)(iii). Cóimhiotail theilgin alúmanaim ina bhfuil suas le 0,3 % luaidhe de réir meáchain ar choinníoll go dtagann an luaidhe as athchúrsáil dramh-alúmanaim a bhfuil luaidhe ann	Feithiclí a cineálcheadaíodh tar éis an 31 Nollaig 2026 agus páirteanna spártha le haghaidh na bhfeithiclí sin. ⁽¹⁾	

Ábhair, páirteanna agus comhpháirteanna aonchineálacha	Raon feidhme agus dáta éaga na díolúine	Le lipéadú nó a bheith in-sainaitheanta i gcomhréir le h Airteagal 5(6), pointe (d)
3. Cóimhiotail chopair ina bhfuil suas le 4 % luaidhe de réir meáchain	(¹)	
4(a). Scealla imthaca agus boisic	Mar pháirteanna spártha le haghaidh feithiclí a cuireadh ar an margadh roimh an 1 Iúil 2008	
4(b). Scealla imthaca agus boisic in innill, tras-seoltaí agus comhbhrúiteoirí aerchóirithe	Mar pháirteanna spártha le haghaidh feithiclí a cuireadh ar an margadh roimh an 1 Iúil 2011	

Luaidhe agus comhdhúile luaidhe i gcomhpháirteanna

5. (scriosta)		
6. Maolairí creathaidh	Feithiclí a cineálcheadaíodh roimh an 1 Eanáir 2016 agus páirteanna spártha le haghaidh na bhfeithiclí sin	X
7(a). Oibreáin agus cobhsaitheoirí bolcáin le haghaidh leaistiméirí i bpiobáin choscáin, piobáin bhreosla, piobáin aerála aeir, leaistiméir/páirteanna miotail sna feidhmeanna fonnaidh, agus gléasadh innill	Mar pháirteanna spártha le haghaidh feithiclí a cuireadh ar an margadh roimh an 1 Iúil 2005	
7(b). Oibreáin bholcánaithe agus cobhsaitheoirí le haghaidh leaistiméirí i bpiobáin choscáin, piobáin bhreosla, piobáin aerála aeir, leaistiméir/páirteanna miotail sna feidhmeanna fonnaidh, agus gléasadh innill ina bhfuil suas le 0,5 % luaidhe de réir meáchain	Mar pháirteanna spártha le haghaidh feithiclí a cuireadh ar an margadh roimh an 1 Iúil 2006	
7(c). Oibreáin nasctha le haghaidh leaistiméirí i bhfeidhmeanna gléasra cumhachta ina bhfuil suas le 0,5 % luaidhe de réir meáchain	Mar pháirteanna spártha le haghaidh feithiclí a cuireadh ar an margadh roimh an 1 Iúil 2009	

Luaidhe i sádaí nó ar bhratú feidhmeanna leictreacha agus leictreonacha a shonraítear sna fo-iontrálacha seo a leanas

8(a). Luaidhe i sádaí chun comhpháirteanna leictreacha agus leictreonacha a cheangal de chláir chiorcad leictreonacha agus luaidhe i mbailchríocha ar fhoircinn comhpháirteanna seachas toilleoirí alúmanaim leictirilíte, ar phionnaí comhpháirte agus ar chláir chiorcad leictreonacha	Feithiclí a cineálcheadaíodh roimh an 1 Eanáir 2016 agus páirteanna spártha le haghaidh na bhfeithiclí sin	X (³)
8(b). Luaidhe i sádaí i bhfeidhmeanna leictreacha seachas sádráil ar chláir chiorcad leictreonacha nó ar ghloine	Feithiclí arna gcineálcheadú roimh an 1 Eanáir 2011 agus páirteanna spártha le haghaidh na bhfeithiclí sin	X (³)

Ábhair, páirteanna agus compháirteanna aonchineálacha	Raon feidhme agus dáta éaga na díolúine	Le lipéadú nó a bheith in-sainaitheanta i gcomhréir le hAirteagal 5(6), pointe (d)
8(c). Luaidhe i mbailchríocha ar theirminéil toilleoirí alúmanaim leictrilíte	Feithiclí arna gcineálcheadú roimh an 1 Eanáir 2013 agus páirteanna spártha le haghaidh na bhfeithiclí sin	X ⁽³⁾
8(d). Luaidhe arna húsáid i sádráil ar ghloine i mbraiteoirí mór-aersreafa	Feithiclí arna gcineálcheadú roimh an 1 Eanáir 2015 agus páirteanna spártha le haghaidh na bhfeithiclí sin	X ⁽³⁾
8(e). Luaidhe i sádair de chineál ardteochta leáite (i.e. cóimhiotail luaidhe-bhunaithe ina bhfuil 85 % luaidhe nó níos mó de réir meáchain)	(¹)	X ⁽³⁾
8(f)(i). Luaidhe i nasc-chórais pionnaí chomhlíontacha	Feithiclí arna gcineálcheadú roimh an 1 Eanáir 2017 agus páirteanna spártha le haghaidh na bhfeithiclí sin	X ⁽³⁾
8(f)(ii). Luaidhe i nasc-chórais pionnaí chomhlíontacha seachas limistéar cúplála nascóirí úma feithicle	Feithiclí arna gcineálcheadú roimh an 1 Eanáir 2024 agus páirteanna spártha le haghaidh na bhfeithiclí sin	X ⁽³⁾
8(g)(i). Luaidhe i sádair le haghaidh nasc leictreach inmharthana a chomhlánú idir díse leathsheoltóra agus iompróir laistigh de phacáistí sliseanna flip ciorcaid comhtháite	Feithiclí arna gcineálcheadú roimh an 1 Deireadh Fómhair 2022 agus páirteanna spártha le haghaidh na bhfeithiclí sin	X ⁽³⁾
8(g)(ii). Luaidhe i sádair le haghaidh nasc leictreach inmharthana a chomhlánú idir an díse leathsheoltóra agus an t-iompróir laistigh de phacáistí sliseanna flip ciorcaid comhtháite, i gcás inarb é atá sa nasc leictreach sin aon cheann díobh seo a leanas: (1) nód teicneolaíochta leathsheoltóra 90 nm nó níos mó; (2) díse aonair 300 mm ² nó níos mó in aon nód teicneolaíochta leathsheoltóra; (3) pacáistí díslí cruachta ina bhfuil díslí aonair 300 mm ² nó níos mó, nó idirshuiteoirí sileacain 300 mm ² nó níos mó.	(1) Feithiclí arna gcineálcheadú roimh an 1 Eanáir 2030 agus páirteanna spártha le haghaidh na bhfeithiclí sin	X ⁽³⁾
8(h). Luaidhe i sádair chun leatóirí teasa a cheangal den tslogaíde teasa i gcóimeálacha leathsheoltóra cumhachta ag a bhfuil slismhéid ar a bhfuil achar teilgin 1 cm ² ar a laghad agus dlús ainmniúil srutha 1 A/mm ² ar a laghad d'achar slise sileacain	Feithiclí arna gcineálcheadú roimh an 1 Eanáir 2016 agus páirteanna spártha le haghaidh na bhfeithiclí sin	X ⁽³⁾

Ábhair, páirteanna agus comhpháirteanna aonchineálacha	Raon feidhme agus dáta éaga na díolúine	Le lipéadú nó a bheith in-sainaitheanta i gcomhréir le h Airteagal 5(6), pointe (d)
8(i). Luaidhe i sádair i bhfeidhmeanna gloinithe leictreacha ar ghloine seachas le haghaidh sádrála i ngloiniú lannaithe	Feithiclí arna gcineálcheadú roimh an 1 Eanáir 2016 agus páirteanna spártha le haghaidh na bhfeithiclí sin	X ⁽³⁾
8(j). Luaidhe i sádair le haghaidh gloiniú lannaithe a shádráil	Feithiclí arna gcineálcheadú roimh an 1 Eanáir 2020 agus páirteanna spártha le haghaidh na bhfeithiclí sin	X ⁽³⁾
8(k). Feidhmeanna téimh a shádráil a bhfuil sruth teasa 0,5 A nó níos mó acu in aghaidh an tsiúnta sádrála ghaolmhair le pánaí aonghloinithe lannaithe nach mó ná 2,1 mm a dtiús balla. Ní chumhdaítear leis an díolúine sin sádráil theagmhálach atá leabaithe sa pholaiméir idirmheánach.	Feithiclí arna gcineálcheadú roimh an 1 Eanáir 2024 agus páirteanna spártha le haghaidh na bhfeithiclí sin	X ⁽³⁾
9. Suíonna comhla	Mar pháirteanna spártha i gcomhair na gcineálacha innill a forbraíodh roimh 1 Iúil 2003	
10(a). Comhpháirteanna leictreacha agus leictreonacha, a bhfuil luaidhe iontu i ngloine nó i gceirmeach, i gcomhdhúil mhaitrise gloine nó cheirmeach, in ábhar gloine-cheirmeach, nó i gcomhdhúil mhaitrise gloine-cheirmeach. Ní chumhdaítear leis an díolúine seo úsáid luaidhe sna nithe seo a leanas: (i) gloine i mbolgáin agus i nglónra spréachphlocóidí, (ii) ábhair cheirmeacha thréleictreacha comhpháirteanna a liostaítear faoi 10(b), 10(c) agus 10(d).		X ⁽⁴⁾ (le haghaidh comhpháirteanna seachas písea-chomhpháirteanna in innill)
10(b). Luaidhe in ábhair cheirmeacha thréleictreacha bunaithe ar PZT as toilleoirí ar cuid iad de chiorcaid chomhtháite nó de leathsheoltóirí scoite		
10(c). Luaidhe in ábhair cheirmeacha thréleictreacha toilleoirí ag a bhfuil voltas rátaithe ar lú é ná 125 V AC nó 250 V DC	Feithiclí arna gcineálcheadú roimh an 1 Eanáir 2016 agus páirteanna spártha le haghaidh na bhfeithiclí sin	
10(d). Luaidhe in ábhair cheirmeacha thréleictreacha toilleoirí a chúitíonn dialltaí braiteoirí a bhaineann le teocht i gcórais sonóra ultrasonacha	Feithiclí arna gcineálcheadú roimh an 1 Eanáir 2017 agus páirteanna spártha le haghaidh na bhfeithiclí sin	

Ábhair, páirteanna agus comhpháirteanna aonchineálacha	Raon feidhme agus dáta éaga na díolúine	Le lipéadú nó a bheith in-sainaitheanta i gcomhréir le h Airteagal 5(6), pointe (d)
11. Tionscnóirí piriteicniúla	Feithiclí arna gcineálcheadú roimh an 1 Iúil 2006 agus páirteanna spártha le haghaidh na bhfeithiclí sin	
12. Ábhair theirmileictreacha a bhfuil luaidhe iontu i bhfeidhmeanna leictreacha mótarfeithiclí le haghaidh astaíochtaí CO ² a laghdú trí theas sceite a aisghabháil	Feithiclí arna gcineálcheadú roimh an 1 Eanáir 2019 agus páirteanna spártha le haghaidh na bhfeithiclí sin	X

Cróimiam heicsifhiúsach

13(a). Bratuithe coiscthe creimthe	Mar pháirteanna spártha le haghaidh feithiclí arna gcur ar an margadh roimh an 1 Iúil 2007	
13(b). Bratuithe coiscthe creimthe a bhaineann le cóimeálacha boltaí agus cnónna le haghaidh feidhmeanna fonnaidh	Mar pháirteanna spártha le haghaidh feithiclí arna gcur ar an margadh roimh an 1 Iúil 2008	
14. Cróimiam heicsifhiúsach mar oibreán frithchreimthe sa chóras fuaraithe cruach carbóin i gcuisneoirí ionsúcháin suas le 0,75 % de réir meáchain sa tuaslagán fuaraithe:		X
(a) atá deartha chun oibriú go hiomlán nó go páirteach le téitheoir leictreach, ag a bhfuil meán-ionchur cumhachta leictre a úsáidtear < 75W faoi dhálaí reatha tairiseacha;	I gcás (a): Feithiclí arna gcineálcheadú roimh an 1 Eanáir 2020 agus páirteanna spártha le haghaidh na bhfeithiclí sin	
(b) atá deartha chun oibriú go hiomlán nó go páirteach le téitheoir leictreach, ag a bhfuil meán-ionchur cumhachta leictre a úsáidtear ≥ 75 W faoi dhálaí reatha tairiseacha;	I gcás (b): Feithiclí arna gcineálcheadú roimh an 1 Eanáir 2026 agus páirteanna spártha le haghaidh na bhfeithiclí sin	
(c) atá deartha chun oibriú go hiomlán le téitheoir neamhleictreach.		

Mearcair

15(a). Lampaí scaoilte le haghaidh feidhmeanna ceannsolais	Feithiclí arna gcineálcheadú roimh an 1 Iúil 2012 agus páirteanna spártha le haghaidh na bhfeithiclí sin	X
--	--	---

Ábhair, páirteanna agus comhpháirteanna aonchineálacha	Raon feidhme agus dáta éaga na díolúine	Le lipéadú nó a bheith in-sainaitheanta i gcomhréir le hAirteagal 5(6), pointe (d)
15(b). Feadáin fhluaraiseacha arna n-úsáid i dtaispeáintí painéil uirlisí	Feithiclí arna gcineálcheadú roimh an 1 Iúil 2012 agus páirteanna spártha le haghaidh na bhfeithiclí sin	X

Nótaí a ghabhann leis an tábla:

- (¹) Déanfar athbhreithniú ar an díolúine sin in 2030 i gcomhréir le hAirteagal 5(6).
- (²) Tá feidhm aige maidir le cóimhiotail alúmanaim nach dtugtar luaidhe isteach iontu d'aon ghnó, ach atá i láthair mar gheall ar úsáid alúmanaim athchúrsáilte.
- (³) Díchóimeáil más rud é, i gcomhghaol le hiontráil 10(a), go sáraítear meántairseach 60 gram in aghaidh na feithicle. Chun críocha an nóta seo, ní chuirfear san áireamh feistí leictreonacha nach bhfuil suiteáilte ag an monaróir ar an líne tháirgthe.
- (⁴) Díchóimeáil más rud é, i gcomhghaol le hiontrálacha 8(a) go 8(k), go sáraítear meántairseach 60 gram in aghaidh na feithicle. Chun críocha an nóta seo, ní chuirfear san áireamh feistí leictreonacha nach bhfuil suiteáilte ag an monaróir ar an líne tháirgthe.

IARSCRÍBHINN V

AN STRAITÉIS CHIORCLAÍOCHTA

CUID A

EILIMINTÍ NA STRAITÉISE CHIORCLAÍOCHTA

1. Tuairisc neamhtheicniúil ar na gníomhaíochtaí atá beartaithe chun a áirithiú go gcomhlíonfaidh na feithiclí ceanglais Airteagail 4 go 7 ar feadh a dtáirgthe.
2. Tuairisc neamhtheicniúil ar nósanna imeachta arna gcur chun feidhme ag an monaróir chun:
 - (a) na sonraí a bhailiú tríd an slabhra soláthair iomlán is ábhartha chun ceanglais Airteagail 4 go 7 a chomhlíonadh;
 - (b) an fhaisnéis a fhaightear ó na soláthróirí a sheiceáil agus a fhíorú;
 - (c) freagairt leormhaith a thabhairt i gcás ina léireoidh na sonraí a fhaightear ó na soláthróirí go bhfuil baol ann nach gcomhlíonfar ceanglais Airteagail 4, 5 ná 6.
3. Faisnéis maidir leis na teicneolaíochtaí cóireála deireadh ré atá i bhfeidhm, maidir leis an dul chun cinn teicneolaíoch a bhfuiltear ag dréim leis i ndáil le teicneolaíochtaí cóireála deireadh ré agus maidir leis an infheistíocht i gcumas i dteicneolaíochtaí den sórt sin, arna n-úsáid ag an monaróir d'fhonn an in-athúsáidteacht, an in-athchúrsáilteacht agus an in-aisghabhálacht a ríomh i gcomhréir le hAirteagal 4 i ndáil lena gcineálacha feithicle.
4. Faisnéis maidir leis an sciar den chion athchúrsáilte i bhfeithiclí dá dtagraítear in Airteagail 6 agus 10.
5. Liosta gníomhaíochtaí a gheallann an monaróir a dhéanamh chun a áirithiú go ndéanfar an chóireáil ar fheithiclí a bhfuil a ré caite i gcomhréir leis an Rialachán seo, agus aird á tabhairt go háirithe ar na nithe seo a leanas:
 - (a) bearta atá ceaptha baint páirteanna a léirítear i gCuid C d'Iarscríbhinn VIII a éascú;
 - (b) bearta chun aghaidh a thabhairt ar na dúshlán a bhaineann le húsáid ábhar agus teicnící a chuireann bac ar dhíchóimeáil éasca nó a fhágann go bhfuil athchúrsáil an-dúshlánach;
 - (c) bearta chun athúsáid páirteanna agus comhpháirteanna a chur chun cinn.
 - (d) gníomhaíochtaí taighde agus forbartha, infheistíochtaí i bhforbairt teicneolaíochtaí nó bonneagair athchúrsála, chomh maith le comhar le hoibreoirí bainistithe dramhaíola, arna ndéanamh chun na gníomhaíochtaí dá dtagraítear i bpointí (a) go (c) a chur chun feidhme.

CUID B

BEARTA LEANTACHA AGUS NUASHONRÚ AR AN STRAITÉIS CHIORCLAÍOCHTA

1. Tabharfaidh na monaróirí an straitéis chiorclaíochta cothrom le dáta gach 5 bliana ar a laghad.
2. Áireofar sa straitéis chiorclaíochta nuashonraithe na hathruithe ábhartha nua agus go háirithe an méid seo a leanas:
 - (a) tuairisc ar an gcaoi ar cuireadh na gníomhaíochtaí dá dtagraítear i bpointe 5 de Chuid A i gcrích, mar aon le measúnú ar a n-éifeachtacht agus, i gcás nár cuireadh gníomh amháin nó níos mó i gcrích a léirítear sa straitéis, míniú ar na cúiseanna atá leis sin;
 - (b) faisnéis faoi na hathruithe suntasacha ar dhearadh agus ar tháirgeadh arna ndéanamh ag an monaróir chun chiorclaíocht feithiclí a fheabhsú.

IARSCRÍBHINN VI

CEANGLAIS FAISNÉISE MAIDIR LE BAINTE AGUS IONADÚ

1. Ceallraí feithiclí leictreacha agus ceallraí do chóiracha iompair éadroma atá ionchorpraithe san fheithicil:
 - (a) uimhir an bhuntrealaimh;
 - (b) ionad;
 - (c) meáchan;
 - (d) an cineál ceimice atá ag an gceallra;
 - (e) treoracha maidir le díluchtú sábháilte an cheallra;
 - (f) treoracha teicniúla maidir le baint agus ionadú, lena n-áirítear seicheamh na gcéimeanna uile agus na cineálacha teicnící ceangail, greamúcháin agus séalúcháin;
 - (g) uirlisí nó teicneolaíochtaí is gá chun na ceallraí feithicle leictre agus na ceallraí do chóiracha iompair éadroma a rochtain, a bhaint agus a ionadú.
2. Mótair ríomhthiomána atá ionchorpraithe san fheithicil:
 - (a) uimhir an bhuntrealaimh;
 - (b) ionad;
 - (c) meáchan;
 - (d) na cineálacha buanmhaighnéad atá i mótair ríomhthiomána mar a liostaítear in Airteagal 28(1), pointe (b), de Rialachán (AE) 2024/1252;
 - (e) treoracha teicniúla maidir le baint agus ionadú, lena n-áirítear seicheamh na gcéimeanna uile agus na cineálacha teicnící ceangail, greamúcháin agus séalúcháin;
 - (f) uirlisí nó teicneolaíochtaí is gá chun na mótair ríomhthiomána a rochtain, a bhaint agus a ionadú.
3. Comhpháirteanna, páirteanna agus ábhair a liostaítear i gCuid B d'Iarscríbhinn VIII:
 - (a) uimhir an bhuntrealaimh;
 - (b) ionad;
 - (c) meáchan;
 - (d) na substaintí a liostaítear in Airteagal 5(4) a bheith ann, nach mór a lipéadú i bhfeithicil ar an mbealach dá dtagraítear in Iarscríbhinn IV;

(e) teoracha teicniúla maidir le baint, lena n-áirítear seicheamh na gcéimeanna uile;

(f) infhaighteacht na dteicnící cóireála is fearr.

4. Comhpháirteanna, páirteanna agus ábhair a liostaítear i gCuid C d'Iarscríbhinn VIII:

(a) uimhir an bhuntrealaimh;

(b) ionad;

(c) teoracha teicniúla maidir le baint agus ionadú, lena n-áirítear seicheamh na gcéimeanna uile;

(d) faisnéis, sonraíochtaí, uirlisí agus próisis, lena n-áirítear nuashonruithe bogearraí, is gá lena n-athmhonarú agus lena n-athchóiriú.

5. Comhpháirteanna agus páirteanna i bhfeithicil arna gcódú go digiteach:

(a) uimhir;

(b) ionad;

(c) teoracha teicniúla maidir le rochtain ar chomhpháirteanna, agus maidir lena mbaint agus lena n-athsholáthar, lena n-áirítear an códú agus na bogearraí is gá d'fhonn páirteanna spártha agus comhpháirteanna a ghníomhachtú le haghaidh feidhmiú i bhfeithicil eile, agus faisnéis faoi phróisis maidir lena ndí-chlárú agus lena ndí-chúpláil ó uimhir aitheantais (VIN), lena n-áirítear, i gcás inarb iomchuí, treoir maidir le húsáid uirlise diagnóiseacha d'fhonn iad a athúsáid amach anseo;

(d) tuairisc ar fheidhmiúlacht, idir-inathraitheacht agus comhoiriúnacht le páirteanna agus comhpháirteanna sonracha feithiclí de dhéanamh agus de chineálacha feithicle eile;

(e) pointe teagmhála an mhonaróra le haghaidh cúnamh teicniúil.

6. Chun críocha phointe 5(c), i gcás ina mbeidh gá le díchlárú agus díchúpláil, ó VIN i ndáil le comhpháirteanna, trealamh agus páirteanna arna gcódú go digiteach dá dtagraítear in Airteagal 11 den Rialachán seo, cuirfidh an monaróir próisis i bhfeidhm chun go mbeidh oibreoirí bainistithe dramhaíola agus oibreoirí deisiúcháin agus cothabhála in ann díchlárú agus díchúpláil den sórt sin a dhéanamh. Sa phróiseas sin, féadfaidh an monaróir deimhniú scriosta a éileamh, chomh maith le fiordheimhniú an oibreora lena mbaineann. Chun na críche sin, gheobhaidh oibreoirí bainistithe dramhaíola agus oibreoirí deisiúcháin agus cothabhála an fhaisnéis fiordheimhnithe is gá le haghaidh shuíomh gréasáin RMI an mhonaróra dá dtagraítear i bpointe 2.1. d'Iarscríbhinn X a ghabhann le Rialachán (AE) 2018/858, agus úsáidfí siad an fhaisnéis sin. I gcás ina mbeidh gá le rochtain ar fhaisnéis faoi dhiagnóisic ar bord feithicle ag oibreoirí bainistithe dramhaíola agus ag oibreoirí deisiúcháin agus cothabhála le haghaidh na bpróiseas sin um dhíchlarú agus um dhíchúpláil, féadfaidh an monaróir an méid seo a leanas a dhéanamh, mar choinníoll chun aon dintíuir rochtana a eisiúint:

(a) a cheangal go mbeidh nasc leanúnach ar líne ann, an tráth a mbeidh an t-aistriú á dhéanamh, ón uirlis dhiagnóiseach chuig freastalaí mhonaróir na huirlise diagnóisí mar aon le nasc ó fhreastalaí mhonaróir na huirlise diagnóisí chuig freastalaí an mhonaróra; agus

- (b) a cheangal ar mhonaróir na huirlise a úsáidtear chun rochtain a fháil ar an bhfaisnéis faoi dhiagnóisic ar bord feithicle céannacht na huirlise diagnóiseacha agus céannacht an oibreora faoi ainm bréige a fhianú don mhonaróir, agus VIN, aitheantóir uathúil na páirte, nuair a bheidh sé ar fáil agus nuair a thacóidh próiseas an mhonaróra feithicle leis, stampa ama agus dáta UTC le haghaidh na gníomhaíochta ábhartha agus aitheantóir uathúil na huirlise diagnóisí a bhailiú agus a stóráil; gheobhaidh an monaróir, arna iarraidh sin dó, rochtain ó mhonaróir na huirlise diagnóisí ar an bhfaisnéis dá dtagraítear sa phointe seo, i gcás inar gá sin d'fhonn freagairt d'amhras réasúnach i ndáil le goid nó le mí-úsáid páirteanna.
-

IARSCRÍBHINN VII

CEANGLAIS MAIDIR LE LIPÉADÚ

1. Páirteanna, comhpháirteanna agus ábhair phlaisteacha feithicle ar mó a meáchan ná 100 gram:
 - (a) caighdeán idirnáisiúnta ISO 1043-1 Plaistigh - siombailí agus téarmaí giorraithe. Cuid 1: Bunpholaimeirí agus a saintréithe speisialta;
 - (b) caighdeán idirnáisiúnta ISO 1043-2 Plaistigh - siombailí agus téarmaí giorraithe. Cuid 2: Líontóirí agus ábhair threisiúcháin;
 - (c) caighdeán idirnáisiúnta ISO 11469 Plaistigh - Sainaitheantas cineálach agus marcáil táirgí plaisteacha.
 2. Páirteanna, comhpháirteanna agus ábhair leaistiméire feithicle ar mó a meáchan ná 200 gram, seachas boinn: caighdeán idirnáisiúnta ISO 1629 Rubair agus laitísí – Ainmníocht.
 3. Is féidir lúbíní a chur in ionad na siombailí '[' nó ']' a úsáidtear i gcaighdeáin ISO.
-

IARSCRÍBHINN VIII

CEANGLAIS CHÓIREÁLA

CUID A

ÍOSCHEANGLAIS MAIDIR LE LÁITHREÁIN STÓRÁLA AGUS LÁITHREÁIN CHÓIREÁLA

1. Láithreáin stórála, lena n-áirítear láithreáin stórála ag na pointí bailiúcháin, le haghaidh feithiclí a bhfuil a ré caite a stóráil, sula ndéanfar iad a chóireáil, agus lena gcomhpháirteanna, a bpáirteanna agus a gcuid ábhar a stóráil, beidh na nithe seo a leanas amhlaidh ina leith:

- (a) beidh dromchlaí neamhscagacha agus saoráidí bailithe doirte, scinceálaithe agus glantóirí is díbhealaitheoirí acu;
- (b) beidh siad feistithe le trealamh chun uisce a chóireáil, lena n-áirítear uisce báistí, i gcomhréir le ceanglais sláinte agus chomhshaoil.
- (c) beidh stóráil iomchuí acu le haghaidh feithiclí a bhfuil a ré caite agus ní chruachfaidh siad ach feithiclí díthruaillithe a bhfuil a ré caite, mura n-úsáidtear racaí cruachta, ar airde iomchuí;
- (d) beidh siad feistithe ionas gur féidir sreabháin agus leachtanna a bhaint láithreach as feithiclí a bhfuil a ré caite atá ag sceitheadh agus aon sreabháin agus leachtanna sceite a bhailiú agus úsáid á baint as ábhar ionsúiteach.

Déanfaidh oibreoirí na láithreán dá dtagraítear sa chéad fhomhír na gníomhaíochtaí dá dtagraítear i bpointe (d) den fhomhír sin a chur i gcrích gan mhoill.

2. Beidh an stóráil eagraithe ar bhealach a seachnófar damáiste do na nithe seo a leanas:

- (a) comhpháirteanna agus páirteanna ina bhfuil na leachtanna agus na sreabháin a liostaítear i bpointí 1 agus 3 de Chuid B den Iarscríbhinn seo;
- (b) comhpháirteanna, páirteanna agus ábhair a liostaítear i gCuid C den Iarscríbhinn seo.

3. Beidh na nithe seo a leanas ag na láithreáin ar a ndéantar feithiclí a bhfuil a ré caite agus a gcomhpháirteanna, a bpáirteanna agus a gcuid ábhar a chóireáil:

- (a) dromchlaí neamhscagacha le haghaidh limistéir iomchuí agus soláthar saoráidí bailithe doirte, scinceálaithe agus glantóirí is díbhealaitheoirí;
- (b) stóráil iomchuí le haghaidh páirteanna, comhpháirteanna agus ábhair a baineadh den fheithicil a bhfuil a ré caite, lena n-áirítear stóráil neamhscagach le haghaidh páirteanna, comhpháirteanna agus ábhair atá éillithe le hola;
- (c) coimeádáin iomchuí chun ceallraí a stóráil (ag a bhfuil neodhrú leictrilíte ar an láthair nó áit éigin eile), scagairí agus toilleoirí ina bhfuil PCB/PCT;
- (d) umair stórála iomchuí ar leithligh le haghaidh stóráil dheighilte sreabhán as feithicil a bhfuil a ré caite: breoslaí, olaí (ola mhótair, ola ghiarbhosca, ola chumhachtstíúrtha, ola tras-seolta, ola hiodrálach), scagairí ola, leachtanna fuaraithe, oibreán frithreo, leachtanna coscáin, cuisneáin, sreabhán sceite díosail agus aon sreabhán nó gás eile atá san fheithicil a bhfuil a ré caite;

- (e) trealamh chun uisce a chóireáil, lena n-áirítear uisce báistí, i gcomhréir le ceanglais sláinte agus chomhshaoil;
 - (f) stóráil iomchuí le haghaidh boinn athláimhe, á chur san áireamh gur gá guaiseacha dóiteáin agus stoc-charnadh iomarcach a chosc.
4. Saoráidí cóireála údaraithe ag a bhfuil cead feithiclí leictreacha a chóireáil, comhlíonfaidh siad na ceanglais a leagtar amach in Iarscríbhinn XII a ghabhann le Rialachán (AE) 2023/1542. Maidir le saoráidí cóireála údaraithe a ghlacann le feithiclí leictreacha a bhfuil amhras ann go ndearnadh damáiste don cheallra feithicle leictre, déanfaidh siad na ceallraí sin a mheasúnú a luaithé is féidir, ach tráth nach déanaí ná laistigh de 24 uair an chloig tar éis an tseachadta. Déanfar na feithiclí agus na ceallraí sin a stóráil ar leithligh i limistéar coraintín dá dtagraítear i mír 1. Beidh an limistéar coraintín feistithe le suiteálacha iomchuí chun dóiteáin ó cheallraí feithicle leictre a chosc, a bhrath agus a shrianadh chun nach leathfaidh siad chuig limistéir eile, chuig feithiclí leictreacha eile agus chuig ceallraí eile.

CUID B

ÍOSCHEANGLAIS MAIDIR LE DÍTHRUAILLIÚ

1. Déanfar na sreabháin, na leachtanna agus na gáis seo a leanas a bhaint den fheithicil a bhfuil a ré caite, mura bhfuil gá leo chun na páirteanna lena mbaineann a athúsáid:
- (a) breosla;
 - (b) ola mhótair;
 - (c) ola thras-seolta;
 - (d) ola ghiarbhosca;
 - (e) ola chumhachtstiúrtha;
 - (f) ola hiodrálach;
 - (g) leachtanna fuaraithe;
 - (h) oibreán frithreo;
 - (i) sreabháin coscán;
 - (j) cuisneáin;
 - (k) sreabháin sceite díosail; agus
 - (l) aon sreabháin nó gáis eile atá san fheithicil a bhfuil a ré caite.

Tar éis na sreabháin agus na leachtanna a bhaint, úsáidfear dalláin draenála chun nach sceithfear an méid atá fágtha. Déanfar na coimeádáin bhailiúcháin a lipéadú chun an cineál leachta atá iontu a léiriú agus déanfar iad a stóráil ar leithligh ó chéile i suíomh slán, i gcomhréir le Cuid A den Iarscríbhinn seo, chun doirteadh nó sceitheadh de thimpiste agus rochtain neamhúdaráithe orthu a chosc.

2. Déanfar na comhpháirteanna, na páirteanna agus na hábhair seo a leanas a neodrú nó a bhaint:

- (a) córas e-call;
- (b) páirteanna piriteicniúla na málaí aeir;
- (c) páirteanna piriteicniúla na gcriosanna sábhála;
- (d) aon pháirt phiriteicniúil eile;

3. Déanfar na comhpháirteanna, na páirteanna agus na hábhair seo a leanas a bhaint d'fheithicil a bhfuil a ré caite:

- (a) neodrófar málaí aeir, umair gáis pheitriliam leachtaithe (GPL), umair gáis nádúrtha chomhbhrúite (CNG), umair hidrigine agus aon pháirt agus comhpháirt eile a d'fhéadfadh a bheith pléascach;
- (b) scagairí ola;
- (c) déanfar cuisneáin a chóireáil i gcomhréir le Rialachán (AE) Uimh. 2024/573;
- (d) comhpháirteanna a shainnítear mar chomhpháirteanna a bhfuil mearcair iontu, déanfar iad a scaradh le linn na cóireála i sruth in-sainitheanta, a dhíluaileofar agus a dhiúscrófar go sábháilte i gcomhréir le hAirteagal 17 de Threoir 2008/98/CE;
- (e) ábhair ina bhfuil substaintí dá dtagraítear in Airteagal 5(4), ar gá iad a lipéadú mar a leagtar síos in Iarscríbhinn IV, déanfar iad a dheighilt le linn na cóireála ina sruth in-sainitheanta, a dhíluaileofar agus a dhiúscrófar go sábháilte i gcomhréir le hAirteagal 17 de Threoir 2008/98/CE.

Na páirteanna, na comhpháirteanna agus na hábhair uile arna mbailiú le linn an díthruaillithe, stórálfar i gcoimeádáin ainmnithe iad. Déanfar na coimeádáin bhailiúcháin a lipéadú chun na comhpháirteanna, na páirteanna agus na hábhair atá iontu a léiriú agus stórálfar i suíomh slán iad i gcomhréir le Cuid A, chun doirteadh nó sceitheadh de thimpiste agus rochtain neamhúdaráithe orthu a chosc.

4. Déanfar an fhaisnéis seo a leanas maidir le díthruailliú na bhfeithiclí a bhfuil a ré caite a thaifeadadh:

- (a) an líon iomlán feithiclí a bhfuil a ré caite a ndearnadh cóireáil orthu;
- (b) meánmheáchan na bhfeithiclí a bhfuil a ré caite sula ndéanfar iad a dhíthruailliú agus a bhaint, agus ina dhiaidh sin;
- (c) cainníocht iomlán gach cineál sreabhán, páirteanna, comhpháirteanna nó ábhar díthruaillithe;
- (d) ainm agus sonraí teagmhála an iompróra dramhaíola, más infheidhme;
- (e) ainm agus faisnéis teagmhála an láithreáin cóireála deiridh, maidir leis na sreabháin agus na gáis, na páirteanna, na comhpháirteanna nó na hábhair arna mbailiú le linn an phróisis díthruaillithe.

CUID C

BAINT SHAINORDAITHEACH PÁIRTEANNA AGUS COMHPHÁIRTEANNA D'FHEITHICLÍ A BHFUIL A RÉ CAITE

	Díolmhaithe faoi Airteagal 29(2), má chomhlíontar coinníollacha Chuid G d'Iarscríbhinn VIII X: tá feidhm ag an díolúine
1. Ceallraí feithiclí leictreacha, lena n-áirítear a gcórais bainistithe ceallraí, luchtairí ar bord, cásálacha nó feireadh más ann dóibh	
2. Ceallraí LMT, mar a shainmhínítear in Airteagal 3, pointe (11), de Rialachán (AE) 2023/1542, lena n-áirítear a gcórais bhainistithe ceallraí, luchtairí ar bord, cásálacha nó feireadh más ann dóibh	
3. Ceallraí DSA mar a shainmhínítear in Airteagal 3, pointe (12), de Rialachán (AE) 2023/1542	
4. Ceallraí inaistrithe mar a shainmhínítear in Airteagal 3, pointe (9), de Rialachán (AE) 2023/1542	
5. móitair ríomhthiomána, lena n-áirítear a gcásálacha agus aon aonad rialaithe, aon sreangú, agus aon pháirt, comhpháirt agus ábhar eile atá bainteach leo	
6. Bloic innill	X
7. Tiontairí catalaíocha	
8. Giarbhoscaí	X
9. 70 % den ghloine iomlán ar a laghad ó ghaothscáthanna, fuinneoga cúil agus taobhfhuinneoga atá déanta as gloine, lena n-áirítear suiteálacha gloine ar an ndíon	
10. Fonsaí	
11. Boinn	

	Díolmhaithe faoi Airteagal 29(2), má chomhlíontar coinníollacha Chuid G d'Iarscríbhinn VIII X: tá feidhm ag an díolúine
12. Páirteanna den chóras faisnéise agus siamsaíochta atá inrochtana go díreach	
13. Ceanntoisc agus cúiltoisc, lena n-áirítear a ngníomhróirí	
14. Príomh-úmacha sreinge	X
15. Tuairteoirí	X
16. Umair bhreosla	X
17. Malartóirí teasa	X
18. Páirteanna de phlaistigh arna dtreisiú le snáithín carbóin	
19. Comhpháirteanna leictreacha agus leictreonacha:	X
(a) inbhéartóirí agus tiontairí DC-DC feithiclí leictreacha ar mó a méachan ná 2 chileagram	X
(b) cláir ciorcad phriontáilte mhóra atá inrochtana go héasca	X
(c) painéil fhótavoltacha ar mó achar a ndromchla ná 0,2 méadar cearnach	X
(d) modúil rialaithe agus boscaí comhla le haghaidh an traiseolta uathoibríoch	X

CUID D

ATHÚSÁID, ATHMHONARÚ AGUS ATHRIOCHTÚ PÁIRTEANNA AGUS COMHPHÁIRTEANNA

1. Meastóireacht theicniúil ar na páirteanna agus na comhpháirteanna arna mbaint:

(a) Le haghaidh athúsáide:

(i) tá an pháirt nó an chomhpháirt feidhmiúil;

(ii) tá sí oiriúnach lena húsáid, ar bhealach éasca, don phríomhchuspóir dar ceapadh í;

(b) Le haghaidh athmhonaraithe nó athriochtaithe:

(i) beidh na codanna ábhartha uile sa pháirt nó sa chomhpháirt;

(ii) tá sí oiriúnach lena hathmhonarú nó lena hathríohtú, agus aon damáiste, feidhmiúlacht laghdaithe, feidhmíocht laghdaithe, saolré laghdaithe agus na deisiúcháin is gá á gcur san áireamh;

(iii) níl aon chreimeadh trom le feiceáil a chuireann bac ar fheidhmiúlacht na páirte nó na comhpháirte.

2. Faisnéis íosta atá le soláthar ar lipéadú na bpáirteanna agus na gcomhpháirteanna:

(a) ainm na comhpháirte nó na páirte;

(b) ainm, seoladh poist, lena léirítear pointe teagmhála aonair agus seoladh ríomhphoist, suíomh gréasáin, más infheidhme, lena sainaithnítear an tsaoráid chóireála údaraithe lenar baineadh an chomhpháirt nó an pháirt.

CUID E

COMPHÁIRTEANNA AGUS PÁIRTEANNA NACH BHFUIL LE HATHÚSÁID

1. Gach mála aeir, lena n-áirítear cúisíní, gníomhróirí piriteicniúla, aonaid rialaithe leictreonacha agus braiteoirí.
2. córais iarchóireála astaíochtaí (e.g. tiontairí cataleíocha, scagairí cáithníní) mura rud é go gcomhlíonann na páirteanna sin an tástáil ródacmhainneachta ghaolmhar a leagtar síos in Airteagal 4 de Threoir 2014/45/AE.
3. Cóimeálacha creasa sábhála uathoibríocha nó neamh-uathoibríocha, lena n-áirítear strapáí, búclaí, feistí aistarraingthe, gníomhróirí piriteicniúla.
4. Suíocháin i gcásanna ina bhfuil daingnithe creasa sábhála agus/nó málaí aeir ionchorpraithe iontu.
5. Cóimeálacha glais stiúrtha ag gníomhú ar an gcolún stiúrtha.
6. Baic dúisithe, lena n-áirítear trasfhreagróirí agus aonaid rialaithe leictreonacha.

CUID F

CEANGLAIS SHONRACHA MAIDIR LE CÓIREÁIL NA bPÁIRTEANNA, NA gCOMPHÁIRTEANNA AGUS NA nÁBHAR ARNA mBAINT

1. Déanfar ceallraí dúisithe, soilsithe agus adhainte (DSA) a chóireáil i gcomhréir le hAirteagal 70 de Rialachán (AE) 2023/1542.
2. Déanfar ceallraí feithicle leictirí a chóireáil i gcomhréir le hAirteagal 70 de Rialachán (AE) 2023/1542.
3. Déanfar ceallraí LMT a chóireáil i gcomhréir le hAirteagal 70 de Rialachán (AE) 2023/1542.
4. Déanfar ceallraí inaistrithe a chóireáil i gcomhréir le hAirteagal 70 de Rialachán (AE) 2023/1542.

5. Ábhair bhuanmhaighnéid ina bhfuil neoidimiam, diospróisiam nó praiséidimiam (Neoidimiam-Iarann-Bórón, NdFeB), mar a shainmhínítear in Airteagal 28 de Rialachán (AE) 2024/1252, agus copar as mótaí ríomhthiomána leictirí nach bhfuil oiriúnach lena n-athúsáid, lena n-athmhonarú nó lena n-athríochtú, bainfear iad i gcás ina mbeidh an próiseas bainte indéanta ag saoráidí cóireála údaraithe gan costas iomarcach. I gcás ina mbeidh easpa dul chun cinn teicniúil ann maidir le hábhair bhuanmhaighnéid NdFeB a athchúrsáil, déanfar na mótaí ríomhthiomána leictirí nó na páirteanna díobh ina bhfuil ábhar buanmhaighnéid a stoc-charnadh agus a lipéadú i gcomhréir le hAirteagal 28(1), pointe (b), de Rialachán (AE) 2024/1252. Chun athchúrsáil a dhéanamh amach anseo, ní bheidh feidhm ag na ceanglais a bhaineann le stóráil shealadach atá i dTreoir 1999/31/CE.
6. Comhpháirteanna agus páirteanna leictreonacha a baineadh, nach bhfuil faoi réir a n-athúsáide, a n-athmhonaraithe nó a n-athríochtaithe, agus codáin neamhfheiriúla, lena n-áirítear cláir ciorcad priontáilte mhionghearrtha, déanfaidh oibreoirí cóireála iad a chóireáil mar a shonraítear in Airteagal 8(3) de Threoir 2012/19/AE.
7. Is éard a dhéanfar le gloine arna baint den fheithicil a bhfuil a ré caite, ar a laghad, í a athchúrsáil ina gloine le haghaidh coimeádán, ina snáithín gloine nó ina táirge de cháilíocht choibhéiseach.
8. Déanfar cuisneáin arna mbaint a athchúrsáil, a athshlánú nó a scriosadh i gcomhréir le hAirteagal 8 de Rialachán (AE) 2024/573.
9. Déanfar na codáin phlaisteacha agus iarmhair a láimhseáil i gcomhréir le hAirteagal 7 de Rialachán (AE) 2019/1021, agus le hlarscríbhinn IV a ghabhann leis.
10. Déanfar boinn rubair a phróiseáil i gcomhréir leis an ordlathas dramhaíola agus leis na ceanglais ghinearálta atá leagtha síos in Airteagal 4 de Threoir 2008/98/CE d'fhonn tosaíocht a thabhairt do roghanna coiscthe as a dtiocfaidh an toradh comhshaoil is fearr ar an iomlán, lena n-áirítear atráchtadh boinn, agus d'fhonn tosaíocht a thabhairt don athchúrsáil, lena n-áirítear modhanna eile seachas an athchúrsáil mheicniúil, thar aisghabháil fuinnimh.
11. Ábhair alúmanaim de thionscnamh malartóirí teasa mar a shonraítear i gCuid C, pointe 17, d'Iarscríbhinn VIII, déanfar iad a stóráil agus a athchúrsáil ar leithligh ó na codáin alúmanaim theilgte agus shaoirsithe a shonraítear i gCuid G, pointe 2(b), d'Iarscríbhinn VIII.

CUID G

CRITÉIR LE HAGHAIDH MIONGHEARRADH COMHCHEANGAILTE AGUS CUR I bhFEIDHM TEICNEOLAÍOCHTAÍ IAR-MHIONGHEARRTHÓRA

1. Chun Airteagal 27(3) den Rialachán seo a chomhlíonadh, ní fhéadfar feithiclí a bhfuil a ré caite a mhionghearradh in éineacht le dramhaíl eile ach amháin i gcás:
 - (a) go ndearnadh dramhthrealamh leictreach agus leictreonach a chóireáil i gcomhréir le hlarscríbhinn VII a ghabhann le Treoir 2012/19/AE;
 - (b) gur baineadh gach ceallra i gcomhréir le Rialachán (AE) 2023/1542;
 - (c) go ndearnadh pacáistíocht phlaisteach a dheighilt ó dhramhaíl ó phacáistíocht agus ó phacáistíocht mhiotail i gcomhréir le Rialachán (AE) 2025/40;
 - (d) nach laghdaíonn an próiseas mionghearrtha comhcheangailte cáilíocht na sruthanna dramhaíola i gcomparáid le cóireáil ar leithligh; agus

- (e) gur féidir rannchuidithe sonracha gach srutha dramhaíola measctha leis na codáin aschuir a shainaithint mar rannchuidithe a chomhlíonann na hoibleagáidí tuairiscithe faoi Rialachán (AE) 2023/1542, Rialachán (AE) 2025/40, Treoir 2008/98/CE agus Treoir 2012/19/AE.

2. Ceanglais cháilíochta maidir leis na codáin aschuir:

- (a) ní bheidh cion copair iomlán an phríomhchodáin cruach níos mó ná 0,25 % ar bhonn meáchain; amhail ón 1 Meán Fómhair 2031, ní bheidh cion iomlán copair an phríomhchodáin cruach níos mó ná 0,15 % de réir meáchain;

- (b) faoin 1 Meán Fómhair 2029, déanfar alúmanam a shórtáil ina dhá chodán ar a laghad:

(i) alúmanam teilgthe (codáin ina bhfuil cion sileacain níos airde ná 1,5 %);

(ii) alúmanam saoirsithe (codáin ina bhfuil cion sileacain 1,5 % nó níos lú);

- (c) faoin 1 Meán Fómhair 2032, déanfar alúmanam a shórtáil ina cheithre chodán ar a laghad:

(i) codán alúmanaim a bhfuil cion sileacain níos airde ná 1,5 % ann, cion copair atá cothrom le 0,5 % nó níos ísle ná sin agus cion iarainn atá cothrom le 0,2 % nó níos ísle ná sin;

(ii) codán alúmanaim ina bhfuil cion sileacain níos airde ná 1,5 % agus nach gcomhlíonann ceanglais chomhdhéanaimh fhophointe (i) maidir le copar agus iarann;

(iii) codán alúmanaim a bhfuil cion sileacain ann atá cothrom le 1,5 % nó níos lú ná sin, maignéisiam atá cothrom le 1,5 % nó níos lú ná sin, cion copair atá cothrom le 0,3 % nó níos lú ná sin agus ábhar since atá cothrom le 0,3 % nó níos lú ná sin;

(iv) codán alúmanaim ina bhfuil cion sileacain atá cothrom le 1,5 % nó níos ísle ná sin agus nach gcomhlíonann ceanglais chomhdhéanaimh fhophointe (iii) maidir le maignéisiam, copar agus sinc;

- (d) An codán atá trom ó thaobh an mhionghearrthóra de a dhíorthaítear tar éis iarann a dheighilt ón aer agus a scaradh, déanfar é a chóireáil tuilleadh d'fhonn miotail fheiriúla, miotail neamhfheiriúla, plaistigh agus ábhair orgánacha eile a scagadh lena n-athchúrsáil nó lena n-aisghabháil. Maidir le hiarmhar na bpróiseas sin, beidh níos lú ná 1 % de mhíotal ann de réir meáchain agus, i gcomhréir le Cinneadh 2003/33/CE ón gComhairle⁽¹⁾, beidh níos lú ná 5 % de charbón orgánach iomlán ann de réir meáchain; ní bheidh feidhm ag teorainn an Charbóin Orgánaigh Iomlán (COI) de < 5 % de réir meáchain má tá codán atá trom ó thaobh an mhionghearrthóra, arna roghnú agus arna athchóiriú i gceart, cobhsaí go bitheolaíoch de réir na reachtaíochta atá ann faoi láthair;

- (e) an codán atá éadrom ó thaobh an mhionghearrthóra de, déanfar é a chóireáil tuilleadh d'fhonn miotail fheiriúla, miotail neamhfheiriúla, plaistigh agus ábhair orgánacha eile a scagadh lena n-athchúrsáil nó lena n-aisghabháil; maidir le hiarmhar na bpróiseas sin, beidh níos lú ná 1 % de mhíotal ann de réir meáchain agus, i gcomhréir le Cinneadh 2003/33/CE, beidh níos lú ná 5 % de charbón orgánach iomlán ann de réir meáchain; ní bheidh feidhm ag teorainn an Charbóin Orgánaigh Iomlán (COI) de < 5 % de réir meáchain má bhíonn codán atá éadrom ó thaobh an mhionghearrthóra de, arna roghnú agus arna athchóiriú i gceart, cobhsaí go bitheolaíoch de réir na reachtaíochta atá ann faoi láthair.

⁽¹⁾ Cinneadh 2003/33/CE ón gComhairle an 19 Nollaig 2002 lena mbunaítear critéir agus nósanna imeachta maidir le glacadh le dramhaíl ag líonadh talún de bhun Airteagal 16 de Threoir 1999/31/CE agus larscríbhinn II a ghabhann leis an Treoir chéanna (IO L 11, 16.1.2003, lch. 27, ELI: [http://data.europa.eu/eli/dec/2003/33\(1\)/oj](http://data.europa.eu/eli/dec/2003/33(1)/oj)).

3. Doiciméadacht atá le soláthar le haghaidh díolúintí ón oibleagáid maidir le páirteanna, comhpháirteanna agus ábhair a bhaint:
- (a) i gcás ina bhfuil sí ar fáil, cóip den chonradh i scríbhinn idir an tsaoráid chóireála údaraithe agus an tsaoráid a dhéanann na hoibríochtaí mionghearrtha agus a úsáideann na teicneolaíochtaí iar-mhionghearrtha, lena n-áirítear na sonraíochtaí maidir le cáilíocht na n-ábhar tánaisteach atá réidh le haghaidh athchúrsála agus an tsonraíocht theicniúil a leanfar le linn codáin chóireála as feithiclí a bhfuil a ré caite a phróiseáil;
 - (b) tuarascáil mhaischothromaíochta ar an anailís shamplach ar cháilíocht agus cainníocht na gcodán cóireála (aschur) i ndáil le cumraíocht chóireála ionadaíoch arna soláthar ag comhlacht neamhspleách.
-

IARSCRÍBHINN IX

FAISNÉIS LE HAGHAIDH CLÁRÚ I gCLÁR NA dTÁIRGEOIRÍ

1. Faisnéis atá le cur isteach ag an táirgeoir nó ag a ionadaí údaraithe le haghaidh na freagrachta leathnaithe táirgeora:
 - (a) ainm, agus ainmneacha branda má tá siad ar fáil, faoina n-oibríonn an táirgeoir sa Bhallstát agus seoladh an táirgeora lena n-áirítear cód poist agus áit phoist, sráid agus uimhir, tír, uimhir theileafóin, más ann di, suíomh gréasáin agus seoladh ríomhphoist, lena léirítear pointe teagmhála aonair;
 - (b) cód céannachta náisiúnta an táirgeora, lena n-áirítear a uimhir ar an gclár trádála nó uimhir chlárúcháin oifigiúil choibhéiseach agus an uimhir Eorpach aitheantais cánach nó an uimhir náisiúnta aitheantais cánach;
 - (c) catagóirí feithiclí a bhfuil sé beartaithe ag an táirgeoir a chur ar fáil ar an margadh den chéad uair laistigh de chríoch Ballstáit;
 - (d) faisnéis maidir leis an gcaoi a gcomhlíonann an táirgeoir a fhreagrachtaí mar a leagtar síos in Airteagal 16, lena n-áirítear faisnéis i bhfoirm scríofa maidir leis na nithe seo a leanas:
 - (i) na bearta a chuireann an táirgeoir i bhfeidhm chun na hoibleagáidí freagrachta táirgeora a leagtar síos in Airteagail 16 agus 20 a chomhlíonadh;
 - (ii) na bearta a chuirtear i bhfeidhm chun an oibleagáid maidir le bailiúchán a leagtar síos in Airteagal 23 a chomhlíonadh maidir leis an líon feithiclí a chuireann an táirgeoir ar an margadh sa Bhallstát; agus
 - (iii) an córas chun a áirithiú go mbeidh na sonraí a thuairiscítear do na húdaráis inniúla iontaofa;
 - (e) ráiteas ón táirgeoir nó, i gcás inarb infheidhme, ó ionadaí údaraithe an táirgeora le haghaidh na freagrachta leathnaithe táirgeora nó ón eagraíocht um fhreagracht táirgeoirí, lena luaitear go bhfuil an fhaisnéis a chuirtear ar fáil fíor.
2. An fhaisnéis atá le soláthar, i dteannta na faisnéise a liostaítear i bpointe 1, i gcás ina gceaptar eagraíocht um fhreagracht táirgeoirí chun na hoibleagáidí um fhreagracht leathnaithe táirgeoirí a dhéanamh:
 - (a) ainm agus sonraí teagmhála, lena n-áirítear cód poist agus áit phoist, sráid agus uimhir na sráide, tír, uimhir theileafóin agus seoladh ríomhphoist agus cód aitheantais náisiúnta na heagraíochta freagrachta táirgeora;
 - (b) uimhir na heagraíochta freagrachta táirgeora ar an gclár trádála nó uimhir chlárúcháin oifigiúil choibhéiseach agus a huimhir aitheantais chánach Eorpach nó náisiúnta; agus
 - (c) sainordú an táirgeora dá ndéantar ionadaíocht.

3. An fhaisnéis atá le soláthar, i dteannta na faisnéise atá liostaithe i bpointe 1, ag an eagraíocht um fhreagracht táirgeoirí i gcás inar ceapadh í i gcomhréir le hAirteagal 17(1):
 - (a) ainmneacha agus sonraí teagmhála, lena n-áirítear cóid phoist agus áiteanna poist, sráideanna agus uimhreacha, tíortha, uimhreacha teileafóin, suíomhanna gréasáin agus seoltaí ríomhphoist na dtáirgeoirí dá ndéantar ionadaíocht;
 - (b) sainordú gach táirgeora dá ndéantar ionadaíocht, i gcás inarb infheidhme;
 - (c) i gcás ina ndéanann an eagraíocht um fhreagracht táirgeoirí ionadaíocht do níos mó ná táirgeoir amháin, tabharfaidh an eagraíocht le fios ar leithligh conas a chomhlíonann gach ceann de na táirgeoirí dá ndéantar ionadaíocht na freagrachtaí a leagtar amach in Airteagal 16.
4. I gcás ina ndéanfaidh ionadaí údaraithe le haghaidh na freagrachta leathnaithe táirgeora oibleagáidí faoi Airteagal 16 a chomhlíonadh thar ceann táirgeora, ar ionadaí é a dhéanann ionadaíocht do bhreis agus táirgeoir amháin, soláthróidh an t-ionadaí sin, i dteannta na faisnéise a liostaítear i bpointe 1, ainm agus sonraí teagmhála gach ceann de na táirgeoirí dá ndéantar ionadaíocht ar leithligh.

IARSCRÍBHINN X

DEIMHNIÚ SCRIOSTA

1.	An bhunaíocht nó an gnóthas a eisíonn an deimhniú sin	
1.1	Ainm	
1.2	Seoladh	
1.3	Uimhir theileafóin	
1.4	Ríomhphost [má tá fáil air]	
1.5	Uimhir chlárúcháin nó uimhir aitheantais (*)	
2.	An t-údarás inniúil a d'eisigh ceadúnas don bhunaíocht nó don ghnóthas dá dtagraítear i bpointe 1	
2.1	Ballstát	
2.2	Ainm	
2.3	Seoladh	
3.	Deimhniú scríosta	
3.1	Dáta eisiúna	
3.2	Uimhir	
4.	Faisnéis faoin bhfeithicil a n-eisítear an deimhniú scríosta sin lena haghaidh	
4.1	Marc náisiúntachta	
4.2	(A) Uimhir chlárúcháin (**)	
4.3	(J) Catagóir (**)	
4.4	(D.1) Déanamh (**)	
4.5	(D.3) Ainm tráchtála (**)	

4.6	(E) Uimhir Aitheantais Feithicle (**)	
4.7	Uimhir an deimhnithe clárúcháin	
5.	Faisnéis faoi úinéir na feithicle	
5.1	(C.2.1) Sloinne nó ainm gnó (**)	
5.2	(C.2.2) Ainm nó ainmneacha eile (**)	
5.3	(C.2.3) Seoladh (**)	
5.4	Uimhir theileafóin [má tá sí ar fáil agus le toiliú an úinéara]	
5.5	Ríomhphost [má tá sé ar fáil agus le toiliú an úinéara]	
6	Nótaí	

(*) Féadfar an ceanglas seo a tharscaoileadh i gcás nach bhforáiltear don uimhir sin sa chóras náisiúnta clárúcháin nó aitheantais.

(**) Cóid chomhchuibhithe Chomhphobail mar a thagraítear dóibh i dTreoir 1999/37/CE.

IARSCRÍBHINN XI

LEASUITHE AR RIALACHÁN (AE) 2018/858 AGUS AR RIALACHÁN (AE) Uimh. 168/2013

1. Is mar a leanas a leasaítear Iarscríbhinn II a ghabhann le Rialachán (AE) 2018/858:

(a) i gCuid I, cuirtear an méid seo a leanas in ionad iontráil G13:

[illegible]

(b) leasaítear Foscríbhinn 1 mar a leanas:

(i) i dtábla 1, cuirtear an méid seo a leanas in ionad iontráil G13:

'G13	Ciorclaíocht	Rialachán (AE) 2026/1738	n/b Beidh feidhm, áfach, ag Cuid E d'larscríbhinn VIII maidir leis an toirmeasc ar athúsáid na gcomhpháirteanna sonraithe.;
------	--------------	--------------------------	---

(ii) i dtábla 2, cuirtear an méid seo a leanas in ionad iontráil G13:

'G13	Ciorclaíocht	Rialachán (AE) 2026/1738	n/b Beidh feidhm, áfach, ag Cuid E d'larscríbhinn VIII maidir leis an toirmeasc ar athúsáid na gcomhpháirteanna sonraithe.;
------	--------------	--------------------------	---

(c) i bhFoscúbhinn 2, leasaítear pointe 4 mar a leanas:

(i) sa tábla ‘Cuid I: I gcás feithiclí de chatagóir M_1 ’, cuirtear an méid seo a leanas in ionad iontráil 59:

'59	Rialachán (AE) 2026/1738 (Ciorclaíocht)	Ní bheidh feidhm ag ceanglais an Rialacháin sin.;
-----	---	---

(ii) sa tábla ‘Cuid II: I gcás feithicil de chatagóir N_1 ’, cuirtear an méid seo a leanas in ionad iontráil 59:

'59	Rialachán (AE) 2026/1738 (Ciorclaíocht)	Ní bheidh feidhm ag ceanglais an Rialacháin sin.;
-----	---	---

(d) leasaítear Cuid III mar a leanas:

(i) i bhFoscábhinn 1, cuirtear an méid seo a leanas in ionad iontráil 59:

'59	Ciorclaíocht	Rialachán (AE) 2026/1738	Ní bhaineann le hábhar	Ní bhaineann le hábhar';		
-----	--------------	--------------------------	------------------------	--------------------------	--	--

(ii) i bhFoscrlbhinn 2, cuirtear an méid seo a leanas in ionad iontráil 59:

‘59	Ciorclaíocht	Rialachán (AE) 2026/1738	Ní bhaineann le hábhar				Ní bhaineann le hábhar’;					
-----	--------------	--------------------------	------------------------	--	--	--	--------------------------	--	--	--	--	--

(iii) i bhFoscrlbhinn 3, cuirtear an méid seo a leanas in ionad iontráil 59:

'59	Ciorclaíocht	Rialachán (AE) 2026/1738	Ní bhaineann le hábhar';
-----	--------------	--------------------------	--------------------------

(iv) i bhFoscrlbhinn 4, cuirtear an méid seo a leanas in ionad iontráil 59:

'59	Ciorclaíocht	Rialachán (AE) 2026/1738	Ní bhaineann le hábhar				Ní bhaineann le hábhar';							
-----	--------------	--------------------------	------------------------	--	--	--	--------------------------	--	--	--	--	--	--	--

2. Is mar a leanas a leasaítear Iarscrlbhinn II a ghabhann le Rialachán (AE) Uimh. 168/2013:

I Roinn C1 den tábla, cuirtear an méid seo a leanas in ionad iontráil 15a:

				L1e-A ¹	L1e-B ²	L2e	L3e	L4e	L5e-B	L6e-A	L7e-A ¹	L7e-A ²	L7e-B ¹	L7e-B ²
'15a	18	Ceanglais chiorclaíochta	Rialachán (AE) 2026/1738	⌘	⌘	⌘	x	x	x	x	x	x	x	x'

IARSCRÍBHINN XII

LEASUITHE AR RIALACHÁN (AE) 2023/1542

Cuirtear an tábla seo a leanas in ionad an tábla in Iarscríbhinn I:

Colún 1 Ainmniú na substainte nó an ghrúpa substaintí	Colún 2 Coinníollacha an tsrianta
1. Mearcair Uimh. CAS. 7439-97-6 Uimh. CE 231-106-7 agus a chomhdhúile	Ní bheidh níos mó ná 0,0005 % de mhearcair (arna shloinneadh mar mhiotal mearcair) de réir meáchain i gceallraí, bídís i láthair nó ionchorpraithe i bhfearais nó ná bíodh, i modhanna éadroma iompair nó i bhfeithiclí eile nó ná bíodh.
2. Caidmiam Uimh. CAS 7440-43-9 Uimh. CE 231-152-8 agus a chomhdhúile	1. Ní bheidh níos mó ná 0,002 % de chaidmiam (arna shloinneadh mar mhiotal caidmiam) de réir meáchain i gceallraí inaistrithe, bídís i láthair nó ionchorpraithe i bhfearais nó ná bíodh, i modhanna éadroma iompair nó i bhfeithiclí eile nó ná bíodh. 2. Maidir le ceallraí feithiclí leictreacha agus ceallraí DSA, atá ionchorpraithe i bhfeithiclí, lena n-áirítear feithiclí sainchuspóireacha, de chatagóirí M₁ agus N₁ mar a shainmhínítear i Rialachán (AE) 2018/858, ní bheidh níos mó ná 0,01 % de chaidmiam (arna shloinneadh mar mhiotal caidmiam) de réir meáchain in ábhar aonchineálach iontu. 3. Ní bheidh feidhm ag pointe 2 maidir le ceallraí feithiclí leictreacha arna n-úsáid mar pháirteanna spártha le haghaidh feithiclí leictreacha, lena n-áirítear feithiclí sainchuspóireacha, de chatagóirí M₁ agus N₁ mar a shainmhínítear i Rialachán (AE) 2018/858 a chuirtear ar an margadh roimh an 31 Nollaig 2008.
3. Luaidhe Uimh. CAS 7439-92-1 Uimh. CE 231-100-4 agus a comhdhúile	1. Ón 18 Lúnasa 2024, ní bheidh níos mó ná 0,01 % de luaidhe (arna shloinneadh mar mhiotal luaidhe) de réir meáchain i gceallraí inaistrithe, bídís i láthair nó ionchorpraithe i bhfearais nó ná bíodh. 2. Ní bheidh feidhm ag an srian a leagtar amach i bpointe 1 maidir le cnapchealla soghluaiste sinc-aeir go dtí an 18 Lúnasa 2028. 3. Ní bheidh níos mó ná 0,1 % luaidhe (arna shloinneadh mar mhiotal luaidhe) de réir meáchain in ábhar aonchineálach i gceallraí inaistrithe atá ionchorpraithe i bhfeithiclí, lena n-áirítear feithiclí sainchuspóireacha, de chatagóirí M₁ agus N₁ mar a shainmhínítear i Rialachán (AE) 2018/858. 4. Ní bheidh feidhm ag pointe 3 maidir le Ceallraí Inaistrithe atá ionchorpraithe i bhfeithiclí, nó arna n-úsáid mar pháirteanna spártha le haghaidh feithiclí, lena n-áirítear feithiclí sainchuspóireacha, de chatagóirí M₁ agus N₁ mar a shainmhínítear i Rialachán (AE) 2018/858, arna gcineálcheadú roimh an 1 Eanáir 2024. 5. Ní bheidh níos mó ná 0,1 % luaidhe (arna shloinneadh mar mhiotal luaidhe) de réir meáchain in ábhar aonchineálach i gceallraí feithiclí leictreacha atá ionchorpraithe i bhfeithiclí, lena n-áirítear feithiclí sainchuspóireacha, de chatagóirí M₁ agus N₁ mar a shainmhínítear i Rialachán (AE) 2018/858.

Colún 1 Ainmniú na substainte nó an ghrúpa substaintí	Colún 2 Coinníollacha an tsrianta
	6. Ní bheidh feidhm ag pointe 5 maidir leis an méid a leanas: (a) Ceallraí feithiclí leictreacha a úsáidtear i gcórais ardvoltais ⁽¹⁾ atá ionchorpraithe i bhfeithiclí de chatagóirí M₁ agus N₁, nó arna n-úsáid mar pháirt spártha dóibh, i bhfeithiclí de chatagóirí M₁ agus N₁, mar a shainmhínítear i Rialachán (AE) 2018/858 agus arna gcineálcheadú roimh an 1 Eanáir 2019; (b) Ceallraí feithiclí leictreacha nach gcumhdaítear le pointe (a) den phointe seo atá ionchorpraithe i bhfeithiclí, lena n-áirítear feithiclí sainchuspóireacha, de chatagóirí M₁ agus N₁ nó arna n-úsáid mar pháirt spártha dóibh, mar a shainmhínítear i Rialachán (AE) 2018/858, agus arna gcineálcheadú roimh an 1 Eanáir 2024. 7. Ní bheidh níos mó ná 0,1 % luaidhe (arna shloinneadh mar mhiotal luaidhe) de réir meáchain in ábhar aonchineálach i gceallraí DSA atá ionchorpraithe i bhfeithiclí, lena n-áirítear feithiclí sainchuspóireacha, de chatagóirí M₁ agus N₁ mar a shainmhínítear i Rialachán (AE) 2018/858. 8. Ní bheidh feidhm ag pointe 7 maidir leis an méid a leanas: (a) ceallraí DSA arna n-úsáid i bhfeidhmeanna 12 V le haghaidh feithiclí, lena n-áirítear feithiclí sainchuspóireacha, de chatagóirí M₁ agus N₁ mar a shainmhínítear i Rialachán (AE) 2018/858. ⁽¹⁾ (b) ceallraí DSA arna n-úsáid i bhfeidhmeanna 24 V i bhfeithiclí sainchuspóireacha de chatagóirí M₁ agus N₁ mar a shainmhínítear i Rialachán (AE) 2018/858. ⁽²⁾ (c) ceallraí DSA arna n-úsáid i bhfeidhmeanna eile seachas na feidhmeanna sin a chumhdaítear le pointí (a) agus (b) den phointe seo i bhfeithiclí, lena n-áirítear feithiclí sainchuspóireacha, de chatagóirí M₁ agus N₁ mar a shainmhínítear i Rialachán (AE) 2018/858 arna gcineálcheadú roimh an 1 Eanáir 2024.
4. Cróimiam heicsifhiúsach CAS Uimh 18540-29-9EC Uimh. 606-053-1 agus a chomhdhúile	Na ceallraí atá ionchorpraithe i bhfeithiclí, lena n-áirítear feithiclí sainchuspóireacha, de chatagóirí M ₁ agus N ₁ mar a shainmhínítear i Rialachán (AE) 2018/858, ní bheidh níos mó ná 0,1 % de chróimiam heicsifhiúsach iontu, arna chur in iúl mar mhiotal cróimiam heicsifhiúsach, de réir meáchain in ábhar aonchineálach.
⁽¹⁾ Córais ag a bhfuil voltas > 75 V DC dá bhforáiltear in Airteagal 1 de Threoir 2014/35/AE ó Pharlaimint na hEorpa agus ón gComhairle ⁽³⁾.	

⁽¹⁾ Déanfar athbhreithniú ar an díolúine sin in 2030.

⁽²⁾ Déanfar athbhreithniú ar an díolúine sin in 2030.

⁽³⁾ Treoir 2014/35/AE ó Pharlaimint na hEorpa agus ón gComhairle an 26 Feabhra 2014 maidir le comhchuibhiú dhlíthe na mBallstát a bhaineann le trealamh leictreach a chur ar fáil ar an margadh, ar trealamh é a dheartar lena úsáid laistigh de theorainneacha áirithe voltais (IO L 96, 29.3.2014, lch. 357, ELI: <http://data.europa.eu/eli/dir/2014/35/oj>).

IARSCRÍBHINN XIII

CRITÉIR ATÁ LE COMHLÍONADH AG SUITEÁLACHA I dTRÍÚ TÍORTHA LENA nDÉANTAR TÁIRGEADH ÁBHAIR
ATHCHÚRSÁILTE

CUID A CRITÉIR CHUN A DHEARBHÚ GO nDEARNADH ÁBHAR ATHCHÚRSÁILTE A THÁIRGEADH I SUITEÁIL INA bhFUIL CEANGLAIS ÁIRITHE MAIDIR LE SLÁINTE AN DUINE, AN AERÁID AGUS AN COMHSHAOL A CHOSAINT, AR CEANGLAIS IAD ATÁ LEAGHTA AMACH I nDLÍ AN AONTAIS NÓ ATÁ COIBHÉISEACH LEIS NA CEANGLAIS SIN (I gCOMHRÉIR LE hAIRTEAGAL 6(4))

1. Maidir leis an tsuiteáil atá lonnaithe i dtríú tír agus a bhfuil baint aici le táirgeadh ábhair athchúrsáilte, comhlíonfaidh sí na coinníollacha seo a leanas le linn a cuid oibríochtaí iarbhair:

- (a) comhlíonann sí na ceanglais maidir le dramhaíl a athchúrsáil agus déanann sí a gníomhaíochtaí i gcomhréir leis an reachtaíocht náisiúnta is infheidhme maidir le cosaint an chomhshaoil;
- (b) deantar, tógtar agus oibrítear í ar bhealach sábháilte atá neamhdhiobhálach don chomhshaol, agus go sonrach, tá na próisis, an teicneolaíocht iomchuí bainistithe dramhaíola, an t-eagrúchán agus an bonneagar riachtanach i bhfeidhm aici chun an dramhaíl atá i gceist a athchúrsáil;
- (c) faigheann sí a cuid dramhaíola plaistigh ó Bhallstát nó ó thír a chomhlíonann dlí an Aontais, nó caighdeán atá coibhéiseach leo siúd sna Ballstáit i dtaca le cosaint an chomhshaoil agus shábháilteacht na n-oibrithe, agus oibríonn sí i dtír mar sin i gcomhréir leis na critéir a shainmhínítear i mír 3;
- (d) bunaíonn agus oibríonn sí an tsaoráid córais, nósanna imeachta agus teicnící um bainistiú agus faireachán, a bhfuil sé mar aidhm acu na nithe seo a leanas a chosc, a mhaolú, a íoslaghdú agus, a mhéid is féidir, a dhíothú:
 - (i) rioscaí do shláinte agus sábháilteacht na n-oibrithe lena mbaineann agus don daonra atá gar don tsaoráid; agus
 - (ii) éifeachtaí díobhálacha ar an gcomhshaol mar gheall ar a gníomhaíochtaí (go háirithe trí bhearta leormhaithe a dhéanamh chun faireachán a dhéanamh agus aghaidh a thabhairt ar thruailliú);
- (e) áirithíonn sí inrianaitheacht na dramhaíola uile a fhaightear agus a chóireáiltear ag an tsaoráid, lena n-áirítear a áirithiú go ndéantar doiciméadú ar an dramhaíl iarmharach ar fad a ghintear óna gníomhaíochtaí agus nach n-aistreofar í ach chuig saoráidí bainistithe dramhaíola a údaraítear chun an dramhaíl iarmharach sin a chóireáil;
- (f) tá bearta déanta aici atá ceaptha chun fuinneamh a shábháil agus chun na hastaíochtaí gás ceaptha teasa a bhaineann lena gníomhaíochtaí a shrianadh;
- (g) coinníonn sí taifid ar a gníomhaíochtaí bainistithe dramhaíola le 5 bliana anuas agus tá sí in ann na taifid sin a chur ar fáil; má tá suiteáil á hoibriú le níos lú ná 5 bliana anuas, coinníonn sí taifid maidir lena gníomhaíochtaí bainistithe dramhaíola le linn di a bheith á hoibriú, agus tá sí in ann na taifid sin a chur ar fáil;
- (h) níor ciontaíodh a hoibreoir ná a lucht bainistíochta as gníomhaíochtaí mídhleathacha a bhaineann le bainistiú dramhaíola a bheith curtha i gcrích acu le cúig bliana anuas.

2. Tabharfar aird ar na rialacha seo a leanas, nó ar rialacha coibhéiseacha, mar phointe tagartha agus i gcás inarb iomchuí:
 - (a) ceanglais shonracha maidir le cóireáil dramhaíola áirithe, agus maidir le cainníocht na dramhaíola a chóireáiltear a ríomh, atá éigeantach faoi reachtaíocht an Aontais, agus maidir le cuntas a choinneáil ar chainníochtaí na n-ábhar athchúrsáilte a tháirgtear;
 - (b) na conclúidí maidir leis na Teicnící is Fearr atá ar Fáil arna nglacadh i leith gníomhaíochtaí áirithe faoi Threoir 2010/75/AE.
3. Déanfar an dramhaíl phlaisteach a chóireáil ar dhóigh a bheidh i gcomhréir leis na ceanglais a leagtar síos i ndlí an Aontais, nó a bheidh coibhéiseach leis na ceanglais sin, agus beidh sí de thionscnamh Ballstáit nó tíre ag a bhfuil creat cuimsitheach um bhainistiú dramhaíola lena gcumhdaítear a críoch iomlán agus lena léirítear go bhfuil an tír sin in ann agus toilteanach bainistiú fóna dramhaíola ó thaobh an chomhshaoil de a ráthú, agus aird á tabhairt go háirithe ar na critéir seo a leanas:
 - (a) na bearta arna gcur chun feidhme agus atá beartaithe chun a áirithiú go ndéanfar dramhaíl a bhainistiú ar bhealach atá fóna ó thaobh an chomhshaoil de laistigh dá críoch, mar shampla scéim freagrachta leathnaithe táirgeora nó córas coibhéiseach a thabhairt isteach lena gcuirtear chun feidhme an prionsabal gurb é údar an truaillithe a íocfaidh as;
 - (b) na bearta arna gcur chun feidhme agus atá beartaithe chun sciar an phlaistigh iarthomhaltais arna athchúrsáil ó fheithiclí a mhéadú, agus na táscairí chun faireachán a dhéanamh ar na bearta sin;
 - (c) na bearta arna gcur chun feidhme agus atá beartaithe chun sciar an phlaistigh athchúrsáilte iarthomhaltais arna ionchorprú i bhfeithiclí a chuirtear ar an margadh náisiúnta a mhéadú, agus na táscairí chun faireachán a dhéanamh ar na bearta sin.

CUID B CRITÉAR CHUN A LÉIRIÚ GO nDEARNADH ÁBHAR ATHCHÚRSÁILTE ARNA THÁIRGEADH I gCOMHRÉIR LEIS NA CEANGLAS IN AIRTEAGAL 6(1), (2) AGUS (3)

Maidir leis an tsuiteáil atá lonnaithe i dtríú tír agus a bhfuil baint aici le táirgeadh ábhair athchúrsáilte, comhlíonfaidh sí na coinníollacha seo a leanas le linn a cuid oibríochtaí iarbhrí:

1. Beidh an tsuiteáil in ann fianaise a thabhairt go bhfuil ábhair arna n-athchúrsáil ó dhramhaíl iarthomhaltais á dtáirgeadh aici. Má tá ábhair á dtáirgeadh ag an tsuiteáil freisin a dhíorthaítear ó dhramhaíl réamhthomhaltais nó a dhíorthaítear ó amhábhair, beidh sí in ann a léiriú go ndéanann sí idirdhealú soiléir idir na cineálacha éagsúla ábhar. Áiritheoidh an tsuiteáil nach soláthróidh sí ach ábhair arna n-athchúrsáil ó dhramhaíl iarthomhaltais, mar choinníoll chun cuntas a thabhairt ar an ábhar sin mar chuid de na spriocanna a leagtar amach in Airteagal 6;
2. Maidir le suiteáil lena dtáirgtear ábhair athchúrsáilte as dramhaíl iarthomhaltais a fhaightear ó fheithiclí a bhfuil a ré caite nó ó fheithiclí arna ndeisiú, beidh sí in ann a léiriú go ndearnadh an dramhaíl sin a bhailiú go leithleach agus nach ndearnadh í a mheascadh le hábhair de thionscnamh eile ar dhóigh a chuirfeadh cosc ar inrianaitheacht na dramhaíola sin sula dtiocfaidh sí chuig an tsuiteáil agus feadh an phróisis athchúrsála go léir.

IARSCRÍBHINN XIV

CEANGLAIS MAIDIR LE HINIÚCHTAÍ, DEIMHNITHEOIRÍ AGUS INIÚCHÓIRÍ

CUID A CEANGLAIS MHIONSONRAITHE LE HAGHAIDH TRÍÚ PÁIRTITHE A DHÉANANN INIÚCHTAÍ

1. An tríú páirtí a dhéanann iniúchtaí ar an tsuiteáil atá lonnaithe i dtríú tír i gcomhréir le hAirteagal 6(5), beidh sé neamhspleách ar an soláthróir, ar an monaróir nó ar an duine a bhfuil baint aige le táirgeadh an ábhair athchúrsáilte, agus ar an tsuiteáil rialaithe. Chun na críche sin, beidh an tríú páirtí sin in ann an méid seo a leanas a dhoiciméadú:

- (a) nach cuid de na heintitis sin é ná nach bhfuil sé faoina smacht acu;
- (b) go bhfuil nósanna imeachta bunaithe agus á n-oibriú aige lena ráthaítear a neamhchlaontacht, lena n-áirítear:
 - (i) measúnú a dhéanamh ar na rioscaí a bhaineann lena neamhchlaontacht ar bhonn leanúnach;
 - (ii) rioscaí neamhchlaontachta a eascraíonn as brú airgeadais, brú tráchtála agus cineálacha eile brú a shainithint, a dhíothú agus a mhaolú;
 - (iii) measúnú a dhéanamh ar an riosca neamhchlaontachta a bhaineann leis mar thoradh ar chaidrimh a phearsanra;
- (c) go ndéantar é a struchtúrú agus a bhainistiú ar bhealach lena n-áirithítear a neamhspleáchas agus a neamhchlaontacht, lena n-áirítear:
 - (i) gur féidir é a shainithint go soiléir laistigh den eintiteas dlíthiúil, má dhéanann an t-eintiteas dlíthiúil gníomhaíochtaí nach mbaineann le hiniúchtaí freisin;
 - (ii) go bhfuil rialacha tuairiscithe aige maidir leis an ngníomhaíocht iniúcháireachta a dhéantar;
 - (iii) go bhfuil freagrachtaí atá inaitheanta go soiléir ar a phearsanra maidir le hiniúchtaí a dhéanamh.

2. Measfar go mbeidh na cáilíochtaí iomchuí i réimse na n-iniúchtaí agus na cóireála dramhaíola ag tríú páirtí a dhéanann iniúchtaí i gcomhréir le hAirteagal 6(5) má tá líon leordhóthanach pearsanra cáilithe aige, go díreach nó trí fhochonraitheoireacht, a gcuirtear oiliúint air go rialta agus má tá taithí ghairmiúil dhoiciméadaithe sna réimsí seo a leanas uile ag a phearsanra atá bainteach leis na hiniúchtaí sin a dhéanamh:

- (a) iniúchtaí a dhéanamh ar shaoráidí cóireála dramhaíola;
- (b) oibríochtaí cóireála dramhaíola;
- (c) córais bainistithe comhshaoil agus sláinte agus sábháilteachta ceirde;
- (d) táirgeadh ábhair athchúrsáilte.

3. D'fhonn comhlíonadh na gcritéar dá dtagraítear i bpointí 1 agus 2 den Chuid seo a léiriú, déanfaidh an tríú páirtí a dhéanann iniúchadh nó deimhniú tagairt dá dheimhniú de réir caighdeán de chuid an Aontais, nó de réir caighdeán choibhéiseacha arna n-aithint go hidirnáisiúnta, atá ábhartha maidir le hiniúchtaí a dhéanamh, amhail caighdeán idirnáisiúnta ISO 19011:2018 nó ISO/IEC 17020:2012.

CUID B ÁBHAR AN INIÚCHTA

1. Leis an iniúchadh dá dtagraítear in Airteagal 6(5), fíorófar go gcomhlíonann an tsuiteáil atá lonnaithe i dtríú tír agus a bhfuil baint aici le táirgeadh an ábhair athchúrsáilte na coinníollacha atá liostaithe in Iarscríbhinn XIII le linn a cuid oibríochtaí iarbhrí.
 2. Déanfar ainmneacha agus sonraí teagmhála na ndaoine a rinne na hiniúchtaí a shonrú go soiléir sna tuarascálacha iniúchta.
-

IARSCRÍBHINN XV

TÁBLAÍ COMHGHAOIL

1. Treoir 2000/53/CE

Treoir 2000/53/CE	An Rialachán seo
Airteagal 1	Airteagal 1
Airteagal 2, pointe (1)	Airteagal 3, pointe (1)
Airteagal 2, pointe (2)	Airteagal 3, pointe (2)
Airteagal 2, pointe (3)	Airteagal 3, pointe 23
Airteagal 2, pointe (4)	Airteagal 3, pointe (39)
Airteagal 2, pointe (5)	Airteagal 3, pointe (18)
Airteagal 2, pointe (6)	Airteagal 3, pointe (4)
Airteagal 2, pointe (7)	Airteagal 3, pointe (39)
Airteagal 2, pointe (8)	Airteagal 3, pointe (39)
Airteagal 2, pointe (9)	Airteagal 3, pointe (39)
Airteagal 2, pointe (10)	Airteagal 3, pointe (35)
Airteagal 2, pointe (11)	—
Airteagal 2, pointe (11) (a)	—
Airteagal 2, pointe (11) (b)	—
Airteagal 2, pointe (11) (c)	—
Airteagal 2, pointe (11) (d)	—
Airteagal 2, pointe (12)	—
Airteagal 2, pointe (13)	—

Treoir 2000/53/CE	An Rialachán seo
Airteagal 3(1)	Airteagal 2(1), pointe (a)
Airteagal 3(2)	—
Airteagal 3(3)	—
Airteagal 3(4)	—
Airteagal 3(5)	—
Airteagal 4(1), pointe (a)	Airteagal 5(1)
Airteagal 4(1), pointe (b)	Airteagal 7(1)
Airteagal 4(1), pointe (c)	Airteagal 6
Airteagal 4(2), pointe (a)	Airteagal 5(4) agus (5)
Airteagal 4(2), pointe (b)(i)	Airteagal 5(6), pointe (a)
Airteagal 4(2), pointe (b)(ii)	Airteagal 5(6), pointe (b)
Airteagal 4(2), pointe (b)(iii)	Airteagal 5(6), pointe (c)
Airteagal 4(2), pointe (b)(iv)	Airteagal 5(6), pointe (d)
Airteagal 4(2), pointe (c)	—
Airteagal 5(1), an chéad fhleasc	—
Airteagal 5(1), an dara fleasc	Airteagal 23(3), pointe (b)
Airteagal 5(2)	Airteagal 24(1)
Airteagal 5(3), an chéad fomhír	Airteagal 25(1)
Airteagal 5(3), an dara fomhír	Airteagal 25(1)
Airteagal 5(3), an tríú fomhír	—
Airteagal 5(4), an chéad fhomhír	Airteagal 24(2)
Airteagal 5(4), an dara fomhír	Airteagail 16 agus Airteagal 20(1), pointe (a)

Treoir 2000/53/CE	An Rialachán seo
Airteagal 5(4), an tríú fomhír	Airteagal 24(2)
Airteagal 5(4), an ceathrú fomhír	—
Airteagal 5(5), an chéad fhomhír	Airteagal 25(1) agus Iarscríbhinn X
Airteagal 5(5), an dara fomhír	—
Airteagal 6(1)	Airteagal 26(1) agus (2)
Airteagal 6(2), an chéad fhomhír	Airteagal 15(1)
Airteagal 6(2), an dara fomhír	—
Airteagal 6(3), an chéad fomhír	Airteagal 29(1) agus Iarscríbhinn VIII, Cuid C
Airteagal 6(3), an dara fomhír	Airteagal 28(1)
Airteagal 6(4)	Airteagal 15(2)
Airteagal 6(5)	Airteagal 26(4)
Airteagal 6(6)	Airteagal 26(3)
Airteagal 7(1)	Airteagal 30(1)
Airteagal 7(2), pointe (a)	—
Airteagal 7(2), pointe (b)	Airteagal 33(1), pointí (a) agus (b)
Airteagal 7(2), an dara fomhír	—
Airteagal 7(2), an tríú fomhír	—
Airteagal 7(3)	—
Airteagal 7(4)	—
Airteagal 7(5)	—
Airteagal 8(1)	Airteagal 12(1)

Treoir 2000/53/CE	An Rialachán seo
Airteagal 8(2)	Airteagal 12(2)
Airteagal 8(3)	Airteagal 11(1)
Airteagal 8(4)	Airteagal 11(1) agus (3)
Airteagal 9(1a), an chéad fhomhír	Airteagal 50(1), an chéad fhomhír
Airteagal 9(1a), an dara fhomhír	Airteagal 50(1) an dara fhomhír
Airteagal 9(1a), an tríú fhomhír	Airteagal 50(1), an tríú fhomhír
Airteagal 9(1b)	Airteagal 50(2)
Airteagal 9(1c)	Airteagal 50(3), an tríú fhomhír
Airteagal 9(1d)	Airteagal 50(5)
Airteagal 9(2)	Airteagal 9 agus Iarscríbhinn V, Cuid A
Airteagal 9a(1)	Airteagal 51(1)
Airteagal 9a(2)	Airteagal 51(2)
Airteagal 9a(3)	Airteagal 51(3)
Airteagal 9a(4)	Airteagal 51(4)
Airteagal 9a(5)	Airteagal 51(5)
Airteagal 9a(6)	Airteagal 51(6)
Airteagal 10(1)	—
Airteagal 10(2)	—
Airteagal 10(3)	—
Airteagal 10a	Airteagal 56
Airteagal 11(1)	Airteagal 52(1)

Treoir 2000/53/CE	An Rialachán seo
Airteagal 11(2)	Airteagal 52(2)
Airteagal 12(1)	Airteagal 59(1)
Airteagal 12(2)	Airteagal 59(2)
Airteagal 12(3)	—
Airteagal 13	—
Iarscríbhinn I	Iarscríbhinn VIII
Iarscríbhinn II	Iarscríbhinn IV

2. Treoir 2005/64/CE

Treoir 2005/64/CE	An Rialachán seo
Airteagal 1, an chéad fhomhír	Airteagal 1
Airteagal 1, an dara fhomhír	—
Airteagal 2	Airteagal 2(1), pointe (a)
Airteagal 3 pointe (a)	—
Airteagal 3, pointe (b)	—
Airteagal 3, pointe (c)	Airteagal 2(2), pointe (a)
Airteagal 4, pointe (1)	Airteagal 3, pointe (1)
Airteagal 4, pointe (2)	—
Airteagal 4, pointe (3)	Airteagal 3, pointe (3)
Airteagal 4, pointe (4)	Airteagal 3, pointe (2)
Airteagal 4, pointe (5)	Iarscríbhinn II
Airteagal 4, pointe (6)	—

Treoir 2005/64/CE	An Rialachán seo
Airteagal 4, pointe (7)	Airteagal 3, pointe (40)
Airteagal 4, pointe (8)	—
Airteagal 4, pointe (9)	Airteagal 3, pointe (4)
Airteagal 4, pointe (10)	Airteagal 3, pointe (39)
Airteagal 4, pointe (11)	—
Airteagal 4, pointe (12)	Airteagal 3, pointe (39)
Airteagal 4, pointe (13)	Airteagal 3, pointe (5)
Airteagal 4, pointe (14)	Airteagal 3, pointe (6)
Airteagal 4, pointe (15)	Airteagal 3, pointe (7)
Airteagal 4, pointe (16)	—
Airteagal 4, pointe (17)	—
Airteagal 4, pointe (18)	—
Airteagal 4, pointe (19)	—
Airteagal 4, pointe (20)	—
Airteagal 5(1)	—
Airteagal 5(2)	Airteagal 8(2)
Airteagal 5(3)	Airteagal 8(3)
Airteagal 5(4)	—
Airteagal 6(1)	—
Airteagal 6(2), an dara fomhír	Airteagal 5(4) agus (5)

Treoir 2005/64/CE	An Rialachán seo
Airteagal 6(3)	Airteagal 9
Airteagal 6(4)	—
Airteagal 6(5)	—
Airteagal 6(6)	—
Airteagal 6(7)	—
Airteagal 6(8)	—
Airteagal 7, pointe (a)	Iarscríbhinn VIII, Cuid E
Airteagal 7, pointe (b)	Iarscríbhinn VIII, Cuid E
Airteagal 8	—
Airteagal 9	—
Airteagal 10(1)	—
Airteagal 10(2)	—
Airteagal 10(3)	—
Airteagal 10(4)	—
Airteagal 11(1)	—
Airteagal 11(2)	—
Airteagal 12	—
Airteagal 13	—
Iarscríbhinn I	Airteagal 4(1)
Iarscríbhinn II	—

Treoir 2005/64/CE	An Rialachán seo
Iarscríbhinn III	—
Iarscríbhinn VII	—
Iarscríbhinn V	Iarscríbhinn VIII, Cuid E
Iarscríbhinn VI	—